

ELEMENTA  
METAPHYSICÆ

MATHEMATICUM IN MOREM  
ADORNATA

A B

ANTONIO GENUENSI

In Regia Neapolitana Academia  
Ethices Professore.

EDITIO NOVISSIMA

*Ad postremam Neapolitanam sedulo exacta,*

AUCTORIS emendationibus atque  
additamentis ornatior.

TOMUS SECUNDUS.



VENETIIS, MDCCLXII.  
APUD BARTHOLOMÆUM OCCHI.



*Superiorum Facultate, ac Privilegio.*



Am. Mus. Nat. Hist.

# ANTONIUS GENUENSIS

Philosopho suo

S: P.

**P**ROdit altera *Metaphysica pars* parentis sui titubanti animo, corde, & pectore, post varios hominum-que urbisque labores. Neque enim ignorans quæ Prior fata habuerit;

. . . . . *Quæ causa indigna serenos  
Fœdarit vultus, aut cur hæc vulnera cernas.*

Saltem ex Apologia, quam *Appendicem* perscribere, discere, in promptu est. Nam ubi ego (ita me Deus adjuvet) in id omnes intenderam nervos, ut nefarios homines ratione adversus religionem abutentes pro virili refellerem, non desuere qui aut arma impiis suppeditare, aut publicam causam prodere, nec clanculum, sed publice clamitarent. Non eo quidem eram ignarus, multos studiose mihi contradicturos, quod nullo modo vitare potui; nisi si nihil omnino scriberem, maxime cum sint, ut in Civili, ita in Literaria Republica; quidem *fruges consumere nati, capite censi*; qui quum nihil ipsi peperere unquam, aut parere possint, in alienis operibus proscindendis ineptissime sunt eloquentes: alii vero, qui quantum alii proficiunt, gloriæ suæ demtum arbitrantur. Quæ utroque jure potuissem contemnere, qui bonorum hominum, nec omnino stupidorum, judici revereri soleam. Sed in eo falsus sum animi, quod ubi humanitus errorum philo-

a \*

sophan-

sophandi reprehendi expectabam, quos ergo reprehenses optabam, quibusque magnas agerem gratias, majores haberem; ecce autem criminationes, ingestæque sine ulla non dicam christiana caritate, sed ne humanitate quidem calumniæ, quæ tanto fuere acerbiores, quanto in hominem paratum flammis devovere, si quid minus recte scripserit (quod ergo viro summo Josepho Spinelli Neapolitanæ hujus Ecclesiæ Archiepiscopo contestatus eram) petulantiores. Neque enim is ergo sum, qui plerique alii omnes, qui scriptionum mearum eo teneor amore, ut etiam contra jus & fas defendere auisim. Quum in publicum eas emisi, velut alienas spectro, paratus in me facere, quod crudeliores ipsi nominis mei inimici vix audeant, *ignoscere nempe aliis multa, mihi nihil*, tantum abest ut justas reprehensiones, & admonitiones adsperner. Nam etsi nemo sit, qui non intelligat, quanta sit humanæ mentis brevitās, quanta imbecillitas, quamque facile errare in plurimis; at confidenter dicam, paucos esse, qui sibi & sapientiæ suæ minus confidant, quique sapientum judicia magis reformident & venerentur, quam ego sim. Et his quidem ex animo ignovi & christianæ legis memor, & quod ita natura sim comparatus, ut nec graves iras sentire, nec diuturnas gerere valeam, nihilque magis homine indignum putem, quam illud, quod profanus homo non dubitavit diis tribuere, *manet alta mente repositum*. Quid est enim aliud *homo homini lupus*? Alia certe esse hominis debet vita: nam & qui fratres sunt ex eodem nati stipite, & qui socialem vitam sub eodem Imperatore Deo agunt, & qui eodem jure tenentur, quique se Dei & Christi imitatores profitentur, non diligere tantum sese mutuo, sed & amare oportet. Ecquid? non pudet nos barba tantum & pallio esse philosophos? Sed, utcumque hæc æstimata sint, ut nunc non in magno ponam discrimine; illud efficere non possum, quin valde commovear eorum pertinacia, qui quum alia, tum illud continentæ jactant, me, ratione & viâ, qua philosophor, scepticismum promovere, & quin, ut dixi, titubanti ani-

mo



mo & pectore hanc alteram Metaphysicæ partem emittam : Nam quamvis studuerim quidem accurate rationis humanæ dignitatem, sed intra suos cancellos, tueri, remotissimasque ipsas suspiciones, quod potui, effugere curaverim; acutiores tamen sunt multo, quam ut ego evadere possim, hujus ævi Aristarchi. Quamquam quis ferat accusari hominem septicismi, qui mathematicum in morem cogitationes suas disponet, & qui exactas etiam in abditibus rebus demonstrationes producere conetur? nisi forte qui nesciat, qui fuerunt unquam, aut hodie sint Sceptici. Quod non sint ratione & causa dico. Nam rogatus quidam eorum, qui nunquam suo judicio uti didicerunt, sed ex incertis vulgi polluti rumoribus præjudicant, ecquid præcipue in Metaphysica mea reprehenderet, Septicismum, inquit. Cur ita? nempe, inquit, quia parum a Jansenismo distat. Oh præclare!

*Speſtatum admiſſi riſum teneatis amici?*

Jam quis eum Pyrrhonismi insimulet, qui ingenue fateatur, se ea ignorare, quæ genus omne humanum ignorat? Nempe tum perpulchre cum hominibus agi arbitrantur, quum sciveris noveris, te scire fateris, nihil omnino reputantes, nihil esse tam temerarium, tamque indignum sapientis gravitate atque constantia, quam aut falsum sentire, aut quod non satis explorate perceptum sit & cognitum sine ulla dubitatione defendere. Quamquam id tantum abest, ut scepticismi vires dilatat, ut nihil potius sit, quod scepticismum funditus evertat, quam accurate distinguere inter ea quæ homines plane norunt, & ea quæ ignorant. Nam qui etiam ea, quæ ignorantur, deridiculis argumentis hominibus persuadere student, etiam ea, quæ sciuntur, in suspicionem adducunt hominum, qui nec trunci sunt, nec satis docti, quorum est magna Reip. literarum pars. Itaque ego ita sum animo constitutus, ut quæ certe scio, quæ ego esse arbitror omnia, quæ ad pietatem & vitam

vitam pertinent, nullo modo, nec voce, nec scriptione  
prodere valeam; quæ ignoro, nequeam non pro igno-  
tis profiteri, atque in iis sapientum hominum senten-  
tiam, & doctrinam expectare, paratus rationi, a qui-  
buscumque ea tandem proficiatur, parere, idque adeo  
læto animo, ut nihil mihi unquam præclarior esse du-  
xerim, quam ab erroribus (quos ego haud dubium erro-  
plurimos) & ignorantia mentem in sapientiam & liber-  
tatem vindicare. Non ego quæsi verim unquam quomo-  
do sint alii animo affecti: Ego certe sic institutus sum,  
ut nulla alia bona Mentis perfectioni, & tranquillitati  
nedum præposuerim, sed ne contulerim quidem. Quo-  
circa quamquam certum mihi est, me undique inclemen-  
ter impeti; prædixisse tamen mihi erit satis. Emergent  
proculdubio qui crimini vertant, protulisse me argumen-  
ta Epicureorum & Socinianorum adversus animi natu-  
ram: Spinozæ & Collini adversus libertatem. Quibus  
si reponam, me communem sanctissimorum quoque Pa-  
trum scribendi rationem sectatum: argumenta quidem  
produxisse Impiorum hominum, sed confutasse; ii sta-  
tim regerunt, nec veteres Ecclesiæ Doctores Spinozam  
& Collinum aggressuros fuisse, quippe quos vel nomina-  
re nefas: & fortasse me non idem animo sentire, quod  
scribo. Egregie prorsus! Quasi Spinozæ & Collini non  
quovis seculo extiterint, postquam scimus extitisse &  
Aristotelem, & Zenonem, & Epicurum, & Diagoram,  
& horum sectarios, atque admiratores! nam certe quos  
B. Thomas in opere adversus Gentiles confutandos ag-  
greditur, quorumque ad vivum refecat objectiones, plu-  
ra quoque & majora commenti sunt adversus Religio-  
nem. Conflatarunt cum veteribus illi, consiliandum  
nobis est cum recentibus Religionis hostibus, non aut  
umbras impetere; aut in otio, dum illi clamant, tabe-  
scere. Quod vero suspicantur, id licet non sit in lite-  
raria Republica novum, atrocius tamen est, quam ut  
verbis curari possit. Unum addo, præripere eos, quod  
Dei proprium est, in hominum corda iudicium. Memi-  
nisse possunt Apostolici verbi, *nolite iudicare ante tempus*.

Nam

Nam ad me quod attinet, sic animum jamdudum formavi, ut potestatibus, quandoquidem eorum jus mihi ratio est, sine ulla ratione paream? Philosophis vero quantum eorum meruerint rationes. Quod si etiam sine ulla ratione me dimovere ab iis, quæ veriora puto, gestiunt, eos si contemnam, nemo sapiens erit, qui me jure meo non uti dicere possit. Sed ea satis; nam copiosius prosequi animi videri potest minus, quam ego sim, pacati.

Sunt quædam, quorum tibi, philosophe, & humanissime Lector, rationem reddere debeam, quod subaudiverim te mussitantem. Primum, *quæ tantæ tenuere moræ?* Rogas? Destinaveram nihil amplius, si per amicos licuisset, edere: nam quantumvis nihil mihi conscius essem, cur in publicum prodire non possem, at hærebat animo grave illud Apostoli verbum, *non comedam carnes in æternum, si frater meus offendantur*. Sed propositum pervicere amici. Nam & Venetiis, & Roma viri quidam docti juxta & humanissimi ita impulerunt, ut mihi persuaderem non esse admodum paucorum judicia extimescenda, eorum maxime, qui assuetudine maledicendi intestabiles evaserint; & scrupulos omnes heic viri ex omni ordine literatissimi exemerunt. Ita ruptæ moræ. Deinde gravissimo per hos annos pectoris morbo laboravi, ut vix necessariis curis intendere possem animum. Nam ego non ita philosophiam colendam esse censeo, ut etiam vita periclitetur: ne si vellem quidem id juris in me habeo: *vetat summus ille imperator Deus, se invito e statione discedere*. Tum quamquam super his rebus scripseram plurima, at indigesta ea erat moles, ut mihi fuerit necesse ex integro rem omnem repetere: in quam rem quum non quantum voluerim, sed quantum potuerim incumberem, effluxit tempus. Nec tamen his causis quidquam judicio tuo prævertere velim: tu si inertię tribuere ames, non repugnabo.

Jam rogas, quum duas tantum Metaphysicas partes promiserim, cur tertiam nunc adjiciam? Nempe,

quum secundam hanc perlegeris, tute ipse intelliges, non potuisse me uno volumine in octavo, ut vocant, tantam rerum molem complecti, nisi omnia corrumpere, aut Herculis cothurnum infanti vellem adaptare. Quæ super natura Dei & Religionis commentatus sum, aut ex veterum recentiorumque philosophorum lectione suppetunt, ea, nisi hallucinor, præstantiora sunt, quam quæ hucusque sunt pertractata. Malui ergo promissis, quam quidquam ei rei detrachere, quod

*Æque pauperibus prodest, locupletibus æque,  
Æque neglectum pueris, senibusque nocebit.*

Prius tibi promiseram: posterius conscientiæ debeo & Deo. Te autem faciliorem habeo & humaniorem iudicem in priori illa causa, quam aut memetipsum, aut vindicem Dei oculum in altera. Quod tu facies profecto, nisi fastidiosus & delicatus velis haberi philosophus, aut inter Ephemeridum (quod nunc hominum genus copiosius est) literatos censeris.

Sed utcumque in eo te accipiam, inquis, at id non fero, quod nimis oles in *hac parte* e schola: Arabes conradis: lutulentos nescio quos consecraris, rivulos. Saltem dum fuerit tibi id laboris non parvi.

*Responsura tuo nunquam est fama labori,*

talis nempe nunc est conditio philosophandi. Næ tu declamator egregius? Maeste. Ausculta interea, & tene. Mentium humanarum ab Adamo vigor seculis omnibus idem fuit: curarum objecta non eadem. Fuisse qui quondam totum eum vigorem individuum Poësi, aut Oratoriæ applicuerunt, in eoque quum essent unice intenti, fuere præcellentes. Alii Mathematicis, cæterosque post se reliquerunt. In iis sæculis, qui barbarici nomine appellantur, cura unica fuere res Metaphysicæ. Concedam ego aliis literarum nitorem & cultum: sed philosophorum, quos barbaros

vo-

vocamus, propria est Metaphysica. Terret, fateor, incomtus vultus & hispidus: neque idcirco te monuerim, ut accedas: sed si qui sunt, qui tibi eosexantlare labores non sunt gravati, qui & ejus ævi philosophiam tibi paucis eleganterque exhibeant, & ex stercore, ut inquis, aurum colligant, tu ne etiam graveris accipere, nec potius grati animi testimonium præbeas? Optandum esset potius, ut viri in utraque literatura versatissimi, in hoc Dictionariorum seculo, Dictionarium nobis darent eorum omnium, quæ in Scholasticorum libris jacent nunc contempta: nam & sunt in iis egregia plurima, &, si non semper docent Scholastici, at acuunt; & historica omnium ætatum philosophia magna est vel cultissimæ eruditionis pars, nisi si velimus adeo esse inepti; ut nostra interesse arbitremur, quæ vetusti Scythæ, Ægyptii, Persæ, Græci cogitaverint, maximo animi capitisque labore exquirere, habereque innumerato; partem vero hanc maximam, & cum rebus nostris plurimis artissime connexam, negligere. Quod opus, nisi præsentis docti aggrediantur, apud posteros magis quoque rerum illarum incuriosos, utpote in tanto bonarum literarum apparatu natos, tam tenuis earum rerum notitia est perventura, ut omnis funditus ea philosophicæ historię pars intercidat: Nam quæ sint ab Historicis Philosophiæ collecta, nimis sunt illa jejuna, & pauca Utinam Bernardus Lamy, quam susceperat ad umbilicum duxisset Scholasticæ Theologiæ historiam! Fortassis plurimorum votis fecisset satis. Quid, quod ego robore, & sublimitate cogitandi primipilis illis scholæ philosophis recentiorum pene neminem anteposuerim? Sic enim habe, mihi videre illos viros, horum magnam partem feminas. Scilicet quemadmodum veteres homines quanto moribus & vestibus impoliti atque hispidi, tanto magis animi corporisque robore præcinædis istis Penelopes sponsis valebant; ita veteres illi philosophi quanto incultiores, & rudiores aspectu, tanto fuere meditatione, & cura profundiores.

Uno

Uno verbo: quo sine manu, & sine libris iri a mente humana potest, ivere profecto veteres illi Metaphysici.

Numquid aliud? Indicem, inquis, rerum postulo Scio. Caput atque propositionum indicem tu igitur in versa pagina quære: copiosorem expecta. Bono sis animo. Interea lege, libereque, sed amice judica, ut soles: nam

*Nunc ego te experiar quid ames, quid simules. Vale.*



# I N D E X

## RERUM PRÆCIPUARUM.



### Definitiones XVIII.

I.	<b>M</b> <sup>Entis.</sup>	pag. <b>4</b>
II.	<i>Intellectus &amp; rationis.</i>	5
III.	<i>Perceptionis.</i>	<b>9</b>
IV.	<i>Judicii.</i>	10
V.	<i>Ratiocinii.</i>	11
VI.	<i>Ideæ.</i>	ibid.
VII.	<i>Memoriæ.</i>	13
VIII.	<i>Reminiscentiæ.</i>	ibid.
IX.	<i>Sensationis.</i>	14
X.	<i>Imaginationis.</i>	ibid.
XI.	<i>Vitæ.</i>	<b>16</b>
XII.	<i>Appetitus, &amp; aversationis.</i>	ibid.
XIII.	<i>Libertatis.</i>	21
XIV.	<i>Voluntatis.</i>	<b>23</b>
XV.	<i>Habitus.</i>	ibid.
XVI.	<i>Affectuum.</i>	25
XVII.	<i>Beatitudinis.</i>	28
XVIII.	<i>Virtutis.</i>	<b>30</b>

### Sequuntur postulata tria.

I.	Philosophandum ex iis ideis, quas habemus, nec in scirpo nodum quærendum.	<b>35</b>
II.	Claritatem & evidentiam characterem esse veri apud homines.	<b>39</b>
	<i>Variæ super ea re observationes seqq.</i>	
III.	Non esse a statis demonstrationibus abscedendum, quod quibusdam objectionibus respondere nequeamus.	42

Ac-

Accedunt LXXXIII. Propositiones, quæ in  
VII. Capitibus digestæ sunt.

- CAP. I. De Natura Mentis humanæ. 43
- Prop. I. Si mens sit qualitas corporea, cogitationes esse debent motiones. ibid.
- Hobbesii & Lochii sententiæ perpenduntur. 44
- Prop. II. Nec iudicium esse ullum in nobis potest, nec ratiocinium, nisi plures eodem tempore Menti ideæ obversentur. 49
- Prop. III. Si perceptiones sunt motiones cerebri, oportet ut tot sint in cerebro distinctæ motiones, quot diversæ & distinctæ ideæ nobis observantur. 50
- Prop. IV. Motiones corporeæ esse nequeunt in indivisibili materiæ parte, neque idcirco in ejusmodi parte gigni ideæ Hobbesianæ. 51
- Confutatio rationum Thomæ Hobbesii. ibid.
- Prop. V. Conscientia perceptionis, iudicii, ratiocinii, est perceptio perceptionis &c. 52
- Prop. VI. Collatio idearum res est ab ideis, quæ conferuntur, diversa. ibid.
- Prop. VII. Conscientia nequit esse motus corporeus. 53
- Prop. VIII. Iudicium nequit esse motus corporeus. ibid.
- Veterum in eandem rem argumenta præcipuæ B. Augustini. 55
- Prop. IX. Mens humana nequit esse temperatio nature corporeæ, qua vigeamus & sentiamus, quæ fuit Dicearchi opinio. 58
- Lucretii eandem in rem argumenta. 59
- Bælii in Dicearchum argumenta. ibid.
- Prop. X. Mobilitas, soliditas, divisibilitas, inertia sunt corporum omnium proprietates essentielles. 61
- Spinozæ doctrina de materiæ indivisibilitate. 62
- Prop. XI. Cogitatio & ratiocinatio pugnat cum divisibilitate, soliditate, & inertia materiæ. 64
- Prop. XII. Mens humana est substantia incorporea. 66
- Prop. XIII. Mens humana quoad vivit perenni perceptione prædita est. 67

Ar-



# I N D E X.

<i>Argumenta Lokii adversus superiorem propositionem refellitur.</i>	68
Prop. XIV. <i>Mens humana est immortalis.</i>	12
<i>Superiorum propositionum historia.</i>	13
<i>Argumentum traditionis expenditur.</i>	75
Celebriorum philosophorum argumenta in eandem rem.	
<i>Platonis.</i>	78
<i>B. Thomæ.</i>	81
<i>Cartesii.</i>	83
Prop. XV. <i>Dogmata incorporalitatis &amp; immortalitatis animorum sunt Christianæ Religionis dogmata.</i>	86
<i>Argumenta Epicureorum adversus duo illa dogmata.</i>	88
<i>Socinianorum argumenta.</i>	89
<i>Responsiones ad superiora argumenta.</i>	91
Prop. XVII. <i>Mens humana non est una eademque in omnibus hominibus.</i>	96
<i>Oppositæ doctrinæ historia.</i>	97
Prop. XVIII. <i>Mens humana sempiterna non est.</i>	98
<i>Historia originis animarum.</i>	99
<i>Platonice opinio ex Arnobio confutata.</i>	100
Prop. XIX. <i>Mens humana neque Deus est, neque Dei pars, aut idea.</i>	106
<i>Oppositæ opinionis historia.</i>	ibid.
<i>Confutatus super ea re Spinoza.</i>	108
<i>Et Poiretus.</i>	109
CAP. II. <i>De unione mentis &amp; corporis.</i>	111
Prop. XX. <i>Mens unitur corpori humano quoad vivimus.</i>	ibi.
Prop. XXI. <i>Perpenditur Scholasticorum opinio super unione mentis &amp; corporis.</i>	113
<i>Præcipue quod Mens sit forma substantialis; quo modo a veteribus acceptum.</i>	117
Prop. XXII. <i>Motiones vitæ vegetativæ &amp; sensitivæ necessariæ sunt, non liberæ.</i>	119
Prop. XXIII. <i>Quid inde sequatur, si earum actionum Mens sit principium activum.</i>	120
Prop. XXIV. <i>Si Mens est immediatum Principium energię corporis est forma corporis substantialis.</i>	121
Prop.	

# I N D E X.

Prop. XXV. Si Mens ita præsidet in cerebro, ut non sit etiam forma substantialis, ponenda est media quædam substantia, quæ sit anima hominis vegetativa & sensitiva.	123
Historia doctrinæ animæ mediæ.	ibid.
Argumenta Henrici. Mori:	ibid.
Systema causarum occasionalium super unione mentis & corporis.	127
Prop. XXVI. Confutatur.	ibid.
Enarratur systema Leibnitianum harmoniæ præstabilitæ.	131
Prop. XXVIII. Ejus systematis defectus.	134
CAP. III. De idearum natura & origine.	141
Prop. XXVIII. Mens nequit ipsa sibi esse causa creatrix simplicium idearum.	142
Prop. XXX. Ideæ & perceptiones non videntur esse posse una eademque res.	143
Argumenta Arnaldi refelluntur.	ibid.
Prop. XXXI. Nihil potest mens intelligere nisi in seipsa.	145
Prop. XXXII. Peripateticorum opinio super origine idearum, & de intellectu agente.	146
Democriticorum super eadem re systema.	150
Prop. XXXIII. Confutatur.	151
Systema in eandem rem Lockianum.	153
Prop. XXXIV. Expenditur.	154
Systema Malebranchianum, quod omnia in Deo videamus.	157
Qui apud veteres ejusdem Patroni.	158
Prop. XXXV. Confutatur.	160
Systema idearum innatarum.	165
Confutatur Prop. xxxvi. xxxvii. xxxviii. xxxix.	
CAP. IV. De humana libertate.	169
Prop. XL. Mens est libera.	ibid.
Prop. XLI. Homines præditi sunt libertate a coactione.	170
Prop. XLIII. Et libertate a necessitate.	ibid.
Et libertate indifferentiæ.	171

Cür

# I N D E X.

<i>Cur oppositiones omnes adversus humanam libertatem sint mera sophismata.</i>	ibid.
Appendix ad superius Caput, in qua de libertatis natu- ra & proprietatibus differitur accuratius & Collini argutationes enervantur.	172
<i>Refelluntur argumenta adversus libertatem humanam.</i>	
<i>Primum argumentum.</i>	185
<i>Secundum argumentum.</i>	186
<i>Tertium argumentum.</i>	187
CAP. V. De propensionibus, & habitibus, tum de me- moria.	190
Prop. XLIV. Propensio ad bonum & verum sunt leges naturæ humanæ mechanicæ.	ibid.
Prop. XLV. Duæ aliæ naturæ humanæ leges mecha- nicæ.	192
Prop. XLVII. Habitum nullus est innatus.	194
Prop. XLVIII. Omnes habitus sunt animi simul & cor- poris.	ibid.
Prop. XLIX. Causæ habituum physicæ.	196
Prop. L. Causæ, quibus enervantur, aut delentur.	ibid.
Prop. LI. Memoria est habitus.	ibid.
Prop. LII. Omnis habitus constat memoria & reminiscen- tia.	198
Prop. LIV. Tota humana eruditio continetur duobus ha- bitibus generalibus.	ibid.
CAP. VI. De causis physicis voluptatis & doloris, ubi de affectibus generatim.	199
Prop. LV. Demonstrantur causæ physicæ voluptatis & do- loris.	200
Prop. LIX. Affectus proprietates naturales naturæ huma- næ.	205
Prop. LX. Affectus homini necessarii.	207
<i>Præcipuorum affectuum natura &amp; utilitas, quæ intra modum suum continentur.</i>	ibid.
Prop. LXII. Omnes affectus sunt modificationes & rea- ctiones amoris.	218
Prop. LXIII. Affectus aucta atque emendata ratione in- tra terminos suos continentur.	219
Prop.	

# INDEX.

Prop. LXIV., & LXV. <i>De natura boni &amp; mali ex relatione ad naturam nostram.</i>	ibid.
Prop. LXVIII. <i>De causis miseriae, quibus in hac vita agitamur.</i>	221
CAP. VII. <i>De hominis beatitudine, ubi de virtute.</i>	128

## Continet Propositiones XV.

Appendix <i>de virtute.</i>	241
Dissertatio <i>de anima brutorum.</i>	257

# ELEMENTORUM METAPHYSICÆ

MATHEMATICUM IN MOREM  
ADORNATORUM.

PARS ALTERA.

*Qua continentur principia Psychosophiæ.*

P R Æ F A T I O.



Ostquam de generalibus Ontosophiæ, & Cosmosophiæ principiis in priori Metaphysicæ parte differuimus, superest, ad integra nobilissimæ hujus scientiæ danda Elementa, ut de Spiritibus pertractemus, quæ per actatio *Pneumatologia* Philosophis appellatur. Sunt autem *Spiritus*, *Animæ humane*, *Angeli*, *Deus*, quod sciamus: nam de Brutorum Animabus anceps disceptatio est. *Spiritus* nomine appellantur, non tam quia sunt substantiæ incorporeæ, quam quia activæ: quidquid enim activum est *ruah* Hebræis, *πνεῦμα* Græcis, *Spiritus* Latinis dicitur. Hinc subtilissima etiam corpora *Spiritus* vocati a Physicis, & Chemicis. In duas partes tractationem hanc distribuimus. Ac in prima quidem de *Mente humana*, in altera vero de *Deo* dicemus. Et priori breviusculam Appendicem de *Animabus Brutorum*, posteriori alteram de *Demonibus* addemus.

Initium autem faciemus ab Animabus humanis. Tractatio de Animabus humanis appellari solet græco vocabulo *Psychologia*, quasi *λόγος περὶ τῆς ψυχῆς*; *dissertatio de Anima*, quod græcum vocabulum pro respiratione veteres quidem Græci accipiebant; Aristoteles vero, aliique Metaphysici pro ipsa Animi substantia. Est autem hæc Philosophiæ pars omnium maxime necessaria.

Tom. II.

A

cessa-

cellaria, utilis, & jucunda: quandoquidem nihil mortalibus esse potest, aut magis necessarium, aut magis utile, ut vivant beati, quam illud, quod Deo veteres tribuerunt, *nosce te ipsum*: & rerum Animi agnitio omnium pulcherrima Philosophis semper visa est, omniumque ferme hominum vehementem curiositatem semper ea excitavit perquisitio. Sane qui perspectam habet animi sui naturam divinam, & immortalem, non potest non præsentia, & circumjacentia bona contemplare velut Infantium crepundia vana, & fugacia; spectare vero sempiterna, & secundum eam vitam longe nobilissimam instituere. Quanti illud est Africani (a)! *sic habeto, non esse te mortalem, sed corpus hoc: nec enim tu is es, quem forma ista declarat, sed mens cujusque, is est quisque, non ea figura, quæ digito demonstrari potest. Deum igitur scito esse: siquidem Deus est, qui videt, qui sentit, meminit, qui providet, qui tam regit, & moderatur, & movet id Corpus, cui præpositus est, quam hunc Mundum ille Princeps Deus. Nempe duo maxime sunt, quæ perpetuo homines misere miseros habent, metus Mortis, & circumpositorum bonorum nimia admiratio. At utrumque, si non omnino demit, maxima saltem ex parte extenuat animi nostri intima contemplatio, efficitque nos non modo in mortis prospectu alacriores, verum etiam in adversa fortuna tranquillos, atque idcirco minus ad magna gerenda impeditos.*

Jam ad hanc scientiam comparandam non tam librorum copia adbibenda est, quam penitissima naturæ nostræ meditatio: ex hac enim meditatione facilius, uberiusque, quam ex ulla librorum lectione natura nostra patescit. Quinimo si ulla hujus præclarissimæ scientiæ amatori lectio præcipienda est, ea Historicorum potius est, quam Metaphysicorum: isti enim ut plurimum non eum, qui in Adæ fœce versetur, sed in Platonis Republica, hominem exhibent, atque describunt: illi totam, quanta quantam est, naturam humanam, collatis moribus, offerunt. Egregie Diodorus

Sicu-

(a) *Apud Cic. in somn. Scip.*

Siculus in Proemio ad Bibliothecam: *Nam qui multâ experientia rerum variis cùm laboribus periculisque, ipsi procul ab omni discrimine positi gesta legimus, nos admonent maxime quid conferat ad degendam vitam. Cognitio igitur ex aliorum tum secundis, tum adversis rebus perceptâ, doctrinam habet ad omnia valde necessariam. Pulchrum est enim ex aliorum erratis in melius instituire vitam nostram, & non tam quid alii egerint querere, quàm quid optime ab iis actum sit, nobis proponere ad imitandum. Seniorum consilia, quos ætas prudentiores effecit, laudantur. At hos tanto antecellit historia, quanto plura rerum exempla complectitur diuturnitas temporis, quàm hominis ætas. Scilicet, quod Soloni ab Ægyptiis dictum repetit Cicero, nihil earum rerum scire, quæ antequàm nasceris factæ sunt, hoc est, semper esse puerum, verissimum est.*

Quoniam autem, quæ de quacumque re instituitur tractatio, ex methodi Analyticæ legibus, a definitionibus vocabulorum paullo obscuriorum; quæ in ea re explicanda usu venire solent, suscipienda est; omnium primum vocabula, quæ passim in hac materia usurpantur, definiemus. Non autem ita ut Geomêtræ nudas; & exsiccas definitiones ponemus, sed ita ut velut primam, & simplicem epigraphen naturæ humanæ exhibeamus, quam mox adjectis paucissimis axiomatis; nec multo pluribus theorematibus, paullo latius diducturi sumus. Præterea longe alia est ratio definitionum Geomêtrarum, & cæterorum Philosophorum: illæ notiorum sunt *arbitrariarum*, istæ *proprietas realium*, ut idcirco quum postremæ non longe ab *axiomatum*, & *theorematum* natura distent, non esse ullo modo *arbitrariæ* possunt; sed *reales*:

## D E F I N I T I O I.

*Mentem voco rem intelligentem, principium cogitationum activum, vel, si quis mavelit, substantiam intelligentem.*

Schol. **N**on heic mentem appello vim tantum intelligendi, vel cogitandi, quæ Latinis proprie mens dicitur, sed ipsam rem; quæ intelligit, ipsum principium activum intelligendi, quo modo Tacitus lib. 1. Annalium loquutus est; *tua*, inquit, *Dive Auguste Cælo recepta mens*. Nec est cur me reprehendant Philolophi, qui id definitione complectar, quod non dum perspicuum fecerim, sit ne mens humana substantia, necne. Enim vero cum negari non possit, nos cogitare, velle, eligere, & hæ sint qualescumque actiones; datis vero actionibus existere debeat, & earum principium aliquod activum; & ejus principii subiectum aliquod, seu substantia (ex prop. 65. pr. par.); inter comperta statui debet, existere substantiam aliquam cogitantem, nec perquiri, nisi quæ sit ejus substantiæ natura:

Cartesius, Sylvanus Regis, & plerique alii hoc statuunt discrimen inter notiones vocabulorum *Mentis*, & *Animæ*, ut eadem substantia cogitans siquidem in se ipsa spectetur, *Mens dicatur*; si prout corpus animat, *Anima*. Quam ego doctrinam in his Philosophis, qui nullum reale commercium inter mentem, & corpus esse opinantur, non possum non videre. Sed & quidam veteres Mentem ab Anima realiter distinxisse videntur, ut non pauci e recentibus Philosophis. Anima docto Varroni definita est, *Aer conceptus in ore, deservefactus in pulmone, servefactus in corde, diffusus in corpus* (a). Neque vero parva est in naturali Philosophia ea quæstio, vita ne corporis a substantia Mentis pendeat, an aliunde: quippe gravissimi Philosophi Gassendus, Cudworthus, alique a substantia media repetunt; Cartesia-

ni

(a) Apud Laëtant, de Opif. cap. 27.



nī a spiritibus animalibus; Leibnitiū, & Wolfius a vī corpore īfīta: Veteres a parte animi ſenſitiva per totum corpus diſfuſa. Profecto eā actiones, actionumque vires, quibus corporis vita continetur, & conſervatur, imperio Mentis non ſubſunt, velut motus cordis, pulmonum, arteriarum, calor vitalis: præterea ſenſus ipſe videtur quodammodo prævertere omnem mentis cogitationem; & voluntatem; atque ab eo potius cogitatio omnis ortum ducere. Quæ efficiunt ut Philoſophus ſuſpicaretur, aut mediam quamdam in homine eſſe ſubſtantiam vitalem, aut fluidam quamdam ſubſtantiam, quæ ſit Mentis vehiculum, ut appellat B. Auguſtinus, totum corpus permeare, & Mechanicis corporis legibus eſſe obnoxiam.

II. Intellectus eſt ea mentis facultas, aut vis (A) qua percipit, cogitat, ratiocinatur &c. Intellectus vocari quandoque ſolet ratio (B).

Sch. (A) Intellectum definivi vim Mentis, non ipſam Mentem, idcirco quod ita ſumus vulgo aſſuefacti, ut actiones quaſcumque ex viribus manare iudicemus, vires vero ſubjectorum quorumcumque eſſe. Cum autem functiones, quas intellectui tribuimus, nobis videantur eſſe actiones quaſcumque, ſit ut intellectum vim appellemus: & quum exiſtat ſubſtantia quædam cogitans, quæcumque ea ſit, ejus ſubſtantix vim intellectum dicimus. Non ſum ignarus refragari nobis viros doctiſſimos, non e veteribus modo Scholaſticis, ſed e novellis quoque Philoſophis, qui intellectum paſſivam faciunt potentiam, cui notioni explicandæ minus eſt vocabulum vis accommodatum. Sed nā iſti egregie deſipiunt. Nam ſiquidem percipere ideas, verſare eas ex omnibus aſpectibus, conferre, quid antecedit, aut ſequatur perſpicere, reminiſci, conjicere, intellectus ſunt, proſecto eā quum ſint actiones, intellectus activa potentia eſt: ſi vero Mentis id eſſe negant, nulliusne ſubjecti erunt, an alicujus? Nullius dicere, eſt aliorum patientia abuti. Si alicujus, id mens eſt. Quæ quum ſint perſpicua, otioſum cenſeo; pluribus eam quæſtionem perſequi. At enim, ideas excipit intellectus, non creat. Eſto.

At tum non ideæ intellectus erunt actiones, sed aliæ quas circa ideas exserit. Quod si qui est, qui tribuat quidem homini mentem, sed neget activam, is pugnantia pronunciat. Non ego igitur probō Renatum Cartesium, qui cum alibi, tum epistola 8. primæ partis, quæ est ad Elisabetham eruditam illam Principem Palatinam, scribit, *rationes, quæ Dei existentiam probant, illumque primam esse, & immutabilem causam omnium effectuum, qui a libero hominum arbitrio non pendent, mihi videri probare, illum etiam esse causam actionum omnium, quæ a libero arbitrio pendent, idest a Mente cum ratione, nec invita, agente, quum nihil sit aliud arbitrii libertas; & quidem causam non tantum primam, & conservatricem creaturarum virium, earumque directricem, sed totalem: nam paucis interjectis addit, verum Deus ita est rerum causa, ut sit etiam TOTALIS*. Id enim præter quamquod evidentissimis rationibus repugnat, quæ demonstrant inesse in rebus mundanis vires suas, singulis peculiares, quemadmodum ex prima parte patet; grandem quoque viam pandit Spinozismo, quod quum ex iis, quæ in superiori parte dicta sunt, tum etiam ex iis, quæ inferius sumus dicturi, est evidens.

(B) Philosophi nempe non aliud videntur *rationis* vocabulo intelligere. Sed aut fallor, aut viri ipsi docti, dum velut ex tripode definiunt, hæc rectæ rationi esse consentanea, illa adversa, nihil minus intelligunt, quam quod *rationem* esse posuere. Ut ergo enucleatior *rationis* sit Philosophis nostris notio, paulo altius repetam.

1. Est in hominibus determinatus quidam idearum numerus, quibus res externas sibi repræsentant.

2. Huiusmodi ideæ (1) nec immutabiles omnes sunt, nec semper eodem numero continentur: nam præterquam quod in singulis hominibus pleræque variant numero, & qualitatibus, pro ætate, conversatione, moribus, studiis, affectibus &c.; in tota quoque quadam humani generis parte veluti in Græcia, Italia, Perside &c. numero, & qualitatibus variant pro variis temporibus, publicarum rerum fortuna, sæcis Philosopho-

rum,

rum, aliisque causis. Itaque non eodem modo cogitabant Græci Codri tempore, atque temporibus Xerxis, aut aliis: non eodem modo Romani tempore Numæ; ac temporibus Decemvirorum, aut Augusti: non eodem modo tota Europa Christiana tempore Caroli Magni, ac tempore Caroli V.

3. Quod dico de Rep. Civili, id magis etiam de Literaria dictum volo. Habent enim sua fata & literarum Disciplinarum, atque Artium quædam hoc sæculo, quædam alio magis florēt: Hæ in Gallia magis; aliæ in Anglia. Maxime cum disciplinarum quarundam fortuna pendeat aut e publica æstimatione; aut utilitate: *Honos alit Artes, omnesque incenduntur ad studia gloria, jacentque ea semper, quæ apud quosque improbantur* (a). Hinc vero fit ut non eodem modo semper in Rep. literaria cogitetur,

4. Quum ergo vulgo loquimur, ea plerumque judicia dicimus rectæ rationi conformia, quæ præsentī numero, & qualitatibus idearum tum nostri, tum eorum, inter quos versamur, consentanea judicamus; ea vero adversa rectæ rationi, quæ ab his ideis abhorrent, quæ etiam absurda, & significantius græce *ἄτοπα*, quasi non sit eo tempore iis locus, dicimus.

5. Sed hæc judicia (4) alio tempore, aut apud alios, ob varietatem idearum (2. 3.), conversâ natura, non eadem censentur. Inde fit, ut vix reperiās idem iudicium probatum omnibus, & omni tempore, fallunturque qui levi quadam similitudine de veteribus, aut extraneis judicant, consentire eos nobis.

*Schol.* Instar omnium sit unum e Rep. Literaria depromptum exemplum. Henricus Morus egregius fuit Philosophus, & penetratione mentis, atque usu rationis insignis. Is sua consultâ ratione ad Cartesium scribit: *tandem enim clare mihi affulsit Cartesiana lux, id est libera, distincta, sibi que constans RATIO; quæ naturam pariter, ac paginas tuas mirifice collustravit: ita ut aut nullæ, aut paucissimæ supersint latebræ,* &

loci, quas non patefacit nobilis illa Fax .... omnia profecto tam concinna in tuis Philosophiæ Principiis Dioptrici, & Meteoris, tamque pulchra sibi ipsis, NATURÆQUE consona sunt, ut mens, RATIOQUE humana jucundius vix optaret, lætiusque spectaculum. Merfennus in epistola ad Gisbertum Voetium ..... credidi, inquit, lucem aliquam eximiam huic viro (Cartesio) Deum infudisse .... vix ut credam ulli mortalium majorem rerum naturalium cognitionem a Deo tributam. Rectæ ergo rationi Cartesiana Philosophia consentanea tum videbatur. Nunc contraria omnia. Quæ ergo est recta isthæc ratio? nec in Philosophia tantum naturali obtinet, sed in morali maxime, in qua idcirco de virtute, & vicio, de bono & malo, de justitia, & injustitia tot sententiæ, quot capita.

6. Philosophus noster duo distinguat in *recta ratione*, ideas, & *ratiocinium*, seu *materiem*, & *artem*. Tum vero dicito quidpiam esse rectæ rationi conforme, quum & ideæ rerum naturæ sunt conformes adamussim, adeoque immutabiles & inde ducta ratiocinatio est necessaria. Quod si quando indicat quæstio de *recta* generis humani *ratione*, vim ratiocinandi, non æqualem licet, omnibus esse communem pronunciet, principiorum vero ratiocinandi pauca tantum. Ex quo intelliget & esse rectam quamdam rationem toti generi humano communem, & plures alias, & quæ itidem dicantur rectæ, temporum, nationumque propriæ, sed quæ revera tales non sunt (a).

## III.

(a) 1. Sed quæret, hoc in loco quispiam, sint, nec ne, ideæ ullæ toti hominum generi communes, eæque immutabiles? Neque enim. si nullæ sint hujusmodi ideæ, esse ulla potest toti hominum generi communis ratio, sed inter eos tantum erit aliqua, quorum communes quædam sunt notiones. Quum hæc quæstio plurimum intersit, & ad speciei humanæ unitatem asserendam, & ad illud jus constituendum, quod naturale, & omnibus commune dicitur, commentemur hac de re paullo accuratius.

III. Perceptio Philosophis est unius ideæ contemplatio, quin eam cum alia quacunque comparemus.

## IV. Co-

2. *Ac illud in primis quilibet per se animadvertere potest, rerum Naturam unam esse ac uniformem ubique, saltem substantia; legibus, ac ordine generali, seu & pulcherrime constructam ordinatamque, & eodem semper, ubique ordine ire, relationesque earum rerum, quæ in Natura sunt easdem semper esse, constantes, immutabiles. Sunt enim omnia ex rerum ipsarum essentiis in Natura ordinata; quæ quoniam eadem sunt semper ac constantes, unum, eundem semper ordinem servarunt, ac ubique servant.*

3. Porro huiusmodi rerum Natura, quacunque hominum sensibus patet, ac quomodocumque patet, eadem, ac eodem modo iis obicitur: non aliam videre Patres, aliamque Nepotes, inquit ille. Magnorum globorum ordo, situs, motus, phænomena cætera; eadem ubique Telluris, quæ sunt, nascuntur, crescunt, intereunt, ordinem ubique servant eundem, relationes easdem ubicumque sunt. Ac quamquam non omnibus fert omnia Tellus, sunt tamen ubique communia quædam, ac plurima magis modificationibus, quam substantia differunt. Ita objecta sensuum humanorum, saltem maxima parte, ubique eadem, & constantissima.

4. Jam humani sensus sunt in omnibus hominibus similiter constructi, oculi, aures, tactus. Natura quoque ipsa humana similis in omnibus. Reperies quidem homines magnitudine, colore, victu, vitæ moribus inter se quandoque differre plurimum, idest iis, quæ sunt naturæ humanæ accidentia; at non aut corporis structura essentiali, aut propensionibus naturæ, affectibus, ejusque generis aliis. Voluptate & dolore capiuntur ubique omnes ac permoventur: iræ, odio, amor, misericordiæ, spei, metui, ambitioni, avaritiæ, aliisque aut animi perturbationibus, aut vitiis, aut virtutibus, subiecti omnes. Ita videre possumus, quacumque patet Tellus, Sinenses, Japonenses, Tartaros, Samoëdas, Lapones, Americanos, Africanos eandem generatim habere naturam, nec differre, nisi iis, quæ naturæ accidunt, aut quæ educatione, aut climatibus inducuntur. Ac id ego observari

sæpe

IV. Cogitatio vero, seu iudicium est plurium idearum, eorumque relationum clara atque evidens perceptio.

## V. Ra-

sæpe in Viatorum itinerariis, incultas ipsas ac barbaras gentes, quod vocamus, generis misericordia tangi, amicitia capi, iustitiæ esse intelligendos, pudore ac verecundia solere ad turpes res suffundi, ac eo constantius, quo a magnis civitatibus remotiores, in quibus corrumpere, & corrumpi sæculum vocatur.

5. Præterea vis judicandi & ratiocinandi, utut non in omnibus æque expedita & prompta, est tamen in omnibus. Itaque hominum societatem invenires nullam, quæ & vitæ consulere nesciat, & non sit numerorum suapte natura intelligens, & regimen politicum omnino ignoret, saltem æconomicum, & Religionis sit inscia, & artes qualescumque non excolat. Sunt populi qui hæc omnia perfectius, plenius, promptius efficiant; sed nemo, qui penitus ignoret. Cultura igitur, & educatione, nonnihil etiam temperamento differunt magis, quam natura.

6. Ex quibus ego conficio esse communem quandam toti hominum generi rationem. Nam & similis in omnibus natura, ac sensus (4) & una ac uniformis ubique Natura rerum (2), eademque oculis omnium objecta (3); & ratiocinandi facultas omnium (5); Ergo habent homines omnes ut eandem semper ac constantem rerum naturam sensibus subjectam, ita communes quasdam ac constantes notiones. Iisdem præterea affectibus ac propensionibus subjecti, ac communi ratiocinandi facultate præditi, non possunt non in communibus quibusdam veritatibus perpetuo consentire. Ex quibus illud efficitur esse rectam quandam rationem hominum omnium communem. Quod nisi esset, qui fieri unquam potuisset, ut aliæ cum aliis locis ac climatibus distantissimis nationibus societatem inirent, ac commercia agerent? Id enim non magis fieri potuisset, quam inter sanos, & insanos, homines & pecudes, quibus nulla est communis ratio. Me elementorum angustia vetant hac in re esse longiorem. Lectores, qui philosophari amant, ipsi per se hæc copiosius deducere possunt, potissimum si in humana historia fuerint versati.

V. Ratiocinatio est plurium judiciorum comparatio instituta ad id clare percipiendum, quod intuitione non perspicitur.

*Sch.* Sunt hæ definitiones ex Malebranchio desumptæ (a). Quum v. g. inquit, bis duo, vel quatuor percipimus, tum simplex est perceptio. Quum vero judicamus bis duo non esse quinque, quid in hoc negotio agit intellectus? id unum certe, percipit nimirum relationem paritatis, quæ est inter duo, & duo, aut bis duo, & quatuor: & relationem imparitatis, quæ est inter bis duo & quinque. Judicium igitur intellectus nihil aliud est præter perceptionem relationis, quæ inter duas, vel plures deprehenditur res. Sed ratiocinium est perceptio relationis, quæ inter duas vel plures relationes duarum vel plurium rerum deprehenditur. Hæc ille. Quæ cum sint, qui potuit idem Philosophus scribere, judicia pertinere ad voluntatem, non ad intellectum? id certe est notionibus suis turpissime implicari. Sed est in hac Malebranchii doctrina, quod aut minus sit verum, aut minus clarum. Enim vero non omnis perceptio relationis duarum idearum proprie judicium est, & appellari potest: clara tantum & evidens judicium & est, & dici debet: obscura vero, aut opinio, aut dubium; ut perceptio idearum extremarum, sed non earum convenientiæ, aut repugnantia, siquidem convenientia, aut repugnantia ex alterius authoritate statuatur, fides (b). E. G. clare perceptio  $A = B$ , aut  $A \neq B$ , seu intuitionem id efficiam, seu ratiocinio, judico. Si minime intueor clare; tum aut opinor, si quidem parvâ quædam, non illa tamen clara lux affulgeat: aut dubito, si nulla, vel utrinque æqualis: aut tandem credo, si ex alterius authoritate id mihi persuadeam.

VI. Idea est forma quædam rei cujusvis, aut existentis, aut possibilis.

*Sch.* Non heic persequar idearum genera, quod in arte

(a) *Lib. 1. de inq. ver. cap. 2. §. 7.*

(b) *Vide quæ diximus in Arte Logico-Critica lib. 3. cap. 2. §. 6.*

arte Logico Critica feci. Unum tantum moneo, distinguere Philosophos solere inter ideas *intelligibiles*, & *phantasticas*, seu *materiales*: illas enim vocant formas pure intellectuales, omnis concretionis corporeæ expertes; has impressiones in cerebro factas, seu ab objectis externis in sensus incurrentibus, seu ab actionibus ipsius mentis in cerebro, quæ divisio, quod suboluit Cartesio in examine programmatis Belgici, nullo modo esse accurata, & vera potest. Nam idea est forma exhibens rem quamdam; seu *ideatum*; sed exhibens menti perspicienti: dicitur ergo *idea* hujusmodi forma ex relatione ad mentem intelligentem. Jam nunc aut mens incorporea est, aut corporea: Si primum nequit suscipere, & intueri nisi formas pure intelligibiles, atque idcirco materiales formæ in cerebro descriptæ; quæcumque eæ sint, cum nequeant immediate esse Menti præsentēs; dici ideæ non possunt. Quod si corporea sit, tum nullo modo observari ei possunt formæ intelligibiles, neque id circo illæ sunt intelligibiles ideæ. Præterquam quod definiri prius oportet, ideæ, & perceptiones idem sint necne, ut possit divisio illa intelligi. Nunc vero cum id non constet, videri potest, eam divisionem vocabulis constare nihili.

Cæterum quidquid sit de hujusmodi divisione, id certum est, non posse alio modo concipi a nobis ideas, nisi formarum; aut imaginum instar, quæ cum obijciuntur menti res referunt, aut existentes, aut possibiles. Scilicet rerum aut existentium, aut possibilium perceptio non fit extra nos, sed in nobis. Quum vero fieri nequeat, nisi intima conjunctione principii intelligentis, aut cum rebus ipsis quas percipit, aut cum earum rerum imaginibus; nisi *ideæ* sint *imagines* & *formæ* rerum, oportet mentem nostram cum rebus ipsis uniri; quod explicari non potest, nisi aut ope intellectus agentis Arabum, qui sit toti naturæ creatæ infusus; ut ope Pythagorici, & Spinozisti systematis, ut non sit alius intellectus noster, nisi pars quædam Dei, aut Deus ipse *per uni-*

ver-



*versam rerum naturam diffusus, & commeans. Spinoza enim sic censet (a): quod ad mentem humanam attinet eam etiam partem naturæ esse censeo; nempe quia statuo dari etiam in natura potentiam infinitam (intensive, & extensive reali extensione) cogitandi, quæ, quatenus infinita, in se continet totam naturam objective, & cujus cogitationes procedunt eodem modo, ac natura, & ejus nimirum idearum. Deinde mentem humanam hanc eandem potentiam statuo, non quatenus infinitam, & totam Naturam percipientem; sed finitam nempe, quatenus tantum humanum Corpus percipit, & hac ratione mentem humanam partem cujusdam infiniti intellectus statuo. Quæ cum sint non minus absurda quam impia, nihil immutandum est de vulgari illa definitione.*

VII. Memoriam vocamus facultatem ea iterum percipiendi, quæ alias sunt a nobis percepta, sed cum intimo sensu, & animadvertentia, fuisse ea alias percepta. Quo circa si sensus præteritæ perceptionis desit, ea actio reminiscencia dici nequit.

VIII. Reminiscencia est actio ipsa, qua rem alias perceptam iterum percipimus cum sensu & animadvertentia fuisse alias perceptam. Differunt igitur Memoria, & Reminiscencia veluti *habitus*, & *actus*, ut nempe quod *habitus* est memoria, id *actus* sit reminiscencia.

*Schol.* Inesse in singulis *reminiscentiis* sensum veterum perceptionum, id clara intima conscientia persentiscimus. Id explicatu difficilius videtur Philosophis, unde is sensus proficiscatur: neque enim eam rem ullo modo expedire posse opinantur. Et certe seu e cerebri vestigiis existere dicas, seu e vestigiis sui generis, quæ post sensationes, & perceptiones fortassis supersunt in animo, inextricabilibus implicaris quæstionibus. Nam cerebri vestigia perceptionem gignere posse ut demus, non video qui possint reminiscenciam. Reggeres, agnoscere mentem non recentia esse vestigia illa, sed vetera: rogo quibus tandem signis? vide ut clara respon-

deas,

(a) *Epist.* 5.

deas. Confugere vero ad vestigia in animo ipso fortassis insculpta; magis etiam mihi obscurum videtur, quam superius; enim vero nec quid sint hujusmodi vestigia, nec qualia; *αἰσθητὰ* ne an immobilia & inertia, explicari potest. Non desunt qui eum sensum, non minus quam sensum doloris, aut voluptatis a Deo repetunt: Argumentum rei inextricabilis perspicuum (a). Quæ omnia idcirco monui ut habeant Tirones Philosophi exercendæ mentis argumenta. Ceterum de memoriæ natura in loco commodius.

IX. Vocamus facultatem sentiendæ eam, qua motus in organis sensoriiis, aut ab externis objectis factos, aut a causis in ipso nostro corpore existentibus excitatos, percipere possumus.

*Schol.* Duo distinguere oportet in sensationibus, *perceptionem*, & *sensum voluptatis aut doloris*, qui singulas sensationes comitetur: nam qui intendunt animum, intelligunt conjuncta quidem illa duo esse, sed distincta. Qui mentis humanæ essentiam in sola posuere cogitatione, ii sensum illum *æqualibus* maxime *voluptatis*, qui sequitur necessario sensationes omnes, unum faciunt *ex modis cogitandi*. At nisi nobis ipsi illudere & imponere velimus, negare non possumus, *sensum* illum longe diversæ naturæ esse a modis cogitandi. Interim Philosophi isti, nisi dicere velint, sensum illum esse agitationem mediæ cujusdam Animæ, quæ mutant, mentem esse substantiam omnino inextensam, nihil superest ut dicant; nisi esse *nescio quid*. Sed ea de re accuratius infra.

X. Facultas imaginandi dicitur ea, qua ideas corporeas absentium corporum nobis repræsentamus; varieque

(a) Dubitari non potest, quin sensus iste nascatur ex idearum concatenatione. Nulla enim idearum nostrarum est; quæ cum pluribus aliis *περὶ αἰσθητῶν* diversarum loci, temporis, personæ non sit conjuncta. Itaque ubi ad animum redit aliqua iis stipata circumstantiis, reminiscor; reminiscor vero fere numquam, si illæ oblitteratæ sint. Hoc cogitandi non potest non esse perspicuum.

que copulamus; augemus, minuímus, & qua res ipsas incorporeas sub corporeis imaginibus nobis depingimus. Vocari etiam solet *phantasia*.

*Schol.* Non est ea *vocabuli* definitio, sed *rei*. Nam quod ea facultas nobis insit intima conscientia scimus. Ut autem imaginationis naturam accuratius explicemus, paullo altius exordiemur. Sensationes omnes quædam sui vestigia, quæcumque ea sint, in nobis relinquunt, quorum vestigiorum ope possimus habere easdem perceptiones luminis, colorum, figurarum, distantiarum, sonorum, odorum, similibus, etiam quum res illæ præsentibus nobis non sunt. Perceptiones hujusmodi dicuntur imaginationes, & phantasmata. Non ergo differunt *sensatio*, & *imaginatio*, nisi diuturnitate, & vivacitate: diuturnior, & vivacior natura sua est *sensatio*; minus diuturna, minusque vivax *imaginatio*. Ex quo id intelligitur facillime, quod alibi animadvertimus (a), tum *imaginationes* pertinacissime pro *sensationibus* haberi, quum diuturnitate, & vivacitate *sensationes* ipsas adæquant. Sed eadem vi, qua præteritas sensationes mens sibi repræsentat, potest sibi conficere phantasmata similia, quæ scilicet numquam sensibus percepimus. Potest hæc phantasmata associare, augere, minuere, atque ita novas rerum formas sibi exhibere, quod faciunt Poetæ: Potest res ipsas incorporeas corporeis phantasmatibus exprimere, quemadmodum Pictores exprimunt. Sed in omnibus his ut fingere infinita, ita infinita peccare potest. (b)

## XI. Vi-

(a) *In Arte Logico-Critica.*

(b) *Angelus a S. Joseph Carmelita in Gazophylacio lingue Persicæ testatur se vidisse hominem, qui quum Opium Persicum deglutisset, plures horas riserit inuitus, ineptaque plurima ac obscæna effutierit. Coram se phantasmata adspiciebat quasi deambulantia; eaque monstruosa aut perridicula (pag. 260.). Chardinus testificatur id huic ipsi Carmelitæ contigisse (in Itinerario tom. 4. pag. 202.). Ac similia efficiunt apud nos spirituosissimi liquores, ut apud cæteras nationes. Mirabilia sunt Catalepti-*

XI. Vita posita est in actione aliqua perenni, quæ ex principio activo rei, quæ vivit, intrinsecò manat; quæque cum sui sensu conjuncta est.

*Schol.* Non aliam vitæ notionem habent homines, nec in scientiis, quæ in hominum scholis traduntur, definitiones, nisi ex communi hominum notionibus, accipi possunt. Unum ut observemus oportet, vitæ plura genera, quæ gradibus distinguantur, statui posse: nam & Plantas, & Brutas animantes, & Homines, & Dæmones (quo nomine bonos, malosque spiritus ex Græcorum Philosophorum usu intelligo) & Deum, vivere dicimus. Plantæ quidem vivæ appellantur, quousque vis plastica, quæcumque sit, eas permeat, & perenniter animat: brutæ vero animantes, quousque, & vi eadem plastica & sensu præterea, atque motu spontaneo sunt præditæ. Hominum vita in eo Brutorum vitæ præstat uno, quod ratione quoque utantur homines. At longe diversa Dæmonum vita, siquidem illi nullo ne tenui quidem corpore utuntur esse debet, ut penitus diversa, ac generis eminentissimi vita Dei. Sed in eo vitæ harum rerum omnium conveniunt, quod esse non possunt sine *energia*, idest actione, & quidem intrinseca, & perenni, ut si ea actio interrumpatur, vivere continuo desinant. Quocirca, si quæ sunt quæ vivunt quin ullius actionis perennis indicium præseferant, quemadmodum, semina, & ova, dubitari non potest quin intrinsecus actione vitali agitentur, cujus nulla sint sensibilia vestigia.

XII. Appetitus, seu desiderium est propensio animi erga bonum perceptum, & ut præclare Chrysippus, *ratio actionem imperans* (a): Aversatio est, quum animus refugit a malo aliquo percepto.

*Schol.*

*leptorum phantasmata. Sed & videre possimus, quid in hominibus possit phantasia in iis, in quibus deturbata est, quorum ubique magna est copia. Plurimum in his errandis oblectamenti videtur cepisse Henricus Morus lib. 1. de immortalitate animorum.*

(a) Apud Plutarchum de Stoic. contrarietatibus.

*Schol.* Vis qua appetimus, aut adversamur, *bruta est*, idest, omnem utrumque rationis, & consultationis prævertit; sed non prævertit tamen omnem perceptionem; nam ut ignoti nulla cupido, ita nullus ex ignoto metus. Veteres Philosophi appetitum diviserunt in *rationalem*, & *concupiscibilem*, quem Christiani philosophi *carnalem* vocarunt. Nec tantum objectis, sed subjectis quoque illos distinxerunt: nam *rationalem* in superiori Animi parte, idest *intellectiva* locarunt, *concupiscibilem* in inferiori, idest *sensitiva* posuerunt. Hinc vero explicuere, ut iis videbatur, facillime, eam pugnam, quæ inter utrumque intercedit, quaque fit illud, quod Medea apud Ovidium pronunciat: *video bona proboque, deteriora sequor*, quodque Paulus Apostolus in epistola ad Romanos paullo pluribus dicit, *video aliam legem in membris meis repugnantem legi mentis meæ: non quod volo bonum hoc ago, sed quod nolo malum illud operor*. Opinabatur nimirum inferiorem animi partem cum superiore pugnare, & ut Plato eleganter dicit, Equum cum Equite. Inde est Horatii illud, *Animum rege* (animum appetitum hunc concupiscibilem, qui affectuum sedes habetur, intelligit), *qui nisi paret, imperat*. Quæ speciosa magis sunt quam vera; nam quum anima sit incorporea & simplex substantia, vocabula partium inferioris, & superioris, *vocabula sunt nihili*. Ego qui in ea sum sententia, Mentem humanam suam habere extensionem, utut incorpoream, sic explico. Ex singulis Mentis perceptionibus totidem nascuntur in tota anima humana, qua continetur vita, commotiones, eæque commotiones in ratione sunt *intensitatum perceptionum* bonorum, vel malorum; quas perceptiones bona, aut mala *repræsentata* voco. Jam quum bonorum aut malorum *repræsentatorum* intensitas non sit æqualis ob eas res, quas loco suo explicaturi sumus, fit ut ne commotiones quidem illæ sint æquales. Jam in ratione commotionum illarum excitantur in nobis sensus voluptatis, aut doloris: qui & ipsi inæquales plerumque sunt. At sensu doloris, vel voluptatis intensiore fere semper determinamur; ergo determinamur in

ratione bonorum aut malorum repræsentatorum, idest in ratione intensitatum commotionum, atque idcirco perceptionum. Itaque si contingat ut eodem tempore duo objecta bona A, B, A quidem animi, B vero corporis, hoc intensitatis 6, illud 4 percipiantur; consequetur, determinari nos erga A propensione = 4, erga B = 6; quod est videre bona deteriora sequi & legem sensuum adversus legem mentis prævalere.

Malebranchius (a) duo alia inclinationum genera ponit, congenitas, & acquisitas, atque primas naturales appellat. Operæ pretium est integrum ejus locum transcribere: Si Deus, inquit ille, quum hunc Mundum creavit, materiam undequaque immensam creavisset, nec ullam ei vim motricem indidisset, nulla corporum varietas provenisset. Totus potius adspectabilis hic Mundus nihil etiamnum esset nisi pondus iners, vastaque moles, quæ demonstraret quidem summam Dei potentiam, & magnitudinem, sed nulla formarum distinctus varietate, nulla rerum successione, qua universitatis rerum pulchritudo continetur, procedens, nulla etiam divinæ sapientiæ indicia præberet. Sunt autem in Spiritibus propensiones & inclinationes in hoc Intelligentiarum Mundo, quod motus in Mundo corporeo. Itaque nisi Spiritus hujusmodi præditi essent inclinationibus, nihil quidem illi unquam appeterent, vellentque, nullaque esset in spirituum Mundo actionum ea varietas, quæ mentes rapit in admirationem, quum divinæ sapientiæ, tum quoque ejus misericordiæ, justitiæ, bonitatis, atque ceterorum Dei attributorum. Discrimen itaque inclinationum efficit haud dubium in Spiritibus, quod motionum varietas in corporibus, atque unica hac re tota creaturarum pulchritudo efficitur, & continetur.

Pergit porro, atque ut quæ tandem hujusmodi sint inclinationes detegat, hunc in modum ratiocinatur. Inclinationes naturales Spirituum non possunt aliud esse, præter quam continuatæ impressiones voluntatis Dei, a quo illi creati sunt & conservantur: quo circa oportet ut sint eæ similes finibus Creatoris: Ergo spectant & Dei gloriam, & Spirituum ipsorum conservationem. Velle enim

non

(a) Lib. 4. de inquirenda veritate cap. 1.

non potest Deus, ut quæ creatæ sunt voluntates in aliâ bona vehementius raptantur; quam in Deum ipsum . . . Nihil igitur imprimit in mentibus Deus; quam amorem erga Deum, quo & ipsum & cætera propter ipsum amamus. Est autem is amor; quod principium est cæterorum peculiarium amorum nostrorum amor ipsius boni; seu boni generatim sumti summi boni. Hæc autem est prima naturalis inclinatio cæterarum fons secundum Malébranchium. Altera vero est inclinatio qua studemus nos conservare, seu nostri ipsorum amor. At ita quidem his de rebus differit vir doctus; ut eas inclinationes velût naturæ rationabilis quasdam *leges Mechanicas* videatur habere: nam *Mechanica lex* ea philosophis dicitur; cuius nulla est in natura causa anterior; sed quæ sola Dei voluntate & existit & conservatur (a). Nec is primus est; qui exemplis & legibus corporum mechanicis deductis, animi humani propensiones explicare studuerit: nam B. Augustinus, cuius hic principiis totum systema suum inædificavit; in *Confessionibus* eodem prorsus exemplo utitur; *ponderibus*, inquit;  *suis aguntur omnia. Amor meus pondus meum: illo feror; quocumque feror.* Ut si Newtoniana calluisset; potuisset dicere, esse in mentibus amorem; & odium; seu inclinationem; & aversionem; quæ sunt in corporibus vires centripetæ, & centrifugæ.

Interim non sine ratione; ut opinor; gravissimi Philosophi ab hac doctrina dissentiunt. Putant enim omnes hominum inclinationes *ex usu vitæ* nasci consentaneas tamen naturæ. Nempe quum ita sit natura humana comparata, ut voluptate conservetur; dolore destruat; adeoque dolore, & voluptate impellatur ad objecta vitæ consentanea; retrahatur a noxiis; his efficitur ut commercio, & usu rerum inclinationes, aut aversiones nascantur erga eas res, quæ vitæ sunt consentaneæ. Nempe Naturæ ipsius sensu quisque amat esse, agere, vivere, idest existere, nec existere modo, sed cum commoditate, ac beatè quoque existere: totus hic naturæ conatus, sensus,

B 2

&amp; amor

(a) Vide Wolffium in *Cosmologia*.

& amor quo nullus in natura nostra prior concipi potest, in nobis terminatur, ulterius non spectat: sed inde fit, ut quum usu vitæ externa didicit bona, in ea feratur, incipiatque amare beatitudinem, & ipsum bonum. Quod si, inquirunt, ingenitæ sunt naturæ nostræ propensiones quædam, *brutæ* ne eæ sunt, idest tales, quæ prævertant perceptionis, & rationis usum, an *rationales*, quæ scilicet ex ideis boni, vel mali oriuntur? primæ quidem naturæ potius corporeæ sunt ac animalis, quam rationalis: alteræ innatas supponunt notionēs; quas quum isti determinaverint, consequitur nec illas esse ullas. Ego non dubito, quin prior illa opinio similior sit vero: sed puto hanc rem non præjudicio ullo majorum Philosophorum, sed accurata naturæ nostræ contemplatione expendendam. (a)

## XIII.

(a) *Non multa meditatione indigemus, qua intelligamus, natura ipsa fieri, ut 1. esse velimus, 2. & bene esse, 3. & beate. Itaque nihil natura nostra vehementius abhorret, quam non esse: secundum hæc, non bene esse: tandem non esse beata. Aristoteles mortem terribilium omnium extremum vocat, ac vere & eleganter vocat. Hinc nullum est malum, aut periculum, quod homines non invadant audentissime, quum de morte evitanda agitur. Plenæ sunt horum exemplorum historia, præsertim navigantium. Jam quantopere non bene esse reformidet humana natura, inde intelligi potest, quod nihil ferme agamus, aut omittamus, nisi animi ac naturæ inquietitudine commoti. Nulla est molesta perceptio, quam non statim ex animo ejicere velimus. Ac sumus adeo delicati, ut minus etiam jucundas perceptiones, si jucundiores nobis suppetant, continuo fastidiamus, & nisi ejecerimus, tristemur. Tandem eodem naturæ impetu fit, ut omnes beati esse velimus. Itaque & in jucundis perceptionibus hæremus lubenter, & iis privari timemus, & si subducantur, ægritudine statim corripimur molestissima. Tum ingentes quoque labores subire parati sumus, si ii ad hanc qualemcumque beatitudinem quidquam conferre arbitremur; & ab omni etiam levissima cura refugimus, si id*



XIII. Libertas est illa mentis facultas, qua possumus quidpiam eligere, aut fugere, prout nobis ex ratione boni, vel mali propria libitum fuerit. Eum igitur nos liberum dicimus, qui ex sua boni vel mali ratione quidpiam operatur; eum vero minime liberum, cujus agendi causa est aut motio vel *passio* sine ratione, aut non sua ratio, quique idcirco non ipse, nec cum voluptate, sed invitus agit.

*Schol.* Nulla res est, cujus tam diversas notiones homines alioquin perspicaces, & docti sibi confecerunt. Sunt enim qui libertatem locant in facultate agendi, aut cessandi ex voluntate (a). Alii vero in facultate agendi, aut cessandi secundum determinationes cogitationum nostrarum. Nempe ut cogitationum nostrarum aliæ aliis intensitate præstant, ita hæc potius inde actiones, quam aliæ manant (b). Alii in facultate eligendi ex consultatione (c). Alii in facultate eligendi super bonis minime infinitis (d). Spinoza libertatem generationem definivit his verbis: *ea res libera dicitur, quæ ex sola suæ naturæ necessitate existit, & a se sola ad agendum determinatur: necessaria autem, vel potius coacta, quæ ab alio determinatur ad existendum, & operandum certa ac determinata ratione* (e). At alibi dum hominem liberum memorat, eum esse dicit, qui ex solo rationis dictamine vivit (f). Ex quo consequi videtur ei humanam libertatem acceptam fuisse pro facultate agendi ex dictamine rationis.

Ego in omnibus his non parvam inesse obscuritatem  
 vi-  
 in animum induximus; turbari illa animi quietem & pacem. Quocirca tria illa, esse; bene esse, esse beate, naturalia omnibus sunt hominibus, & naturæ ipsius humanæ structura quasi emergentia, ingenita sunt.

(a) La Placette *Eclaircissement sur la liberté* p. 2. Jaquelot de l'existence de Dieu pag. 381.

(b) Locke *Essai de l'Entend.* lib. II. cap. XXI. §. 8.

(c) Alexander Aphrodis de Fato.

(d) B. Tb. p. part. 9. 82. art. 2. in corp.

(e) *Eth.* part. 1. def. 7. (f) *Eth.* p. 4. in demonstr. prop. 67.

video. Libertatem isti non ex eadem facie omnes contemplati sunt: inde notiones variæ, & concertationes æternæ. Rem paucis comprehendam. In primis duo sunt in homine distinguenda, *vis quædam activa*, & *motiva*, quibus ea vis determinatur ad hoc potius, quam aliud objectum. Inesse homini vim quamdam activam, inter comperta habeo. Quum autem vis nulla activa determinata simul esse possit in omnes partes, si talis vis in homine inest, quæ nunc in hanc partem, nunc in aliam inclinatur, idest, quæ non sit unum in modum determinata, necesse est, motiva quædam adesse, quibus illa determinetur. Jam dnum generum ea *motiva* esse possunt, *ratio*, & *passio*. Quum vis hominis activa passione determinatur, idest actione aliarum rerum externarum, aut ipsius corporis, necessaria est, & mechanica: si ratione, libera. Quæstio ergo, utrum ulla sit in homine libertas, huc redit, determinetur ne semper homo a *passionibus*, an aliquando etiam a propria ratione. Si primum constituerit, actum erit de humana libertate: si posterius liberi erimus. Præterea nisi quoque distinguatur inter libertatem ipsam, & ejus usum, in multis nos implicari quæstionibus minime necessariis oportet. Ex. gr. B. Thomas, qui in prima part. Summæ Theologicæ Quæstionibus LXXXII. & LXXXIII. acutissime his de rebus disputat, atque. me saltem auctore, cæteris accuratius, & solidius, duas in primis quæstiones ponit, una, *fit ne libertas potentia cum habitu conjuncta*; altera *libertas & voluntas sint ne duæ potentia?* Utrumque negat. Scilicet ei & libertas & voluntas una eademque sunt potentia; & hæc potentia nec habitus est, nec cum habitu conjuncta. At distinguere debebat. Libertas enim ab usu velut abstracta & separata, nec voluntas est, nec habitus: usus autem libertatis, & cum voluntate, & cum habitu est conjunctus. Ex quibus & id intelligitur facillime, ad libertatem generatim sumptam pertinere quidem illa libertatis genera, quæ a *coactione*, & a *necessitate* naturæ dicuntur: ut scilicet vis hominis activa nec ab exter-

nīs causis necessario, nec ulla naturæ sine necessitate determinetur: reliqua vero genera, quæ dicuntur *in-differentiæ*, *contradictionis*, *contrarietatis* solum spectare usum libertatis: Quæ si probe observassent Theologi nostri, magnam partem quæstionum vocabulorum rescire ex descriptionibus suis potuissent.

XIV. Voluntas est ultima mentis determinatio; quæ se ad bonum *repræsentatum* complectendum, malum *repræsentatum* fugiendum ex sua ratione, & rationis conscientia determinat.

*Schol.* Hic voluntatem a libertate distinguo, ut sit hæc *potentia*, illa ejus potentix *actus*. Quod ut intelligatur apertius; ex nostri ipsorum conscientia, quinque, quorum alterum ex altero nascatur, in hoc negotio sunt distinguenda. I. Intellectus seu vis percipiendi, & cogitandi: II. Perceptiones boni vel mali, quæ potentix intelligendi sunt actiones. III. Inclinationes, aut aversiones necessariæ ex iis perceptionibus natæ: IV. Potentia eligendi, vel fugiendi ex ratione: V. Electio ipsa, aut fuga. Eorum quartum mihi *libertas* est, quintum voluntates. Non *potentiæ* ergo, sed actionis vocabulum est apud nos *voluntas*: in quo discedimus quidem a Philosophis nostris, sed non ab usu purioris Latinæ linguæ, & rerum.

XV. Habitus sunt facultates animi, quibus actus aliquos quum internos cogitationum & voluntatum, tum etiam externos linguæ, manuum &c. expeditius edere potest.

*Schol.* Hujusmodi facultatum esse naturam humanam capacem, nemo est, qui possit inficiari, nisi fortassis, qui nondum aut sui, aut aliorum ullam habuit notitiam. Sed illud non omnes animadvertunt, hominem, quantus quantus est, nihil aliud esse præterquam habituum congeriem: hominem autem quum dico, non hoc tantum animal intelligo *mente divina*, & corpore præditum, quem *naturalem hominem* appellare possis: sed *hominem civilem*, cujus velut rudis quædam materies homo ille est *naturalis*. Atqui ego id pono inter *naturalem* illum, & hunc *civilem* discrimen, quod in-

ter rude metallum & inde confectam statuam. Porro e naturali civilem hominem soli efficiunt habitus, quum qui intellectum & voluntatem, tum etiam qui corpus spectant. Jam habitus *continuatione actuum* acquiri vetus est Philosophorum effatum & verum: nempe ut tenellæ plantæ inflexione continuata eum acquirunt situm, quo dirigit Agricultor: ita humana natura quum quidpiam sæpe efficit, eo inclinatur, ut velut pondere quodam protrahatur, & lubentius, ac facilius repetit. Natura certe nostra, quum esse incipit, nulla insita vi ullibi flectitur, nisi ad se conservandum, ut superius dictum: propensiones commercio mundi acquirat. Si quam in partem sæpius aut ab objectis externis, aut ab internis animi cogitationibus impellitur, in eam fit propensior; ea propensio continuatis actibus confirmata *habitus est*, & quidem, ut inquirunt, altera natura,

*Quam licet expellas furca, tamen usque recurrit.*

Quocirca inde petenda ratio. I. Cur habitus non nisi diuturna actuum continuatione acquirantur. II. Cur ii facilius, quorum exercitatio cum voluptate est. III. Cur ii expeditius, qui phantasia, aut corpore magis, quam mente constant; contra hi difficilior. IV. Cur *habitus intellectuales* & difficillime acquirantur, & facillime deleantur. V. Cur infantes & pueri aptiores sint excipiendis habitibus, quam ætate maturi. Præterea quum quantitas virium naturæ humanæ finita sit; inde etiam patet & hoc aliud phænomenon, cur natura nostra quum tota unum in habitum incumbit, inepta brevi tempore aliis evadit: quemadmodum si quis vim habeat motricem = 4, dum 4 viribus dextero brachio aliquid urget, nihil conari altero potest. Nec difficilior erit Aristotelicum illud Theorema intelligere, quod pluribus ille in secundo Nicomachiorum explicat, *nullum esse posse ingenitum habitum*. Quod si quis roget, qui hæc doctrina stare possit, cum *infusis theologicarum virtutum habitibus*, is sciat naturam omnem ita Deo rerum opifici & moderatori subesse, ut quod tu inflectere non nisi paulatim & lente queas, sola ille voluntate flectat.

XVI. Affectus voco eas naturæ humanæ commotiones, quæ ex perceptione boni vel mali nascuntur, quales sunt amor, metus, ira, similes (a).

Sch. Renatus Cartesius *affectus*, quos *passiones* vocant recentes Philosophi, ita definivit, *perceptiones*, aut *sensus*, aut *commotiones animæ*, quæ ad eam speciatim referuntur, quæque producuntur, conservantur, & corroborantur per aliquem motum spirituum (b), seu fluidi corporei, quæ velut anima quædam spectari potest. Sed mihi naturæ ordinem acutus alioquin Philosophus pervertere videtur: nam quam ille facit causam affectuum, ille potius est effectus, & vicissim: non enim eæ perceptiones & sensus, quæ ille *passiones* appellat, e motu spirituum producuntur, & conservantur; sed contra, motus ille animæ, seu partis naturæ humanæ, quam sensitivam vocant, & ut hic amat loqui, spiritum, perceptionum effectus est, cogitatione conservatur & corroboratur. Si tantum ignorare possunt, perceptionibus boni vel mali primum excitari affectus, deinde, perdurantibus illis, intensiores effici, & vehementiores, qui sunt omnino sibi ignoti. Nam unde illud ----- *Est mollis flamma medullas, Tacitumque vivit sub pectore vulnus?* nempe quia *absens absentem, auditque videtque*. Injurato igitur Cartesio credo, quod ille ad Elizabetham scribit de hoc *passionum opusculo*, nequaquam miror, quod *vitia in illo de pre-*

(a) *Naturam humanam, quo in loco est, indigere affectibus, ut conservetur id postea demonstraturi sumus. Sed quoniam sunt excessus quidem affectuum seu intensitate, seu extensione, qui tantum abest ut ullam nobis vitæ commoditatem præsent, ut potius ad nos infelicitandos videantur aptiores; quo distinctius his de rebus differamus, motus illos naturæ nostræ necessarios, quibus aut in bonum fertur, aut aversatur malum, affectus vocare possumus, ut hoc vocabulum in meliorem semper partem accipiat, excessus vero seu intensitate, seu extensione dicemus perturbationes, quod vocabulum in pejorem partem usurpabitur.*

(b) *De Pass. Animæ part. I. art. 27.*

prehendas ; quibus certe eum vacare minime putavi , quum ejusmodi habebat argumentum , cui nunquam antea studueram ( a ) . Interim hæc non satis sunt consentanea cum iis , quæ præfatione in eum librum paullo confidentior dixit , ea , quæ de affectibus docuere veteres , tam parvi momenti esse , & maxima ex parte tam parum probabilia , ut sperare non debeam , me ad veritatem rei perventurum , nisi plane ab iis , quas instituerunt , viis recessero . Nec ergo , si Physicam hujus tractationis partem spectes , vere ab eo id dictum ; de Morali , quæ reponam habeo .

Operæ pretium erit , & Cimmerium illum tenebrionem audire , qui sibi , ut solet , & Musis canit , heic ne Musis quidem , opinor . *Affectus* , qui animi *pathema* dicitur , est confusa idea , qua mens majorem , vel minorem sui corporis , ve alicujus ejus partis existendi vim , quam antea , affirmat , & qua data , ipsa Mens ad hoc potius , quam ad illud cogitandum determinatur ( b ) . Peream si γῶν intellexi : id profecto Delio eget natatore . Audiamus definitionis definitionem . *Explicatio* ( pergit ) : Dico primo affectum , seu passionem animi esse confusam ideam : nam mentem eatenus tantum pati ostendimus ( prop. 3. hujus ) quatenus ideas inadæquatas seu confusas habet . Quum nemo sit : qui non miretur , pronuntiari a Philolopho confidentissime , Mentem in ideis inadæquatis pati , jucundum erit paucis subdere ejus hominis demonstrationem . Postquam in citata prop. 3. demonstrare adnissus est , Mentem , quatenus adæquatas habet ideas , eatenus quædam necessario agere , seu potius Deum , quatenus Mentis essentiam constituit , transit ad hoc nostrum . Deinde , inquit , quidquid necessario sequitur ex idea , quæ in Deo est , adæquate , non quatenus mentem unius hominis tantum , sed quatenus aliarum rerum mentes simul cum ejusdem hominis mente in se habet , ejus illius hominis mens non est causa adæquata , sed partialis , ac proinde ( per def. 2. hujus ) Mens quatenus ideas inadæquatas habet , quædam ne-

( a ) *Epistolarum par. . Ep. xi.*

( b ) *Spinoza Ethic. part. 3. pag. 159.*

*cessario patitur*. Tum vero literis cubitalibus subnectit,  
 Q. E. D. Atqui nisi id est data opera crucem homini-  
 bus Philosophis figere, vix hunc hominem humanum  
 habuisse sensum mihi persuaserim. Ad rem: persequa-  
 mur explicationem prioris enigmatis, *Dico deinde*, qua  
 mens majorem, vel minorem sui corporis, vel alicu-  
 jus ejus partis existendi vim, quam antea, affirmat:  
*omnes enim corporum ideae, quas habemus, magis nostri*  
*corporis actualem constitutionem, quam corporis externi*  
*naturam indicant: at hæc idea, quæ effectus formam con-*  
*stituit, corporis, vel alicujus ejus partis constitutionem*  
*indicare, vel exprimere debet; quam ipsum corpus, vel*  
*aliqua ejus pars habet, ex eo quod ipsius agendi poten-*  
*tia, sive existendi vis augetur, vel minuitur, juvatur*  
*vel coercetur*. Et est præterea, qui Heraclitum cognom-  
 ento σκοπεῖον obscure loquutum dicat? est qui Aristo-  
 teleas denitiones obscuritatis arguat? Quibus de rebus  
 quotiescumque cogito, vehementer dubito, voluerit  
 ne hominibus recutitus hic homo scribere, an illudere.  
 Scio passim illum clamare in epistolis, cæteros omnes  
 mortales ideis phantasæ, idest falsis, de rebus judica-  
 re, non *intellectualibus*, quæ veræ sunt: phantasiæ  
 vero non posse nobis rerum veras naturas exhibere.  
 Queritur non intelligi sua principia, idcirco, quod ad  
 sua pura noemata nemo intendat animum: intellectum  
 humanum omnia fingere ex analogia suæ naturæ, non  
 ex analogia universi, adeo ut sit instar speculi inæ-  
 qualis ad radios rerum, *qui suam naturam naturæ re-*  
*rum immiscet* (a). Non ego inficior, id sic se habere  
 in hominum vulgo: at de gravissimis quoque Philosophis  
 id affirmare, & quidem hominem de hominibus,  
 id vero est intolerabile. Quid? Spinoza homines eru-  
 dire contendit ope communionis idearum, quarum na-  
 tura capax est humana, an earum, quas numquam  
 homines habere possunt? Primum negat opère ipso:  
 posterius qui promittit, omnem is humanam naturam  
 exuisse prius oportuit. Quam bellum erat fateri, se  
 non intelligere clare, quod nullo modo clare alios  
 doce-

(a) *Epist. 2. & alibi ex Verulam.*

docere potuit? Imago enim animi est scriptura:

XVII. Beatitudo est status fruitionis sine ulla tristitia dolore, metu, seu status perfectæ voluptatis.

*Schol.* Boetius, quem deinceps ducem cæteri sectati sunt, beatitudinem definit *est status omnium bonorum aggregatione perfectus*. Quæ non est definitio rei, sed causæ rei: Neque enim nunc quæritur, unde beatitudo manet, sed in quo sit posita. Quinimo, quod accurate prorsus pertractatur a Cartesio (a) & Vvolphio (b), non aggregatio bonorum aut voluptatem in nobis gignit, aut facit nos beatos; sed *conscientia perfectionis nostræ*, quæ e bonis illis derivatur; qua de re postea. Jam idem peccatum peccant illi omnes, qui rogati in quo sit posita beatitudo, varia bonorum genera percensent, atque in eorum aliquo locatam docent: nempe beatitudo esse non potest, nisi in æquabili & perfecta voluntate: unde vero ea derivatur voluptas, alia quæstio est. Quum autem dico in *perfecta voluntate* positam esse nostri beatitudinem, *hominis*, seu *naturæ humanæ* voluptatem intelligo, nec necesse est distinguere inter voluptatem *animi* & *corporis*: voluptas enim non potest esse nisi animæ, seu potius *naturæ viventis*, & *sensitivæ*. Excitentur vero voluptates ex perceptionibus bonorum animi, an ex conscientia bonorum corporis, id est, ut dixi inquirere in causas voluptatis & beatitudinis, non ipsam beatitudinis essentiam explicare. Quare injuria in Epicurum debacchatur Cicero (c) quod ille beatitudinem in voluptate posuerit, quasi in abdomine & in iis, quæ infra ventrem sunt. Nec enim hanc tantum voluptatem vocabulum *ἡδονή* significat, ut Romanus hic censet Philosophus, & non agebatur Epicuro, quæ beatitudinis causæ, sed quæ natura, in quo ille perspicacius philosophabatur, quam alii, qui turpissime statum quæstionis miscebant.

Age vero, audiamus & hic humanæ sapientiæ, si  
diis

(a) In *Epist. ad Elizabeth. part. 1. Epistolarum*.

(b) In *Psychologia Empirica*.

(c) De *finib. lib. 1.*



diis placet, instauratorem. *Nostra salus, seu beatitudo, seu libertas* ( nempe hæc Sinonymia habet ) *consistit in constanti, & æterno erga Deum amore, sive* ( & hæc Sinonymia ) *in amore Dei erga homines* ( a ). Paulum audire jures, nisi posteriora impietatem eandem, quam cætera, saperent. Ne vero quisquam roget, qui secunda illa verba cum primis conveniant, audiant quid ille, *Hinc sequitur*, inquit, *quod Deus, quatenus seipsum amat, homines amat* ( recte hæc quidem ) *& consequenter quod amor Dei erga homines, & Mentis erga Deum amor intellectualis unum & idem sit*. Nempe, quia *Mentis erga Deum amor intellectualis pars est infiniti amoris, quo se Deum amat, non quatenus infinitus est, sed quatenus per essentiam humanæ mentis, sub specie æternitatis consideratam explicari potest* ( b ). Quæ nova argumentationis species? Quæ cum impietate commixtæ tenebræ? Dogmata naturæ & rationi contraria. Sed ut mendacis argumentum dictorum est inconstantia, ita errore turbati animi sententiarum pugna. *In vita*, inquit alibi, *apprime utile est intellectum, seu rationem, quantum possumus perficere, & in hoc uno summa hominis FELICITAS, seu BEATITUDO consistit ... intellectum vero perficere nihil etiam aliud est, quam Deum, Deique attributa, & actiones, quæ ex ipsius naturæ necessitate consequuntur, intelligere* ( c ). ( \* )

## XVIII.

( a ) *Spinoza Eth. part. 5. in Schol. prop. 36. Coroll.*

( b ) *Ibidem prop. 36.*

( c ) *Appendice ad part. IV. cap. 4.*

( \* ) *Est editus superiori anno Lugduni Batavorum libellus, quo philosophia Moralis Mathematicum in morem comprehensa exhibetur, Auctore Maupertusio viro in primis clarissimo. Auctor doctus humanam felicitatem hunc ferme in modum explicat. Voluptatem, inquit, appello omnem perceptionem, quam habere potius, quam non, velimus, ac quam nolimus a nobis subduci, & cum qua libenter sumus. Omnis vero perceptio, quam minus libenter ferimus, quamque commutare gestimus, dolor est. Jam duratio voluntatis, seu perceptionis amabilis, tempus*

XVIII. Virtus est habitus *facultates* hominis *rationalis* perficiens. Vitium habitus deteriores efficiens. Itaque moralis est quæ perficit facultates rationales ad beatitudinem: vitium; quod impeditiores ad illam efficit.

*Schol.* Nihil immuto de doctrina B. Thomæ; cæteris eam præfero: nam ubi aliorum definitiones, quas mox proferam; obscuræ aut mancæ; aut falsæ; aut non essentialis rei, sed vel causarum; vel qualitarum; hæc & clara, & perfecta; & vera; & secundum essentialiam. Virtus; inquit ille (a); nominat quandam potentie perfectionem: uniuscujusque autem perfecto præcipue consideratur in ordine ad suum finem: finis autem potentie actus est: unde potentia dicitur esse perfecta secundum quod determinatur ad suos actus. . . . potentie autem rationales, quæ sunt propriæ hominis, non sunt determinatæ ad unum (ut naturales nempe vires) sed se habent indeterminate ad multa; determinantur autem ad actus per habitus. Egregius est ea de re Ciceronis locus (b), ut, inquit; in malis attingit animi naturam corporis similitudo, sic & in bonis: sunt enim in corpore præcipua; pulchritudo, vires, valetudo, firmitas, velocitas (quæ scilicet sunt affectiones corporis membra & vires perficientes): sunt item in animo. Corporis temperatio; quum ea congruunt inter se; e quibus constamus;

tempus est beatum, eoque beatius, quo voluptas illa intensior & diuturnior; contra duratio perceptionis molestæ, seu minus amabilis, tempus est miserum, ac miserius, pro ejus intensitate, aut diuturnitate majori. Demum perceptionum amabilium summa beatitudo est: molestarum summa miseria. Quumque Auctor doctus sibi persuasisset ex accuratissimo; ut inquit; calculo in vita humana; perceptionum amabilium summam longe excedi a summa molestarum perceptionum; inde conclusit; longe esse in vita humana majorem miseriam; quam felicitatem (Biblioth. Raisonnée an. 50. par. 2. art. 3.) Quum hominis docti conclusionem nec Auctores hujus Bibliothecæ probant, nec ego veram puto; qua de re dicitur loco suo:

(a) Secunda part. qu. 55. art. 1.

(b) Tuscul. IV.

*mus; sanitas sic animi dicitur, quum ejus judicia, opinionionesque concordant, eaque est animi VIRTUS . . . Et ut corporis est quædam apta figura membrorum, cum coloris quadam suavitate, eaque dicitur pulchritudo: sic in animo, opinionum judiciorumque æqualitas Et constantia cum firmitate quadam Et stabilitate virtutem subsequens, aut virtutis vim ipsam consequens, pulchritudo vocatur. Neque vero ab ea definitione nisi verbo genus, distat Augustini virtutis definitio, ut sit bonus usus liberi arbitrii. Si is disserit, ut tria bonorum faciat genera, magna, media, & minima, hinc addit (a) quod in mediis bonis invenitur liberum arbitrium; quia Et male illo uti possumus, Et tamen tale est, ut sine illo recte vivere nequeamus. Bonus autem usus ejus jam virtus est, quæ in magnis reperitur bonis, quibus male uti nullus potest.*

*Renatus Cartesius (b) sic eam in rem scripsit. Secunda est (regula bene vivendi & beate) ut sit semper in firmo Et constanti proposito ea omnia faciendi, quæ SUA RATIO ipsi suadebit, nec passionibus suis aut appetitionibus ab hoc abduci se permittat. Atque hujus propositi firmitudinem pro virtute habendam esse existimo; quamquam haud scio, virtutem fuisse ab ullo unquam ita explicatam. Ego vero tantum abest ut hanc virtutem dicam, ut potius vitiorum omnium hoc caput faciam, pertinaciter ex propria ratione vivere, quum non brevissima tantum ea sit, sed in plerisque falsa, semper inconstans & levis. Gravissime potius præcipit Salomo, ne sapientiæ tuæ innitaris. Scio veteres plerosque Peripateticos & Stoicos, virtutem habuisse constanter ex recta ratione vivere, plenius certe ii, qui non ex propria ratione, sed recta definivere virtutem; sed oportuit ut prius in eo convenirent, quid sit recta hæc ratio. Nam Zeno vera dicebat visa impressa effictaque ex eo quod est, qualia esse non possunt ex eo quod non est (c) ea dispelcebat in naturalia, & arte acquisita, illaque appellabat quæ infantes sine Doctoribus didicimus:*

*ratio*

(a) Lib. 1. Retract. cap. 9.

(b) Epist. part. 1. Epist. 4.

(c) Cicero in Lucullo.

*rationem ex naturalibus illis prænotionibus atque notitiis in animo collectis confici atque consummari & constare dicebat (a). At Academici hæc fluxa, atque idcirco falsa habebant, qui scientiam, adeoque rectam rationem non nisi æternarum & immutabilium formarum intellectionem appellabant. ARISTOTELES in Magnis Moralibus interroganti, quid & ubi sit hæc recta ratio, quum nihil haberet in promptu respondit, nisi apud semetipsum habes hujusmodi rerum sensum nihil efficitur (b) Alibi vivere secundum decreta Summi Imperatoris Dei, ex recta ratione vitam instituire pronunciat. (c) Sed cur ea decreta non protulit? ut sciremus, unde recta ratio exordiat (d) Henricus Morus virtutem hunc in modum diffinivit, intellectualis vis animæ, qua impressionibus animalibus, sive passionibus corporeis ita dominatur, ut in singulis actionibus illud facile prosequatur, quod absolute & simpliciter optimum est. (e) Duo sunt in ea definitione, quorum alterum controversum est, alterum obscurum. Primum, quum dicit vim animæ, si quidem ingenitam intelligit, quod ille propendit, rem maxime controversam definitione sua complectitur: nam acquiratur ne virtus, an nobiscum nascatur, quæstio fuit inter Græcos Philosophos diu vexata, nec unquam definita. Si autem acquisitam, quum naturales virtutes definiat, non Theologicas, æque non possint nisi habitus esse; non erat cur diserte negaret virtutes esse habitus. Alterum; definire apte oportuit, quid illud sit optimum, quod virtus persequitur: nam & id valde incertum inter Philosophos extitit.*

Joan-

(a) *Plutarch. l. 4. de Placit. cap. 11. vide & Petrum Valentiam ibi erudito libello Academica inscripto.*

(b) *Lib. 2. cap. 10.*

(c) *Moral. Eudem. lib. vii. cap. 15.*

(d) *Videri possunt, quæ de veritate hac reali, qua informata ratio recta est, & vitæ regula differit Ashley Sykes, quem in prima parte laudavimus.*

(e) *Enchiridio Ethico lib. 1. cap. 3.*

Joannes Franciscus Buddeus (a) acerrime in vulgatam hanc virtutis definitionem invehitur, in Scholis, inquit, Theologorum, imo ne Philosophorum quidem, locum non invenit recepta illa, & multorum errorum genitrix definitio . . . enim vero bonarum actionum exercitio quod virtus proprie & accurate sic dicta acquiri possit, experientiæ repugnat, multo autem magis rationibus Theologicis. Itaque ille virtutem definit, constans & serium studium se in omnibus ad voluntatem numinis componendi: eam vero donum Dei esse pronunciat. Sed si penitius humanam naturam consulisset, nec nimium indulisset sectæ genio, haud confidenter dixisset, priorem illam definitionem experientiæ repugnare, & Theologiæ. Scilicet & experientia discimus ex sola Naturæ lege ad morales virtutes se plurimos composuisse, ut exemplaria earum virtutum etiam a primis Christianis fuerint habiti; & id non taceant Scriptores Sacri utriusque instrumenti. Non ignoro, veteres quosdam Christianos Theologos negasse videri ullam veram fuisse virtutem moralem in Gentilibus, in primis Augustinum; tamen quum & universa historia refragetur; & quosdam virtuosos memoret veteris testamenti historia, ut Abimelechum, Cyrum, alios; & ipse agnoscat Augustinus de Civitate Dei, Deum Romanorum veterum virtutes dum remuneraretur, imperii dilatasse fines; & Paulus in Epistola ad Romanos, scribat *Gentes dum ea quæ legis sunt faciunt natura, ipsos sibi esse legem, quippe qui ostendunt opus legis scriptum in cordibus suis*; qui dicit eam doctrinam experientiæ & Theologiæ repugnare, imperitiam & humanæ naturæ, & Theologiæ patefacit.

Perpendenda nunc paucis est Spinozistica virtutis definitio: *per virtutem*, inquit, & *potentiam idem intelligo, hoc est virtus, quatenus ad hominem refertur, est ipsa hominis essentia, seu natura, quatenus potestatem habet quædam efficiendi, quæ per solas ipsius naturæ leges possunt intelligi* (a). Quum definitiones, quæ

Tomo II.

C

ex-

(a) In Theolog. Morali cap. I. Sect. 4. ad §. 126.

(b) Eth. part. IV. def. 8.

explicant res ipsas, debeant esse veræ, & a propositione vel axiomate non differre, ut idem homo agnoscit (a), videamus utrum hæc sit vera. Quoniam Huic virtus est ipsa potentia naturalis, ea congenita est, & immutabilis: virtutes ergo nullæ exercitatione acquiruntur, nullæ amittuntur contrariis habitibus; adeoque tota hominum falsa est historia & vita; egregie prorsus! nempe qui a sensu hominum communi discedit, non potest nisi perridicula effutire, inquit accurate Aristoteles.

Tandem extitere is, qui virtutis nomen omne inane esse dicerent vocabulum, aut virtutem non esse nisi quod sit utile. Vulgatum illud Epicureorum est,

*Sola est utilitas iusti prope mater & æqui.*

Memorable est Bruti illud morientis, ob infelix virtus! Ita ne quum nihil quam nomen esses, ego te tanquam rem aliquam exercui? (b) Cujus Epicurei vocem approbat Florus: sed quanto efficacior est Fortuna, inquit, quam Virtus! Et quam verum est, quod moriens efflavit; non in re, sed in verbo tantum esse virtutem! (c) Quæ pestifera opinio mascule loco suo confutabitur (d).

PO-

(a) Ep. 27. (b) Plut. in Bruto.

(c) Flor. lib. 4. cap. 7.

(d) Dicamus hic pauca in antecessum, ostendamusque virtutem & esse, & ad vitam sapienter transigendum esse necessariam, nec nomen istud inane esse.

I. Ac omnium primum, ita natura comparati sumus, ut 1. & beati esse velimus. 2. & ut simus beati ipsi nobis sufficere nequeamus. 3. ac propterea ab externarum rerum usu plurimum nostra felicitas, vel miseria pendeat.

II. Jam externæ res nobis utiles aut noxiæ esse possunt, seu nos conservare, vel destruere; unde rerum distinctio facta, ut aliæ sint bonæ, aliæ malæ, & quidem bonæ, vel malæ, magis vel minus, prout magis, vel minus cum natura nostra consentiunt, vel pugnant.

III. Hæc realia sunt, seu natura ipsa rerum continentur. Nihil est in illis puræ imaginationis. Sed & hoc reale

## POSTULATA.

I. **P**hilosophari oportere ex ideis, quas habent homines: tota enim nostri cognitio ambitu idearum nostrarum continetur: adeoque contentos esse debere ea scientia; quæ ex huiusmodi ideis nascitur. Si quis igitur

*reale est; hæc externa bona, vel mala usu magis; quam re nobis esse quod sunt. Nam quamquam externæ, ut dixi, res ita natura constitutæ sunt; ut aliæ nobis prodesse, aliæ nocere possint; usu tamen fit, ut reapse aliæ profint; aliæ noceant.*

IV. Tota igitur natura nostra sic instituenda est ac conformanda; ut aut in recto harum rerum usu non peccet, aut peccet saltem quam minimum. Nam quando his utendum necessario est (I. II. III.) ut simus felices; id quod naturæ ipsius necessitate cupimus (I. 1.) & nec vero obtinere possumus, nisi recto usu quippe quod usu fiat, ut earum aliæ reapse bonæ sint; aliæ malæ (III.); nisi miseriam nobis consciscere velimus; assuescendum est huiusmodi rebus bene uti.

V. Nemo autem his rebus bene unquam utetur; nisi eas probe cognoverit, ac non modo bonas a malis accurate discernerit; sed earum præterea; quoad fieri potest; intensitates perpendarit. Neque enim ad rectum externarum rerum usum satis fuerit; scire; quæ utiles & bonæ; quæ sint noxiæ: intelligendum illud etiam est; quatenus utiles aut noxiæ sint; Scilicet usu plerumque venit; ut operæ sit premium minus bonas repudiare; quo obtinere possimus meliores; aut minoribus malis subesse, quo maiora caveamus. Sunt hæc perspicua.

VI. Qua ex re fit; ut qui habitus mentis ad hæc nos conformant, ii virtutes intellectuales non modo nominentur, (def. 17.) sed sint. Est enim reale quoddam res eas, ex quibus beatitudo; aut miseria nostra profisciscatur ita internoscere, ut recte & præclare uti possimus. Virtutes igitur intellectuales inane vocabulum non sunt, nisi his hominibus; quorum non interfit, beati ne, an miseri

tur in philosophia ea nobis proponat, quæ omnem nostrarum idearum ambitum, omnemque perspicientiam fugiunt, is impostor habeatur.

Sch.

vivant, quos ego, si qui sunt, a tota hominis natura alienos esse puto.

VII. Jam perpetuis experimentis discere possumus, evenire in hominis natura morali, quod in iis corporibus, quæ sese attrahunt, aut repellunt. Nam & quum se attrahunt, in ratione distantiarum attractio minor est, aut major, maxima in contactu: & quum se repellunt, eo vehementior repulsio, quæ viciniora. Enimvero & in bona naturæ quodam impetu ferimur, estque hic naturæ impetus in bonorum complexu maximus, pro distantia major aut minor: & mala impetu item naturæ refugimus, ac præsentia maxime, distantia, in ratione earum a nobis intervalli. Erant autem huiusmodi impetus naturæ nostræ finitæ, sibi quæ ut sit, & ut beata sit ipsa per se minime sufficienti, conservandæ necessarii. Nam nisi ab externis rebus tangi illa posset, ut in alias attractione quadam, ferretur, ab aliis naturali repulsione, fugeret, ne uteremur quidem illis, idest in nos conservandos ac tutandos minime impelleremur.

VIII. Sed fieri potest eas ob causas, quas ego in Appendice ad caput quartum recensebo, ut huiusmodi impetus, quos affectus diximus, modum excedant, idest, ut minime bonorum, vel malorum intensitati sint proportionati; id quod quum evenit, necesse est ut perturbemur, ac inquieti & miseri simus. Itaque fit, ut quum affectus sint naturæ conservandæ necessarii, perturbationes contra, seu affectuum excessus cum nostra conservatione ac felicitate pugnent. Amare, quæ odisse debueramus, est recte mala petere, idest infelicitatem nobis consciscere: Odisse quæ sunt amanda; est ea repellere, quæ naturæ sunt aut necessaria, aut consentanea, adeoque iis nos privare, quæ nos conservare ac beare possunt. Tum ea magis amare, quæ minus sunt bona, minus, quæ majora; odisse vero maxime, quæ minima sunt, mala, minime, quæ sunt maxima, non potest non totum æquabilis ac beatæ vitæ ordinem conturbare. Id quod nemo est, qui non in se possit continenter experiri, ubi parum attente vivit.

IX.



Sch. Ad coercenda ingenia lascivientia, & nimium Fanatismi amantia id postulatum est necessarium. Quis enarret quot monstra errorum in Rep. literaria produxit am-

IX. *Ac intelligo ego, difficillimum esse, ita naturam nostram moderari & regere, ut ea perpetuo rationi pareat, ac affectus suos ad res externas accurate componat. Sed est profecto quodam prodite tectus, si non datur ultra, quod ille dixit. Potest ita diuturna doctrina, & assuesfactione conformari, ut si non ex regula mathematice, at modificetur tamen utcumque; ac æqualitati illi geometricæ accedat quam fieri potest proximius. Sed nec insicari possumus id efficere plures. Hujusmodi habitus; quibus affectus intra suos cancellos continere didicimus, virtutes morales appellavimus (def. 17.) Virtutes ergo morales & possibiles sunt, & sunt in plurimis; adeoque inane non sunt vocabulum. Quinimo quum nemo quiete ac tranquille vivere possit, ubi affectus turbent (VIII.); turbas autem affectuum hujusmodi comescant morales virtutes (IX.): qui sapienter felicitati suæ studet, is sedulam dare debet operam, ut hujusmodi instruatür virtutibus.*

X. *Neque vero hæc ita ratiocinatione constant; ut non vita etiam hominum egregie confirmetur. Cæteris enim paribus, qui & ratione sunt sana ac ampla præditi; quique ex rerum natura ac relationibus vivere assueverunt, vitam agunt multo tranquilliores, quam aut stupidi & bruti; aut animo impotentes, quique sibi perpetuo turbas creant. Nam ut demus homines esse plures malos & scelestos, ut velint ex libidine sua imbecillos ac bonos infelicitare; habent hoc viri docti; perspicaces, boni, proprium ut nec sibi ipsi mala comparent, nec aliis causas malefaciendi præbeant, & oblatas doctæ evitare sciant. Quod quanto opere humanæ vitæ beatitudini conferat, ii demum novere, qui sua inscitia; imprudentia, temeritate eo devenere, ut perpetuo miseri sint.*

XI. *Quibus rebus omnibus si addamus pietatem adversus Deam, quæ virtutum omnium est maxima ac præcipua, quaquæ sit, ut mala etiam ingentia fortiter toleremus, intelligimus proculdubio, quam jucunde sit ex virtute vivere. Ac*

ambitio novæ, & mortalibus omnibus ignoræ atque incomprehensibilis sapientiæ? oportet in ea Republica esse omnino hospitem, qui nesciat. Nempe dum homines supra mortalitatem conantur, dum nova se & pulcherrima invenisse putarent, ea in medium protulere, quæ nec ipsi unquam, tantum abest ut alii, intellexere: nec animadverterunt, se pro sapientibus deridiculos fecisse. Nam si quæ est Respublica, in qua minus occultæ imponendi artes, &, ut vulgo dicunt, *mysteria scientiarum*, tolerantur, ea profecto est literaria. Possunt hi quidem sub initium rei novitate, & incomprehensibilitate sulcipi; at *quum commenta deleat dies*, Systemata hujusmodi nihili regnare non possunt. Inde sunt illa, Pythagoræ numeri & *Metempsychosis* (A); *ideæ* Platonis æternæ ante res omnes; Aristotelis *materia unica immensa & simplex*, & *formæ* Scholarum *substantiales*, intellectus Arabum *universalis*; *Anima mundana* & rerum omnium *sensus* & *perceptio* Campanellæ nostri, Fluddi, Cudworthi; *Systema Causarum occasionalium*, & *cognitionis omnium in Deo* Malebranchii; *harmonia* Leibnitii *præstabilita*, & *Monades*, quarum quælibet integrum referat universum; & trecenta alia, quæ, nisi fortassis Satur-

ni

*addenda omnino est, invocandusque Deus sedulo, si pacate vivere velimus. Est enim natura nostra talis, quam difficillimum sit, ut dictum est, ad regulam geometricè componere. Epictetus quum de compescendis animi commotionibus differeret, nec in nobis satis opis ad eam rem inesse intelligeret, certamen, inquit gravissime, magnum est opusque plane divinum. Dei igitur memineris: eum invoca opitulatorem, & auxiliatorem, quemadmodum Nautæ Dioscuros, quum in tempestate navigant. Quæ enim major tempestas, quam quæ oritur ex imaginationibus violentibus ipsamque rationem elidentibus? Arrian. lib. 2. cap. 1. in Epict.*

(A) Is ut opinionem eam suis altius imprimeret, in subterranea domo diu latuit, creditusque est mortuus: deinceps squalidus, ac mortuis concolor quum inde evassisset, magnam sui admirationem fecit ut rediuvivi. Laert. in vita Pythagoræ.

ni homines, intelligit nemo. Et potuissent observare Philosophi isti, plerosque, qui maxime nova crediderunt detexisse, aut maxime vetera, recinisse, aut intelligibilia, adeoque terminos suos habere mentes humanas, ut quos qui prætergredi volunt, aut in antiqua ruant, aut in omnibus ignota intermundia.

II. Ea inter nos habere certa, quæ aut clara intuitione & conscientia; aut clara demonstratione ab omnibus intelliguntur: huic veri characteri, qui diffidit, is prima Reipublicæ literariæ fundamenta subvertit.

*Sch.* De veri *criterio* nemo ignorat quanta animorum contentione disputatum sit. Veterum ea de re concertationes omnes, & sententias docte enarrat ornatque, quem superius laudavimus, Petrus Valentia in *Academicis*, docto opusculo (a). Eæ ad tria genera referri possunt: nam Epicurei & Stoici ad claritatem *phantasiarum* & *perceptorum* confugiebant: Platonici, qui corporum ut non *entium*, idest nec æternorum, nec immutabilium, nullam esse Scientiam, sed opinionem tantum, docebant, ad claram intellectionem idearum æternarum, quas Summus rerum opifex Deus cæteris mentibus participat: Sceptici nullum esse definiverunt. Omissis nunc Scepticis, adversus quos in priori parte disputavimus; Recentiores omnes philosophi claritatem & evidentiam tesseram esse veri uno ore fatentur, sed in eo distant, quod quidem Platoniam doctrinam, alii Stoicam restituere conati sunt. Nempe alii claras æternarum formarum & causarum intellectiones tantum veras dicunt, ut ii, quibus mens est incorporea; alii quæcumque clara percepta & visa, ut recentes Epicurei. Cartesius claram & distinctam intellectionem esse criterium veri sic probat (b): *quoties voluntatem in judiciis ferendis ita contineo, ut ad ea tantum se extendat, quæ illi CLARE & DISTINCTE ab intellectu exhibentur, fieri plane non potest uterrem, quia omnis clara & distincta perceptio proculdubio est aliquid, ac proinde*

C 4

a ni-

(a) Excusum est Antuerpiæ anno 1596. Author eruditus & perspicax Zafrensis in extrema Bætica. Copiosius Villemandy in Scepticismo debell.

(b) *Medit. 4. prope finem.*

*a* *nihil* esse non potest, sed necessario Deum authorem habet, Deum, inquam, illum summe perfectum, quem fallacem esse repugnat; ideoque proculdubio est vera, Nec hodie tantum didici quid mihi sit cavendum, ut nunquam fallar, sed simul etiam quid agendum, ut assequar veritatem: assequar enim illam profecto, si tantum ad omnia quæ perfecte intelligo, satis attendam, atque illa a reliquis, quæ confusius & obscurius apprehendo, secernam. Sed quum hæc doctrina videatur etiam complecti imaginationes & sensationes claras, monuere deinde Cartesiani, solam purarum intellectuum claritatem veritatis esse insigne; nam multiplicitate experientia didicisse arbitrantur, ab imaginationibus & sensationibus alioquin claris pluries nos fuisse deceptos. Ita Malebranchius.

Author Tractatus de Emendatione intellectus (*a*) quum omnes cognoscendi modos ad quatuor retulisset, auctoritatem, experientiam, analogiam, & cognitionem rei per suam essentiam, vel per proximam suam causam, addit, solum quartum modum comprehendere essentiam rei adæquatam, & absque erroris periculo. Sed pergit quærere, qui sit character veritatis hoc modo perquisitæ? atque concludit, patere, quod ad certitudinem veritatis nullo alio signo sit opus, quam VERAM habere IDEAM: Ex quibus, addit, rursus patet, neminem posse scire quid sit summa certitudo, nisi qui habet adæquatam ideam, aut essentiam objectivam alicujus rei; nimirum quia idem est certitudo, & essentia objectiva, idest idea. Quum itaque veritas nullo egeat signo, sed sufficiat habere essentias rerum objectivas, aut, quod idem est, ideas, ut omne tollatur dubium; hinc sequitur, quod vera non est methodus signum veritatis quærere post acquisitionem idearum. Hæc explicat clarius paulo inferius hunc in modum: nam quum videret ad hoc statuendum, oportere reperire characterem verarum idearum, quibus distinguere possint a falsis, subdit; nec dicendum hanc differentiam (veræ & falsæ ideæ) ex eo oriri, quod cogitatio vera est res cognoscere per primas suas causas, in quo quidem a falsa valde differret..... cognitio enim vera etiam dicitur, quæ

(a) B. D. S. in oper. posth. pag. 362.

*quæ essentiam alicujus principii objective involvit, quod causam non habet, & per se, & in se cognoscitur. Quare forma veræ cogitationis sine relatione ad alias debet esse sita . . . quare id, quod formam veræ cogitationis constituit, in ipsa eadem cogitatione est quærendum &c.* Ex hujus igitur authoris sententia, vera scientia est cognoscere res quidem æternas in se, & sua essentia; creatas in suis causis immediatis; forma autem, seu character veræ scientiæ sunt ipsæ veræ ideæ, quæ sui veritatem evidentia & perspicuitate patefaciant. Eadem doctrina & veterum Platoniorum fuit, & Augustini, & B. Thomæ, & Malebranchii; nempe veram scientiam esse, æterna in seipsis, facta in suis causis cognoscere; criterium perspicuitatem hujus cognitionis. Neque quidquam dici potest verius, si ab ea doctrina removeantur quædam, quæ Fanatici quidam addidere.

Vir mihi amicissimus (a) dum hanc doctrinam illustrat, non satis expedito, ut videtur, quæstionis statu, duo miscet, & *veram scientiam, & veræ hujus scientiæ characterem apud homines*. Duo illa in primis sunt distinguenda, ut nimirum sciamus, & *quæ sit methodus veræ scientiæ acquirendæ, & quæ tessera hujus veræ scientiæ*. Nihil dici potest verius, neque ea unquam de re dubitatum est, tum esse scientiam perfectam, atque veram, quum res & in sua essentia, & in suis causis immediatis, & in æternis atque immutabilibus sui rationibus perspiciuntur; sed duo homines exquirunt; 1. quæ sit methodus ad eam scientiam perveniendæ: 2. quæ tessera nos pervenisse, neque dum pervenisse credimus, nos decipi. Ea potius præstare debuit Author noster, quam Platoniorum illam coctam crambem recoquere. At is generatim pronunciat, *Criterium veritatis consistere in eo, ut res in æternis suis causis & principiiis æternis, & quidem æternas causas & æterna principia in Deo cognoscamus*. At non erat hæc quæstio; sed hæc alia; *versetur ne inter homines insigne aliquod, tessera, character, quo esse possint certi, se veram hanc scientiam acquisivisse?* Ex. g. Scio omnes rectas a circuli

(a) Magli trattato del Criterio della Verità.

culi centro ad circumferentiam esse æquales: æquales in circulo rectas æqualiter a centro distare: si in circulo duæ rectæ se secuerint, rectangulum sub segmentis unius, æquale esse rectangulo sub segmentis alterius comprehenso, & trecenta alia ex natura circuli manantia. Rogo nunc, unde scio esse vera? quia, inquit, in sua causa immediata, idest in essentia circuli, ex qua illa proficiuntur, vides. Rursum rogo; cur scio me illa in essentia circuli *videre*? nempe, quod hic respondendum est, id demum est criterium veri. Quid? non vides; nihil posse homines respondere, nisi se *clare & distincte* id intelligere? Non igitur apud homines esse alia tessera veræ scientiæ potest, nisi *claritas*, & *perspicuitas* cognitionis rei aut in sua essentia, aut in suis causis. Addendum igitur illud erat tractationi illi alioquin accuratissimæ, & si humano generi esse Author utilis voluisset, methodus demonstranda, qua ad illam sapientiam itur: nam dicere criterium veri esse omnia in Deo videre, idest in æternis suis rationibus, & agnoscere interim, naturam Dei omnibus esse imperviam, nescio utrum sit homines in Trophonii antrum dejicere. (a)

III. Si principia demonstrationum sint *evidentia*, & consequentia *necessaria*, non esse de demonstratione dubitandum, idcirco quod non ita afficiamur conclusione, ut omnis abscedat scrupulus: id enim fieri potest ob inveteratâ infantia, vel phantasiæ præjudicia.

Schol. Cartesius (b) hoc ejus postulati protulit exemplum: clara demonstrationes ostendunt Solem multo esse Tellure nostra majorem: interim conclusio nullo modo demit sensuum præjudicium. Addo, demonstratur evidentissime, nos cuncta corpora, corporumque colores, figuras, distantias, motum, intra nos cernere, non extra nos: interea ne philosophi quidem ipsi vim præjudicii & sensuum hac in re superare possunt. Recte igitur monebat Plato, atque inde Augustinus, ut in veritate perquirenda phantasiam, & sensus caveamus: plurimum enim serenitati mentis officere possunt, at-

(a) Vide quæ diximus in Proleg. p. part. §. 7. & 8,

(b) Respons. ad objectiones sextas.

que nos a veritate deturbare in falsa præjudicia . Ex quo intelligi potest nec veteres Epicureos , & Stoicos , nec novellos *materialistas* , qui omnia ad sensum & phantasiam referunt , veram insistere solidæ scientiæ viam .

## P R O P O S I T I O N E S

## C A P . I .

*De natura mentis humanæ .*

*Prop. I.* **S**I mens aut corpus est , aut corporis proprietates , qualitas , affectio , non vero substantia a corpore distincta , idearum repræsentatio , & perceptio , tum judicium , & ratiocinatio , non aliter fieri possunt , quam motionibus partium corporis , nimirum actione & reactione fibrillarum , & nervulorum sensuum , & cerebri , aut cujuscumque alterius fluidi actione .

*Schol.* Scilicet nullam aliam actionem in corpore intelligimus ; & reprehendendi non sumus , si ex iis philosophamur ideis , quas omnes habent homines ( ex post. 1. ) Plura congeffit Henricus Morus , ut hanc propositionem confirmaret ( a ) . In præfatione ad libros de immortalitate animæ sic scribit : *Non difficile erit irrefragabilia producere argumenta ad evincendam veritatem supradicti axiomatis* , quod sensus nempe & perceptio in materia , supposito nihil præter materiam in mundo existere , idem est realiter quod corporeus motus & reactio . *Manifestum enim est in sensatione , quum semper externus motus fit ab objectis , quando sensus nostri afficiuntur . Quodque interna cogitatio sic perficitur ex calore patet , quem qui attentius cogitant , in seipsis excitant . Quam ob rem omnem cogitationem universam aliquis motus corporeus comitatur . Et si nihil præter materiam fit in universo , ipsa cogitatio realiter idem est , quod motus corporeus . Præterea quemadmodum in sensatione motus corporeus prior est , & perceptio sequitur ; ita nec-*

cessa-

( a ) *Lib. 2. de immortalitate Animæ cap. 1. & præfat. ad hos libros §. 5.*

*cessarium est, ut universim in omnibus internis etiam cogitationibus certi quidam motus corporei immediate præcedant istas perceptiones, quamquam admitteremus materiam a seipsa moveri; nullus enim sensus inde oriretur, sine resistantia alterius alicujus, in quod alterum quasi impingat. Adeo ut vel subtilissima materia, nisi in ea resistantia sit, in eamque impressio, nec magis capax esset cogitationis, quam Rhombus plumbeus, Ligulae aurea. Ac proinde modo fateri velimus (quod nemo nisi mente captus est negaturus) quod Rhombus plumbeus, Ligulae aurea nullam omnino habet cogitationem, aut perceptionem sine aliquo ictu, aut allisione pro illorum magnitudine & soliditate; subtilissima materia similiter necessario nullam habet sine aliqua proportionali impressione, aut resistantia. Unde manifestum est quod corporea reactio, sive collisio præcedit perceptionem, quodque omnis perceptio, quasi tactus quidam est, seu palpatio, quæ tamdiu durat, quamdiu durat resistantia hæc, motusve impressio; illa vero cessante extinguitur, materia evadente æque stupida, atque Rhombus plumbeus. Quodque proinde quæ admodum in genere semper motus corporeus est, ubi est cogitatio, ita diversificatio motus hujus, & collisionis, cogitationum diversificationem parit: atque sic, quasi junctis manibus, una perpetuo incedunt, altero nunquam introducto sine ductu alterius, nec durante diutius, quam alterum durat. Verum prout calor deperditur (qui haud mediocrem supponit alicujus admodum subtilis materiae motum sive agitationem), ita intellectus noster & imaginatio languescunt, ipsique sensus deficiunt, ut qui moveri nequeant ab impressione externorum objectorum, aut in debito liquiditatis & agilitatis gradu non constituantur, ac proinde corpora in morte æque insensibilia evadunt, atque massa lutea. Omnis igitur sensatio & perceptio re vera idem est, quod motus, & reactio materiae, si nihil sit præter materiam in universo.*

*Scio adesse, qui opponant, esse hæc argumenta philosophica negativa, quæ nos ipsi alibi, velut nullius ponderis, rejecerimus. Falso. Argumentum negativum philosophicum est, in quo principium est id, quod non*



*intelligimus*; contra vero hoc in loco ex iis, quæ cuncti homines intelligimus, actiones scilicet corporis omnes esse *motiones*, seu mutationes loci, situs, figuræ &c. concludimus, cogitationem, si qualitas est corporis, esse motionem.

Reponunt, quum ignota nobis sit intima corporis essentia, concludi, nisi quam imperitissime, non posse, nullas esse in corpore alias actiones quam, quæ *motiones* dicuntur, idest mutationes loci, situs, figuræ.

Præterquam quod *magnetismus*, & universalis partium materiæ *attractio*, quam tanta consensione Newtoniani statuunt, actiones sunt longe diversæ ab iis *motionibus*, quas ita vulgo appellamus.

Tum pleræque sunt actiones, quæ consistunt in *conatu* ad mutandum locum, situm, figuram &c., sed ex quibus nulla nascitur hujusmodi mutatio, velut gravitationes pendulorum immobiliter consistentium, alique conatus virium, quas *mortuas* vocant Philosophi.

Ad hæc, omnes vires activæ, quæcumque in corporibus reperiuntur, haberi debent ut incorporeæ (prima part. prop. 96.); quod si hoc non adversatur naturæ corporeæ, ne *cogitare* quidem: potest igitur esse *vis cogitandi*, ut *vis motrix*, ejusdem substantiæ corporeæ qualitas (a): maxime quum substantia corporea, nihil aliud sit, uti Leibnitio placet (b), præterquam subiectum quoddam, cujus tota essentia in *actione* est posita. Enim vero nos externarum rerum tantum percipimus quantum in nos agit: nihil externum, quod in sensus nostros, seu *mediate*, seu *immediate*, non agat, ullo modo cognoscimus. Ex. g. percipimus tactu & oculis extensionem, idcirco quod ex pluribus spatii partibus, oculus, aut tactus concutitur actione quacumque: gravitationem, divisionem eodem modo, illam actione in tactu, hanc inæquali actione ex æquali spatio. Figuram, dum major actio minore terminatur, aut contra minor

ma-

(a) Hæc objectio proposita est Cartesio ab Auctore objectionum quintarum viro in primis docto & perspicaci.

(b) Legatur *Examen des Princip. du R. P. Mallebranche* in *Miscellaneis Leibnizii, Newtoni &c.* tom. 2.

maiore ; nec enim percipimus globum ligneum , nisi quia actio ex dato ligno undequaque terminatur æqualiter ab actione aeris , aut alterius extensi : Quod si tota substantiarum natura actio est , quid vetat posse eam actionem esse multiplicem ; ut alia vis motrix ; alia cogitans ? Non necessario ergo concluditur , nullam esse aliam substantiæ corporeæ actionem præter motionem &c.

Tandem ; quid vetat ; quin eadem substantia ut *vi motrice* , ita etiam *vi cogitandi* a Deo sit ornata ? plurimis ; inquit ; demonstrat Lockius ; non id esse *αδύνατον* ( *a* ) . At enim ; intelligi non potest ; qui possit corpus cogitare ? opposuit Stillingfleetus ( *b* ) . Fa-teor ; inquit alter : at velle inde concludere ; non posse id Deum efficere , est eam divinæ potentiæ tribuere extensionem ; quæ æqualis sit capacitati mentis humanæ . Quod si ea ; inquit ; ratiocinandi regula vim ullam habet ; concludas etiam oportet ; corpora a corporibus non attrahi ; bruta nec sentire ; nec hominem ; quantus quantus est , exprimere actionibus suis ; & similia ; quod ea non intelligas . Sed , pergit , intelligis tu expeditius ; qui mens ; aut ulla alia substantia cogitet ? Sed , repperit Stillingfleetus ; *quum nostra cognitio ideis nostris contineatur ; idea vero apud nos materiæ sit substantiæ extensæ & solidæ ; qui dicit materiam cogitationis esse capacem , Materiæ , & Mentis ideas miscet* . Reponit alter ; genericam materiæ notionem esse rei extensæ & solidæ : at nihil prohibere posse ; quo minus materiæ partibus aliquibus ; seu corporibus quibusdam alias qualitates Deus addat . Nec enim destruit notionem materiæ ; qui rei extensæ & solidæ motum addit ; vegetationem , attractionem . Quod si hæc genericæ materiæ naturæ addi possunt ; quin materiæ essentia destruat ; poterit eodem modo addi & *vis perceprix* & *ratiocinatrix* . Quæ quum sint , vera esse non potest ea propositio ; *cogitationem ; si sit substantiæ corporeæ qualitas ; continuo esse motionem* .

Sed hæc omnia talia sunt ; quæ tantum abest ; ut  
no-

( *a* ) Vide notam Acoſtæ Galli Lokii interpretis , de intellectu. hum. lib. iv. cap. 3. ad §. 6. ( *b* ) Ibid.

nostrum illud axioma obscurant, aut infirmant, ut expedit potius, & confirmant. Tota enim superior oratio huc spectat, posse fortassis esse in corpore vim aliam a motrice distinctam, quæ sit vis cogitandi. Rogo hic, vis illa exferit actiones suas motionibus corporeis, an aliis alterius generis? Si primum, non est cur adversus propositionem illam declament. Si posterius, quum actiones generum sint diversorum *motus*, & *cogitatio*, ut aliæ intrinsecus ab aliis non pendeant, & vires ipsæ diversorum erunt generum, nec a se mutuò pendent: & quum tales sint actiones huiusmodi, ut in eodem simplici subiecto illæ has destruant, quippe quæ *totis essentiis* differunt; vires quoque ipsæ *totis essentiis* distrahunt, ut idcirco altera alteram destruat: ex viribus autem *diversarum essentialium* conflare *substantiæ*, idest rei simplicissimæ (p. p. prop. 22.) essentia nequit; substantiæ ergo corporeæ *primæ* nequeunt duplici illa vi constare. Quocirca aut cogitationes nihil sunt præter motiones cerebri, siquidem sunt affectiones substantiæ corporeæ; aut, si motiones non sunt, actiones sunt substantiæ, quæ sit diversa a substantiis corporeis. Nec reponant, Deum id efficere posse, ut nimirum eadem substantia viribus diversorum generum sit composita; respondemus enim, non posse Deum efficere, ut eadem essentia velut A conflatur proprietatibus, quarum altera alteram destruat; quandoquidem idest impossibile intrinsecum (def. 9. p. p.) ad quod Dei potentia non pertingit. Quum autem earum duarum virium altera alteram destruat, quod inferius demonstrabitur aperte; fieri nequit ut eadem substantia ambabus sit prædita. Quod si fingere velint, creatam a Deo *fluidam quandam substantiam* naturæ diversæ ab iis corporibus, quæ cognoscimus; eique substantiæ per totum corpus nostrum diffusæ eam vim, qua cogitamus, tributam; isti aut hanc fluidam substantiam facient reliquis corporum viribus præditam, *soliditate*, *gravitate*, *divisibilitate* &c. aut non: si posterius, ea incorporea erit: si prius itidem conflabitur ex iis quæ se mutuò destruunt: nempe, ut dixi-

mus, & inferius lumus demonstraturi, cogitationem stare non posse in eadem substantia cum corporis notis proprietatibus.

Minus igitur absurde veteres Epicurei, quam recentiores isti, res sua composuere: nam illi, pernegata omni substantia incorporea, non videbant negari posse eas actiones, quas animo attribuimus, motiones esse corporeas. Idcirco Lucretius animarum constare ait particulis *per quam subtilibus perquamque minutis, atque agitatissimis*. In primis vero Hobbelius dum operationes mentis explicat, sensationes & cogitationes, sola *actione, & reactione* partium cerebri id efficit, ut, quum adversus istos præcipue philosophos disseramus, poteramus ea propositione uti sine ulla demonstratione, tanquam ea, quæ constet inter partes. *Sensio igitur, inquit (a), in sentiente nihil aliud esse potest, præter motum partium aliquarum intus in sentiente existentium, quæ partes notæ, organorum, quibus sentimus, partes sunt: nam partes corporis, per quas perficitur sentio, eæ ipsæ sunt, quas vulgo organa sensoria appellamus... Ex quo intelligitur, sensationis immediatam causam esse in eo, quod sensationis organum primum & tangit, & premit. Si enim organi pars extima prematur, illa cedente premetur quoque pars, quæ versus interiora illi proxima est, & ita propagabitur pressio, sive motus ille per partes organi omnes usque ad intimam. Quemadmodum & pressio extima procedit ab aliqua pressione corporis remotioris, & sic perpetuo, donec veniatur ad id, a quo phantasma ipsum, quod a sensatione fit, tamquam a primo fonte derivari judicamus... Quoniam autem motui ab objecto per media ad organi partem intimam propagato fit aliqua totius organi resistentia, sive reactio per motum ipsius organi internum naturalem; fit propterea conatui ab objecto conatus ab organo contrarius: ut quum conatus ille ad intima ultimus actus sit eorum, qui fiunt in actu sensationis; tum demum ex reactione aliquamdiu durante ipsum existit phantasma, quod propter conatum versus externa semper videtur tanquam aliquid situm extra organum. A sensatione ad ratio-*

(a) In Elem. Phil. cap. 25. art. 2. §. 5.

tiocinium explicandum sic porro pergit (a). *Ortus perpetuus tum sentientibus, tum cogitantibus phantasmatum idipsum est, quod appellari solet animi discursus; & communis est hominibus cum brutis; nam is qui cogitat transeuntia phantasmata comparat, idest similitudinem vel dissimilitudinem inter ea animadvertit. Distinctius hac de re eadem in Leviathane differit (b). Ut nullam, inquit, habemus imaginationem, quæ non ante fuit in sensu, vel tota, vel per partes, ita nulla est transitio ab una cogitatione ad aliam, cujus similis non extiterit ante in sensu. Cujus rei causa hæc est. Phantasmata omnia motus sunt interni, nempe motuum in sensu factorum reliquiarum: motus autem qui alii aliis succedunt in sensu immediate, remanent etiam simul, etiam post sensationem; adeo quoties redit cogitatio prior, prædominaturque, sequatur posterior, propter cohesionem materiarum motarum, quemadmodum aqua super tabulam planam, & lævem trahitur per viam, qua ducit digitus &c.*

Apparet hinc abunde, quæ ratione Epicurei, submota omni substantia incorporea, conentur ea expedire, quæ mentis sunt propria. Paulo autem pluribus id theorema explicuimus, quod fundamentum futurum est totius confutationis doctrinæ Epicuræ: ostendemus enim operationes humanæ mentis esse nullo modo posse actiones, & reactiones cerebri: ex quo consequitur actiones esse alterius subjecti, quod corpus non sit. Quam consequentiam, si primum illud demonstraverimus, inficiari, ut ex superioribus patet, nequeunt Hobbesiani.

*Prop. II. Nec iudicium esse ullum in nobis potest, nec ratiocinium, nisi plures eodem tempore Menti, quæcumque hæc sit, seu vi percipienti, obversentur idææ.*

D. Iudicium est perceptio relationis, quæ inter duas, aut plures idæas intercedit; ratiocinium vero perceptio relationis plurium iudiciorum (ex def. 4. & 5.): conferri autem nequeunt, nisi quæ eodem tempore percipiuntur, uti patet (A); ergo nec iudicium esse ullum

Tom. II.

D

in

(a) *Ibid.* §. 8.

(b) *Leviath. c. 3. sed & in libro de homine eadem repetit.*

in nobis potest, nec ratiocinium, nisi ideæ, quæ conferuntur, ei tempori, quo iudicium, aut ratiocinium fit, coexistant.

*Schol.* (A) sint duo tempora A, B, percipiatque Mens tempore A parallelogrammum, tempore vero B quadratum, evidens est, eam non posse percipere relationem æqualitatis, aut inæqualitatis, quæ inter duas illas figuras intercedit. Enimvero relationem illam non videt tempore A, quippe in quo sola parallelogrammi idea menti obversatur, non etiam quadrati: nec tempore B, in quo non igitur præsens est parallelogrammum, sed solum quadratum: minus etiam tempore C, in quo neutrum videt. Perspicuum ergo est, in iudiciis & ratiociniis ideas omnes, quæ comparantur, si quidem comparantur, necessario coexistere debere.

*Coroll.* Et quidem coexistere debent toti illi temporis spatio, in quo iudicium, aut ratiocinium vividum perdurat.

*Prop. III.* Si perceptiones sunt motiones cerebri, oportet ut tot sint in cerebro distinctæ motiones, quot diversæ & distinctæ ideæ nobis obversantur.

D. Nempe in ea hypothese, ratio sufficiens repræsentationis cujuslibet ideæ, aut phantasmatis, est & in actione objectorum externorum introrsum, & in reactione cerebri extrorsum (ex prop. I.): utraque autem, externa actio, & reactio interna sunt entia singularia, ut patet; *singularium* vero ea natura est, ut unum alterum non contineat; ergo una integra motio reactione & actione constans non potest nisi unius ideæ singularis rationem sufficientem continere: jam singulæ ideæ singularia objecta repræsentant, nulla plura (prop. 58. p. p.); ergo si ideæ sunt motiones cerebri, oportet &c.

*Schol.* Si quis, causa exempli, dicat, tonos chordæ non esse, nisi vibrationes, vel oscillationes chordæ, is ut explicet diversos tonos A, B, C, D, statuere debet distinctas, atque diversas oscillationes P, O, R, S. Ineptissime enim contenderet & perridicule eadem oscillatione P, produci distinctos diversosque tonos A, B, C, D. Eodem modo si ideæ sunt, quæ resultant ex conflictu actio-

*actionis & reactionis*, ut opinatur Hobbius, proculdubio quot sunt in nobis diversæ distinctæque ideæ, tot esse oportet distinctos, diversosque *conflictus actionis & reactionis* partium cerebri. Quod si idea sit aut sola actio introrsum, seu *inpressio* ab objecto in Cerebro facta, aut sola reactio extrorsum, eodem modo, tot actiones, aut reactiones esse debent, quot insunt cuilibet ideæ.

*Coroll.* Et quidem motiones hujusmodi tamdiu durare in cerebro debent, quamdiu ei vivide ideæ obversantur.

*Prop. IV.* Motiones corporeæ esse nequeunt in Indivisibili materiæ parte: neque idcirco in ea parte gigni ideæ Hobbesianæ.

D. Motus est actio, qua ens de loco extrinseco in locum extrinsecum transfertur ( p. p. def. 70. ): fieri ergo in indivisibili spatii, aut materiæ parte nequit.

Deinde ideæ Hobbesianæ sunt; quæ ex actionis & reactionis conflictu existunt ( prop. 1. ) adeoque aut motiones corporeæ, aut vivida inde existentia vestigia; quum autem motiones fieri nequeant in indivisibili materiæ parte ( ex hujus parte priori ); ne inde quidem resultantia phantasmata; (A) potissimum quum in tali puncto tamdiu durare distincti & diversi motus nequeant, quamdiu ideæ claræ & vividæ perdurant, quod necessarium factu est ex Coroll. prop. 3.

*Schol.* (A) Pluribus hanc propositionem confirmat Henricus Morus (a). Hæc, inquit, parvitas, quæ tam exigua est, ut partes integrales realiter distinguendas proprie non habeat, qui potest esse subiectum distincte receptivum adspæctus puta dimidiati horizontis simul? Quæ visio afficitur reali distinctoque motu a realibus distinctisque partibus objecti visi procedente . . . Præterea si hæc tam imperfecta parvitas distincte percipere potest objecta variegata, mira omnia sunt; ni itidem aeris, & atmospheræ particulas, luminis globulos, & subtilissimam quamque texturam partium corporum opacorum percipere possit. Ad hæc; objectum illud, de quo loquimur; iis coloribus variari potest; ut repugnet plane, ut una eademque particula.

D 2

illos

(a) *De immortal: Animæ lib. II. cap. I. axiome 24.*

*illos omnes simul recipiat : quoniam species eorum oppositæ non aliter communicari possunt isti particulæ , quam per contrarios motus , vel quæ æque eodem tempore sunt contraria , per quietem & motum .*

Duo opponi possunt. I. Varias illas objectorum representationes non variis motionibus fieri , sed variis diversisque conatibus . II. Eos conatus non esse simultaneos , sed successivos , tanta tamen cum celeritate factos , ut videantur simultanei , quod iis , qui velocitatem ignis , luminis , materiæ electricæ non ignorant , videri non debet incredibile . Utrumque prorsus inaptum . I. Conatus ad motum est reactio : at quæcumque reactio corporea , etsi in exiguo , at sit tamen in spatio . Demonstrant Physici ex ictu pulicis Tellurem subsilire , subsultu quidem infinite parvo , sed qui tamen sit subsultus . II. Motus quantumvis acceleretur , nequit tamen fieri in instante indivisibili ( ex prop. 102. primæ part. ) : ergo successivi motus existunt in distinctis , & divisibilibus temporis partibus , nec idcirco coexistunt : coexistunt autem imagines , seu ideæ : non ergo ideæ motus sunt in indivisibili , sed , si motiones sunt , in extenso omnes fieri oportet .

*Prop. V. Conscientia perceptionis , iudicii , ratiocinii , & perceptio perceptionis , iudicii , ratiocinii ( ex intima conscientia ) ; adeoque si perceptiones , iudicia , ratiocinia non sunt nisi motiones , motio esse debet ab iis distincta . Ex. g. percipere lumen , esseque sibi conscium ejus perceptionis , quæ dicitur animadvertentia perceptionis ; percipere æqualitatem quantitatum P. Q. atque ejus perceptionis esse conscium , omnino sunt diversa . Ergo nequit utrumque eadem motionē , eodemque conflictu effici , ut scilicet eadem motio A & rationem ideæ contineat , & conscientiæ ideæ .*

*Prop. VI. Collatio idearum , qua iudicia , & ratiocinia existunt , res est ab ideis , quæ conferuntur , diversa . Nempe aliud est percipere C , aut D , aliud duo illa inter se conferre . Si ex fenestræ foramine radius in obscurum cubile penetret , ibique in alba tabula varias rerum extrinsecus objectarum depingat imagines ,*  
*nemo*



nemo est tam plumbei cerebri, qui non intelligat, eadem ipsa actione, qua imagines illæ depinguntur, conferri inter se non posse, ut altera alterum secum metiatur. Exigitur ergo actio ab iis distincta & diversa, quibus imagines dipinguntur.

*Prop. VII.* Conscientia nequit esse motus corporeus.

D. Si est, aut *impressio* est, aut *reactio*, aut quod inde *resultat*, aut *conflictus* hujus *reflectio*. Non priora: iis enim continetur sensatio & perceptio (Schol. prop. 1.) a quibus conscientia res est diversa (prop. 5.): nec postremum: nam *reflectio Conflictus primi* fit & ipsa conflictu altero, ut patet: jam alter hic conflictus aut motus est realiter distincta a priore, ei interim similis; aut non: si primum et sunt duæ distinctæ perceptiones ejusdem objecti, non perceptio-perceptionis; quippe secundæ primæ quidem simillima est, non eam continet, quum nullum singularium alterum contineat: quomodo reflexio soni est sonus alter a priore distinctus, ei simillimus, sed non animadvertentia prioris: & reflexio alicujus imaginis earum, de quibus in prop. 6. loquuti sumus, est altera imago, sed non continet animadvertentiam prioris: si alterum, minus quoque secundo eo conflictu animadvertentia illa explicari potest.

Præterea si secundus conflictus est conscientia, aut fit ille eodem tempore quo primus, aut altero. Non hoc: quum conscientia & perceptio coexistant; primum ergo. Jam aut fit in eadem parte, in qua prior, aut in altera. Eodem tempore in eadem materiæ parte distincti & similes conflictus fieri nequeunt, ut patet: in diversa vero si fiant duo phantasmata producent, non unum, uti ex Hobbesiana doctrina apparet: non igitur alter erit ideæ prioris animadvertentia, sed phantasma priori quidem simile, sed ab illo distinctum, nec illud exhibens.

*Prop. VIII.* Judicium nequit esse motio corporea.

D. Judicium est plurium idearum, earumque relationum perceptio (def. 4.) quæ perceptio, & comparatio res est ab ideis, quæ conferuntur, diversa (prop. 6.): quum autem singulæ perceptiones ex singulis conflictibus

existent, si quidem sunt illæ motiones (prop. 3.); hæc comparatio debet esse motio, & inde natus conflictus realiter distinctus ab omnibus ideis, quæ conferuntur, seu a conflictibus aliis, ex quibus ideæ, quæ comparantur, existunt. Sint duæ ideæ, quæ conferuntur, B, C; comparatio erit A; eruntque tres conflictus B, C, A, realiter distincti, adeoque tria singularia, seu individua, Si motiones sunt, eæ in eadem Cerebri parte indivisibili non certe fient (prop. 4.); nec in divisibili diversis temporibus (prop. 2.) etiam brevissimis & velocissime decurrentibus (Schol. prop. 4.); nam B, C, A coexistere debent eidem loco & tempori. Quum autem eidem extenso & tempori coexistunt, aut compenetrantur omnimoda compenetratione, aut non. Si primum, erunt unus, idemque conflictus, qui non potest continere rationem sufficientem plurium idearum (prop. 3.). Si alterum, non coexistent eidem; quandoquidem unus existit extra alium: Necessè ergo est, ut coexistent eidem tempori, sed non eidem cerebri parti: at ita unus alium non continet, sed semetipsum, ut patet; ergo ne unus quidem aliud refert; erunt ergo tria potius phantasmata, quam duorum collatio: non igitur judicium. Quocirca judicium nullo modo esse potest motio corporea. Q. E. D.

Sch. Demonstratio huc redit, dato, motionibus exprimi posse phantasmata (quamquam nemo unquam demonstraverit, sic expressa ex conflictu phantasmata esse quoque *perceptiones*, & *conscientias*, seu *animadvertentias*); quum hæc phantasmata sint singularia, singularem vero natura sit, ut nequeat unum alterum continere; efficitur ut nec phantasma A contineat B, nec B, A. Quod si se mutuo non continent, ne mutuo quidem se referunt. Si addatur collatio velut tertius conflictus, hic ut ambo illa exhibeat, utrumque debet continere: at id non magis potest, quam duo illi priores sese mutuo. Jam nisi id fiat, collatio idearum nulla esse potest; nulla ergo idearum collatio fieri potest, si perceptio, & judicium sunt motiones. Quum autem fiat ea comparatio (ex intima experientia);

ope-

operationes, quæ tribuuntur menti, motiones esse nequeunt.

*Coroll.* Meditatio, perquisitio, conjectura, ratiocinatio nequeunt esse puræ cerebri motiones, aut *conflictus* ex actione & reactione in cerebro nati. Nempe in omnibus his judicium inest, seu idearum comparatio, quæ pura ce-rebri motione constare nequit (ex prop. 8.)

*Sch.* Egregie in eam rem disseruit Aristoteles in *primo de Anima*, qui locus Veritatis amatoribus omnino consulendus est: Nemo enim accuratius & doctius unquam demonstravit Animam motu corporeo interno agitari non posse, nec operationes ejus motus esse corporeos, etsi cognoscat nullam esse in Anima cogitationem, quæ cum agitatione aliqua, & motione corporea non sit conjuncta. Quid? quod Hobbius ipse, sui immemor systematis, rei perspicuitate, ut par est credere, impulsus, rotundis id verbis fatetur? *Quis igitur*, inquit, *sibi persuadeat, motione externorum objectorum, non tantum motum, sed & perceptiones produci (a)?* Scilicet hoc distant *Veritas*, & *Conflictæ hypotheses*, ut hæc tum demum videantur veræ, quum earum amore incaluit animus: ubi deferbuit, evanescant: illa vera æquabilis semper est & eadem. Similia sunt, illa quidem Solis lumini; hæc lumini, quod somniamus.

Jam præclara sunt quæ ea super re B. Augustinus in iis libris scripsit, qui in media versantur *Metaphysica*. I. Sensus & phantasia falluntur, dum rectum baculum, cujus dimidia pars aqua merfa est, curvum exhibent: interea ratio perspicue errorem detegit & perpetuo contradicit, etiam perdurante sensus, & phantasie errore. Quod si nihil esset aliud ratio, nisi hic cerebri conflictus, aut quoniam perdurat idem, dum idem refert phantasma, errorem suum non agnosceret; aut si is idem se corrigeret, non idem referret phantasma, nec idem esset conflictus (b). Te nunc appello, Senex Malmesburiensis, ecquid ad hæc? Se phantasma erroris reprehendit, perduratque idem, an ab alio dedoce-

D 4

tur?

(a) *Hobb. in Leviath. pag. 3.*

(b) *Lib. 2. Soliloq. cap. 3.*

tur? Ab alio autem phantasmate? unde & hoc aliud? Qui alterum alterum percipit? Qui cum objecto confert? Ad rem. Inde vero gravissimis verbis concludit Augustinus, *quare conficitur, ut aliud simus NOS, aliud SENSUS: siquidem quum IPSE fallitur, possumus NOS non falli.*

II. Ad hæc, judicia & ratiocinia rerum abstractarum, & ipsa *conflictus* erunt corporei? Probabile efficere potes, conflictu quocumque nasci in cerebro phantasmata Trianguli, Rectanguli, Quadrati, lineæ, velut in tabula luminis jactu imagines: at an etiam eodem conflictu perceptiones æqualitatis trium Trianguli angularum cum duobus rectis; æqualitatis Rectangulorum, aut Quadratorum cum quibusvis Rectilineis; differentiam harum quantitatum; proprietates Numerorum, & quidem in longissima judiciorum serie expedieris? Tu Geometra Geometris persuaderis exactissimas & longissimas demonstrationes esse seriem conflictuum cerebri? Vah! ..(a) Itaque & hinc perspete concludit. *Si corporea corporeis oculis mira quadam rerum cognatione cernuntur, oportet animum, quo videmus illa incorporalia, corporeum, corpusque non esse.*

III. Quum aliquod nomen, velut Patris Alexandri Macedonis, memoria excidit, ecce quidam revocare conantur, memorantque mihi Perdiccam, Lisimacum, Seleucum, Antiochum: non dum agnosco, nisi Philippum nominaverint: ecquis ea confert nomina? Ecquis illa reprobatur, hoc probatur? ille veri sensus unde nascitur? inter se blande colloquuntur conflictus illi; atque sese agnoscere gestiunt (b)? Qui velint philosophari attente, facile intelligent, memoriæ & reminiscentiæ phænomena solo mechanismo corporis explicari non posse (c).

IV. Jam statuamus Passerculum meum vocari Biltri: quum id pronunciari audio vocabulum, statim cogito, mihi quidem Passerculum esse, cæteris nihil. Ecquis

ea di-

(a) Ex eodem Aug. lib. 2. Solil. cap. 19. & de Quantitat. Animæ a cap. 4. ad 13.

(b) Ibid. cap. 20.

(c) Adis Henricum Morum de Immort. An. cap. 2. lib. 2.

ea distinguit? Quis vocabulum nihil, a vocabulo rei cuiusvis discernit, quum sonus idemque idcirco inde natus conflictus (a).

Sed inde vir acutissimus luculenter quoque causas explicat, quibus fit, ut de Mente Mens ipsa tanquam de re corporea in plerisque cogitet. Tanta, inquit, vis est amoris, ut ea, quæ cum amore diu cogitaverit (Mens), eisque curæ glutino in hæserit, attrahat secum etiam, quum ad se cogitandum quodammodo redit. Et quia illa corpora sunt, quæ foris per sensus carnis adamavit, eorumque diuturna quadam familiaritate implicata est, nec secum potest introrsum, tanquam in regionem incorporeæ naturæ ipsa corpora inferre, imagines eorum contrahit, & rapit, factas in semetipsa de semetipsa (b).

Atqui hæc talia sunt, ut Lucretius, vir non omnino stupidus, intellexerit, motione partium vulgarium Elementorum, eorum nimirum corporum, quæ noscimus, sensum & cogitationem creari non posse. Quumque nihil aliud, quod diceret, reperiisset, quartam quamdam invexit substantiam corpoream, &, ne dolus apertius intelligeretur, innominatam esse voluit.

*Nec tamen hæc sat sunt ad sensum cuncta creandum;  
Nihil horum quoniam recipit mens posse creare  
Sensiferos motus, quædam qui mente volutent.*

QUARTA quoque his igitur quædam natura necesse est

*Attribuatur (ea est omnino nominis expers):*

*Qua neque mobilius quidquam, neque tenuius existat.*

*Nec magis e parvis, aut lævibus ex elementis,  
Sensiferes motus, quæ didit prima per artus (c).*

Sed si sensiferes hos motus, sensus, cogitationis, & ratiocinii, quibus nil fieri celerius potest (d), quibusve fit

(a) De quantit. animæ cap. 32.

(b) De Trinit. lib. 2. cap. 5. Vide 6. & 7. caput ejusdem libri.

(c) Lib. 3. de rerum vers. 239. Vide & Plutarchi in 4. de plac.

(d) Ibidem v. 183.

fit ut nulla res *animo ocys se perciat* [a], si motus, inquam istos, perquam minutis illis seminibus *vaporis, aeris, atque ignis* gigni non posse ultro, o Tite, agnosceis, videsis an ullis aliis cujuscumque corporis particulis fieri possint. Scilicet si cogitationes fiunt atomorum motu; nulla alia præterea re, atomis minus tenuibus atque minutis, certe non æque veloces, at fient tamen. Quod si non his, ne ullis quidem aliis. Meminerimus igitur hoc in loco, *ex ideis humanis philosophari oportere* [post. 1.], *tesseramque, eandemque & Duce[m] Philosophiæ humanæ esse claritatem & perspicuitatem* [post. 2.] [b].

*Prop. IX.* Mens humana nequit esse *temperatio naturæ corporeæ, qua vigeamus, & sentiamus*, quæ fuit Dicæarchi opinio. Ita enim, aut operationes Mentis rationales nihil sunt aliud, nisi motiones partium corporis, & quum id esse nequeat [ex prop. 7. & 8.], ne illud quidem consistere potest: aut sunt actiones alterius generis; & tota ipsa harmonia res est a corpore distincta, & in se & per se subsistens; adeoque vera substantia a corpore distincta, quod ejus opinionis fautores nolunt.

*Schol.* Dicæarchus Aristotelis discipulus vir fuit doctus & facundus, ita ut Cicero delitias suas non dubitaverit appellare: *Delitiæ meæ*, inquit Dicæarchus [c]. Is in eo sermone, quem Corinthi habitum tribus libris exponit doctorum hominum disputantium, primo libro multos loquentes facit, duobus Phereratem quendam Phitiotam Senem . . . differentem inducit, nihil esse omnino animum, & hoc esse nomen totum inane . . . neque in homine inesse animum vel animam, nec in bestia; vimque omnem eam, qua vel agamus quid, vel sentiamus in omnibus corporibus vivis æqualiter esse fusam, nec separabilem a corpore esse, quippe quæ nulla sit, nec quidquam, nisi corpus unum & simplex, ita figuratum, ut temperatio-

[a] Ibid. v. 185.

[b] Vide ut ea de re profuse admodum & docte differit Henricus Morus de Immortal. Animæ lib. 11. cap. 2.

[c] Cicero lib. 1. Tuscul.

*ratione naturæ vigeat & sentiat* [a]. Dicæarchi doctrina Lokianæ permissillima est; ut idcirco, iisdem, quo illam refellimus, argumentis confutari possit [b]. Fallitur profecto Plutarchus, in 4. de Placit. dum Dicæarchum censet inter eos, qui animam fecere incorpoream.

Lucretius Carus aliquot non omnino spernendis argumentis in hanc sententiam scripsit [c]. Postquam enim dixisset, quosdam sapientum putasse.

*Sensum animi certâ non esse in parte locatum,  
Verum habitum quemdam vitalem corporis esse,  
Harmoniam Graji quam dicunt . . .*

Addit

*Magnopere in quo mi diversi errare videntur.  
Tum argumenta profert.*

*Sæpe utique in promptu corpus, quod cernitur, æ-  
grit,*

*Quum tamen ex alia lætamur parte latenti;*

*Et retro fit, uti contra fit sæpe vicissim,*

*Quum miser ex animo, lætatur corpore toto.*

*Præterea molli cum somno dedita membra  
Effusumque jacet sine sensu corpus onustum:  
Est illud tamen in nobis, quod tempore in illo  
Multimodis agitatur, & omneis accipit in se  
Lætitiæ motus, & curas cordis inaneis.*

Mediocria omnia. Quis ab Epicureo meliora expectet? Sed ecce Baelius [d] ex instituto Dicæarchum refellere aggreditur. Peream, si quid boni a Sceptico? Dicæarchi, inquit, opinio indigna est Philosopho? qui sic enim, ut ille, ratiocinatur, vagatur sine ullis scientiæ principiis, nec quid sit systematica harmonia intelligit. Quicumque ponit, animum atque animam non esse a corpore distinctam, vimque esse in omnibus corporibus vivis æqualiter fusam, unamque efficere rem & naturam cum

cor-

[a] Ibidem.

[b] Vide Schol. prop. 1.

[c] Lib. 3. de nat. rer. 107. & seqq.

[d] Dict. Hist. Crit. Art. Dicæarque Remarque. C.

corporibus viventibus, aut ipse se non intelligit, aut is defendat etiam oportet, eam virtutem nullo unquam tempore a corpore separari. Nempe quod a corpore distinctum non est, essentialē est corpori, pugnatque vero cum manifesta ratione, quæ sunt Enti essentialia separari ab eo posse. Quod si verum est, & cadavera ipsa vivent, & partes corporis, singulæ quæ ab illo decidunt quotidie, partem quoque animæ humanæ secum trahere . . . Præterquam quod si corpus doloris capax est, aut voluptatis, quin ulla alia substantia animetur, ubicumque eadem est corporis natura, in lapidibus, in metallis, tum etiam in diffluentibus corporibus aqua, & aere, eundem inesse sensum necesse est. Sentiebat Baelius argumentorum suorum imbecillitatem, non enim tam obtusi erat pectoris, ut non animadverteret, esse, qui reponerent; vitam & sensum non esse corporis essentialia, sed ejus potius modificationes, quæ dilapsa machina humana, abesse possint, quin naturæ corporis quidam detrahatur. Eam igitur exceptionem occupatum it. Timeo Danaos, & dona ferentes. Ea, inquit, doctrina absurda est: nam omnes modificationes sunt ita natura comparatæ, ut earum nulla destruaturn unquam, nisi alterius similis intrusione: ita nunquam delctur in corpore figura nisi altera figura, non color nisi colore altero . . . . . Qui igitur his principiis consentaneè ratiocinari velit, his dicere debet, non cessare in homine sensum & vitam, nisi alterius sensus & vitæ intrusione: id si ita est, næ homines beati, qui velint nolint, semper victuri sunt . . . . . Regerent, esse in corpore modos, qui destruuntur, quin alii ejusdem generis eorum locum occupent: profertur exemplum motus, qui quiete, re nempe minime positiva, cessat. Repono falsum esse, differre motum & quietem, velut positivum, & ejus privationem: sunt potius ambo entia positiva, nec differunt, nisi externis relationibus. Nam quies est conservatio præsentia in loco eodem: motus ejus præsentia commutatio &c. Nempe adeo perturbabatur exemplo motus Baelius, ut homo alioquin Scepticus, quod mirum, ne a cæpto, desisteret, ineptum protulit, & quod Physici omnes rideant: Quis enim conco-

quat



quat novam hanc motus & quietis theoriam? Nihil esse potest clarius, quam motum esse actionem realem, quæ ex corpore in corpus transeat, quæque separabilis a corpore sit (a).

Prop. X. Mobilitas singularum partium conjuncta cum divisibilitate, soliditas, & inertia, sunt corporis proprietates essentielles.

D. Primum. Omne corpus natura sua divisibile est usque in indivisibilia elementa, idest quatenus est extensum: at intelligi nequit divisibilitas sine mobilitate, ut patet; ergo mobilitas singulorum partium conjuncta cum divisibilitate ita est corpori essentialis, ut intelligi nullum corpus sine ea possit. Ea de re igitur dubitandum non est inter homines (ex post. 1. & 2.)

Alterum. Soliditas philosophis est ea extensi qualitas, qua fit ut una ejus pars alteri, ne eundem locum occupet, resistat (def. 37. p. p.): jam singulis quorumcumque corporum partibus eam vim inesse experimenta demonstrant, & ita quidem ut intelligi nequeat sine ea qualitate corpus: corpori igitur essentialis est soliditas. Enimvero ni ita esset, ne motus quidem ullus esse in corporibus posset, quin omnia continuo in punctum geometricum compenetrations abirent, uti perspicuum est.

Tertium. Inertiam appellamus cum Nevvtono (b) vim insitam materię, qua corpus unumquodque, quantum in se est perseverat in statu suo quiescendi, vel movendi; ut per eam fiat, ut omne corpus de statu suo vel quiescendi, vel movendi difficulter deturbetur. Eam autem singulis corporibus inesse, & continuis experimentis discimus, & plurimis demonstratum est a Philosophis recentioribus (c); & hæc igitur vis corporeę naturę essentialis est.

Schol. Non sum nescius, plerisque Philosophis in dubium

(a) Vide Musschembroeck *Element Phys.* §. 107. & 110. & seqq.

(b) Nevvtonus *Princip. Math. Phil. Natural.* def. 3.

(c) Musschembroeck *Elem. Phys.* a §. 53. ad 63. Vide ibi adnotata ab illustri Philosopho Josepho Orlando.

bium vocari *divisibilitatem cum mobilitate conjunctam*, & *inertiam* materiæ. Aristotelem materiam mundanam fecisse unam, undequaque immensam, immobilem atque indivisibilem, nemo est qui ignorat. Eadem suis Arabum doctrina. Inde omnem substantiam Spinoza indivisibilem postquam conatus esset demonstrare (a), in Corollario propositionis XII. rotunde scribit. *Ex his sequitur nullam substantiam, & consequenter nullam substantiam corpoream, esse divisibilem*. Cujus opinionis rationem paucis comprehendit in Scholior. *Quod substantia, inquit, sit indivisibilis, simplicius ex hoc solo intelligitur, quod natura substantiæ non potest concipi; nisi infinita, & quod per partem substantiæ nihil aliud intelligi potest, quam substantia finita, quod manifestam contradictionem implicat. Quid autem? nonne experimenta perspicue demonstrant, materiam dividi? Ei, inquit (b), respondebo, quod quantitas duobus modis a nobis concipitur, abstracte scilicet, siue superficialiter, prout ut nempe ipsam imaginamur; vel ut substantia, quod a solo intellectu fit. Si itaque ad quantitatem attendimus, prout in imaginatione est, quod sæpe & facilius a nobis fit, reperietur finita, divisibilis & ex partibus constata: si autem ad ipsam prout in intellectu est attendimus, & eam quatenus substantia est concipimus, quod difficillime fit, tum, ut jam satis demonstravimus, infinita, unica, & indivisibilis reperietur, quod omnibus, qui inter imaginationem, & intellectum distinguere sciverint, satis manifestum erit. Præcipue si ad hoc etiam attendatur, quod materia ubique eadem est, nec partes in eadem distinguuntur, nisi quatenus materiam diversimode affectam esse concipimus, unde ejus partes modaliter tantum distinguuntur, non realiter. Ex. gr. aquam quatenus aqua est dividi concipimus, ejusque partes ab invicem separari: at non quatenus substantia est corporea: eatenus enim neque separatur neque dividitur.*

Quum hic homo corpora dividi quidem non inficiatur prout imaginationis sunt objectum, neget prout  
 obje-

(a) P. part. Prop. XII.

(b) Schol. prop. XV. primæ partis.

objectum sunt *intellectus*; affirmet aquam dividi quatenus aquam, neget quatenus substantiam, perspicuum est eum, (quod illi familiare) abstracta illa substantiæ, quam commentus est, idea deludi. Scilicet tantundem est, quod ait, atque abstractam quidem substantiæ notionem non dividi, in quo ei non adversamur; dividi autem corpora ipsa. Nos, qui philosophamur ex *ideis*, quas habent homines (post. 1.) quique præcipere solemus, *caveto ab ideis abstractis & universalibus; ex iis de rebus ipsis ne judicatio* [a] contenti sumus huiusmodi deridiculi erroris fontem indigitasse; nec putamus operæ pretium in re evidente argumenta non necessaria congerere. Atque ne quis inertiam id noscæ tribuat, is sciat, duo esse rerum genera, quæ demonstratione comprehendere nequeant, *summe evidentiæ; & summe obscuræ*. Bene autem habet, quod in Philosophi, adversus quod differimus, Epicurei nempe, priori illi theoremati nostri parti non adversantur.

Quod spectat ad inertiam, ei videntur & veteres plerimi, & non pauci e recentioribus Philosophis contrahere. Nam & Democritici omnes, atque Epicurei actiosa corpora fecerunt: & fecit Aristoteles cum suis formis substantialibus, quamquam eas minime corporeas habuerint Peripatetici omnes: nec repugnant Scholastici [b] & omnes nunc Leibnitiani suum addunt calculum. Nec Platonici eam negarunt activitatem, etsi a formis æternis repetierunt [c]: At Arabes quidam, præcipue Avicbron, quem B. Thomas memorat [d], omnes actiones, quæ videntur esse corporum, esse actiones cujusdam virtutis spiritualis, quæ penetret per omnia corpora, putarunt. Quid, quod ipse Newtonus ab hoc naturæ spiritu plastico non abhorruit [e]? Eandem nos

cor-

[a] *Art. Logico-Crit. lib. 2. cap. 3. can. 4.*

[b] *Vide B. Th. in Summ. Theol. p. 1. q. 115. art. 4.*

[c] *Idem Ibidem.*

[d] *Ibidem.*

[e] *Vide a nobis dicta in dissert. de origine & constit. rerum corporearum quam iterum edidimus ad calcem primæ part.*

corporum omnium activitatem in priori parte [ prop. 96. ] statuimus.

Si quis est, qui ita adversus inertiam corporum differat, is quæstionis vim nondum intellexit: ea enim activitas, de qua loquuntur, non pugnat cum *inertia* hac recentium philosophorum. Nam hæc est vis illa, *qua corpus reluctatur vi extrinsecus impressæ, quæ e statu suo deturbatur, ut in suo statu se conservet & qua re agit in causam impellentem* [a]. Est autem perspicuum, & eam vim omnibus inesse corporibus, & non pugnare cum activitate illa, quam isti opponunt.

Prop. XI. Cogitatio & ratiocinatio pugnant cum soliditate, divisibilitate, & inertia corporis.

D. Primum: Cogitatio & ratiocinatio est actio quæ plures idæ comparantur [ def. 4. & 5. ]. Vocetur hæc actio A, idæ quæ conferuntur B, C, D, E. Sint hujusmodi idæ motiones extensi solidi G. Eæ conferri non possunt, nisi in unam A confluant, ut se mutuo in ea repræsentent, quemadmodum est manifestum: id vero aut fit, quia totidem particulæ solidi G, quæ sint subjecta quatuor illarum motionum B, C, D, E, in unum compenetrantur; aut quia actiones tantum A, B, C, D, sine suis subjectis in unum confluant. Posterius esse nequit, quum modificationes nequeant existere sine suis subjectis [ b ] [ prop. 27. primæ part. ]: superest prius; at id evertit soliditatem [ def. 62. pr. part. ]: omni modo cogitatio & ratiocinatio pugnant cum soliditate.

Alterum. Pone subjectum cogitans G dividi in partes

[ a ] Vide Newtonum loco superius citato.

[ b ] Reponet quispiam, motiones omnes fibrarum cerebri, quæ sint totidem perceptiones, confluere in unum cerebri punctum, quod sensus sit communis, ibique inter se conferri. Sed principio, confluent in indivisibile, an in divisibile cerebri punctum? non primum: id enim motum nullum excipere potest. Si alterum, idem diversis ne motionibus agitabitur, an una motionem composita ex diversis? Primum me intelligere non posse fateor: posterius si est, unam hæc motio ac novam ideam repræsentabit, non plures, quas inter se conferet.

tes B, C, D, E: cogitatio A aut coextendetur iisdem, aut non: si posterius, evertetur cogitatio, quippe diffluent ab ea ideæ B, C, D, E, Prius ergo: dividetur autem ea in partes, an indivisibilis erit in toto illo diviso B, C, D, E? Posterius inintelligibile est, neque ex eo philosophari fas est (post. 1.). Si prius, singulæ ne partes, puta P, Q, R, S complectentur integram comparisonem phantasmatum B, C, D, E; an singulæ singula? Prius est contra hypothesin: neque enim eo casu divisa erit cogitatio: alterum totam naturam cogitationis evertet. Cogitatio ergo & ratiocinatio cum sunt comprehensiones plurimum idearum in uno impartibili pugnant cum divisibilitate.

Tertium. Libertas, seu facultas agendi aut cessandi ex ratione (def. 12.) cuicumque inest, uti inferius sumus demonstraturi: ea & a ratione pendet & cum ea est conjuncta: nec ratio quidpiam est, nisi vis cogitandi (def. 2.). Quum autem ea libertas evertat inertiam, ut patet; sequitur & vim cogitandi cum libertate pugnare.

Præterea, quoniam corpora sunt inertia, perspicuum est Newtoni illud axioma, *Mutationem motus proportionalem esse vi motrici impressæ, & fieri secundum lineam rectam, qua vis illa imprimitur* (a): at cogitatione & ratiocinatione totum hoc axioma evertitur: nam de infinitis rebus cogitamus, quin ulla actione externa agitemur: & libertatem habemus seriem demonstrationis unius interrompere, alteramque omnino divisam aggredi, idque centies repetere, & intermittere. Præterea, minorem, aut majorem intensionem adhibere; minorem intendere aut remittere: ab imaginatione, ad intellectionem, & vicissim, quoties libeat, transire. Quæ omnia cum corporis illa proprietate, atque cum iis, quæ ex illa sequuntur, manifesto pugnant.

Schol. Pugnare corporis divisibilitatem cum cogitatione observatum Cartesio perspece. Is enim sic eam in rem scribit (b) *Nempe in primis hic adverto ma-*

Tom. II.

E

gnam

(a) Princip. Math. lemme 2.

(b) Medit. 6. de prima Phil.

nam esse differentiam inter Mentem, & Corpus, in eo quod corpus ex natura sua sit semper divisibile, Mens autem plane indivisibilis. Nam sane quum hanc considero, sive meipsum quatenus sum tantum res cogitans, nullas in me partes possum distinguere, sed rem plane unam & integram me esse intelligo. Et quamvis toti corpori tota mens unita esse videatur, abscisso tamen pede, vel brachio, vel quavis alia corporis parte, nihil ideo de mente subductum esse cognosco. Neque etiam facultates volendi, sentiendi, intelligendi &c. ejus partes dici possunt, quia una & eadem mens est, quæ vult, quæ sentit, quæ intelligit. Contra vero nulla res corporea sive extensa potest a me cogitari, quam non facile in partes cogitatione dividam, atque hoc ipso illam divisibilem esse intelligam. Quod unum sufficeret ad me docendum, mentem a corpore omnino esse diversam, si nondum illud aliunde satis scirem. Operæ tamen fecisset pretium si paullo accuratius ex legibus Mechanices rem explicuisset: nimis enim vage id dicit.

Prop. XII. Mens humana est substantia incorporea.

D. I. Quum cogitationes sint actiones (ex def. 2. Sch.) esse debet earum vis aliqua, seu potentia (p. part. prop. 66.), ejusque vis aut potentiæ subjectum sive substantia [ibid. prop. 65.]. Jam si id subjectum corpus est, idearum repræsentatio & perceptio, tum judicium & ratiocinatio non aliter fieri possunt quam conflictu partium corporis [prop. 1.]: quod quum esse nequeat; [prop. 8. & ejus Coroll.] cogitationes erunt subjecti alicujus incorporei: subjectum vero cogitationum nostrarum Mens est humana [def. 1.]; Mens ergo humana incorporea est.

II. Præterea si non est incorporea, erit aut habitus & temperatio corporis; aut ejus attributum aliquod substantiale. Primum esse nequit [prop. 9.]: nec secundum: nam quum mens pugnet cum præcipuis corporis attributis essentialibus, divisibilitate, mobilitate partium, soliditate, inertia [prop. 11.] eadem substantia corporea constaret ex iis, quæ se mutuo destruunt, quod fieri nequit [prim. part. prop. 1. & 2.]. Nec rē-  
gera-

geratur, ignorare nos essentiam corporis; ac propterea non posse affirmare; cogitationem non esse illius attributum essentialia: nam ut demonstrarem pugnare: Ex. g., ut triangulum sit quævis alia figura; non est necesse, ut utriusque omnes proprietates noscam: sat est scire, esse in illa figura; v. g. X; proprietatem Z; quæ destruat hanc Trianguli, tres ejus angulos æquales esse duobus rectis.

*Coroll.* Attributa essentialia Mentis omnino sunt diversa ab essentialibus Corporis attributis. Nempe substantiæ diversæ iisdem attributis constare nequeunt.

*Prop. XIII.* Mens humana, quoad vivit perenni perceptione prædita sit necesse est, si ex postulato primo philosophemur.

D. Principio, Mens humana est substantia a corpore distincta & diversa (prop. 12.), ejusque attributa essentialia ab attributis corporis essentialibus distincta sunt & diversa (Coroll. prop. 12.); ergo & vita Mentis quoad ea vivit, diversa esse debet ab ea, quæ corpori vulgo tribuitur, aut quæ corporis esse propria possit, nempe agitatione, aut energia corporearum partium. Jam posita est omnis vita in actione quacumque, quæ sit perennis quoad vita durat, quemadmodum per se est perspicuum: (def. 10.) ita plantam, ignem, atque alia, tamdiu vivere dicimus, quoad actione aliqua vitali agitantur: actio ergo, qua Mens vivit, perennis esse debet, quoad vivit. Ea vero actio aut *corporea motio* est, aut *cogitatio*; neque enim ullius alterius actionis ideam habemus: motio esse non potest (ex superioribus); cogitatio ergo est: perenni ergo cogitatione Mens prædita est, quoad vivit; idest ex natura Mentis sequitur necessario, ut semper cogitet.

Præterea. Ponatur Mens non semper cogitare: per intervalla cogitabit, & non cogitabit. Cogitet tempore A, non cogitet tempore B; perpetuo a statu cogitationis ad statum incogitantiam transibit: fieri autem id potest aut ipsa Mentis natura; aut objectu externæ alterius causæ. Primum esse nequit; nam principio quemadmodum nullum corpus suapte natura a

E 2

motu

motu ad quietem transire potest: ita nulla substantia suapte natura ab *actione* quacumque ad *inactionem*; cuius rei ratio est, quod quælibet res natura sua & esse & conservari exigit, nec ipsa sibi esse potest contraria: quumque nulla res iis constare possit, quæ se mutuo destruunt: omnia cujuslibet rei attributa, ex quorum indivisibili unione ejus rei essentia existit, natura comparata sunt ad *esse* & *conservari*; ut idcirco nullum ens *actione sui*, sed *passione* perire possit. Deinde quemadmodum nullum corpus a quiete ad motum transire potest suapte natura; ita nulla substantia ab inactione ad actionem; scilicet ex nihilo nihil fit (prop. I. part. p.). Suapte ergo natura Mens humana, si perenni cogitatione destituitur, neque ab A ad B, neque a B ad A transire per intervalla temporis potest. Alterum si est, vel corporis objectu id fit, vel Dei, aut alterius. Non corporis. Quum enim Mens sit incorporea (prop. XII.) intelligi nequit conatus corporis in mentem; ut quum nulla sit alia actio in corpore, nisi motio, idest mutatio *figuræ*, *situs*, *loci*; nec ea fieri in mente possit (ex super.); Mens a corpore ad cogitandum excitari nequit. Quoniam ergo nullus esse potest Physicus influxus corporis in Mentem, corporis actione nec cessare potest Mens a cogitatione, nec ad cogitationem excitari. Idipsum conficitur de quacumque alia corporea causa. Dei vero voluntate id fieri posse, non negamus: sed neutri ad id confugere possumus: ut enim nos nulla habemus argumenta, quibus id non fieri evincamus: ita, qui huic theoremati adversantur, nulla, quibus probent id fieri.

*Schol.* Magna inter Philosophos hujus ætatis de perenni Mentis cogitatione controversia exorta est. Nam Cartesius quum Mentis humana essentiam in actuali cogitatione posuisset, non potuit non asserere Mentem perenni cogitatione præditam esse, quippe qua sublata, Mentis essentia aufertur ex Cartesii doctrina. Scio respondere recentiores Philosophos Cartesio, temere illud sumi, Mentis essentiam in cogitatione positam: ex quo consequitur concidere totum illud Renati argumentum.

Sed



Sed quum isti non inficiantur, cogitationem & vim cogitandi essentiale esse Mentis attributum; idem omnino conficitur. Nempe ut esse nequit ens sine sua essentia, ita esse nequit sine suo attributo essentiali; præcipue quum in entibus simplicibus *agere & esse* idem sit, quod Peripatetici non ignorarunt. Quæ res adeo est manifesta, ut non intelligam, qui hæc duo stare possint, Mentem incorpoream esse substantiam & intelligentem, destitui vero perenni cogitatione. Sic habeo, doctrinam hanc Peripateticorum & Lockianorum e diametro pugnare cum animi incorporalitate, nec locum habere posse nisi in Lucretiano & Hobbesiano systemate. Qui secus sentiunt, rem non satis ad incudem exegere. B. Thomas omnium mortalium in his rebus exercitissimus negat quidem *intellectum humanum esse semper in actu*, idque intellectus divini proprium esse dicit (a); sed quum is non dubitaret, *nihil deduci de potentia in actum, nisi per aliquod ens actu* (b), ad *intellectum agentem* confugit: at nisi hic intellectus sit semper *in actu*, necesse erit alterum adhibere, idque in infinitum. Quod Aristoteles vidit, qui eo loco, quem B. Thom. laudat corruptum, ut Joan. Nicolaus observat (c), negat intellectum agentem esse posse *aliquando in actu, aliquando non in actu*, quinimmo alibi diserte scribit (d) *intellectum agentem esse substantiam actu ens*. Jam ex Thomæ sententia intellectus agens non est ab anima distinctus: ergo si consentaneæ principiis suis ratiocinari voluisset, negare non potuisset, Mentem in perenni esse cogitatione.

Jam Cartesium secuti sunt primum Cartesiani omnes, in primis viri acutissimi Claubergius, Malebr., Silvan. Regis, alique, denique sæculo nostro Leibnitius & VVolfius. At iis se opposuerunt omnes Peripatetici, & Joh. Lok. in lib. 2. De intellectu humano cap. 2., quo in loco conatur demonstrare fanaticum esse dogma de

E 3

peren-

(a) *Sum. Theol. p. p. q. 79. art. 2.*(b) *Ibid. art. 3.*(c) *Nota ad art. 4. ibidem.*(d) *In 3. de anima text. 14.*

perenni Mentis cogitatione. Lockii argumenta ad duo summa capita referri possunt. Primum: Quod nemo unquam eorum, de quibus in profundissimo somno cogitat, recordetur: itaque hæc doctrina internis Animi experimentis adversatur. Alterum; quod status cogitationis sit status vigilæ; experimur enim nos dormire non posse, dum perennis quædam cogitatio Animum vexat. Quod si semper cogitaremus, semper vigilaremus, quod est falsum. Accedit eodem, quod Mens nostra duas referret personas, alteram dum dormimus, alteram dum vigilamus. Personæ enim identitas ex Lockii doctrina posita est in identitate conscientiæ cogitationum: at quoniam vigilantibus mens nostra non habet conscientiam earumdem cogitationum, quas habuit nobis dormientibus: sequitur duas referre personas, alteram nobis dormientibus, alteram vigilantibus, quod ille intolerabile putat absurdum.

Sed sunt rationes istæ suapte natura infirmæ. Ad primum quod attinet, respondet Malebr. ideo nos cogitationum illarum non reminisci, quod eæ, torpentibus spiritibus animalibus, & cerebri fibris, nulla in cerebro vestigia relinquant. Vvolfius autem respondet id evenire, quod eæ cogitationes ut plurimum sunt confusæ & obscuræ, non vero claræ & distinctæ. Nam quum mens a clarioribus semper ideis rapiatur; dum a statu idearum confusarum ad claras transit, nullam illis attentionem præbet; quo circa eorum recordari nequit (a). Cæterum falsum est, nos nunquam reminisci eorum, quæ in somno cogitavimus: nam quid est aliud somniorum recordari, quam recordari earum perceptionum, quas paullo distinctiores habuimus, quæque majorem impressionem in cerebro fecerunt? Quod spectat ad vigiliam & somnum, itidem falsum est, quod profert Lockius, nos non posse cogitare & dormire: quippe intima experientia scimus, nos dum dormimus, longissimas plerumque habere ratiocinationes. Nec raro Geometra somniabit longissimas demonstrationes, suæque abstracta Systemata Metaphysicus; quod

Lock;

(a) Vide quæ super ea re differit in utraque Psychologia.

Lock, si ingenuus esse voluisset, non potuisset negare. Sane nos dormimus non quando nihil cogitamus, sed quando quasi torpentibus cerebri fibris, & sanguine, motus fit tardior. Quod si cogitationes quædam somnum rumpunt, id fit, dum ex cerebrum paullo vehementius agitant. Tandem postremum Lockii argumentum, si nihil aliud est persona nisi identitas *conscientiæ*, recte concludit, duas Animam referre personas, alteram dum dormimus, alteram dum vigilamus. Sed id non magis absurdum est, quam eundem hominem in scena Mercurium agere & Sosiam. Quod si persona statuatur esse individuum rationale, quemadmodum cæteri omnes Philosophi docent, Anima, dum vigilamus & dormimus semper eadem erit persona, quippe semper idem individuum rationale. Nullis igitur evidentibus argumentis perennis Animi cogitatio everti potest.

Sed rogant quibus tandem de rebus, quum primum Mens corpori unitur, cogitat? Unde ei ideæ suppetunt? Est enim illa id temporis nuda quædam tabula: materiem ergo cogitationum non habet. Quasi vero, qui perennem cogitationem mentis ex ejus natura sequi demonstravit, cogatur etiam scire, unde illi materies suppetat cogitandi; aut hæc si ignoret, illud quoque ignorent. Sylvanus quidem Regis (a) ex unione cum corpore statim illi materiem cogitandi præsto esse affirmat. Nec id inverisimile est. Me ea ignorare lubens fateor. Scio adesse, qui refictam hanc Cartesii crambem exhibituri sunt, quique admiraturi, me Lockii alias prædicatorem egregium nunc velut palinodiam recinere. Sed nec eos moror, qui de re nulla, nisi ex cortice judicant, quibusque philosophandi principium est phantasia, quique laborem refugiunt ex immutabilibus ratiocinandi principiis; & his parco, qui ex vulgi fama potius, quam scriptionibus censent. Nempe si quis est qui minus Philosophorum jugum admittant, parcus eorum nominis cultor, rationis dumtaxat tenax, eum me esse pluries sum testificatus. Lockium vero ut virum doctum laudo, sed tantum abest ut admirer, ut nemo

E 4

po-

(a) *Regis usage de la raison, & de la foi.*

potius sit, qui magis agnoscat, quod veteri Philosopho Phocion dixit [a], totum ejus de Intellectu humano librum *Cupresso esse plane similem*.

*Prop. XIV.* Mens nec suapte natura, nec actione corporum circumpositorum perire potest.

D. Mens humana est substantia incorporea [prop. 12.] ut idcirco ejus attributa essentialia omnino sint diversa ab attributis essentialibus corporis [ibid. Coroll.]: dividi ego & discerpi in partes nequit nec suapte natura, nec passione circumpositorum corporum: nam & natura cujusque entis ad se conservandum comparata est; & substantia incorporea passioni corporum obnoxia esse non potest. Quæ autem talia sunt, siquidem natura sint viventia, immortalia sunt; Mens ergo humana, quæ & incorporea est, & natura sua vivens, nec corrumpi potest, & immortalis est.

*Sch. 1.* Hominem duabus rebus, mente, scilicet, & corporea machina, quæ separatim intelligi & esse possint, constare, communis est, & vetustissima omnium nationum, saltem cultiorum, opinio. Quod inde vel maxime patet, quod apud cultiores omnes nationes & sepulchrorum curam, & apotheosin, adeoque alterius vitæ beatæ vel miseræ, persuasionem reperimus. Ea vero publica persuasionem gravissimi Philosophi ad hujus doctrinæ adversarios refellendos confidenter utebantur, rati *consensionem omnium vocem quamdam naturæ esse. Quum de animorum æternitate differitur*, inquit Seneca, *non leve momentum apud nos habet consensus dominum aut timentium inferos, aut colentium* (b). Vide ut ea super re. differunt Gerardus Vossius, & Huetius [c]. Macrobius certe vetustioris sapientiæ diligens investigator, audacter scribit, *obtinuisse jam non minus de incorporeitate, quam de immortalitate animæ sententiam* (d).

2. Opponunt habuisse eam sententiam, hodieque habere,

[a] *Plutarch. in Phocione.*

[b] *Seneca Ep. 117. Vide, & Tull. in prima Tuscul.*

[c] *Vossius in Theol. Gentil. lib. 1. cap. 10. Huet. in Alnet. lib. 2. cap. 8.*

[d] *In Somn. Scip. lib. 1. cap. 14.*

bere, aut qui ignorent, aut qui adversantur. Scilicet & Saducæi, famigeratissima Judæorum Secta, utrumque negarunt [a]; & Epicurei apud Græcos Latinosque magis argumentis id dogma conati sunt subvertere: & in eadem fuere sententia Stoici, qui & tenuissimum æthera fecere animas, & longævas quidem, sed mortales. Nobilissimorum quorundam aliorum Philosophorum consimiles opiniones describit Cic. in p. Tusc. & Plutarchus in 4. de Placitis Philosophorum. Homerus animas quidem post corpora superesse docet, sed velut tenuissima corpora, quæ non omnem modo effigiem retineant humanam, sed *αἷμα καλαινόν* (*nigrum sanguinem*) bibant. Anima Anticlæ dicitur *σκιῇ ἢ ἵκελον ἢ καὶ ὄνειρον* *instar umbræ & somnii* avolare (b): quem locum Virgilius, ut solet, transtulit; ei enim Anchisæ anima describitur

*Par levibus ventis, volucrique simillima somno.*

3. Accedit, inquit, quod tota illa inferiorum doctrina, ex qua altera hæc de animorum incorporalitate & immortalitate profluit, Poetarum sit commentum, quemadmodum testificatur Diodorus Siculus (c). Orpheum, inquit, hymnos Deorum plurimos, & Orgya, & Inferorum fictionem ex Ægypto attulisse tradunt . . . . . impiorum pœnas & campos Elysios . . . . . ab Ægyptiorum sepulchris desumpta introduxit. Mercurium quoque secundum antiquos destinantem finxit mortuorum animas . . . Oceanum igitur Nilum vocant (Hesiodus, & Homerus), quoniam apud Ægyptios Nilus proprio nomine Oceanus appellatur . . . . . Acherusia palus prope Memphim, circumque prata amœna, paludesque calamis plene. Prosequitur deinde, mortuos hæc incolere loca, quod Ægyptiorum sepulchra magna ex parte in iis locis ædificata sunt: corpora vero, pergit, per fluvium & Acherusiam paludem ad sepulchra delata, ibique condita, aliaque plura, quæ nunc etiam servant Ægyptii, dant locum fabulis, quas Græci de inferis finxerunt.

(a) Vide Josep. lib. 2. Antiq. Judaic. cap. 18.

(b) Homer. Ody. V.

(c) Lib. 2. Biblioth. prope finem.

sunt. In eadem opinione fuisse videtur Cicero, alias Platonius; nam postquam adunco naso, quæ de inferis narrantur, descripsisset, rogat discipulum, hæc fortasse metuis & idcirco mortem esse censes sempiternum malum? *A. Adeo ne me delirare censes, ut ista esse credam?* *M. An tu hæc non credis?* *A. Minime vero, M. Male bercule narras.* *A. Cur quæso?* *M. Quia disertus esse possem, si contra ista dicerem.* *A. Quis enim non, in ejusmodi causa? aut quid negotii est hæc poetarum & pictorum portenta convincere . . . .* *M. Si ergo apud inferos miseri non sunt, ne sunt quidem apud inferos ulli.* *A. Ita prorsus existimo.*

4. Sed & Christiani quidam Theologi quum veteres, tum etiam recentiores incorporalitatem animi humani rejecerunt. Tertullianus apertissime animam corpoream facit, idque & bonæ Philosophiæ, & Scripturis Sacris esse conforme contendit (a). Jam Hobbes, Cowardus, Sociniani omnes eandem fovant opinionem. In Italia nostra quantam animorum contentione super ea re scriptum est a Cardano, Pomponatio, Ficino, Portio, aliisque? Sed & recentes nationes Siamenses, Sineses, Americani, atque Africanorum, qui noscuntur, nullius rei incorporeæ notionem habent, easque, ubi prædicari audiunt, rident. Huttentotti alteram vitam ignorant (b). Nec veteres entia hæc Cartesianorum incorporea ullo modo cognovisse, plurimis ostendit Huetius, vir in primis eruditus, in Origenianis. Lucas Brugensis doctus Lovaniensis Theologus non dubitavit scribere, opinionem hanc de incorporalitate & immortalitate animorum ignotam fuisse veteribus Hebræis, nec apud illos usurpatam, nisi post commercium cum Græcis (c). Veteres, ipsi plerique Pa-

(a) In lib. de Anima cap. 7.

(b) Vide Andreæ Kolbi in descriptione Capitis bonæ spei.

(c) Comment. in Matth. cap. 3. v. 7. Quum, inquit, tempore Macchabæorum plures florent Scribæ, quorum collegium ab Esdra exordium sumserat, qui sapientiæ stu-

tres tantum abest ut Mentibus, & Dæmonibus tenuia negaverint corpora, ut Deo etiam id dederint, rati quod corpus non sit, nihil esse, in qua re enarranda plurimus est Petavius in dogmatibus Theologicis tom. 1. & 2.

5. Tota hæc argumentatio recentium Epicureorum tribus constat partibus, 1. Quidam negant, aut immortalitatem animi, aut incorporealitatem, aut utrumque. 2. Quidam non negant diserte, sed ea animo attribuant, unde duo illa dogmata destrui videntur. 3. Quidam tandem ignorant. Ut a posterioribus exordiamur, ignoratio veritatis alicujus præjudicium adversus illam facere nullum potest: nam quæ res ignoratur, aut ex traditione majorum deriyata est, aut ex ratione. Si posterius, causa ignorationis est neglecta ea super re animi exercitatio. Ita veritates Geometricas, Astronomicas, Physicas necesse est eos omnes ignorare, qui iis nunquam intelligendis incubuerunt. Quod si eorum apud majorem hominum partem ignoratio argumentum est falsitatis, næ solemniter insaniunt Philosophi omnes,

derent, & ut jugo Græcorum subjacebant, nonnunquam audirent Græcorum de his rebus (animæ humanæ immortalitate, corporis resurrectione, æternis bonorum præmiis, & malorum suppliciis) fabulas, factum est ut cœperint quæstiones de his rebus in medium afferre, & inter se ventilare, atque a se mutuo dissidere, aliis ista adstruentibus, qui vocati sunt Pharisei, aliis negantibus, qui Saducæi. Ante hæc tempora non videtur populus Israel quidquam de his rebus doctus fuisse, aut quidquam de his publice prædicatum, eo quod lex harum rerum discretam mentionem non faceret, terrenas dumtaxat spes minasque bonis malisque ob oculos ponens. Fuit quidem Patriarcharum & prophetarum non dubia hæc fides, quod vel undecimum caput Epistolæ ad Hebræos testatum facit. Sed multa a Patriarchis & Prophetis credita prædictaque fuisse, quæ ut non proposita atque enarrata, ita nec credenda necessario populo fuerunt, ut Virginitas Matris Messiae, paupertas, passio, mors, resurrectio Messiae. Videtur clara publicaque hujusmodi rerum æternarum doctrina Messiae reservata fuisse,

omnes, qui prædicant Iſoſcelium triangulorum angulos ad baſim eſſe æquales, angulum in ſemicirculo eſſe rectum, &c. Si vero prius, cauſa eſt ſerina & barbara educatio majorum, ex qua progenies ſemper ſtupidior ſit nata. Nam in ipſa culta Europa, ejuſque literatiſſimis civitatibus reperies facile agreſtes homines, aut plebejos, qui maxima etiam Religionis Chriſtianæ capita ignorent. Si iſti delati in vacuas terras gentem integram condant, quacum nullum ſit aliarum cultiorum commercium, ignorabit ea intra duo ſæcula totam Chriſtianam ſapientiam. Erit autem qui ex ea ignoratione præjudiciū colligat adverſus Chriſtianam doctrinam? Quod de Hebræis dicunt, id duplex eſt. Exitiſſe apud Hebræos opinionem alterius vitæ adeoque immortalitatis animorum ſaltem apud primores plura probant manifeſte. I. Notata ſecta Saducæorum, quæ ei doctrinæ ſe opponeret. II. Lex a Moſe lata contra eos, qui defunctorum animas conſulerent, &c. De incorporalitate animorum loca diſerta, fateor, non habemus. Interim colligi id poteſt ex creatione animæ Adæ, aliisque locis, de quibus conſulendi ſunt Theologi. Hæc quum ſint, duo illa dogmata (prop. 12. & 14.) talia ſunt, ut ſeu e ratione nata dicamus, ſeu ex traditione propagata, quorumdem ignoratione in dubium vocari non poſſunt (a).

6. Quod ſpectat ad ſecundum, principio hallucinatur manifeſte eo loco Huetius, ubi ignotas incorporeas ſubſtantias veteribus fuiſſe ſcribit. Nam Thales, Pythagoras, Plato, Cicero ita eas ſubſtantias deſcripſerunt, ut non poſſint clariſſe recentibus Philoſophi. Plutarcus (b) quum retuliſſet Thaletem animam vocaſſe φύσιν ἀεικίνητον ἢ αὐτοκίνητον naturam quæ ſemper & a ſe moveatur; Pythagoram vero numerum ἐαυτὸν κινῶντα ſe moventem; Platonem νοῦν ἢ ψυχὴν ſubſtantiam mente præditam a ſe ipſa nobilem ſecundum numerum harmonicum; addit

(a) Vide ut copioſſime, veterum productis locis, eandem rem adſervat Cudworthus in ſyſt. intell. cap. 1. 19. ad 27. ibique adnotata Moſhemii.

(b) Lib. 4. de Placitis cap. 2.



addit (a) iis positam *incorpoream*. Ne vero quis putet tenue corpus illi habitum incorporeum, audiat quam egregie & Dei & Mentis incorporeitatem ex eorum mente explicat Cicero (b). *Nec vero, inquit, Deus ipse, qui intelligitur a nobis, alio modo intelligi potest, nisi mens soluta quædam & libera, SEGREGATA AB OMNI CONCRETIONE MORTALI, omnia sentiens & movens, ipsa prædita motu sempiterno. Hoc e genere & eadem e natura est humana mens...* In animi igitur cognitione dubitare non possumus, nisi in physicis *PLANE PLUMBEI* simus, quin nihil sit animis *ADMIXTUM*, nihil *CONCRETUM*, nihil *COPULATUM*, nihil *COAGMENTATUM*, nihil *DUPLEX*. Eodem modo loquuntur nobilissimi Platonici Philosophi Alcinus, Ammonius, Numenius, Proclus, Jamblicus, Plotinus, quorum verba brevitatis amore lubens omitto. Deinde tota doctrina idearum æternarum Philosophiæ Platoniciæ, formarum substantialium Aristoteliciæ, spatii etiam vacui Epicuriæ, ostendit incorporea veteribus ignota non fuisse. Quod si ne id quidem est clare loqui de substantiis incorporeis, operæ prætium fecisset Anabrigensis Episcopus, si conceptas eas de re formulas docuisset Philosophos, is, qui tam cernit acute, ut in ipsis *Bacco & Priapo* Mosem videat expressum. Jam veterum Theologorum, quorum isti autoritate abutuntur, perspicaces, si Diis placet, Criticos, turpe est doctrinam non esse assequutos. Veteres nempe illi Patres duo in anima distinguebant humana *Animam & Spiritum*, quod & Græci quidam fecere Philosophi (c). Priorem corpoream, & mortalem, posteriorem incorpoream & immortalem habebant (d) Augustinus, aliique priorem partem *Spiritus vehiculum* appellant. Eodem modo de Angelis loquebantur. At existimare substantiam ipsam spiritus incorpoream tenui corpore circumdari, velut

vehi-

(a) *Ibid. cap. 2.*

(b) *Lib. 1. Quæst. Tusc.*

(c) *Vide Plut. in 4. de placitis.*

(d) *Vide Tatianum orat. ad Græcos, Irænum lib. 4. v. cap. 6. & 7.*

vehiculo & sensorio, non idem est, atque ipsam Mentis substantiam facere corpoream, quum recentissimi Philosophi incorporalitatis animorum alioquin defensores, eandem docuerint opinionem. Oportebat id observare *Confarcinator Philosophiæ paganae*, præsertim quum doctus Gentis suæ Auctor aperte id explicuisset (a). Qua vero ratione Tertullianus, Hilarius, & quidam alii Deo corpus tribuerint, loco suo.

8. Tandem, qui negant incorporalitatem animi, ratione ne illi utuntur, an auctoritate? Rationes quam sint pueriles inferius dicetur. Auctoritas vero esse non potest, nisi plebejorum, quos non negamus. Mentis sibi velut subtilia corpora repræsentare: eorum tantum captui Homerus aliique Poetæ sese adaptarunt, qui idcirco gravissime vapulant Platoni Philosophorum facile principi (b), quod Religionem auctoritate sua frædisime conspurcarint. At suaves sunt *magnanimi isti spiritus*, ut vocari volunt, qui nos, dum revocare conantur a popularibus erroribus, ad hominum sæcem appellant. Non pudet Hobbiam, & Lockium eos patronos appellare? Nam quod ad immortalitatem attinet ne populum quidem appellare possunt, quum perpetua ea de re Gentium omnium consensione aperte refellantur. Jam Diodorus & Cicero fabulas tantum veræ doctrinæ adfutas a Poetis confictas scribunt, non rem ipsam. Dic queso, inquit, Cicero eodem in loco, num te illa terreant, *triceps apud inferos Cerberus, Coccyi fremitus, transvectio Acherontis, mento summam aquam attingens, siti eneectus Tantalus? num illud quod Sisyphus versat,*

*Saxum sudans nitendo, neque proficit bilum?* Fortasse etiam inexorabiles iudices Minos, & Rhadamanthus, apud quos nec te Lucius Crassus defendet, nec Marcus Antonius, nec quoniam apud Græcos iudices res agetur, poteris adhibere Demosthenem? Hæc Poetarum & pictorum portenta vocat, non id, superesse post mor-

tem

(a) Joan. Cleric. in Hist. duor. prior. Eccles. Sæcul.

(b) In 3. de Rep.

sem corporis immortales animos; in qua re demonstranda potissimum eo in libro adlaborat.

9. Constat ergo de Traditione duorum illorum dogmatum. Percenseamus nunc breviter præcipue in eam sem Philosophorum argumenta: Plato quum in Phedone, tum etiam in Phædro plura profert incorporalitatibus, & immortalitatis animorum argumenta, I. Quod imperat, & id, cui imperatur; quod utitur, & id quo utitur distincta ac diversa inter se sint oportet: est autem in nobis quod paret quidem corpus; idemque instrumentum, quo altera nostri pars utitur: imperat vero ratio, eaque corpore utitur, idque moderatur; ergo ratio, adeoque animus, in quo inest ratio, res est a corpore distincta & diversa: nec vero corpus natura sua se & vi atque temperatione regit, sibi que imperat; nam clarus inest in nobis sensus, machinam hanc humani corporis rei alteri subjici, eique parere.

10. II. Jam præcipuum immortalitatis argumentum ex ipsa animi natura activa & irrequieta desumebat Plato. Nempè ex veteri philosophorum consensione, omne motum corpus est, incorporeum quod movet, quod probatum Aristoteli, hinc gravioribus omnibus philosophis: animus ergo qui principium est & sui & corporis vitæ atque actionis corpus non est, neque idcirco mortalis. Libeat Ciceronis verbis id argumentum describere. Nam, inquit, (a), quod semper movetur, æternum est: quod autem motum affert alicui, quodque ipsum agitur aliunde, quando finem habet motus, vivendi finem habeat necesse est. Solum igitur quod sese movet, quia numquam deseritur a se, numquam ne moveri quidem desinit, quin etiam cæteris, quæ moventur, hic fons, hoc principium est movendi: principio autem nulla est origo: nam ex principio oriuntur omnia: ipsum autem nulla ex re alia nasci potest: nec enim id esset principium, quod gigneretur aliunde. Quod si nunquam oritur, ne occidit quidem unquam: nam principium extinctum nec ipso ab alio renascetur; nec ex se aliud crea-

(a) In Somnio Scipionis.

creabit: siquidem necesse est a principio oriri omnia. Ita fit, ut motus principium ex eo fit, quod ipsum a se movetur: id autem nec nasci potest, nec mori ... Quum pateat igitur æternum id esse, quod a se ipso moveatur, quis est, qui hanc naturam animi esse tributum neget? inanime est enim omne, quod pulsus agitur externo: quod autem animal est, id motu cietur interiore & suo: nam hæc est natura propria animæ atque vis. Quæ si est una ex omnibus, quæ sese moveat; neque nata est certe, & æterna est. Quæ Platonica ratiocinatio æqualis esset Geometrarum demonstrationibus, si animi humani sempiterni essent: nunc quando constat Platoni ipsi, creatos esse animos a Supremo Deo (a); argumentum illud quod observatum Vossio, sublestum est. Quamquam ne is ipse quidem id probasse videtur, quippe qui in Timæo voluntate supremi Opificis Mentis facit immortales, sed natura sua mortales, in quam opinionem plures ex veteri Ecclesia Patres pertraxit, qui *gratia*, non *natura*, quum Angelos, tum Mentis immortales habuerunt. Interim ne hæc quidem distinctio digna est aut tanto philosopho, aut tantis sectatoribus. Nam si quidem Natura rerum nihil est, quam Dei constans & immutabilis voluntas rerum creatrix & conservatrix; quæ Dei voluntate sunt immortalia, natura sunt talia; si vero natura sint vires rerum factarum, quam naturam naturatam dixere Scholastici; partiri iterum quæstionem oportet: nam vi ipsarum mentium necesse est esse eas immortales, quippe nulla res sua vi & natura perire potest: at utrum perire possint *passione*, seu actione extrinsecarum rerum, id tantum in quæstione esse potest. Hæc ne sunt Pherecidis illa, quibus immortalitatem animorum sibi persuasit Plato?

II. Veteres quidam Theologi ex providentia divina luculentum desumebant argumentum, cur animi sint immortales. Nam quum constet plerosque viros bonos in præsentī vita perpetuo adversis conflictari; malos contra prosperari, & in deliciis esse: nisi altera sit vita, qua contraria omnia, bonis bona, malis mala retri-

(a) Vide *Timeum*.

tribuantur, videri posset, res humanas a Deo negligi, quod esse nequit (a).

12. B. Thomas in utroque opere, *Summa* nempe *Theologica*, & altera *adversus Gentes* accurate prorsus & subtilissime de incorporalitate & immortalitate animorum disputavit. In posteriore hoc opere (b) plurimis demonstrat, operationes intellectuales esse non posse corporeas: inde vero incorporalitatem, & immortalitatem omnium substantiarum intellectivarum derivat. *Ostensum est*, inquit, *quod intelligere non potest esse actio alicujus corporis: est autem actus animæ, anima igitur ad minus intellectiva, non est corpus* (c). Jam adhibet argumentum ex principio actionis & motus: nempe quum naturæ corporeæ sit aliunde moveri & agitari; quod principium est motionum corporis corpus corporeumve non est; est autem anima vitæ, adeoque notiorum corporæarum principium, & fons; corpus ergo anima non est. Quo argumento sæpe utitur & Pláto, & Aristoteles, & plerique alii veterum, ut dictum est.

13. Sed illud in primis egregium si quid video. *Omne corpus divisibile est: omne autem divisibile indiget aliquo continente & uniente partes ejus*: (itaque Newtoniani vim attractricem, aut naturæ quemdam spiritum commenti sunt, qui certe corporeus esse non potest, nisi & is alio coire dicatur, & sic porro in infinitum, Campanella vero spatium universali eam vim conglutinandi, & attrahendi tribuit): Si igitur anima sit corpus, habebit aliquid aliud continens, & aliud magis erit anima: videmus enim, anima recedente, corpus dissolvi; ut si hoc iterum sit divisibile, oportebit vel devenire ad aliquod indivisibile & incorporeum, quod erit anima: vel erit in infinitum procedere, quod est impossibile; non est igitur anima corpus (d).

14. Quod spectat ad immortalitatem Substantiarum intellectivarum, pluribus ille eam rem persequitur in

Tom. II.

F

codem

(a) Vide Chrysostomum orat. 4. de Providentia.

(b) Lib. 2. cap. 50. & 51.

(c) Contra Gentes lib. 2. cap. 65.

(d) Ibidem l. 3.

eodem libro (a). I. Nihil corrumpitur, nisi quatenus compositum est ex dissolubilibus partibus: intellectivæ vero substantiæ simplices sunt; corruptioni ergo non sunt obnoxia: II. In entibus simplicibus *vita, essentia, existentia* unum sunt: at quæ sunt talia, sola annihilatione, non etiam corruptione perire possunt. Pereant enim corruptione; superesse aliquid debet; quum sint simplicia, nihil, nisi ipsum esse superesse potest. Annihilatio autem nullius rei viribus naturæ fieri potest; viribus ergo naturæ perire nequeunt substantiæ intellectivæ. Eo argumento mirifice delectatus est Vvolsius. III. Nihil Natura corrumpitur, sed *passione*, idest actione eorum, quæ excipit: nihil autem substantia intellectiva suscipere potest ex corpore, quod ejus naturæ sit contrarium, quum nihil ex corpore corporeum transire in incorporeum possit: ergo ne *passione* quidem perire Mens potest. IV. Quæ desideria sunt naturalia Entibus inania esse non possunt, quum *nihil frustra Deus naturæ Auctor operetur*; est tamen desiderium beatitudinis Mentibus innatum: & id complectitur *semper esse*, uti patet; inane ergo esse nequit. Semper ergo sunt, quæ hujusmodi sunt. Atque hæc sunt præcipua. Cetera Arabicæ Philosophiæ principiis innituntur, nec vim habent ullam, nisi adversus eos, qui eodem modo philosophantur.

15. Operis esset infiniti ea enarrare, quæ eandem in rem egregia alia Italiæ nostræ ingenia, Marsilius Ficinus in *Theologia Platonica*, Hieronymus Cardanus in libris *de immortalitate*, Thomas Campanella, Pomponatius, Pici Mirandulæ Comites, aliique excogitarunt. Venio ad Cartesium, qui nova quadam ratione & via hæc dogmata conatus est demonstrare (b). *Quoniam scio*, inquit, *omnia quæ clare & distincte intelligo, talia a Deo fieri posse, qualia illa intelligo, satis est, quod possum unam rem absque altera clare & distincte intelligere, ut certus sim, unam ab altera esse diversam*. Possum autem intelligere cogitationem, idest inentem,

fine

(a) Cap. 55.

(b) Medit. 6. de pr. phil.

sine ulla extensione, seu corpore: nam. 1. Si supponam me nullum habere corpus; adhuc cogito, cogitationisque sum conscius. 2. Nullam extensionem in cogitatione inesse video; nec possum dimidiam; aut tertiam partem cogitationis intelligere; conficitur cogitationem, seu mentem rem esse distinctam & diversam ab extensione, seu corpore.

16. Plura adversus illud Cartesii argumentum objecta sunt: Autor *secundarum* objectionum Mersennus vir in primis doctus & acutus reposuit; *memineris te non actus quidem & revera; sed tantum animi fictione corporum omnium phantasmata pro viribus rejecisse; ut te solam rem cogitantem esse concluderes; ne postea forte concludi posse credas; te revera nihil esse præter Mentem, aut cogitationem vel rem cogitantem. . . .* Hactenus cognoscis te esse rem cogitantem; sed quid sit res illa cogitans nescis. Quid enim si fueris corpus; quod variis motibus & occurribus illud faciat, quod vocamus cogitationem? licet eam existimes te corpus omne repulisse, in eo decipi potuisti, quàm te ipsum minime rejeceris; qui sis corpus. Quomodo enim demonstras; corpus non posse cogitare? vel motus corporeos non esse cogitationem? Cui Cartesius respondet item generatim & vage, sufficere quod unam rem absque altera clare intelligamus; ut agnoscamus illas realiter distinguere. Si id non sufficit, date; inquit; certius aliquod signum distinctionis realis: nam confido nullum dari posse: . . . Si qui autem negent se habere distinctas ideas Mentis & corporis, nihil possum amplius; quàm illos rogare; ut ad ea; quæ in hac secunda meditatione continentur; satis attendant. Nec fallitur Cartesius profecto dum cogitationem & extensionem realiter distincta esse scribit. Quis id non intelligat? Sed id oportuit demonstrare; distinguere ea ut duas substantias, seu res per se subsistentes; nec intrinsicè alteram ab altera pendentem: non ut duos ejusdem substantiæ modos, vel duo attributa.

17. Antonius Arnauldus auctor objectionum quarinarum minutatim prorsus argumentum illud cribavit, ut Cartesius ipse ingenue confiteatur; se non potuisse optare m.

*gis perspicacem scripti sui examinatorem. Ac primum, inquit ille, ut vera sit illius syllogismi propositio (quæ clare & distincte percipiuntur esse substantias) non de quacumque etiam clara & distincta, sed tantummodo de adæquata rei cognitione intelligi debet. . . . contendat igitur aliquis, inadæquatam tantum esse tui conceptionem, dum te concipis tamquam rem cogitantem, non extensam; similiterque quum te concipis tamquam rem extensam, non cogitantem. Itaque ut possum concipere figuram, sine aliis proprietatibus circuli, nec inde sequitur eam esse realiter a circulo distinctam; ita cogitationem sine extensione, quin concludi possit, esse illas duas distinctas substantias. Reposuit Cartesius, si, ut duo distingui realiter intelligatur, necessarium sit, adæquatas eorum habere ideas, rerum distinctionem realem solus Deus noscet: quippe qui solus ideas rerum adæquatas habere potest. Ad rem vero quod attinet, Et si, inquit, multa forte in me sint, quæ nondum adverto; quia tamen id quod adverto mihi sufficit, ut cum hoc solo subsistam; certus sum me a Deo potuisse creari absque aliis, quæ non adverto; atque ideo ista alia ad mentis essentiam non pertinere. Nihil enim eorum sine quibus res aliqua esse potest, mihi videtur in ejus essentia comprehendendi: & quamvis mens sit de essentia hominis, non tamen est proprie de essentia Mentis, quod humano corpori sit unita.*

18. Plures interea fuisse reperio e Scholæ Theologis, qui, quod animi immortalitatem spectat, in ea fuere opinione, credere eam divina revelatione oportere velut rem supra captum humanum positam, & quam nullis naturæ rationibus demonstrare possimus. Nam naturæ rationes, quas B. Thomas protulit Henricus & Scotus probabiliter suadere, non necessario demonstrare censuerunt, ut Canus agnoscit (a); & Cajetanus, addit idem, sui valde dissimilis scripserit, se credere quidem animam rationalem incorruptibilem esse, at nescire tamen. In eandem sententiam ingressi sunt & alii, in primis

Ni-

(a) De locis lib. 12. cap. 1.



Nicolaus Perrottus (a), & Joannes Lockius (b). Nempe,, inquit, tamdiu res creatæ vivunt, quoad eas esse & vivere Animas vult Deus: at quousque esse & vivere animas velit Deus id scire nequimus nisi divina revelatione, seu manifestatione divinæ voluntatis. Atque pluribus hos refellit eodem in loco Canus: ego tribus verbis. Nempe divina voluntas, non omnis quidem, & adæquate, sed ex parte, ab hominibus intelligitur non *revelatione* tantum, sed ipsa quoque naturali ratione, quum & revelatio, & ratio naturalis duo quasi radii ejusdem Dei luminis æterni sint. Itaque vulgatum est apud Philosophos omnes, & *naturæ via*, & *via prophetiæ Deum nos alloqui*: & Augustinus elegantissime Philosophos appellat *vates naturæ* (c). Nihil impedit igitur, quo minus inter alia, quæ de divina voluntate cognoscimus naturæ via, & hoc sit, animos esse immortales (d).

Prop.

(a) Apud Bælium in Diction. Art. Perrot. Remarq. L.

(b) Locke 3. Replique a Mr. Stilling.

(c) Lib. 2. de ordine.

(d) Quum divina voluntas æternæ Dei sapientiæ esse contraria nequeat; possintque ex rerum natura plures divinæ sapientiæ rationes a nobis intelligi; & voluntates, quæ ad eas rationes pertinent, intelligi a nobis posse; equidem nemini ambiguum esse puto. Ut ecce, Deum velle mundum existere; quem conservat tanto ordine ac providentia; item velle omnia ex æterno ordine in eo fieri; tum homines & se conservare; a mutuo se fovere & amare, ac plura ejusdem generis; perspicua ego esse ajo ex naturæ ipsius contemplatione. Itaque quamquam divinam homines sapientiam & voluntatem plene & adæquate nullo pacto comprehendere possunt, sunt tamen plurimæ, quæ Naturæ res spectant, in quibus liquido rationes ac voluntatem Dei intelligimus. Ad id nos genus referre hoc possumus, de quo disputamus, mentem humanam esse quum ex natura sua, tum etiam ex divina voluntate non indestructibilem modo, sed immortalem quoque. Quid enim attinisset & simplicem illam creare, & essentialiter intelligentem ac viventem, & æterni cupidam atque sempiternum

*Prop. XIV.* Dogmata incorporeitatis & immortalitatis animorum sunt Christianæ Religionis dogmata.

D. Christianæ Religionis dogmata sunt, quæ a Deo sunt revelata: quæ vero a Deo sunt revelata Divinis scripturis, & traditionibus demonstrantur: demonstrantur autem divinis scripturis & traditionibus incorporeitas & immortalitas animorum: dogmata ergo sunt Christianæ Religionis. Propositionem hujus argumenti majorem apud Christianos, inter quos hoc theorema disceptatur, constat. Assumptionem sequentibus probamus.

I. Plurima veteris Testamenti loca pro incorporeitate, & immortalitate animorum proferri solent, locus in primis sub initium *Genes.*, quo in loco animæ creatio describitur. Cum Deus corpus humanum ex argilla molliori conformasset, inspiravit in faciem ejus spiraculum

*spectantem*, ubi tota ejus existentia non brevi solum unius æculi ambitu, sed plerumque unius mensis, ac nonnumquam tiam unius diei, contineatur? Artifices inter homines machinarum naturam, quas construunt, ei tempori aptare solent, cui destinant. Ita ex iis intelligere facile, perpetuo ne ut essent, voluerint auctores sui, an mœstyuæ, annuæ, seculares. Nemo ignorat, æternitati Ægyptios Pyramides suas ædificare voluisse, qui tantas moles molibus aggerarunt. Cur non idem ego ex Dei operibus conjiciam? Præsertim cui nec efficiendi scientia, nec potentia desit, cuique res subjectæ, non ut homini, resistunt, sed parent, ut sit in iis, quod scholæ more suo dicunt, potentia obediæntialis Dei activæ potentia ejusque imperio equalis. Accedit, quod quædam humane mentis aut facultates, aut propensiones sunt, quæ suapte natura in infinitum tempus feruntur, qualis intelligentia, voluntas, providentia, quæ in iis animantibus, quorum tota vita hic absolvitur, nullum est vestigium. Hinc futuri providentia in homine, quæ nulla in brutis.

Serit arbores, quæ alteri sæculo profint.

Quid autem causæ esse dicimus, quod ex omnibus animantibus solus homo curam ac providentiam suam ultra vitam porrigat longissime? Hæc me monere videntur, me ad æternitatem generari, cui ego vel imprudens studeo, & ad quam natura ipsa rapior.

*culum vitæ , & factus est homo in animam viventem ,* idest factus est vivens , cum antea non esset nisi pura machina . Patet hinc origo Animæ Divina . Scio locum non esse adeo manifestum , ut sit ab omni exceptione immunis : nihil enim in eo loco aliud dici videtur , nisi Deum dedisse machinæ illi vim vitalem , quæ stare etiam potest in Dicæarchi sententia . Itaque Grotius , & Calmetus agnoscunt infirmum esse ex hoc loco adversus Socinianos petatum argumentum . Sed fatendum non parvam habere inde desumptum argumentum probabilitatem , maxime quum perspicacissimi veterum interpretum agnoscant eo in loco animi divinam naturam . Addi solet argumentum desumptum ex Mosaica lege , quæ extat in *Levitico* , contra eos , qui animas mortuorum consulunt . Ex qua lege patet persuasum fuisse Hebræis ejus temporis , animas corporibus superstites esse . Non est hoc quidem argumentum liquidum , quippe non explicat Moyse , vera ne fuerit illa populi persuasio , an falsa , nec licet ex populari persuasionem solide argumentari : sed sua probabilitate non caret . Argumentum desumptum ex facto Pythonissæ Endoræ : quæ Samuelis animam revocavit minus etiam probat : nam non consentiunt . Interpretes , nec perspicuum est animam ne Samuelis , an spectrum aliquod excitaverit Pythonissa illa . Quocirca ex vetustis libris veteris Testamenti probabiliter certe , sed non admodum perspicue adversus Socinianos argumentari possumus . In recentioribus veteris Testamenti libris , ut in libro Sapientiæ , in libris Machabæorum , clariora sunt hujus rei exempla . Sed hos libros non admittunt Sociniani .

2. Præster igitur novi Testamenti loca , quæ sunt apertiora , urgere . Primum Matth. 10. v. 28. Servator noster aperte dicit , *nolite timere eos , qui occidunt corpus ; animam enim occidere non possunt ; sed timete eum qui postquam occiderit corpus , potestatem habet mittendi animam in gehennam ignis .* In hoc loco animus a corpore , illius vita a vita corporis manifestissime distinguitur . Non solum ergo hinc probatur animos esse incorporeos , verum etiam corporibus extinctis supereffe .

Accedit quod Matth. 18. apparuerint cum Christo Moyſes , & Eliæ ; ſupererant igitur animæ Moyſis , & Eliæ , poſtquam ii mortui fuerant . Tum Paulus in epiſt. ad Philipp. inquit , *Cupio diſſolvi , & eſſe cum Chriſto* . Ex Pauli igitur ſententia animus diſſolvi poteſt a corpore , & ſuper-eſſe , quod argumento eſt incorporeum eſſe , & immortalem . His omnibus adde conſenſum omnium Chriſtianorum ab Apoſtoliſ uſque ad nos continuatum , qui locus eſt Theologicus , ex quo certiffima petuntur argumenta .

3. Super-eſt ut Epicureos & Socinianos audiamus , neque enim licet quemquam inaudita cauſa damnare . Quæcumque adverſus incorporealitatem , & immortalitatem animorum depravata ſuppeditat ratio , unus complexus eſt Lucretius in tertio de natura rerum . Hic Philoſophus primum animum eſſe corporeum ſic probare conatur . Cum videamus magnam eſſe corpus inter , & animum harmoniam , ita ut quæcunque animo accidunt , corpus etiam efficiant , & quæ corpori , animum ; ſequitur eadem natura præditos eſſe animum , & corpus , alioquin iſdem cauſis non efficerentur . Deinde animus movet corpus , corpus animum afficit , ita ut nihil animus percipere , aut ſentire poſſit , niſi per excitatas in cerebro commotiones : id autem eſſe nequiret , niſi animus , & corpus ſimili conſtarent natura , eo vel maxime quod tangere & tangi nulla res niſi corpus poſſit : fatendum igitur eſt , concludit Epicureus iſte ,

*Corporea natura animum conſtare , animamque .*

4. Accedit Inde ad animi mortalitatem . A verſu igitur 418. ad verſ. 842. animos naſci , & interire cum corporibus viginti oſto argumentis demonſtrare conatur . Præcipua ſunt huiusmodi .

*Prinſipio , quoniam tenuem conſtare minutis  
Corporibus docui , multoque minoribus eſſe  
Prinſipiis factam , quam liquidus humor aquæ eſt ,  
Aut nebula , aut fumus : nam longe mobilitate  
Præſtat , & a tenui cauſa magis iſta movetur ;*

*Nunc*

*Nunc igitur quoniam quassatis undique vasis  
 Diffuere humorem, & laticem discedere cernis,  
 Et nebula aut fumus quoniam discedit in auras,  
 Crede animam quoque diffundi, multoque perire  
 Ocyus, & citius dissolvi corpora prima  
 Cum semel omnibus e membris ablata recessit.*

5. *Præterea gigni pariter cum corpore, & una  
 Crescere sentimus, pariterque senescere mentem.  
 Nam velut infirmo pueri, teneroque vagantur  
 Corpore, sic animi sequitur sententia tenuis.  
 Inde ubi robustis adolevit viribus ætas  
 Consilium quoque majus, & auctior est animi vis.  
 Post ubi jam validis quassatum est viribus ævi  
 Corpus, & obtusis ceciderunt viribus artus  
 Claudicat ingenium, delirat linguaque mensque,  
 Omnia deficiunt, atque uno tempore desunt.  
 Ergo dissolvi quoque convenit omnem animæ  
 Naturam, ceu fumus in altæ aeris auras.*

6. *Huc accedit uti videamus corpus ut ipsum  
 Suscipere immane morbor, durumque dolorem  
 Sic animum curas aceris, luctumque, metumque  
 Quare participem lethi quoque convenit esse.*

7. *Huic argumento aliud adjungit ab animi demen-  
 tia, quæ medicinis corporeis sanatur.*

*Et quoniam mentem sanari corpus ut ægrum  
 Cernimus, & flecti medicina posse videmus,  
 Id quoque præfagit mortalem vivere mentem.*

8. *Ad hæc si animus esset immortalis, quid doleret  
 cum e corpore dissolutum it? lætari enim potius de-  
 beret. Sane rogant ii, qui huic argumento coronidem  
 addunt, animæ lubentes ne in corpus intrarunt, an  
 coactæ? Si primum, postquam infinita corporis mala  
 sunt expertæ, & lubentes exire deberent. Si coactæ,  
 quid tantum mali commeruere? Vide sis hoc argumen-  
 tum magna verborum pompa, & sententiarum pondere  
 tractatum ab Arnobio lib. 2. adversus Gentes.*

9. *Et hæc quidem Epicureorum Nepotes. At Soci-  
 niani negant ullo modo doctrinam de incorporalitate,  
 & immortalitate animarum in Scripturis Sacris haberi;  
 imo*

imo illarum dogmatibus adversari pronunciant ; ajuntque cum Pythagorica , atque Platonica Philosophia in Christianam Religionem mansisse . Nam , inquiunt , in toto Mosis Pentateucho neque vestigium est hujus dogmatis , neque vola . Quin oppositum , inquiunt , reperitur , cum Deus facit hominem ex argilla , ei inspirat vitam , quam *nephesh hajach* , & *nischmat hajim* passim Hebræi vocant , quæ vocabula halitum , flatum , respirationem significant , ut Interpretes Hebraicarum rerum consentiunt . Quod autem nullam animam a corpore distinctam explicent vocabula ista , patet , inquiunt , ex eo quod promiscue etiam adhibentur ad animas brutorum significandas , quas ipsa scriptura docet esse corporeas . Præterea ex ipsis verbis , quibus Moyses describit hominis creationem , patet , inquiunt , hominem purum esse corpus animatum . *Formavit Deus hominem pulverem ex terra* . Sic enim , inquiunt , legendum est , non *ex pulvere terræ* , ut vulgo legunt . Nam Hebraica præpositio *Min* non præponitur pulveri , sed terræ . Jam post peccatum nulla animi facta mentione , Deus sic Adæ minatur , *pulvis es , & in pulverem reverteris* . Ad hæc Scriptura de anima hominis non alia ratione loquitur , quam de Animabus bestiarum : Genes. 7. v. 22. eodem illò vocabulo *nischmath hajim* vocatur hominum , & brutorum anima , ut observat Scherzerus in systemate Theologiæ loco 5. Genes. 9. pactum Deus paciscitur nedum cum homine , sed cum omni anima vivente , quæ est nobiscum tam in volucribus , quam in jumentis , & pecudibus terræ . Requirit etiam rationem vitæ hominis , & de manu hominum , & de manu bestiarum . In his ita se Deus gerit cum homine , tanquam qui nihil majus habet ipsis brutis . Præterea Salomon in Ecclesiaste cap. 3. rem omnem definit clarissimis verbis . „ *Dixi in* „ *corde meo de filiis hominum ut probaret eos Deus ,* „ *& ostenderet similes esse bestiis , idcirco unus interi-* „ *tus est hominum , & jumentorum , & æqua utriusque* „ *conditio . Sic moritur homo , sic & illa moriuntur :* „ *Similiter spirant omnia , & nihil habet homo jumen-* „ *to amplius ; cuncta subjacent vanitati , & omnia per-* „ *gunt*

„ gunt ad unum locum : de terra facta sunt , & in ter-  
 „ ram pariter revertuntur . Quis novit si spiritus filio-  
 „ rum Adam ascendat sursum ; & spiritus jumentorum  
 „ descendat deorsum „ . Hæc Salomon .

10. Tandem urgent locum Pauli in prima ad Cor. cap. 15. Eo in loco Paulus ostendit Christum resurrexisse , idque testimoniis eorum , qui illum resuscitatum viderant . Probat secundo & nos olim resurrekturos , tum quia resurrectio mortuorum possibilis est , ut patet ex Christo , qui resurrexit ; tum etiam quia vanæ essent omnes nostræ afflictiones , & labores , nisi resurgere deberemus . Si enim , inquit , *in hac tantum vita speramus in Christum , miserrimi omnium hominum sumus : si non est resurrectio , edamus , & bibamus cras moriemur .* Qui hunc in modum loquitur persuasum sibi habere debet , animas corporibus superstites non esse : nam si animæ supersunt , etiamsi non resurgant corpora , virtutum præmia obtinere possunt . Itaque dogma immortalitatis animorum , pergunt Sociniani , evertit necessitatem resurrectionis corporum . Si enim animæ immortales sunt , esseque possunt beatæ sine corporibus , quid attinet eas iterum in corpora , velut in tetros carceres , detrudere ? certe animæ horrere debent conjunctionem cum corporibus , in quibus tot mala sunt perpessæ . Hæc Sociniani .

11. Nunc his paucis respondebimus , & primum quidem Lucretii argumentum , quo probare nititur animum esse corporeum ex corporis , & animi consensu , ineptum est . Scilicet cum Deus hominem ex animo , & corpore constare voluisset , efficere debuit , ut inter utrumque harmonia esset perpetua , alioquin monstrum biceps fecisset . Sed qua ratione , inquiunt , corporeum afficit corporeum , & hoc illud ? Corporeum ab incorporeo affici & moveri clare percipio , cum omnes vires motrices sint incorporeæ : rationem , & viam ignoro . At id non efficit quominus primum cognoscam . Interim quoniam ex hoc capite omnia alia Lucretiana argumenta pendent ; explicemus in antecessum paulo fufius mentis , & corporis unionem .

12. Silvanus Regis in auréo opere de usu Rationis , & Fidei lib. I. parte I. cap. 3. decem ponit leges unionis mentis , & corporis , quas perpetua experientia veras esse discimus . Prima est , ut quousque Mens unitur corpori habeat ideam extensionis corporeæ occasione motionum ab externis corporibus in sensus nostros excitatarum . Hinc fit , ut omnes mentis perceptiones cum phantasmatibus corporeis conjunctæ sint , nec possibilis sit in anima conjuncta corpori pura intellectio . II. Ut omnis motio cerebri excitet similem in animo sensationem , quæ tamdiu duret , quamdiu hæc cerebri motio . III. Ut quousque anima corpori conjuncta est , habeat notionem alicujus corporis peculiaris in sensus agentis . IV. Ut anima , excitata motione in cerebro ab aliquo peculiari objecto externo , statim convertatur ad id objectum , & eam motionem referat ad objectum suum cum circumstantiis temporis , & loci . V. ut si iterum excitetur motio aliqua in cerebro , quæ alias fuerit ab objecto externo facta , nascatur in anima ejusdem objecti reminiscencia . VI. ut excitata motionem quolibet in corpore , qua corporis harmonia conservatur , aut destruitur , nascatur in anima voluptas , vel dolor . VII. ut quæ ideæ cum voluptate conjunctæ sunt determinant animam ad objecta harum idearum persequenda , quæ cum dolore , ad fugienda . VIII. ut omnes ideæ animæ , seu notiones , quæ pertinent , aut ad corpus nostrum , aut ad animum , aut ad bona utriusque , vel mala , conjunctæ sint cum motionibus excitatis in cerebro . Hinc fit , ut ad notionem vero rei terribilis contremiscat corpus , ad notionem vero rei amabilis oculi , & vultus rideant . IX. ut quamdiu anima cum corpore unita est , nulla de re cogitare possit , nisi ex alicujus motionis occasione in cerebro , vel sensibus excitatæ . X. ut perceptiones animi sint magis , aut minus expeditæ prout magis vel minus expediti fuerint motus cerebri , & sensuum . Hanc decimam legem substituimus Silvano Regio .

13. Ceterum non consentiunt Philosophi circa modum unionis animæ , & corporis , ex quo hujusmodi sequuntur leges , quas perpetuo experimento discimus .

Sunt



Sunt quibus placet animam physice in corpus influere, corpus in animam, quemadmodum Scholastici ferme omnes. Quod systema vix defendi potest salva animi incorporeitate. Alii adsciverunt substantiam quamdam mediam inter mentem, & corpus, qualem induxerat post veteres quosdam Philosophos Athenagoras, de quo supra: Ita Gassendus, Cudworthus, & Clericus. Cartesiani Deum faciunt auctorem immediatum hujusmodi legum, qui nempe immediate producat cogitationes in anima, ex occasione motionum corporearum, & motiones in corpore, ex occasione cogitationum animi. Leibnitiani ex natura animi, & corporis per harmoniam præstabilitam hæc explicant. Quæ omnia inferius edifferentur. Ex posterioribus systematibus possunt facillime argumenta Lucretiana refelli. Sed si maius modum unionis mentis, & corporis inter ignota referre, non idcirco Lucretii argumenta illa minus erunt solubilia.

14. Postremis Lucretii argumentis facillime respondetur, si recoluerimus leges illas unionis mentis, & corporis. Juxta illas leges mens cogitat secundum motiones cerebri, & sensuum, & secundum easdem afficitur. At inde non sequitur eam esse corpoream, & mortalem, sed tantum ita esse a Deo factam, ut non possit, quamdiu in corpore est, alio modo operari. Objectiones igitur omnes Lucretianæ sunt phenomena hominis, quæ ex legibus unionis mentis, & corporis nascuntur. Quod vero anima timeat a corpore separari, & doleat, id fit, aut cogitatione futuræ vitæ, quæ vitæ anceps est, ut respondet Lipsius; aut quia cum per diuturnum usum mancipata sit bonis hujus vitæ, dolet quod illa sit relicta. Alioquin scimus eos homines, qui præsentia bona præ æternis contemnunt, cupere etiam dissolvi, ut de se loquebatur Paulus. Sed quærent, lubentes, ne, an invitæ animæ corpus subeunt? Neutrum fortassis: nam si animæ in corpore creantur, neque unquam corpus præcesserunt, ridiculum est quærare, lubentes ne, an invitæ corpus intrent.

15. Restant nunc Sociniani. Primum eorum argu-

men-

mentum ex silentio veteris Scripturæ desumptum est. Sed hoc argumentum non magis probat animos esse corporeos, & mortales, quam silentium incorporalitatibus Dei in ipsis vetustis Scripturis probat Deum esse corporeum. Quod autem veteres illi Scriptores de homine semper ita locuti sint, ut de prorsus corporeo, & mortali, mirum non est, cum & de Deo tanquam de natura corporea perpetuo verba faciant. Indulgendum igitur est hoc rusticitati Hebræorum, qui nisi corpora, nihil præterea intelligere poterant. Quemadmodum igitur Thomas Hobbesius ex hujusmodi veteris Testamenti phralibus non recte deduceret Deum esse corporeum; ita ex similibus non recte Sociniani concludunt animorum corporalitatem. Quod porro Moses non ita aperte de altera vita monuerit in suis legibus Hebræos, factum est ex arcanis Providentiæ Divinæ, quæ magnum hic dogma clare explicandum Christo reservaverat; ut ratiocinatur B. Austuginus. Sane Deus non omnia simul homines docuit, sed præfinitis quædam temporibus explicanda distulit, ut ex perenni Scripturarum œconomia patet.

16. Quod spectat ad Salomonis locum; primum non is sensus est; in nulla prorsus re hominem a bestiis differre; seu simillimum illis esse in omnibus, quum Salomo alibi præstantiam animi super bruta aperte doceat: verum ortu, vita animali, & interitu nos bestiis esse simillimos, & quod ad corpus pertinet, ex eadem tellure cum brutis genitos, in eandem redire. Quod addit, *quis novit utrum spiritus filiorum Adam adsceadat sursum; spiritus jumentorum descendat deorsum*, rationem spectat naturalem, cujus ope nequeunt homines clare, & distincte cognoscere discrimen mortalitatis animarum brutorum, & hominum. Hanc mentis brevitetem, imbecillitatem, obscuritatem; passim notare solent Scriptores Sacri; in primis auctor libri Jobi, Salomô ipse in hoc eodem libro, & ut coeteros omittam; Paulus in epist. ad Rom. Sunt quibus placet Salomonem in hoc loco ex persona impiorum loqui. Ita Gregorius Magnus, & B. Thomas. Sed Scripturæ contextus ei opi-

ei opinioni refragatur. Alii censent hæc narrare Salomonem, velut a se cogitata, dum juvenis esset: quod item rerum series non patitur.

17. Ad Pauli auctoritatem post B. Chrysostomum ita respondent Theologi, quod quoniam Paulus sciebat plenam beatitudinem nemini contingere ante corporum resurrectionem, idcirco scripserit inanes esse labores nostros, nisi corporum futura esset resurrectio. Primi tamen aliquot Christiani ita hæc intelligebant, ut animæ separatæ usque ad corporum resurrectionem censerentur esse in statu quodam dormitionis, a quo tandem essent excitandæ in die extremi judicii. Eam ob rem Christianorum mortem *somnum*, & *requiem* appellabant: quæ opinio Scripturæ juxta & meliori traditioni adversatur. Sed ea de re in elementis Theologiæ Christianæ differimus. Quid autem atineat corpora resurgere cum animæ sint immortales, is quærere potest, qui æterna Dei consilia in numerato habeat. His in rebus, quod sæpe dixi, quæ clare in Scripturis positæ sunt, fas non est hominem, qui tenuitatis suæ sit sibi conscius, Dei æternas rationes & fines investigare. Ex his igitur concludimus mentes humanas, & incorporeas esse, & superesse post corporum dissolutionem, ex Theologiæ quoque Christianæ decretis.

*Prop. XVI.* Cogitationes sunt actiones *immanentes*, non *transeuntes*. D. Pertinent enim ad vitam Mentis [prop. 12.]: vita autem posita est in actione perenni e principio rei viventi insito manante [def. 10.]; insitæ igitur sunt Menti; adeoque ei *essentiales*; quæ vero *insita* sunt Enti & *essentialia* nequeunt esse *transeuntia*: cogitationes ergo sunt actiones immanentes. Enimvero perridiculus esset, qui cogitationes aut non esse Menti insitas, aut de Mente in Mentem, aut de mente in corpus transire diceret. Itaque quoniam & id clare sequitur ex natura mentis, & omnium philosophorum consensione probatur; nobis, qui philosophamur ex ideis humanis [post. 1.] axioma habendum est. Quamquam ne Hobbesius quidem alias philosophari posset. Nam quum illi cogitatio sit *conflictus corporeus*, ilque peragatur ex  
*actio-*

*actione* externa singulari, & singulari *reactione*; nequit is esse, nisi in quo fit, neque is idem numero conflictus de subiecto in subiectum migrare. Neque vero ab eadem doctrina dissentire possunt, qui animam faciunt vim quidem incorpoream, sed toto corpore fusam, & ex corporis compage atque temperatione pendentem. Scilicet ex horum sententia cogitationes sunt modificationes singulares hujus vis in humana machina, quæ idcirco, nisi in ea, esse non possunt, sed ne intelligi quidem ab ea separatæ.

*Prop. XVII.* Mens humana non est una eademque numero in omnibus hominibus.

D. Mens humana est substantia incorporea [ *prop. 13.* ]; cui cogitationes immanentes sunt & essentielles [ *prop. 16.* ]; si est una eademque in omnibus hominibus ejus vis intellectiva & una ipsa eademque est in omnibus; adeoque eadẽ in omnibus cogitationes, idemque cogitationum ordo & numerus, eademque claritas, aut obscuritas, velocitas, aut tarditas: at neque eadẽ numero cogitationes in omnibus, neque eadẽ cogitationum series & numerus, minus etiam eadẽ aliæ cogitationum affectiones, claritas, obscuritas, velocitas, ne super iisdem quidem rebus; non igitur mens humana una eademque numero in omnibus est.

Præterea, quod Aristoteles prodidit, comprobatumque est a sequioribus, *intellectum fieri quodammodo omnia, quæ intelligit, idest ideas intellectuales & intellectum unum esse, idemque*, adeo verum est, ut nihil verius scribere potuit Joannes Picus, qui dubitat ex intelligibili & intellectu magis vere & substantialiter fieri unum, quam ex materia & forma substantiali non est philosophus (a): fit autem non simul omnia intelligibilia, neque plurima; capacitatis enim non modo infinitæ non est sed ne magnæ quidem, ut idcirco experiamur, vix eum sufficere parvo numero idearum simul contemplando: at si unus esset in omnibus, fieret eodem tempore tot distincta atque diversa intelligibilia, quot simul, qui sunt

(a) *Joan. Picus in thesibus ex mente sua thesi 71. tom. 1. pag. 59.*

sunt homines , intelligunt : non unus igitur in omnibus . Scholasticorum quidem pulvere adpersum est id argumentum , sed minime tamen contemnendum .

*Sch.* Sunt qui superioribus argumentis respondent , vim intellectivam unam quidem in omnibus hominibus esse , sed eam diverse modificari in singulis , pro phantasmatum sensuum & cerebri diversitate , indeque esse ut in diversis hominibus diversa appareat . Quemadmodum idem succus nutritivus pro varia herbarum , plantarumque structura , in frondes , fructusque diversos erumpit : idem status pro strumentorum varietate varios edit sonos . Quibus B. Th. perspecte respondet , quod quoniam intelligere actio est immanens , fieri non potest , ut sola phantasmatum varietate & multiplicitate variet [ a ] .

Arabum præcipue Peripateticorum ea fuit opinio , unam esse animam intellectivam in omnibus hominibus , quæ Averrois thesis est apud Joannem Picum ( b ) & B. Th. [ c ] . Nempe *Anima & intellectus Passivus* , ut vocat Aristoteles , vel *possibilis* , ut Arabes & Scholastici , pro hominum multiplicitate multiplex est , & varius : Agens vero , qui ex Arabum Philosophia est substantia ab Intellectu passivo distincta , unus tantum est . Sed non sibi convenit Arabibus . Sunt enim qui creatum intellectum hunc mundanum opinentur : sunt qui ipsum Deum arbitrentur . Nam Albumaron , *Intellectum agentem esse Deum* scribit ( d ) ; & Themistii doctrina fuit , *Intellectus possibiles , qui illuminantur tantum , plures esse : agentes participatos illuminantes , & illuminatos plures quoque esse : agentem illuminantem tantum unum* , scilicet Deum [ e ] , quod Aristotelis doctrinæ est conforme , quippe qui Deum fecit *Mentem mundum informantem* , quemadmodum demonstratum est a Walchio .

[ a ] *Lib. 2. contra Gent. cap. 73.*

[ b ] *In Apologia pag. 45.*

[ c ] *Loco superius citato.*

[ d ] *Apud Joan. Picum pag. 45.*

[ e ] *Apud eundem pag. 49.*

chio (a). Plura super ea re congeffit Baelius (g). Nos inferius copioſius eam hiftoriam enarrabimus. Sed quod ſpectat ad priorem opinionem, nescio utrum Campanellæ, & Cudworthi *anima mundana & genitrix* affinitatem cum illo Arabum intellectu habeat : at certe ſecti in eandem doctrinam haud difficulter poteſt. Ego etſi non negem, me valde eſſe proclivem in eam opinionem ; eſſe in natura corporea *vim quandam omnia permanen-tem atque continentem*, quam & *genitricem* appellare poſſis, ſeu igneæ ea ſit naturæ, ſeu cujuſvis alterius ; atque ex ea non parum, ut aliorum viventium, ita hominum vitam pendere, quod experimentis perpetuis probari poſſet, ſi eſſet opus ; at eam ſubſtantiam, qua intelligimus, ſubjectum idem & principium cogitationum noſtrarum communem eſſe, aut toti corporeæ naturæ, aut ſaltem hominibus omnibus adeo ſtolidum puto, ut ne confutatione quidem dignum cenſeam.

*Prop. XVIII.* Mens umana ſempiterna non eſt.

D. Nam nulla habet ſempiternitatis attributa. Principio, ſempiternum neceſſariam habet exiſtentiam, adeoque eſſentiam [prim. part. prop. 15.]; hinc infinite perfectum [ibid. prop. 16.]; quod nunc Mens humana non eſt. Deinde ſempiternum neceſſariam habet exiſtentiam ; nulli ergo ſubditur, nec quidquam invitum ab alio pati poteſt ; plura autem invita patitur mens, ut patet : ſempiterna ergo non eſt. Tandem Mens humana mutationi obnoxia eſt : quæ ſunt talia ſunt contingentia (prim. part. prop. 17.); nec contingentia ſempiterna ; Mens ergo humana contingentem habet exiſtentiam, nec idcirco ſempiterna.

*Schol. 1.* Super Animarum humanarum origine & veterum philoſophorum memoria diſputatum eſt acerrime, & nunc diſputatur ; neque inter Proſanos modo, ſed inter ipſos maxime Theologos. B. Hieronymus [c] ſic paucis hiftoriam ferme omnem complectitur, *Super animæ ſtatu memini veſtræ quæſtiunculæ, immo MAXI-  
MAE-*

[a] *De Atheiſmo Ariſtotelis in Parergis Academicis.*

[b] *in diſt. Art. Ariſtoteh. & Averr.*

[c] *Tom. 4. oper. pag. 642. edit. Maurian.*

*MAE ECCLESIASTICAE QUE QUÆSTIONIS*, utrum lapsa de celo sit, ut *Phythagoras Philosophus*, omnes *Platonici*, & *Origenes* putant? an ex propria Dei substantia, ut *Stoici*, *Manicheus*, & *Hispana Priscilliani hæresis* suspicatur? an in *Thesauro*, habeantur Dei olim condita, ut quidam *Ecclesiastici* stulta persuasione confidunt? an quotidie a Deo fiant & immittantur in corpora? an certe ex traduce, ut *Tertullianus*, *Apollinaris*, & maxima pars occidentaliū censent? Ad quinque igitur classes, quæcumque ferebantur opiniones, retulit *Hieronymus*: quarum tamen non erat cur primam a tertia distingueret. Et gravissimos quidem Philosophos, atque Theologos earum opinionum singulæ patronos habuere: nunc vero quarta tantum vulgata est & publice suscepta: quinta a paucis, in primis a *Wolffio* [a], restituta est. *B. Augustinus de origine animæ* [b]: quatuor libris disse-ruit: & quamquam in eam fuerit opinionem proclivior, ex traduce ad posteros animos derivari; ita tamen disse-ruit, ut plurimis demonstraverit nihil certi super ea re nec revelatione divina, nec naturæ ratione sciri. Quod paucis ostendit inde Clericus in *Pneumatologia*. Scilicet nulla nobis suppetunt principia: neque sensu, neque conscientia, neque conjectura ulla, quibus quidpiam certi pronunciare possimus; & in *Scripturis* altum ea de re silentium: *Hebræi* vero veteres, & *Christiani Theologi* in partes varias iverunt [c].

2. In primis vero inter veteres vulgatissima est prima illa opinio, *Mentes humanas* longe ante corpora præextitisse, quæ cum altera erat conjuncta, transire eas de corporibus in corpora. *Metempsychosin* enim hanc non *Græci* tantum Philosophi, sed & *Ægyptii*, & *Chaldæi*, & *Persæ*, & *Indi* magna consensione tradiderunt, hodieque *Orientalēs* ferme omnes populi credunt [d]. Sed & *Menasseh ben Israel* opinionem hanc communem omnium *Hebræorum* vocat, & ab his ad *Genti-*

G. 2

les

[a] In *Psychologia Rationali*.

[b] Vide &amp; lib. 3. de libero arbit. cap. 21.

[c] Vide *Calmet*, *Diction. Biblico* art. *Ame*.[d] Vide eund. ibid. art. *Metempsychosis*.

les manasse autumat [a]; quæ gloriatio Rabbinica est; nempe posteriores tantum Kabbalistæ id sibi persuadere. In tractatu de revolutionibus animarum (b) legitur: *Res ipsa autem ita se habet, quod nempe omnes MENTES, & SPIRITUS, & PSYCHÆ, nulla excepta, comprehensæ fuerint in Adamo protoplasto cum conderetur.* Ad ejusdem capituli §. V. Auctor Kabbalæ denudatæ hæc observat, sciendum, antiquo dogmate Hebræorum, per Adamum protoplasten non intelligi personam unam individuum, sed totum animarum genus suis ordinibus atque gradibus varie distinctum, & sub forma exercitus cujusdam ab Adamo seu Duce sub imperatore Messia, per signa membrorum humanis assimilata gubernatum, quod corpus intelligitur Apostolo Eph. iv. 13. & alibi, ubicumque Christus ab ipso caput nominatur [c].

3. Jam Platoniorum illam animorum præexistentiam in aliis orbibus, dehinc descensum in corpora non in-scito illo argumento deridet Lucretius [d],

*Præterea si immortalis natura animi*

*Constat, & in corpus nascentibus insinuat,*

*Cur super anteaetam ætatem meminisse nequimus?*

*Nec vestigia gestarum rerum ulla tenemus?*

*Nam si tantopere est animi mutata potestas,*

*Omnis ut actarum exciderit retinentia rerum,*

*Non, ut opinor, id ab leto jam longiter errat.*

4. Arnobius acerrime in eandem opinionem dum invehitur, præclara quædam dicit adversus Platonicos, sed quædam addit, quæ demere possis. Rogat primum, quum in Cælo essent Mentes humanæ beatæ, quæ causa extitit, cur in corpora demitterentur? *Habitari, inquit, oportuit, has partes, & incirco hic animas tanquam in Colonias aliquas Deus omnipotens misit.* Tum summo cothurno in eam opinionem, velut Dei provi-  
den-

[a] Lib. i. de creat. problemate 15.

[b] Part. i. cap. i. §. ii.

[c] Vide Henricum Morum tom. i. operum in exposit. visionis Exechielis, & Buddeum Introduct. ad bist. phil. Heb. pag. 431.

[d] De nat. rer. lib. 3. v. 670.



dentiae injuriam, debacchatur. Locus paulo longior est; sed rerum utilitas longitudinem compensabit (a).

Et quid homines prosunt mundo, aut ob rei cujus sunt necessarii causam, ut non frustra debuisse credantur parte in hac agere, & terreni esse corporis inquilini? Ad consummandum molis bujus integritatem, partem aliquam conferunt: & nisi fuerint additi, imperfecta & clauda est universitatis hæc summa. Quid ergo? si homines non sint, ab officiis suis cessabit mundus? Vicissitudines suas non peragent sidera? æstates, atque hyemes non erunt? ventorum flamina conticescent? nec ex coactis, & pendentibus nubibus ad terram decident imbres ariditatis temperamenta laturi? Atqui necesse est, cuncta suos ire per cursus, nec ab ordinis nati continuatione discedere, etiam si nomen in mundo nullum hominis audiat, orbisque iste terrarum solitudinis vacuæ silentio conticescat. Quemadmodum ergo jactatur habitatorem debuisse regionibus his addi, cum ab homine liqueat nihil ad mundi perfectionem redire, omniaque ejus studia commoditatem semper spectare privatam, nec a finibus propriæ utilitatis abscedere? Quid enim prodest mundo (ut ab rebus incipiam seriis) maximos reges hic esse? Quid tyrannos, quid dominos, quid innumeras alias atque ampliissimas potestates? Quid rei militaris experientissimos duces capiendarum urbium peritos, in equestribus præliis, aut in pedestri pugna imobiles atque invictissimos milites? Quid oratores, grammaticos, poetas? quid scriptores, dialecticos, musicos? quid pantomimos, quid mimulos, histriones, cantores, tuba, tibia, calamoque statantes? Quid cursores, quid pugiles, quadrigarios, desultores, grillatores, funambulos, præstigatores? Quid bigarios, salinatores, volones, unguentarios, aurifices, aucupes, vannorum firpiarumque victores? Quid fullones, lanarios, phrygiões; coquos, pancrystarios, muliones, lenones, lanios, meretrices? Quid insitorum alta genera? Quid professorum, & artium, quibus enumerandis omnis ætas angusta est? Rationibus conferre, & constitutionibus mundi, ut sine hominibus condi non potuisse credatur, nec obtenturus integritatem sui, nisi ei contentio animalis miseri, & supervacui jungeretur. Nisi forti rex mundi (quem temeritatis est maxime humano ex ore depromere) idcirco ex se genitas hæc animas misit, ut quæ fuerant apud se deæ, corporei ta-

*Æus, & temerariæ circumscriptiōnis expertes, humana immergerentur in semina: fœminarum ex genitalibus proflirent, ineptissimos ederent continuarentque vagitus: exurgerent felitantes mammas, proluvio linerent & madidarent se suo? & ut ad silentium pavidī nutricis motibus, & crepitaculis adducerentur auditis. Idcirco animas misit, ut quæ fuerant simplices, & bonitatis nuper innoxie: simulare in hominibus discerent; dissimulare, mentiri, circumscribere, fallere, adulatoria humilitate captare, mente aliud volvere, aliud in facie polliceri: illaqueare, decipere dolis atque insidiis nescios, per innumeras artes malitiarum venena conquirere, & ad usum temporis pellaciæ mobilitate formare. Idcirco animas misit, ut in pacata & placida tranquillitate degentes, assumerent ex corporibus causas, quibus feræ fierent, & immanes similitates, atque inimicitias gererent, consererent inter se bella, expugnant atque everterent civitates: servitutis opprimerent & manciparent se jugo: & ad ultimum fierent alterius altera potestatis natalium conditione mutata? Idcirco animas misit, ut immemores veritatis effectæ, & quidnam esset Deus oblitæ, simulacris inertibus supplicarent, ligna, æra, & lapides, divina alloquerentur ut numina, auxilia poscerent cæcorum animantium cruore, nullam sui facerent mentionem, quinimmo ex his aliæ ut dubitarent se esse, aut ullum esse penitus abnegarent? Idcirco animas misit, ut quæ in sedibus propriis mente fuerant una, intellectu & scientia paribus, postquam formas induere mortales, opinionum discriminibus dissiderent, aliud aliis justum, aliud utile videretur, & rectum, de appetendis rebus, fugiendisque certarent, malorum ac bonorum alios aliæ constituerent fines: veritatem cupientibus noscere rerum opponeretur obscuritas, & velut oculorum luminibus viduæ nihil cætum viderent, & per ancipites semitas suspicionum inducerentur errore? Idcirco animas misit, ut cum animantia cætera sponte natis alerentur, & nulla satiatione prolatis, neque domorum, aut vestium tutamina sibi, aut velamenta conquirerent, miserabilis istis necessitas adderetur: ut cum impendiis maximis, perpetuisque sudoribus domos sibi construerent, membrorum conficerent tegmina, suppellectilem variam diurnorum contraherent egestate, imbecillitatis auxilia animalibus mutuarentur a muris, vim facerent terris, ut non sua sufficerent gramina, sed imperatas*

atas extollerent fruges, & cum sanguinem totum in subigenda tellure sudissent, rubigine, grandine, siccitate, spem laboris amitterent: & ad ultimum vi famis humanis cadaveribus incubarent: & ab hominum formis tabifica macie dissociarentur abjunctæ? Idcirco animas misit, ut quæ secum commorantes possessionis alicujus nullum unquam habuissent amorem: avarissimæ hic fierent, & in habendi studium inexaturabili pectoris ardescerent appetitu: effoderent alios montes, & viscera ignota terrarum in materias verterent alieni nominis, atque usus: penetrarent abditas discrimine cum capitis nationes, & translatis mercibus caritatem semper, vilitatemque captarent: exercerent avidum atque injustissimum sænus, & miserorum e sanguine supputandi se angerent insania: millibus possessionum semper producerent fines: & quamvis provincias totas rus facerent unum, pro arbore una, pro sulco, forum litibus tenerent; cum amicis, & fratribus inexpressibiles susciperent similitudines? Idcirco animas misit, ut quæ dudum fuerant mites & feritatis affectibus nesciæ commoveri, macella sibi, & amphiteatra constituerent, loca sanguinis & publicæ impietatis: ex quibus in altero mandi homines cernerent, & bestiarum laniatibus dissipari: interficere se alios nullius ob meriti causam, sed ingratam voluptatem confessorum, ipsosque illos dies, quibus tantum committeretur nefas, in gaudiis communibus ducerent, & festa bilaritate sacrarent: in altero vero animalium miserorum discernerent viscera, alias aliæ raperent ( ut canibus mos est & vulturibus ) portiones, subigerent dentibus, & crudelissimo ventri darent, & in tam sævis atque horridis oribus sortem suam fterent, quas ab talibus mensis paupertatis angustiae vindicarent: pro beatissimis ac felicibus viverent, quarum ora & faciem tam crudeles polluerent apparatus? Idcirco animas misit, ut divini ponderis & gravitatis oblitæ, gemmas, lapillos, margaritas, castitatis dispendio compararent, conspiciendis quærent corporibus fucos, innecterent his colla, laminas pertunderent aurium, imminuerent frontes limbis, fuligine oculos obumbrarent, nec in formas erubescerent masculorum calamistris vibrare cæsariem, cutem corporis levigare, incedere poplitibus nudis, omnique alio cultu vigorem virilitatis, & exponere, & in habitum fæminarum, delitiasque mollire? Idcirco animas misit, ut viarum aliæ infestarent meatus, aliæ circumscriberent

berent nescios, testamenta supponerent falsa, venenatas conficerent potiones, domos ut effringerent, noctibus sollicitarent, abigerent, prævaticarentur, & proderent, saporum fastidia ut excuterent palato, ut in coquendis alitibus pinguitudinem nossent retinere labentem, ut spirulas, & botulos facerent; isicia, castellamenta lucanica, suminatam cum his carnem, & glaciali conditione tuceta? Idcirco animas misit, ut res sancti atque augustissimi nominis symphonias agerent & fistulatorias hic artes, ut inflandis bucculas distenderent tibiis, cantionibus ut præirent obscœnis numerositer, & scabillorum concrepationibus sonoris, quibus animarum alia lasciviens multitudo incompósitos corporum dissolveretur in motus, saltitaret, & cantaret, orbis saltatorios verteret, & ad ultimum clunibus & coxendicibus sublevatis lumbrorum crispitudine fluctuaret? Idcirco animas misit, ut in maribus exoleti, in sæminis fierent meretrices, sambucistriae, psaltria, venalia ut prosternerent corpora, virilitatem sui populo publicarent, in lupanaribus promptæ, in fornicibus obvinctæ, nihil pati renuentes, ad oris stuprum paratæ? Quid dicitis, o soboles, ac primi progenies numinis? Ergone sapientes illæ, atque ex causis principalibus proditæ genera hæc animæ turpitudinum, criminum, malitiarumque noverunt, atque ut exercerent, ut gererent, ut percelebrarent hæc mala, habitare jussæ sunt has partes, & humani corporis circumjectione vestiri? Et mortalium quisquam est rationis alicujus accipiens sensum, qui ordinatum existimet mundum per has esse, ac non potius sedem ac domicilium constitutum, in quo omne quotidie perpatraretur nefas, maleficia cuncta conficerent, insidiæ, fraudes, doli, avaritia, rapinæ, vis, scelus, audacia, obscœnitas, turpitudine, flagitium, mala omnia cetera, quæ in orbe homines toto mente noxia pariunt, & labem machinantur in mutuam? Sed sua (inquitis) voluntate, non regis jussione venerunt. At ubi pater omnipotens fuit, ubi regiæ sublimitatis auctoritas, ut eas prohiberet abscedere, nec in præcípites labi permetteret voluptates? Si enim degeneres futuras locorum immutationibus sciebat (scire autem debuerat causarum ut omnium constitutor) aut extrinsecus aliquid accessurum his esse, quod eas faceret oblivisci suæ dignitatis & decoris: miles, ut ignoscat oraverim: universorum non alius quam

quam ipse est causa: siquidem perpeſſus eſt evagandi eam habere jus liberum, quas retenturas non eſſe integritatis ſuæ habitum prævidebat: atque ita perſcitur, ut nihil interſit omnino voluntariæ venerint, an illius obtemperaverint juffioni: cum non prohibendo quod oportuerat prohiberi, ceſſatione crimen fecerit proprium, & retentionis diſſimulatione permiſerit prius. Sed procul hæc abeat ſclerata opinioſis immanitas, ut Deus credatur omnipotens, magnarum, & inviſibilium rerum ſator, & conditor, procreator, tam mobiles animas genuiſſe gravitatis ac ponderis conſtantiæque nullius: in vitia labiles, in peccatorum genera univerſa declives: cumque eas tales, atque hujusmodi ſciret, in corpora ire juſſiſſe, quorum induta carceribus ſub procellis agerent, tempeſtatibusque quotidie fortuna, & modo turpia facerent, modo paterentur obſcœna: naufragiis, ruinis, incendiis conflagrationibus ut perirent: Pauperies alias, alias ut mendicitas premeret, infernarum paterentur aliæ laniatus mſcularum, aliæ ut interirent veneno, claudæ ut incederent aliæ, ut aliæ lumen amitterent: ut articulis ſederent aliæ colligatis, morbis denique objeſcerentur ut cunctis, quos infelix & miſeranda mortalitas diverſarum ſuſtinet dilaceratione pœnarum: tum deinde oblita unius eſſe ſe fontis, unius genitoris, & capitis, germanitatis convellerent, atque abrumperent jura: urbes ſuas everterent, popularentur hoſtiliter terras, ſervos de liberis facerent, inſultarent virginibus, & matrimoniis alienis, odiſſent invicem ſeſe, aliorum gaudiis & felicitatibus inviderent: tum deinde ſe omnes maledicerent, carperent, & ſævorum dentium mordacitate laniarent. Sed procul hæc (habeat) ut eadem rursus, frequentiusque dicamus tam immanis, & ſclerata perſuaſio, ut ille ſalus rerum Deus omnium, virtutum caput, benignitatis & columen, atque (ne cum laudibus extollamus humanis) ſapientiſſimus, juſtus, perfectæ omnia faciens, & integritatis ſuæ conſervans menſiones, aut aliquid fecerit claudum, & quod eminus eſſet a recto, aut ulli rei fuerit miſeriarum aut diſcriminum cauſa, aut ipſos actus quibus vita tranſigitur & celebratur humana, ordinaverit, juſſerit: & a ſua fluere conſtitutione præceperit. Minora hæc illo ſunt, & magnitudinis ejus deſtruentia poteſtatem: tantumque eſt longe ut iſtarum auctor rerum eſſe credatur, ut in ſacrilegæ crimen impietatis incurrat quiſquis ab eo conceperit

*vit hominem esse prodatum, rem infelicem & miseram, qui esse se doleat: qui conditionem suam detestetur & lugeat: qui nulla alia de causa sese intelligat procreatum, quam ne materiam non haberent per quam diffunderent se mala, & essent miseri semper, quorum cruciatibus pasceretur nescio quæ latens & humanitati adversa crudelitas. Et graviter quidem Arnobius platonice opinionem refellit. Sed noluissem tot nimis ad vivum refecata: nam nihil vehementius in rem suam Manichæi dicere potuerit. Quocirca inferius in Theologia naturali copiose hæc eadem argumenta expediemus. Quod hoc in loco monere fatis fuit.*

*Prop. XIX. Mens humana neque Deus est, neque Dei pars, aut idea.*

*D. 1. Mens humana nec una in omnibus hominibus est (prop. 17.) nec æterna (prop. 18.); Deus autem substantia est æterna, & unica, quod heic assumo ex eorum maxime consensione; adversus quos præsens theorema positum est; mens ergo humana non est Deus.*

*2. & 3. Mens humana existentiam habet contingentem (prop. 18); quæ autem sunt talia, neque partes esse possunt, neque attributa, neque affectiones substantiæ æternæ (prim. part. prop. 21.); neque pars ergo est, neque idea entis æterni, seu Dei.*

*Schol. Inter opiniones olim apud philosophos magna omnium consensione vulgatas, hæc haud dubium referenda est, tantem humanam aut Deum esse per omnem verum naturam commentem & intentum, aut Dei partem; aut vim & statum. Quod Gentilis philosophiæ principiis consentaneum est. Nempe cum nihil apud illos verius putaretur, quam hoc.*

*Ex nihilo nihil, & in nihilum nil posse reverti, duoque tantum statuerentur æterna, materia, & mens; corpora omnia non poterant non haberi modificationes materiæ illius æternæ: Mentis vero modificationes menti æternæ in materia. Itaque quod de Ægyptiis retulit Herodotus (a), eos primum animas humanas immortales dixisse, ita interpretantur docti, animas post absolutum per varia corpora circuitum, in Deum, seu Animam mundi reverti. Id quod confirmat disertis verbis Jamblicus (b), a primo, inquit, descensu propterea dimisit Deus*

(a) *Lib. 2. cap. 123.*

(b) *Lib. 8. de myster. c. 8.*

*Deus animas, ut rursus in ipsum revertantur* (εἰς αὐτὸν ἐπανελθούσιν). Eadem & Chaldæorum doctrina fuit, ut alibi demonstravi [a]. Hinc investus fons ille animarum Græcis Auctoribus tam sæpe memoratus, & crater Platonis, de quo is disserit in Timeo [b]. Aper-te idipsum docuit Pythagoras, qui dixit esse Deum per naturam rerum intentum & commensantem, ex quo nostri animi caperentur [c]. Tribuit idem Platoni Theodoretus [d]. Diserte Clemens Alexandrinus pronunciat, ex Platoniorum doctrina, mentem humanam & divinæ sortis esse & effluxionem seu emanationem naturæ divinæ (e) quamquam ei videtur adversari Plutarchus, qui in 4. de Placitis scribit, Platonis doctrinam esse, mentem esse Dei opus, quo maxime loco ab ea opinione eum vindicare studet Buddeus. Omnia quæ ad hanc Platonis doctrinam pertinent contrasit Hanschius in *Diatriba de Enthusiasmo Platonico* edita Lipsiæ ann. 1716. Non est cur plura etiam de Stoicis dicamus: constat ipsis animas habitas partes Dei, earumque mortem regressum in Dei naturam [f], uti passim loquitur Seneca. Placuit jam id Marcionitis & Priscillianistis veteris Ecclesiæ hæreticis: Placuit Arabibus plurimis in eo impietatis Aristotelicæ sectatoribus, qui intellectum Agentem Deum habuere. Hinc nata apud Muhammedanos plerosque portentosa illa opinio, omnia esse Deum [g]. De Almarico hæc retulit Gerlon: omnia sunt Deus: Deus est omnia: Creator, & creatura idem. Idem creat, & creatur. Deus ideo dicitur finis omnium, quod omnia reversura sunt in ipsum, ut in Deo immutabiliter conquiescant, & unum individuum, atque incommutabile permanebunt:

[a] In dissert. de orig. & const. rer. corp.

[b] Legatur docta ea super re Jacobi Thomasi dissertatio addita ejusdem Exercit. de exst. mund. Stoica pag. 249.

[c] Cic. de natura Deor. lib. 1. Vide citatam nostram dissert.

[d] De curandis Græcorum Affect. serm. 5. tom. 4. oper.

[e] Lib. 4. Stromat.

[f] Vide Vvilelmum Suiterum in Idea Philosophiæ Stoicæ.

[g] Pietro della Valle tom. 3. Bespier sur Ricont.

*manebunt* [a]. Jam Siamenses plurimi, & Sinenses, & Japonenses, animas censent tenuem ætherem mundanum, eundemque & Deum.

Atque hæc idcirco retuli, ut nemo ignoret, quo ex coeno Spinozisticum systema manaverit. Hic igitur homo rotunde pronunciat, *mentem humanam partem esse infiniti intellectus Dei*, additque, ac proinde quum dicimus, *mentem humanam hoc vel illud percipere*, nihil aliud dicimus, quam quod Deus, non quatenus infinitus est, sed quatenus per naturam humanæ mentis explicatur, sive quatenus humanæ mentis essentiam constituit, hanc vel illam habet ideam (b). Propositio vero ipsa XI. apertius explicat quid illam constituat mentem, primum, inquit, quod *actuale mentis humanæ esse constituit*, nihil aliud est, quam *idea rei alicujus actu existentis*. Propositione autem XIII. scribit, *objectum ideæ humanam mentem constituentis est corpus, sive certus extensionis modus actu existens, & nihil aliud*.

Ea autem errorum portenta ipsis hominis theorematibus adversantur, quod paucis demonstrabo. Prima parte Ethicæ prop. XXI. scribit. *Omnia, quæ ex absoluta natura alicujus attributi Dei sequuntur, semper & infinita existere debuerunt, sive per idem attributum æterna & infinita sunt: Essentia autem non mentis tantum, verum totius hominis constituitur a certis Dei attributorum modificationibus* [idem part. 2. Coroll. prop. x.]. Non ergo tantum mens humana, sed tota essentia cujusque hominis æterna est & infinita: non est autem nec æterna, nec infinita, non ergo &c. Deinde *Idea Dei ex qua infinita infinitis modis sequuntur unica tantum esse potest* (idem prop. 4. part. 2.); quum autem mens humana sit idea corporis humani in intellectu Dei, ea nequit esse aliud nisi hæc unica idea; quicquid autem in Deo est Deus est; & mens ergo humana Deus est. Jam ea unica idea repræsentat tam Dei essentiam, quam omnia, quæ ex ipsius essentia necessario sequuntur

(a) Gerson tract. de concord. Metaph. cum Logica part. 4. operi.

(b) Part. 2. prop. XI. coroll.



tur (idem p. 2. prop. 3.) ; & sequuntur infinita infinitis modis [ ibid. prop. 4. ] ; ergo repræsentat infinita infinitis modis : nihil ergo ignorat mens humana , nec ullas confusas , & inadæquatas habet ideas ; habet autem inadæquatam cognitionem sui corporis ( prop. 24. ibidem ) & rerum externarum [ ibidem prop. 25. ] & de duratione sui corporis ( ibidem prop. 30. ) & infinitarum aliarum rerum , ut passim deinde scribit ; non igitur *unica illa idea*.

Præterea , si id ita se habet , mens humana non minus late patebit quam Dei ; atque ut Deus adæquatam habet sui ideam , omniumque quæ ex ipsius essentia necessario sequuntur ( idem 2. part. prop. 3. ) , ita & illa ; quam ille conclusionem tantum abest ut dissimulet , ut potius diserte doceat , coneturque demonstrare ; *mens* , inquit , *humana adæquatam habet cognitionem æternæ & infinitæ essentiæ Dei* [ prop. 47. part. 2. ] intelligit autem Dei nomine *ens absolute infinitum* , *hoc est substantiam constantem infinitis attributis* , *quarum unumquodque æternam* , *& infinitam essentiam exprimit* [ prima part. def. 6. ] ; mens ergo humana adæquatam habet cognitionem entis absolute infiniti , idest substantiæ constantis infinitis attributis &c. eorumque omnium , quæ inde necessario sequuntur : qui autem talem habet cognitionem & nihil ignorat , & in nullo labitur , erratque : at ignorat mens humana infinita , & in plurimis errat , quod is agnoscit , nec negare nisi esse velit deridiculus , potest ; non ergo id est , quod is esse vult . Quæ quum sint , oportuit hunc hominem perpetuo cum ratione sua colluctari , ut ea scriberet . Nempe quos semel fanaticismus arripuit ad insaniam usque adigit ,

*Baccatur vates , magnum si pectore possit*

*Excussisse Deum : tanto magis ille fatigat*

*Os rabidum , fera corda domans , fingitque premendo [ a ] .*

Sed ecce , quum hic , tum Sectatores ejus Tolandus , Poiretus , aliique , Scripturas quoque divinas in partem suam , quo auctor erroris honestior sit , trahere adnituntur .

( a ) *Virg. lib. 6. Æneid.*

tur. Scriptura, inquit, animam pro perenni Dei flatu habet. Primum in Genesi vocatur *Spiraculum vite*, quod Deus inspiravit in faciem Adæ (a): tum deinde, ut describeret Moses, qua ratione Deus esset homines deleturus de facie terræ, ait, *non permanebit spiritus meus in homine [b]*, quod scilicet illum ad se traheret; quod aperte explicat Auctor libri Jobi, *si spiritum illius & flatum ad se trahat deficiet omnis caro simul (c)*; eodem stilo loquitur Auctor Psalmi 113. V. 29. Accedit Salomon, qui in Ecclesiaste eandem phrasin repetit, *redeat Spiritus ad Deum qui dedit illum, & corpus in terram unde sumptum est (d)*: reddit autem corpus in terram velut pars in totum suum; ergo & spiritus in Deum uti in fontem leaturiginis suæ. Tandem Paulus, quo loco maxime abutitur Spinoza, *in Deo nos vivere, moveri, & esse*, pronunciat (e). Atqui hæc talia sunt, ut nisi mens læva fuisset, homines styli Hebraicæ linguæ non ignari, pudere potuit in confirmationem erroris sui producere. Stylus enim est perpetuus Scripturarum Sanctarum actiones causarum secundarum æquius Deo tribuere, quod ille earum causa & primaria est & perpetuo conservatrix (f). At inde non magis deducere potes, partes Dei esse quæcumque sunt in Natura rerum, quam ex eo quod ventus, tempestas, cedri, montes dicantur Dei, concludere, ea omnia ex Scripturarum doctrina Dei esse membra. Eam autem scribendi rationem Spinoza idem in tractatu Theologico-politico diserte adnotaverat, ut non necesse ei fuerit ex aliis discere. Et vero, qui animadvertit, nihil aut clarius, aut sæpius in Scripturis divinis prædicari, quam Deum rerum omnium, quibus universum hoc continetur, creatorem esse, easque non ex æterno, sed nudius tertius creasse, is imperitare ex libertate, & similia,

(a) Gen. 2. V. 7.

(b) Ibid. cap. 9.

(c) Cap. 34. V. 14.

(d) Eccl. cap. xii. V. 7.

(e) Act. 17. V. 25.

(f) Vide Calmet. in Dict. Bibl. art. Ame.

milia, non potest non inter putida mendacia censere & imperitissima, Divinis Scripturæ auctoribus Deum esse quodcumque vides, quocumque moveris. Jam in eorum classem, qui mentem humanam emanationem esse, seu effluxionem ex Deo, censuerunt, retulit Joannes Franciscus Buddeus [a] Petrum Poiretum: is enim ex instituto eam rem egit in primo eorum, quos de Oeconomia divina inscripsit, libro (b). Interim nemo melius explicavit, Auctores omnes hujus sententiæ ipsosmet ignorare quid dicant, tantum abest ut ab aliis possint intelligi. Nam quum quæreret, quid tandem esset hæc emanatio Animæ ex Deo, ingenue ignorantiam suam fatetur. *At si quis*, inquit, *inquirat penitus, quæ fuerit hæc emanatio animæ ex Deo suo egredientis & nascentis? id mihi peculiariter intelligere non licet, neque video, an ab ulla creatura in hac certe vita intelligi possit*, sed bene, quod hæc portenta in prima parte pluribus ac sæpe refellimus.

*De unione Mentis, & corporis.*

Prop. XX. **M**ENS unitur corpori humano quoad homo vivit.

D. Mentem & corpus uniri dicimus, quousque harmonice inter sese utriusque operationes & nascuntur & procedunt, iis quidem legibus, quas superius ex Sylvano Regis recitavimus: at quoad homo vivit Mentis & corporis operationes harmonice secundum eas leges & nascuntur, & procedunt, ita, ut quilibet ejus rei esse possit testis locupletissimus. Mens ergo & corpus, quoad homo vivit, uniuntur.

Schol. Neminem esse qui ei theoremati adversetur non dubito. In eo potius æterna inter philosophos quaestio erit, qua ratione modoque mens unitur corpori. Super ea re hæc sunt excogitata. 1. Peripatetici esse animam putant *formam substantialem corporis*, quæ totum permeet corpus, totam in toto corpore, totam in qualibet corporis parte, principium ut *vitale*, ita *essentiale*.

[a] *Theol. dog. lib. 2. cap. 2. ad §. 16.*

(b) *Cap. x. §. 2. §. 20. §. 24. &c.*

*tiale* corporis, adeoque reciprocum esse inter utriusque substantiæ operationes influxum, transmutarique cogitationes in corpore, motiones in animo (a). 2. Plato (b) Mentem quidem corpori præesse, ut Nautam Navi, eoque uti velut instrumento, censuit: energiam vero, seu vitam, & sensum corporis ab alia esse substantia quadam mediæ naturæ. Cui opinioni & favisse videtur Augustinus [c]; & recente memoria Gassendus, Cudworthus, Clericus patrocinati sunt (d). Renatus Cartesius in eo quidem Platoni assentitur, non esse mentem formam corporis substantialem, sed soli cerebro præesse, indeque ope spirituum animalium motus in corpore cieri: at nullum nisi in mente sensum agnoscit, nullamque idcirco substantiam mediam. 4. At Malebranchius, & Sylvanus Regis longius quoque prætergressi sunt: nam quod non negabat Plato, nec aperte Cartesius inficiatus erat, isti diserte dixerunt, nullo modo Mentem in corpus agere, sed ex occasione cogitationum animi Deum agitare corpus; ut ex occasione motionum corporis modificare animum; quo omnino reale commercium inter mentem & corpus rupe- runt. 5. Leibnitius, & Wolfius in eo Malebranchianis assentiunt, nullum esse reale inter mentem & corpus commercium, sed tantum apparens: sed ut hoc apparens commercium explicent, non, ut illi, ad Deum confugerunt, sed ex ipsa animi & corporis natura secundum præstabilitam harmoniam explicare conati sunt. Quarum omnium opinionum quæ verior sit, Deus sciverit. Sed earum prior placet Pantheistis, & Lockianis: Malebranchiana Enthusiastis: Leibnitiana Idealistis: Platonica generosis philosophis & nobilibus: Cartesiana mechanicis. Sed incertæ omnes, quod sequentibus theorematibus demonstrabimus.

*Prop. XXI.* Scholasticorum opinio ceteris, quæ feruntur, hominis naturæ accomodatior est; nec repugnat phæ-

[a] Vide B. Thom. in utraque summa.

[b] Plato in Alcibiade, & Phædone.

[c] Aug. de quant. animæ cap. 31. & 32.

[d] Vide Cleric. Biblioth. Chois tom. 2. pag. 213.

phænomenis; sed nec certa est; & cum natura animi non satis convenit.

D. Prima pars. Mens quoad homo vivit, unitur corpori (prop. 20.); & quidem reali commercio; nisi conscientiam prodere velimus: ex reali enim illo commercio natura existit humana, & inter Mentis ac corporis actiones omnes perfecta harmonia: at totum hoc falsum est, nisi concipiatur anima velut entelechia prima corporis humani; ex qua hominis manet energia & vita: Quum cæteri philosophi & reale illud commercium abrumphant; & negent Mentem esse corporis humani Entelechiam; ea docent quæ naturæ humanæ & intimæ cujusque conscientiæ minus sunt consentanea, consentaneæ ergo naturæ humanæ & intimæ cujusque conscientiæ Scholæ philosophi ratiocinantur.

Secunda pars. In homine actiones sunt quæ ad duo summa genera referre possis; *motiones*, & *cogitationes*. Tum *motiones*, quæ in tota sunt corporis machina, item in duas classes partiri possumus; & quædam *ingenitæ* sunt ac *naturales*, qualis æquabilis illa motio, qua constat *vita* hominis *plastica* & *sensitiva*, quæ intelligi alio modo non potest, nisi velut continuata & æquabiliter toto corpore energia; qua agitantur harmonice corporis fluida, tum etiam cor, & vasa arteriarum; aliæque partes: quædam vero *superadventitiæ* sunt; velut *motiones* quæ æquabili illi *energiam* & *vitam* accedunt in morbis; in affectionibus; in voluptatibus, & doloribus gestientibus. Præterea ipsæ *cogitationes* cum commotionibus totius *energiam* corporeæ plerumque sunt conjunctæ, velut in iis ex quibus affectus permanent; v. g. ex perceptione objecti pulchri calor amoris, nempe illud

- - - est mollis flamma medullas; &

*Vulnus alit venis, & cæco carpitur igni.*

Ex perceptione injuriæ repente existit ira, quæ, non ut amor, sensim, sed statim sanguinem rarefacit, atque diffundit; unde *ardere* dicuntur irati. In prospectu

*periculi gelidus excurrit per ossa tremor. Tum livida in-*  
*vidia.*

*Invidus alterius macrescit rebus opimis.*

Accedit quod *cogitatione ipsa abstracta*, ut vocant, consumitur quodammodo, & paulatim tabescit corpus. Et hæc quidem omnia ita fiunt in corpore, ut nisi a principio quodam activo provenire nequeant. Proveniunt autem non ex principii hujus activi libertate, sed ex ejus natura necessario. Nec quisquam est, qui non expertus sit omnes has, quas descripsi, seu naturales, seu advenientes motiones, sui imperio & libertati non subjici, aut non nasci eas ex naturæ ipsius humanæ necessitate non sentiat. Nascuntur autem aut a Mente, substantia nempe illa incorporea, aut ab alia quavis. Si a Mente, id fieri non posse videtur, nisi ejus vis per totum corpus diffundatur, præsensque sit intime iis omnibus partibus, quas agit. Nam quum actiones, de quibus loquimur, non sint voluntariæ, sed ex necessitate naturæ ipsius principii activi manent, ut superius docuimus, id intelligi nullo alio modo potest, nisi diffusionem ejus principii per partes omnes corporis, in quibus *vita inest & energia naturalis*. Nam qui aut spirituum animalium ope id fieri arbitrantur, aut ope nervulorum & fibrillarum, quibus, velut tela, contextum est corpus humanum, nec certa proferunt opinionis suæ argumenta; & si attendant, verbo tantum a Scholasticis differunt, si quidem eos motus immediate a Mente repetunt: Enim vero quam parum verisimilis sit hypothesis spirituum animalium eo sensu, quo a Cartesio inducta est, a plurimis est demonstratum: & recentes Mechanici suis conjecturis nihil aliud demonstrarunt, nisi ope nervulorum, & fibrillarum communicari motus a cerebro ad extimas corporis partes, aut ab his ad cerebrum: at id nihil prohibet, quominus sit verum, vim vitalem esse toto corpore fufam; atque ab ea actiones humanæ naturæ necessarias esse; quinimo diserte videntur hoc eorum plerique dicere, in primis Boerhave, quem ego hominem in his rebus impense doctum habeo. Sed quibuscumque

quæ tandem mediis vis hæc vitalis per corpus diffundatur , & undecumque diffundi incipiat , seu e cerebro , seu e corde , seu e quocumque alio loco , siquidem ea a Mentē est immediate , non potest concipi nisi tamquam vis Mentis *vitalis & essentialis* toto corpore fusa . Quumque mens discerpi in partes & dividi nequeat ; erit ea vis Mentis immanens ; adeoque erit tota Mens velut *Entelechia prima* intime toti corpori præfens . Nec reponatur si id sit , oportere etiam mentem diffundi in ea corpora , in quæ motum transfundit . Primo ignoratur qua ratione motus transfundatur (a) ; nec ex re ignota argumentari licet adversus notionem . Deinde sunt qui putant , vim activam motricem totam permeare materiam mundanam , nec moveri corpora peculiaria virium ex aliis transfusione , sed aliorum resistantia cedente . Quam ego quidem opinionem veram quidem non habeo , sed nec manifesto falsam comperio : & in re obscura infinita opinari facile esse video , quorum quousque quod sit verum sciatur , nihil decerni affirmare potest . Accedit quod ea vis , quæ ab homine in alia corpora transfunditur longe sit diversa a vi illa vitali , quæ in toto est corpore . Tandem hoc sistema accommodatum est non iis tantum phenomenis facilius explicandis , quæ *vitam & sensum* spectant , sed iis maxime , quæ ad voluptatem & dolorem pertinent , quæ præterquam in toto sentiuntur corpore , intensiorem suam habent & remissionem , in ratione ejus intensitatis & remissionis , quæ est in motione corporis , qua *vita & sensus* continetur ; & congeminantur hæc plerumque , ut plures diversi generis dolores & voluptas & dolor , idque in diversis hominis partibus vivide & distincte sentiantur . Quæ quum sint , qui Scholasticorum systema nimis præpropere damnant , ii sæculo magis indulgent , quam rationi consulunt . Nec Cartesius , qui adversus præcipitantiam philosophandi tam sæpe invehitur , rem attente ad incudem revocaverat . Qui sequuti sunt , novitatibus dum toti intendunt , vetera negligunt , dixerunt magis , quod placeret , quam

H 2

quod

(a) Vide *Musschbroeck Element. Phys. §. 111. & 112.*

quod repperant . Nempe vetera fastidiosum hominis ingenium contemnit .

*Transvolat in medio posita , & fugientia captat .*

Tertia pars . Quum plures esse possint phænomeni alicujus causæ , & ex earum nulla evidenti intuitione , vel demonstratione pendere id intelligatur ; aut nulla perspicua demonstratione cæteræ possibiles excludantur : qui ex una potius , quam altera pendere illud contendit , incertum pronunciat . Jam unionis mentis & corporis modi esse possunt plures , non ii tantum quos alii a Peripateticis edidere philosophi , sed & qui mentis nostræ aciem fugiunt ; quorum nec suum perspicue demonstratione comprobarunt Scholastici , sed probabilibus tantum probationibus ; nec reliquos evidenter rejecerunt , quemadmodum patet , incerta ergo eorum est doctrina , & non nisi opinatio . Tum quædam sunt in hac scholarum veterum doctrina , quæ nec ipsos intellexisse Scholasticos , si ingenui esse velint , nepotes concedent ; nec philosophorum recentium ullus : veluti qui transfundi ex corpore in animum quidpiam , & in eo *spiritualizari* , qui ex animo in corpus , atque in hoc *corporalizari* , queat ; quæ recte vocabula nihil appellat Vvolfsius : qui corpus ab incorporea substantia agitari possit : nam reactione id fiat aliqua , an nulla , fieri intelligi nequit , quum naturæ corporeæ proprium sit reagere in agentia & impellentia : reagere vero in animum corpus minus etiam intelligi potest . Quod si Scholastici regerant , eam objectionem spectare omnes corporum vires activas , ipsam quoque Deum , si ad illum velut omnismotionis fontem confugiatur ; annuemus . Sed fatebimur esse , ut hæc , ita illud ignotum . Non dubito quin [ si in re tam obscura minus obscuram speciem veri ementiri possit ] intelligatur facilius *a vi informante* agitari corpus aliquod , quam *ab assistente* : sed in re etiam minus obscura tantum superest tenebrarum , ut qui id negare velit sit conscientiam dissimulaturus ; utque non injuria Vvolfsius inter qualitates occultas eam doctrinam retulerit , & quod facietum , geometrica demonstratione confirmaverit (a) .

Quar-

(a) *In Psychol. Ration. sect. 3. cap. 2. §. 528.*



Quarta pars. Mens humana est substantia a corpore distincta & diversa [prop. 12.] ; ea autem si corpori unitur, quemadmodum Scholastici contendunt, efficiet cum corpore unam eandemque substantiam, cujus corpus sit materia, Mens materiæ energia, & actus, quod illi diserte docent, uti ex adjecto Scholio patet (A); quod nescio utrum sit ei Mentis naturæ, quam demonstravimus, satis consentaneum.

Schol. (A) Peripatetici illi majorum Gentium (nam posteriores rem penitus non inspexere) dum ea de re disputant, sic ne anima humana *forma* corporis, necne, talia dicunt, quæ, nisi stabile illud Dicæarchi spiritus & corporis conjugium in unam eandemque substantiam statuatur, & superiora omnia theorematum evertantur, vix, opinor, intelligi possunt. B. Thomas (a) quum percensuisset veterum philosophorum opiniones super unione mentis & corporis, easque, accurate necne, rejecisset, iis verbis Mentis velut *formæ*, & corporis unionem adstruit (b), quæ perspicuum faciunt, quod dico. Scilicet nec probat Mentem uniri corpori velut *motorem motæ machinæ*, quod & Plato, & Augustinus censuere: nec ope *phantasmatum*, quæ ex corpore excipit, quod opinabatur Averroes: sed contendit eam esse debere *formam substantialem*, corporis. *Ad hoc autem*, pergit ille, *quod aliquid sit forma substantialis alterius*, duo requiruntur: quorum unum est, ut **FORMA SIT PRINCIPIUM ESSENDI SUBSTANTIALITER** ei cujus est forma: principium autem dico, non effectivum, sed formale, quo aliquid est, & denominatur ens. Unde sequitur aliud, scilicet quod **FORMA ET MATERIA CONVENIANT IN UNO ESSE . . . . .** & hoc ESSE, est in quo subsistit **SUBSTANTIA COMPOSITA, QUÆ EST UNA SECUNDUM ESSE EX MATERIA & FORMA CONSTANS**. Et ne quid desit, addit paullo post: Non tamen minus est aliquid unum ex substantia intellectuali & materia corporis, quam ex forma ignis & ejus materia: sed forte **MAGIS**; quia quanto forma magis vincit materiam, tanto ex

H 3

ca

(a) Lib. 2. contra Gent. (b) Ibid. cap. 68.

*ca & materia magis efficitur unum. Et emollit hæc quidem paullo inferius, dum negat substantiam intellectivam esse totaliter materiae immersam, ut aliae formae materiales, quæ videri possunt superioribus contraria: sed statim, objecta diluens, addit (a) . . . non enim corpus & anima sunt duæ substantiæ actu existentes, sed ex iis duobus fit UNA SUBSTANTIA actu existens, idest unum per se subsistens, quod illi est substantia. Erant qui opponebant, intelligi non posse, si sic se res haberet, mentem rem esse a corpore separata. Reponit, etsi non per essentiam, at per potentiam intelligendi, quæ sine corpore sit, id esse verum, Quum tamen idem passim scribat potentiam cujusque rei ejus essentia contineri, quod verum cæteri Philosophi habuere. Franciscus Ferrariensis, qui B. Thomæ interpretes perhibetur acutissimus, ut clarius etiam doceat, qui ex corpore embrionis, quod etiam ante unionem cum anima, substantia est, & ex substantia ipsa intellectiva una fieri possit substantia, quum id ex Peripateticæ philosophiæ dogmatis sit ἀδύνατον; addit, corpus adventu animæ corrumpi secundum substantiam. Quæ proculdubio miranda est Philosophia! Accedit, quod forma & materia habent se ut potentia & actus (b): adeoque quum anima sit forma corporis est ejus actus primus potentia vitam habens. Quod si, ut nunc loquuntur philosophi, proferre velis, anima est vis corporis activa, tota diffusa corpore, &, ut Dicearcus dicebat, una corporis temperatio, qua illud vigeat & sentiat. Scio non hoc dicere scholæ Philosophos voluisse, quod illi aperte oppugnabant: at nemo non videt ea inde consequi. Et bene habet, quod non prospexerunt; quo ea doctrina abire posset: alioquin quibus illi piaculis expiari possent? Atque hinc intelligitur, gravissimas proferre potuisse recentiores Philosophos causas, si id animadvertissent, cur veterem potius Platoniam, & Augustinianam doctrinam super unionem mentis & corporis, quam hæc Peripateticorum, tenuerint. Nempe est hæc quidem Philosophia Aristotelis æconomiz inserta,*

(a) *Ibid. cap. 69. sub initium.*

(b) *B. Thom. ibid. cap. 71. & passim alibi.*

ferga, qui Deum fecit *animam informantem materiæ* ; ut alias observatum est ; sensus & phantasie phænomenis adulatur, ita ut systemati suo accommodatiorem *Sensistæ & Materialistæ* Philosophi reperiant nullam : at est interim talis quæ rationi adversatur ; & quam Christiani Philosophi vix sine nefandis conlectariis tueri possint : Hæc observari ab iis velim ; qui tanta cum protervitate in recentes philosophos invehantur ; quasi qui Mechanica philosophandi ratione substantias incorporeas e dignitate sua deturbarint ; quum illi potius sedi & dignitati suæ restituerint : Nam ; quæso ; qui dicit mentem humanam esse ; *vim* ; *virtutem* ; *actum* ; *principium essendi substantialiter* corporis ; quocum corpus *unum simpliciter* ; *unam SUBSTANTIAM* efficiat ; is ne melius Mentis naturæ & dignitati prospicit ; an qui præsidere eam corpori : eoque velut instrumento uti , nec ullo modo cum eo misceri pronunciat ? Quæ quum observo , miror Hobbesianes , & Lockianos philosophos ; dum de natura animi loquerentur ; & quidem tanta cum invidia ; ad hos patronos non appellasse : nam ego certe non video quid intersit inter Aristotelis ; ejusque discipuli Dicæarchi ; & Lockii de natura animæ sententias : illi enim est *actus corporis* ; & *forma substantialis* ; energia scilicet ; entelechia ; & *usia* corporis : isti corporis totius temperatio : huic tandem vis quæ corpus vivit & cogitat : Rogoque viros doctos , ut me ejus discriminis admoneant .

*Prop. XXII.* Motiones vitæ vegetativæ ; & sensitivæ necessariæ sunt , non liberæ , omnemque usum rationis prævertunt .

D. Primum ex intimo cujusque sensu & conscientia : nam crescere ; nutrirî ; vegetare corpus ; tum motus pulmonum , cordis ; sanguinis ; in nobis sunt velimus , nolimus : manifestissime eas motiones distinguimus a voluntariis , gesticulationibus artuum ; motu oculorum , linguæ ; agitatione totius corporis ; translatione de loco in locum ; quæ ex consultatione fiunt , saltem quum ex ratione & deliberatione fiunt ; quod est ex libertate fieri ( def. 12. ) Atque hinc nascuntur hominis tem-

peramenta, ac temperamentorum affectiones & propensiones & ipsæ necessariæ. Inde quoque sensus doloris & voluptatis necessarius, ex iis motionibus paulo vehementioribus, quæ seu ab extrinsecis, seu ab intrinsecis excitantur causis. Neque quisquam est adeo aut sibi ignotus, aut impudens, ut hæc omnia ex imperio & libertate nostra proficisci affirmare possit. Nihil enim est quod de natura nostrâ clariùs intelligamus, atque certius pronunciare possimus.

Altera autem pars ex superiori patet. Nam quæ necessario in nobis fiunt, ea profecto usum libertatis antevertunt; adeoque usum consultationis atque deliberationis, idest rationis.

Nec regerant Malebranchiani, positis earum motionum necessariis perceptionibus, a Deo eas produci, neque idcirco omnem rationem antevertere. Nam hos rogo, quum perceptiones sint *causæ occasionales* motionum corporis, nullæque in corpore a Deo exciteantur motiones, nisi quæ perceptionibus & voluntatibus mentis respondeant, ut sanctæ testæ leges unionis mentis & corporis serventur; percipit ne Mens, aut vult omnes eas motiones, quæ ad conservandam vitam corporis sunt necessariæ? Si percipit, percipiet quoque totam partium omnium corporis compagem & structuram; neque enim alias, quæ motiones vitæ conservandæ inservire possint, intelligere potest. Vix, opinor, eo confidentiæ evadent, ut hæc affirmant serio: nam si exercere ingenium, & ludere velint, non repugno. Moneo tantum, quod hæc,

*Si quem delectent barbatum, amentia versat.*

Prop. XXIII. Si earum actionum & corporis *ἐνσυνείας* [prop. 22.] Mens est immediatum principium, eæ provenientes in corpore necessaria naturæ Mentis in corpus emanatione seu effluxione.

D. Nempe quæ ex re aliqua fluunt non ex libertate, sed necessario, emanationes esse debent, seu effluxiones necessariæ naturæ ejus rei: quum autem hujusmodi actiones, *ἐνσυνείας* & vitæ hominis [prop. 22.] antevertant rationis & libertatis usum [ibidem]; nequeunt

queunt esse nisi effluxiones necessariae Mentis, si quidem ab illa sunt immediate.

*Prop. XXIV.* Si Mens est immediatum principium energiae corporis, est *forma* corporis *substantialis*.

D. Si id ita est, energia corporis est necessaria effluxio mentis totum permeans corpus (prop. 23.): effluxiones autem, quae ex re aliqua fluunt necessitate naturae, essentialis ei rei sunt; energia ergo illa erit Menti essentialis, idest ipsa mens actuosa; adeoque mens erit energia haec, actus & entelechia corporis, idest forma substantialis.

*Corol.* Si Cartesiani & Platonici ita Mentem locant in Cerebro, ut ea sit principium immediatum totius Energiae corporis, ii negare nequeunt mentem esse *formam* corporis *substantialem* (ex prop. 24.)

Opponunt, nihil prohibere, quo minus Mens praefideat quidem in cerebro, ex eoque moderetur totam humanam machinam ope motus, quin influat physice in corpus. Enimvero seu in corpore ingens *spirituum animalium* copia insit, & ad energiam illam corporis producendam ii apti erunt administri: seu ope nervulorum, eorumque fluidi nervei, & fibrillarum id dicatur fieri, & intellectu facillimum est, quum tota humanae machinae tela a cerebro ordiatur, inde etiam exordiri vitam. Sat est igitur moveri a mente glandulam pinealem, aut eam cerebri partem, unde procedunt nervi, ut tota corporis harmonia & vita consistat. Sed Cartesianos rogo, voluntate ne Mens glandulam pinealem agitat quaquaversus, an ipsa naturae suae necessitate? Posterius sine physico influxu fieri nequit; & prius nec intelligitur, & adversatur vivido naturae nostrae sensui. Sed, inquiunt, cur membra paralyti affecta, quae excipiendo a cerebro motui apta non sint, sensu & vita destituuntur? Quia nempe ne cannae quidem Musicae, si orificia, unde perfluit flatus, clausa sint, sonum reddunt. Nec interrim, quum sonant, inflari spiritu minus verum est. Ne plantae quidem rami virescunt, si vasa, quae succum deferunt, obstruantur. Sed an idcirco quum virent  
non

non eos permeat succus? Nempe vis illa sensifera & vegetatrix quæcumque ea sit, quæ ex Animo in corpus perfluit, siquidem perfluit [ ejus scilicet opinionis auctorum heic personam gero ], meatus, vasa, organa energię illi apta habeat oportet, ut & transeat, & agat. Pergunt, quum ex capite tota vitæ humanæ structura ordiatur, non sine ratione id factum sit oportet; nec esse alia ex ratio potest, nisi ut ibi præsidens Anima movendo & regendo corpori sit expeditior. Quæ si ratio quidquā valet; probabit etiam brutorum totam animam in cerebro residere, quorum similis est machinæ structura: tum plantarum vim vegetatricem & plasticam in uno semine, aut solis radicibus contineri, nec ullo modo corpus plantæ pervadere, nisi sola fibrillarum oscillatione. Addunt porro, ita fieri ut in toto corpore, atque in singulis ejus partibus insint cogitationes, si quidem Mens in tota sit humana machina: quod quum non sit, in cerebro Mens præsidere potest, quin per totum corpus diffundatur. Cui argumento reponunt Scholastici, Mentem ita corporis partibus esse aptam, ut eas exserat actiones, quæ sint parti cuilibet accommodatæ. Atque ita videt quidem in oculo, non in aure; nec aure, sed naribus odoratur. Non alia ratione ac idem plantarum succus candere potest in flore, virescere in fronde, flavescere in pomo: idem in cannis Musicis status altius, gravius sonare; idem calor liquefacere, aut indurare. Quod, inquit, intellectu facilius est, quam inextensam substantiam & ab omni corporis commercio abstractam eodem tempore odorem, sonum, saporem, colorem, calorem, frigus, dolorem, & voluptatem, quod evenit plerumque, sentire. Ut ecce Palæmon cui renes morbo tentantur acuto, per amœnum collem spatatur,

*Quum omnis ager, omnis parturit arbor:*

Pastores

*Formosam resonare docent Amaryllida Sylvas.*

Is virentia late prata prospectat, niveasque bidentes: legit humi nascentia fraga, & gustat; matutino gelu rigent artus, dum, admoto lateri fomento, uritur.

Hæc

Hæc ne tu in uno conario compones? Aut in uno geometrico puncto?

Corol. 2. Si Mens non est forma corporis substantialis; ea nullo modo immediate influit in corpus.

Sch. Id intellexit Malebranchius & Leibnitius; qui idcirco reale omne commercium inter Mentem & corpus susulere, ille systemate *causarum occasionalium*; hic harmonia præstabilita. Scilicet qui cum una parte commercium illud *immediati & physici influxus* ponit, is intelligit non repugnare mentem totum corpus permeare & agitare posse, nec idcirco est cur reprehendat Scholasticos. Quod si de maxima corporis parte negat, is etiam neget de omnibus.

Prop. XXV. Si Mens ita præsidet in cerebro, ut non sit etiam forma *substantialis & essentialis* humani corporis, ponenda est media quædam substantia, quæ sit anima hominis *vegetativa & sensitiva*, seu principium activum earum actionum, ejusque energia, quæ in corpore inest necessaria.

D. Nam si ita præsidet, ea non influet in corpus (prop. 24. coroll. 2.) adeoque eæ actiones *vegetativæ & sensitivæ* vitæ quæ sunt in toto corpore, ut patet, & necessariæ (prop. 22.) a Mente provenire nequeunt; ergo alterius activi principii erunt (prop. 67. p. part.) quod appellabitur *anima media*, seu *vegetativa & sensitiva*.

Schol. 1. Sit ne in homine reapse anima hæc media magna contentione inter philosophos disputatur. Nam (a) & veteres Philosophi *subtilissimo fluido*, quæ sit *anima media*

(a) Extat apud Homerum in *Odissea* & locus omnino aureus, ex quo apparet perspicue, veteres Mentem ab Anima distinxisse, atque Animæ tantum, velut mediæ cui-dam substantiæ, effigiem, aliasque qualitates corporeas tribuisse. Narrat eo in loco Ulysses inter veteres apud inferos Heroas & Herculem vidisse, diuque cum eo colloquutum, sed agnoscit fuisse id *Εἰδωλον* Herculis; Hercules enim ipse apud Deos immortales convivabatur, qui Homero aliud esse non potuit, nisi Hercules Mens, ut Mens cujusque id sit quisque. Sed ponam Homeri locum.

*media*, *Mentes* circumvestiri crediderunt, & in eandem sententiam magna pars antiquorum Christianorum Theologorum ivit, & recentes plurimi, ut superius adnotatum est, suum calculum addidere. Nec scholasticorum plerisque ea displicuit, inprimis Zabarellæ (a) & Henrico Gandavenſi (b), qui tres Animas velut tres substantias realiter distinctas, *Vegetativam*, quæ sit materies *Sensitivæ*; *Sensitivam* quæ sit materies *Intellectivæ*; Et *Intellectivam*, quæ *actus* sit, in homine posuerunt. Accessere Chimici quidam & Fanatici, Theophrastus Paracelsus [c], Joannes Baptista Helmontius (d), & Joannes Comenius [e], qui Mosaicam esse & Cabbalisticam doctrinam contendit. Hic post Cabbalistas quosdam *Nus Mentem* a Deo esse, animam mediam ex præexistente spiritu mundi, quod & Fluddus opinatus est (f), & Campanella (g): & Henricus Morus, etsi doceat animam vegetativam & sensitivam esse ipsam Mentis vim toto corpore fusam, ab eo non admodum abhorret, & spiritum mundi archeon plurimum in vitam humanam influere (h). Referemus in pauca quæ in eam rem excogitata sunt. Nec nunc moror comenii argumenta e Scriptura Sacra deprompta, ne contortis interpretationibus hominum Fanaticorum quid concedere videar.

## 2. VI.

Τὸν δὲ μετ' εἰσκόπῃσιν βίῳ Ἡρακλείῳ,  
Εἰδῶλον αὐτοῦ δὲ μετ' ἀθανάτοισι θεοῖσι  
Τέρεται ἐν θαλίῃς . . .

Post hæc vidi vim vitalem, animam Herculis,  
Formam, animam effigiatam: nam ipse apud immortales Deos

Obletatur in conviviis . . .

(a) In libro de facultatibus animæ cap. 8.

(b) In VII. physicorum quæst. 8.

(c) De Creat. hominis pag. 757.

(d) De Sede Animæ num. 17.

(e) In physica cap. XI. pag. 194.

(f) Apud Gassendum Exercit. in Fludd. philosoph. c. 19.

(g) De sensu rerum.

(h) De Immortalit. animæ.



2. Vitam sensitivam, qua voluptatem & dolorem sentiamus, qua externarum rerum impressiones, & imagines excipiamus, toto corpore esse fusam pluribus demonstravit Morus [a]: 1. Nulla est corporis pars in qua voluptas aliqua aut dolor non sentiat, & quidem vivide & distincte. Dicere id fieri ope motionum ad sedem usque animi communicatarum, adeoque ad ipsam animam, est sine consilio rationis loqui. Nam si id sit, nihil erit in extremo pedis digito, dum uritur, aut scinditur, nisi motus, sensus vero nullus: est enim sensus in sola mente. Cur ego dolor persentitur in digito? inde scilicet oritur doloris causa. Sed quoniam is motus perpetuatur ad cerebrum usque; eoque totus nervus, quo is communicatur, concutitur: ita ut causa physica ejus doloris sit is motus, quatenus ad partem concussam refertur a mente, oportet in toto nervo, quo defertur motus ille, dolorem persentiri, quum in toto nervo sit eadem causa doloris physica; quod si non in toto; ne in extremitate quidem, ex qua exorditur motio.

3. Præterea aperte distinguimus dolores, qui ex sola perceptione nascuntur, ab iis qui nascuntur ex violenta corporis contusione, aut scissione, ut sit inter eos id discriminis, quod est inter dolorem, quem Nauta sentit ex fractura navis; & quem percipit ex cruris, aut brachii fractura. Id autem discrimen esset nullum, si eodem modo ex perceptione mali, quod contingit rei, quam caram habemus, & corporis contusione afficeretur Mens.

4. Tum qui dolores animi dicuntur intensi magis aut minus sunt in ratione intensitatis motionis energię corporeæ, quæ agitatio necessario perceptionem mali sequitur. Ex. gr. ex acerba amici morte perstringitur spiritus, & cor, atque in ratione hujus excitatæ in corpore perturbationis consequitur dolor. Quod argumento est dolorem esse in anima per corpus diffusa.

5. Quod pertinet ad sensationes id potissimum argumentum ex Moro adornant. Nisi animæ aut *sensitivæ*, aut *rationalis* essentia a communi sensorio ad oculos peringat, difficillimum erit intellectu, qui distincta repræsen-

[a] De immortal. Animæ libro 2. cap. x.

sentatio fieret objecti cuiusvis visibilis. Nam qui non confunduntur colores? præcipue quum colores qui in ipsis sunt radiis luminis, non possunt eo pertingere distincti, quo radii ipsi non pertingunt, idest ad remotiorem cerebri partem. Qui porro imago objecti non disperditur per confragas ad cerebrum usque nervorum contexturas? Cur saltem non miris modis confrangitur? Nam experimenta Catoptrica aperte docent, dissipatis radiis ob inæqualem in speculis inæqualium angulorum reflexionem, aut contortas & monstruosas imagines rerum objectarum apparere, aut etiam concisas in partes.

6. Est ergo anima in toto corpore; nec tamen *Intellectiva*; nam quod proprium *Intellectivæ* est, percipere, judicare, ratiocinari, id in solo cerebro persentiscimus distincte, ut argumento sit in eo mentem præsidere, seu in conario Cartesii, seu in aliquo cerebri ventriculo, quod probabilius putarunt alii, seu in toto cerebro; quod parum refert. Præterea quæ est in corpore anima vegetatrix & sentiens, nec imperio mentis paret, & a pluribus externis causis pendet, & veluti nutritur, in primis aere, igne, & spiritu mundano plastico. Id etiam ostendit hanc animam esse a Mente distinctam. Tum contrahitur hæc, & dilatatur pro ratione corporis, quod *Intellectivæ* esse nequit. Tandem dolor & voluptas, & sunt animæ, nec esse possunt *Intellectivæ*. Nam & sunt mutationes quædam substantiæ, quæ dolore aut voluptate afficitur; & gradus intensitatis dolorum & voluptatum, qui intenduntur & remittuntur, sine intensione & remissione subjecti, quod dolet, aut lætatur, intelligi nequeunt: Anima autem *intellectiva* nec internæ mutationi obnoxia est, nec ullo modo intendi & remitti potest. Atque hæc sunt argumenta eorum qui animam sensitivam a Mente distinguunt, non ea certe perspicua, nec certa, sed probabilia tamen, quæ juvenem olim Gassendum in sententiam pertraxere, ut ipse adversus Fluddum fatetur, quæque plerumque veri specie mihi adblandiuntur. Sed nolo opinari.

## SYSTEMA MALEBRANCHIANUM,

Seu causarum occasionalium.

**P**ergamus nunc ad systema Malebranchianum. In hoc systemate commercium inter mentem & corpus explicatur ope modificationum harmonicarum Mentis & corporis, quæ immediate a Deo producuntur ex sua generali voluntate, & secundum æternas & immutabiles leges. Scilicet Deus in gratiam corporis perceptiones quasdam & voluntates in Mente producit, quæ impressionibus in corpore factis, corporisque modificationibus respondeant: & in gratiam Animæ quosdam motus in corpore excitat, quia Anima hos & non alios vult, Quamobrem nec Anima influit ullo modo in corpus, nec corpus in Animam: nullum reale sed apparens tantum inter duas hæc substantias intercedit commercium. Tantum cogitationes & voluntates Animæ *causæ sunt occasionales* motionum corporis: ut motiones corporis *causæ occasionales* cogitationum & voluntatum animi. Præterea nulla est in corpore anima aut *sensitiva*, aut *vegetativa*: ejus omnia phænomena aut motus sunt, aut corpori non recte tribuuntur.

*Prop. XXVI.* Systema causarum occasionalium, 1. incertum est, 2. intimæ conscientiæ repugnat, 3. gravissimis argumentis oppugnatur, 4. & cum Theologia Christiana non satis consentit.

**D.** Prima pars. Quum plures esse possunt dati aliqujus phænomeni causæ, earum nulla pro certa habenda, nisi quum omnes aliæ aut falsæ demonstratæ sunt, aut impossibiles: jam nec certi sumus nullas superesse alias vias explicandæ unionis mentis & corporis, quam quæ hucusque sunt a Philosophis traditæ, nec, quæ suo tempore ferebantur, demonstratæ sunt a Malebranchio falsæ, vel impossibiles; & postquam is occidit reperta est etiam *harmonia præstabilita*; incerta est ergo hypothesis illa causarum occasionalium.

At

At enim, nulla res creata potest sibi quidquam *realitatis* dare, quum *ex nihilo nihil esse possit*, & nulla res dare sibi aut alteri possit, quod non habet. Quum autem & cogitationes novæ sint novæ etiam realitates Mentis, & novæ sint realitates novæ corporis motiones; nec corpus sibi novos motus, nec Mens novas cogitationes creare potest. Utrumque ergo efficit Deus (a). Ego unum rogaverim, qui sciunt id Deum posse? Quia, inquit, & omniscius est, & omnipotens. Sed iterum rogaverim, qui omniscius est & omnipotens, potest ne tales naturas creare, quæ & cogitent ipsæ suapte vi, & moveant? nam & homines, qui nec omniscii sunt, nec omnipotentes, tales machinas fabricare didicerunt, quæ sua partium temperatione moveantur. Quod si Deus potest (nec enim adeo vesania agitari putaverim, ut negent), unde sciunt non id effecisse? Incertum ergo quodcumque pronunciant. Sed illa sola via (inquit Malebranchius) & facilior est & brevior, & breviori semper & faciliori via operatur Deus. Næ ego stultus, qui puto; & omnes agendi vias esse Deo æque faciles, atque brevès; & eam dicere nos debere faciliorem, breviorēque, qua ille operatur, non eam quæ homuncionibus placeat! Nunc disco philosophos alioquin doctissimos Virgiliano Tityro esse persimiles.

*Urbem quam dicunt Romam, Meliboeæ putavi.*

*Stultus ego huic nostræ similem....*

*Sic Canibus catulos similes, sic matribus hædos;*

*Noram, sic parvis componere magna solebam.*

Ignosco: natura est enim ita comparatum, ut rebus ignotis, quas maxime celebrare volumus, naturam atque affectiones nostras tribuamus. Hinc illud Ciceronis adversus Poetas, *humana transfulerunt ad Deos: divina mallet ad homines.*

Secunda pars. Clara omnium hominum conscientia docet corpus hoc nostrum ab anima agitari, animari, vivum atque vegetum fieri, esse inter Animam & corpus commercium reale: at hæc omnia abruptim syste-  
mate

(a) Ita ferme rationes subducit Auctor operis. *Actions de Dieu sur les Creatures.*

mate suo Malebranchius; claræ igitur cujusque conscientia & sensui, nec plebejorum modo, sed ipsorum philosophorum, Malebranchii ipsius, hæc doctrina repugnat. Neque vero argumenta ex claro hominum sensu atque conscientia desumpta nihili esse debent apud homines; saltem in dubium vocari nequeunt, nisi ex perspicuis demonstrationibus, non ex meris hypotesibus. Ex. gr. Quum Optici a communi sensu discedunt, docentque visionem non fieri per *extramissionem*, sed *intromissionem*, pronuntiati sui claras demonstrationes præferunt. Astronomi dum motum Telluri contra communem sensum persuadere student: Physici, dum negant qualitates sensiferas esse in rebus ipsis corporeis. Nunc quum nullas perspicuas systematis sui demonstrationes Malebranchius protulerit; non video, cur a sensu omnium communi & claro sit discedendum. Nam argumenta Auctoris libri *Actionum Dei in Creaturis* fanaticismo sunt omnia involuta, & si quid probant, probant etiam, Deum esse solum mundi actum, animam, naturam, quod est Spinozistis assidere. Quamquam illud scire velim, cur ne Malebranchius ipse post diuturnas meditationes intelligere potuit, unde nascatur sensus hic vividus & clarus, animam immediate corpus movere, quum, si illi fides, id sit falsum? Nempe quum anima sit conscia operationum suarum, nihil illi debet esse facilius, quam internoscere inter eas actiones, quas ipsa natura sua exserit, & eas, quarum non physica, sed moralis tantum causa est. Nemo est quantumvis stultus, qui non advertat, quid intersit inter movere baculum propria manu, & præcipere alteri, aut eum orare, ut moveat. Josue, ex. gr., intelligebat aperte, quantum esset discrimen inter cessare solem a motu ad suum nutum, dehinc iterum ad nutum suum moveri: atque ad nutum brachium movere, aut cohibere. At nunc sit ut ne perspicacissimus ipse Malebranchius longa attentione distinguere potuit inter eas actiones quæ sunt Animæ propriæ, & eas cujus est occasio. Quod si nullas Animæ actiones tribuere vult, contenditque esse omnes passiones, negare quoque debet ulla activa vi esse Animam præditam.

ac consequenter esse in nobis ullam Animam. Mihi enim tantumdem est, nullas esse in Mundo Animas præter Deum, & esse, sed magis etiam inertes, quam corpora. Quæ quum sint, non intelligo, qui philosophandi hic furor sit, nota & clara hominibus e manibus auferre, obscura & ignota substituere. Non tu; Malebranchi,

. . . . . floribus Ausrum

Perditus, & liquidis immittis fontibus Apros?

Tertia pars, 1. Non intelligo cui usui sit Mens humana in corporibus; atque adversus Malebranchium argumenta omnia flecto, quæ adversus Platonem Anonius (a). 2. Nec quæ esse possit libertas in corporis actiones, si nullum in corpus habet Mens imperium: sed ne in Mente ipsa quidem esse ulla voluntatum libertas potest, si ex occasione tantum motionum corporis omnes in illa cogitationes & voluntates producat Deus. 3. Cur non sit Deus anima mundana: nec enim aliud Animæ nomine intelligimus, nisi principium activum vitæ, sensus, cogitationum: at ex Malebranchianis omnium harum rerum immediatum activum principium est Deus. Quam rem Anonius superius citatus videtur diserte dicere. Ei enim anima cujusque hominis est cogitatio: & omnis cogitatio perpetuo creatur a Deo immediate, quod si recte accipio, est idem atque dicere, Deum perpetuo & perenniter in mundanis machinis cogitare. 3. Lex est mechanica, corpus motum nec cessare a motu, nec a priori directione, nisi incursum alterius; quæ falsa est in corporibus hominum & brutorum. Dicere vero in hominibus & brutis esse legis exceptionem, est *ludere par impar*: oportuit enim id accurata demonstratione ostendi. Mitto alia, quæ protulit Vvolsius (a). Hæc talia sunt, ut Malebranchium imprudentem coegerint esse in ea sententia minus constantem, ut scilicet philosopharetur ex systemate & paucis; loqueretur, & pluribus, ex communi sensu, ac vulgo, ut ille dicere solet.

Quar-

(a) Vide superius pag. 106.

(b) In Psychol Rationali sect. 3.

Quarta pars. Nemini peccato imputari possunt actiones adversus Dei legem : Nam . 1. scelera a corpore patrata Menti imputari non possunt , quippe est illa causa moralis ( nisi instrumentum dicere mavis ). Deus tantum physica . Quis autem non intelligat actiones physicæ magis causæ imputari ; quam morali ? . 2. ne peccata quidem cordis imputari Menti possunt , quum producantur in illa necessario ex occasione motionum corporearum . Quæ si sunt vera , *Ecce qui tollit peccata mundi ?* 2. Inutiles sunt leges morales : Nam cui tu usui dices legem *non occides* , si ut occidam corpus moveri debet a solo Deo , animus nihil potest , nisi obtemperare necessario ex occasione motionum corporis ? Nempe leges morales tum regulæ sunt rationis & voluntatis , si quidem mens & ipsa suapte natura cogitat , & libertate ulla utitur . Tu quum utrumque neges animo , inanes efficis & leges , & exhortationes omnes , & consilia . Vide igitur ne instabilis ; & sacer sis . 3. Doctrina peccati originalis hoc systemate est omnino inintelligibilis , nisi statuatur etiam animarum præexistentia . Enim vero , sublato omni cum corpore Mentis commercio , quo ex surculo contrives labem illam Adamiticam ? Scio non deesse Malebranchianis ad hæc quæ regerant : sed scio etiam nullam esse falsitatem sine patrono .

## SYSTEMATIS LEIBNITIANI

## Enarratio .

GOTTFREDUS GUILLIEMUS LEIBNITIUS sub exitum elapsi sæculi , ut veterem , quemadmodum scribit , & veram philosophiam restitueret , omnium primum in genuinam substantiæ notionem , quam ille in recentiorum philosophorum scholis depravatam esse censuit , inquisivit . Ejus rei specimen exhibuit in commentatione *de primæ philosophiæ emendatione ; & de notionē substantiæ* (a) . Ejus ea de re doctrina huc redit , omni sub-

I 2 stan-

[ a ] Extat in *Act. Erudit. Lips. ann. 1694. mense Martio pag. 110.*

stantiæ tam corporeæ quam incorporeæ inesse vim quãdam activam, atque ex ea perenniter actionem sui generis emanare (a), qua super re acerrima illi cum Ruaro Andala fuit concertatio. Ea Leibnitii sententia vim fecit novo dogmati harmoniæ præstabilitæ. Nam harmoniam actionum duarum substantiarum triplici tantum via & ratione expediri posse vidit. Nempe aut altera in alteram influit, altera alteri est causa determinans, atque id est systema *influxus physici*: aut ab eadem causa extrinseca utraque agitur atque determinatur, *repetita & immediata semper actione*, idque Malebranchianum est systema: aut a causa quidem extrinseca sed mediantibus viribus ipsis utrique substantiæ insitis, & *harmonia est præstabilita* (b). Fac, inquit Bilfingerus, duo esse horologia, quæ consonent; obtineri id potest triplici modo. Uno per influxum, si feceris ut alterum agat in alterum, idque vel mutuo; vel ex alterutro tantum latere. Hanc viam influxus vocabimus. Secundus est si Opificem operi comitem feceris, qui dissonantia ceteroquin vel cessatura horologia singulis momentis sibi mutuo accommodet, alterum dirigens ex altero: hanc viam vocabimus assistentiæ. Tertius est, si satis accuratas feceris eas machinas, ut singulæ suas leges exacte sequantur, easdemque ab initio sibi respondere curaveris: ita enim quum utraque easdem vel similes exsequatur leges, semel harmoniacæ nunquam dissilient; quam viam præstabiliti consensu vel harmoniæ dicimus (c). Quum autem influxus substantiæ corporeæ & incorporeæ videretur sine ulla ratione sufficiente positus, quod neque in corpore esse ulla possit ratio sufficiens actionum animæ, nec in anima motionum corporis, everteretque quantitatem virium perennarum, quam statam & immutabilem is habebat: systema vero Malebranchianum vires substantiarum essentielles funditus avelleret: una ei harmonia præstabi-

(a) Vide quæ dicta sunt pr. part. Schol. prop. 97.

(b) Bilfingerus in Harmonia præstabilita §. 15. 17. & 18.

(c) Est Leibnitii comparatio Journal. des Savans 19. Novem. 1696. edit. Batav. pag. 708., & 709.



• stabilita superfuit, qua mentis & corporis unionem explicaret .

Christianus Vvolffius hujus systematis præcipuus patronus pluribus additamentis illud exornavit (a). *Anima*, inquit, *ita est a Deo creata, ut vi sua sine ope externæ cujusvis causæ omnes suas perceptiones & appetitiones continuata serie sibi producat, ita ut semper posterioris perceptionis aut appetitionis ratio sufficiens continueatur in antecedente perceptione vel appetitione: & corpus ita compactum ac constitutum est, ut per se solum ex legibus motus sine ulla animæ ope sibi producat omnes suas motiones, itidem continuata serie, ut semper posterioris mutationis ratio sufficiens sit in præcedente. Quocirca etiamsi nullum esset corpus Animam eadem continuata serie omnes eas perceptiones & appetitiones, quas nunc habet, producere sibi posset; & sublata omni Anima, corpus eadem continuata serie omnes motus suos sibi crearet. Séd qui harmonice alteri altera confociatur? Nempe ea vis animæ matrix & primigenia est, vis sibi repræsentandi universum convenienter ad motus in organis nostris sensoriis productos, ita scilicet ut ea universi idea easdem mutationes subeat quas mundus spectabilis per relationem ad sensus nostros. Ita utriusque actiones harmonicæ procedunt. Quasi diceret, quum oculis suspicio Lunam, tum illa universi idea ex Lunæ adspectu repræsentatur menti: si libuerit statim a Luna in subiectum mare oculos dejicere, ecce vertigine quadam idea illa exhibet mare: & si attentius contueor oculis innatantes pisciculos, tum ipsa etiam Mentis acies acuitur, introspicitque in immensa universi idea pisciculorum fluctuantes imagines. Tum repente si per vastissima aeris spatia in minutissimas stellas oculos intendo, & circumgiro velocitate incredibili circum singulas, atque pro variis distantiiis in partes varias differo, & nunc defigo, nunc proveho, nun expando, idea illa rotatur, dilatatur, modo se explicans in vasta intervalla, modo se in punctis coarctans. Quod si celeritate magna & continuata successione percurro oculis innumerabilia*

diversi generis individua, herbas, plantas, lapides, animalia, picturas, numeros, vestes, literas Hebraicas, Arabicas, Sineses, Græcas, Latinas, quæ omnia nullam habent inter se necessariam connexionem, repente idea illa sine ullo cum oculis commercio hæc omnia offert. Sed & colores, & sonos, & sapores & odores, & figurarum infinitas miriades uno quasi momento exhibere potest. Oh!

*Quo teneas nodo nutantem Protea vultus?*

Mirum non est, si magna animorum contentione super ea re disputatum sit. Ex una parte Leibnitio, Volfio, Bilfingero, eorumque cohortibus; ex altera Baelio, Andala, Lamio, Turnenimio, aliisque decertantibus. Nam nihil minus involutum excogitari posse putarunt Leibnitiani; nihil magis paradoxum adversarii. Et hi quidem adjutore populo utebantur; nihil enim populus magis esse perspicuum censet, quam reale intercedere inter mentem & corpus commercium. At illi, qui Imperati vulgo audiunt, nihil multitudinem verebantur; est enim philosophia paucis contenta iudiciis, multitudinem ipsa consulto fugiens, eique ipsi & suspecta & invisæ, ut vel, si quis universam velit vituperare, secundo id populo facere possit; vel si in eam, quam ipsi maxime sequuntur, conetur invadere; magna habere possit auxilia ex vulgarium philosophorum disciplinis (a).

*Prop. XXVII.* Systema harmoniæ præstabilitæ & incertum est, & gravissimis oppugnatur argumentis.

D. Prima pars. Principio Volfius, quo nemo accuratius in ejus systematis penetralia inquisivit, non habet nisi loco *hypothesis* (b): & *hypotheticam* commentationem suam inscripsit Bilfingerus, & incertitudinis conscius monet in præfatione lectorem Plautinum illud, *optio hæc tua est; utram harum vis conditionem, accipe*. Neque putandum est alio loco a Leibnitio ipso habitum, qui ut erat acerrimi ingenii, ignorare non potuit, quipiam sunt certitudinis characteres. Auctoribus igitur ipsis harmonia præstabilita hypothesis est, non aut per-

ceptum.

(a) Cicero in secunda Tusc.

(b) *Psych. Rationali* sect. 3.

ceptum, aut demonstratum theorema. Nam quæ ejusmodi sunt characteres alios evidentiae & certitudinis præferunt, quibus, literata omni Rep. judice, Leibnitianum systema destituitur.

Deinde, quum communis omnium hominum sensus sit, Animam imperium in corpus habere, in id influere, vi & voluntate moderari, qui ab ea sententia velit desciscere, perspicue debet demonstrare, esse eam aut impossibilem, aut falsam; alioquin ineptus sit oportet, qui a tam vivida & clara conscientia dissentiat: at id non effecere novi systematis conditores: nam *Vvolfius qualitatem tantum occultam* habet; *Bilfingerus incertam*: probabilibus argumentis eam oppugnant: possibiles proferunt causas; unde conscientia illa *influxus* in omnibus hominibus, etiam perspicacibus & attentis, provenire possit. Quæ omnia incertam efficere sententiam illam possunt, quod in reliquis naturæ rebus præstare quam facillimum est, impossibilem, & falsam nondum faciunt. Ex. gr. sic præcipuas rationes subducit Bilfingerus. Nulla intelligi potest in Anima ratio, sufficiens earum corporis motionum, quæ animo tribuuntur: nec ulla in corpore, qua illud possit influere in animam: quum autem sine ratione sufficiente nihil esse aut fieri possit; ne influxus esse ullo modo potest. At tota ea ratiocinatio tantis philosophis indigna est, aut, si quid valet, systema totum Leibnitianum evertit.

2. Capacitas Mentis humanæ aptata non est integris rerum naturis, & causis, nec ex iis, quæ intelligis confeceris, nihil superesse quod ignores. 2. Adæquatam corporis ideam nemo habet, minus etiam Mentis. Nam ex systemate ipso Leibnitiano ea corporis sibi mens repræsentare potest, quæ sunt phænomena, seu motiones & mutationes partium aut ab insita activa vi, aut ab extrinsecis causis manantes, seu simplicium substantiarum & monadum, quibus illud coalescit, effecta; intimas earundem substantiarum essentias nullo modo, aut obscure tantum; confuse, inadæquate. Et Mentis nostræ, præter perceptiones, nihil præterea aliud noscimus, si attente recoluerimus. Conscii

nempe sumus variarum idearum, seu perceptionum rerum aut ad nos, aut ad reliquas universi partes pertinentium; intimam autem animi essentiam omnino ignoramus. 3. Sunt plurima, quæ ad animum pertinere Leibnitiani non inficiantur, neque tamen quisquam est, qui eorum in animo rationem sufficientem intelligere possit. Instar omnium sit sensus doloris & voluptatis. Is enim sensus procul dubio ex mutatione aliqua subjecti, quod eo afficitur, nascitur. Divinent autem nunc Leibnitiani, quo animi, seu monadis illius inextensæ intelligentis motu dolor & voluptas fiat: quæ sit doloris, & voluptatis intensitatis & remissionis in animo ratio sufficiens: quid causæ sit cur a dolore ad voluptatem, & vicissim, ab uno ad alium gradum intensiorem, aut remissiorem, transeat. 4. In corpore eadem ambages: Quæ ratio sufficiens in inextensis monadibus extensionis? quæ soliditatis? actione sese, inquit Vvolsius, repellunt: inde fit ut ne se penetrent: inde extensio simul & soliditas. Sed rogaverim, monadum actio extrinsecus etiam exseritur, necne? si posterius, non in se agent mutuo. Si prius, ecquid ex una in aliam monadem pertransit? nihil? effluvia incorporea, idest monades aliæ, ut sint primigeniæ illæ prægnantes? actio sine ullo subjecto? nescio quid? viderint isti, qui hæc omnia expederint. Si ergo ratiocinatio illa, qua Peripateticos perstringunt, vera est, de toto systemate Leibnitiano actum est. Quod si eam in id tantum urgent, ut incertitudinem vulgaris doctrinæ persuadeant, non repugnabo: sed quando illa incerta, non aperte est falsa, ne hæc quidem præstabilita harmonia perspicua erit & certa.

Præterea Malebranchianum systema impossibile non est, nisi dicere Leibnitiani velint, efficere non posse Deum duas substantias, quarum alteram ex altera moderetur; posse artificem quemlibet duo construere horologia, eaque ita regere, ut alterum alteri consonet. Ne manifesto quidem falsum; quod Vvolsius ipse intellexit, qui argumentorum omnium, quibus illud impetitur, infirmitatem luculenter demonstravit. Quum igitur

tur

tur & hoc possibile sit, nec omnino improbabile, certum habere Leibnitianum nequimus, nisi omnes Logicæ canones temerare velimus.

Secunda pars. 1. In hoc systemate admittuntur phænomena sine ratione sufficiente, quod paucis ostendam. Mens est in continuo fluxu idearum: earum singulæ singulos Mentis status efficiunt; adeoque Mens a statu ad statum perpetuo transit. Quum, ex Leibnitiana doctrina, Mens ipsa suapte natura secundum vim illam intelligendi & agendi primigeniam omnes sibi perceptiones, adeoque status producat; id fieri nequit nisi in antecedente statu posterioris ratio sufficiens contineatur: sunt autem animi quidam status quorum in corpore facilius quam in animo reperieris *rationem sufficientem*, quales sunt status cogitationum inter quas nulla est connexio, quod quilibet ipse per se experiri potest. Sumat quis in manus Lexicum aliquod Linguae alicujus, Catalogum Plantarum, Animantium, aut aliarum rerum, Dictionaria Artium, Scientiarum, Historiarum; intra horam percurrere potest duo millia verborum idearum inter se nullo modo connexarum, plantarum dissimilium, animantium, artium, factorum, hominum illustrium. Quis in omnibus his dixerit rationem posterioris ideæ aut perceptionis contineri in anteriori, & non potius in impressionibus in sensibus aut cerebro factis? Ex. gr. lego hæc verba Aaron; Aristides, Aristippus, Averroes, Busiris, Bucephalus, Binkershoek, Bilsingerus, Codrus, Cæsar, Celenates, Centaurus, David, Delphus, Dido, Dantes &c.: totidem obversantur mentis perceptiones: est autem quisquam adeo ineptus, qui dicat rationem sufficientem notionis Aristidis esse in perceptione Summi Sacerdotis Aaronis, Aristippi notionis in Aristide, Averrois in Aristippo, Binkershoekii in Bucephalo? Lego hæc, Alpha, Aaron, Acanthus, Anchora, Amens, Elephas, Cedrus, Persepolis, Pirus, Alexander Macedo, Homerus, Ficus, Ellipsis, Draco, Lepus, Quadratum, Quercus, Luna, Diagonalis &c. Tunc in his alterius perceptionis in altera rationem sufficientem explicaveris? atque nisi

nisi hæc componant Leibnitiani, sciant neminem esse adeo incogitantem, qui hæc sibi velit persuadere. Sunt, inquit, rationes sufficientes, quas non pervidemus. Scilicet ita ludere cum pueris potuit renatus Pythagoras, ut iis una esset ratio, ipse dixit: at philosophis, ut nova doctrina persuadeatur, rationes saltem probabiles reddendæ sunt, quas illi intelligant & probent. Nempe laborant.

*Quum ventum ad verum est; sensus moresque repugnant.*

*Atque Unanimitas recti sola mater & æqui.*

2. In eo systemate neque sciri potest, utrum quidquam præter mentem existat, neque quæ sint veræ aut inter se, aut cum vita nostra corporea rerum relationes: nam quum mentis perceptiones, seu ideæ ex ipsa Mentis natura profluant, eæ non possunt haberi nisi formæ rerum tantum possibilitium, existentium nullo modo: quo enim argumento persuadere sibi mens potest ideis suis totidem extra se res respondere? Non intuitione: non enim res, sed earum ideas intuetur: non ex causis; quandoquidem ideæ hujusmodi non sunt causæ existentiae aut essentiae rerum: non ex effectibus; quum hujusmodi perceptiones a rebus ipsis non nascantur. Ita tota scientia Poetica erit & Romanensis fabula. Quod si Leibnitius dicat, Mentem esse creatam cum *idea totius Universi*, quæ paulatim se evolvat: quumque certi simus, divinas ideæ rebus esse adamussim conformes, dubitare non posse, & nostras rebus ipsis respondere: tum 1. efficietur rerum *ideas* seu *formas* esse a perceptionibus distinctas, quod non concoquet Volfius fidus ille Leibnitii Achates & interpret. Deinde expedire clarius oportet quæ sint conditiones *ideæ* hujus & *mappæ*, ut vocant, *cosmographicæ*. Tum componere quæ a viris doctissimis adversus innatas hujusmodi ideæ congesta sunt. Præterea explicare & illud, cur in evolvenda ea mappa semper ab iis incipiat mens, quæ sensus tangunt, nec unquam ultra progrediatur? Ex. g. usu oculorum detegitur in ea mappa idea Saturni: cur semel ea patefacta non etiam

etiam cætera quæ in illa Saturni idea continentur, partes, corpora varia, corporum vires, figuræ, relationes, quemadmodum in Telluris idea evenit, sine Telescopio manifestantur? cur sine sensuum usu & experimentis nihil ex ea pateat; cur non omnes æque faciles & habiles in ea explicanda? Jam quum Mappa illa non possit continere nisi *ideas reales*, cur tot fictitiæ nobis obversentur ideæ?

3. Vis, quæ corpus regit, bruta ne est, an rationis particeps? si posterius, erit ea Mens; quum ea vis sit entelechia corporis secundum Leibnitium, erit Mens corporis entelechia, quod isti nolunt. Prius ergo sic oportet. At

*Tempora si, fastosque velis evolvere mundi.*

sanus non videberis, qui ex ea sola vi bruta hominum omnium, gesta, Rerumpublicarum & Regnorum fasta, quibus mundus civilis continetur, nata & ordinata velis. Nempe corpus Alexandri Macedonis, Annibalis, Julii Cæsaris, nulla mentis directione, nulla manu directrice, ipsa insita bruta vi, ejusque fatalibus modificationibus, non secus atque fictiles marmorei, aut argentei Hermæ, aut circulatorum pupæ, ex omnia efficere debuere, quæ in eorum historiis narrantur. Ea etiam effecissent, si postridie ejus diei, qua geniti sunt, earum Mentis in nihilum essent redactæ. Exercuissent sese in artibus omnibus, quibus Resp. bello, domique gubernatur: petiissent magistratus: delectum militum fecissent: agmina disposuissent; parassent commeatus: flumina, maria transissent: prælia infinita iniissent: fœdera aut paces constituissent, Mentibus interim, & Deo otiose inspectantibus (a). Præclara ea quidem, & Dei amplitudine digna: sed vereor ut ulli persuadeat Leibnitius. Bellum est, inquit, sapere cum paucis? At tu etiam solus sapere possis. Nec tamen desipient alii qui recinant.

*Muscam, quæ sit abscondita, eam esse nulli rei.*  
Sed perpendamus hæc paulo pressius accuratiusque. *In hoc*

[a] Vide ut hæc eleganter diducit Baelius dicit, Art. Rorarius Remarque L,

*hoc systemate, inquit Leibnitius (a) corpora agunt, ac si per impossibile nullæ darentur animæ: animæ agunt, ac si corpora nulla darentur: & ambo agunt, ac si unum influeret in alterum. Nempe ob vim illam a Deo iis sub existentia initium inditam, vim primigeniam & substantialem. Ex ea primigenia vi omnes quum animi, tum corporis actiones perquam ordinatissimæ atque harmonicæ fluunt. Videtur Baelio paradoxum, quod omnem humanum captum superet, corpus Julii Cæsaris sola illa vi bruta ea omnia efficere potuisse, quæ in ejus Vita narrantur. Reponit Leibnitius, quum id non sit ἀδυνάτων, in admirationem potius divinæ sapientiæ & potentia nos rapere debet, quam in systematis irritationem. Atque heic Leibnitium volo. Rogo, vis illa primigenia creata est; atque a vi ipsa Dei distincta; an eadem? creata, inquit. Conservatur ne perenni Dei activitate, nec ne? Quis negaverit? Jam earum virium determinationes manant ne a vi illa Dei conservante primigenias substantiarum vires an a viribus ipsis suapte se natura determinantibus? Si prius, id systema Cartesianum est: si posterius oportet in viribus ipsis inesse rationem sufficientem omnium determinationum; nihil enim est sine ratione sufficiente. Agnoscit. Itaque bene habet: processimus. Unum superest. Determinationes corporis Julii Cæsaris sint æquales 2000000. ratio earum omnium sufficiens adæquata ab initio existentia ejus corporis exstitit. necne? si prius, quum axioma sit non cæterorum modo, sed Leibnitianorum quoque perspicuum, posita adæquata ratione sufficiente, poni integrum effectum, omnes illæ 2000000. simul existent, quod systema totum evertit, ut ne quid aliud dicam. Si posterius, efficitur adæquata suapte virium natura, influxu aliarum, an voluntate Dei? posteriora continent Scholasticorum & Cartesianorum systema: ea Leibnitianis falsa. Prius sit ne ratione alia sufficiente, an nulla? videant quo sese proreptent novi isti Philosophi. Respondent, actiones Mentis causas esse*

(a) *In princip. phil. §. 84.*



esse determinantes (a), non phyficas, sed metaphyficas. Nova vocabula, novæ ambages. Metaphyficæ hujusmodi causæ agunt in corpus? an occasiones sunt quibus Deus ipse agat? an neutrum? non difficile est videre, pudoris ergo, ne concederent quidpiam, excogitata.

## C A P. III.

*De idearum natura & origine.*

**A**D rem aggredimur, qua nescio utrum alia sit in philosophia magis implicata & super qua docti tanta sunt in varietate ac dissentione constituti, ut eorum vel molestum sit annumerare sententias. Atque si mihi sæpe contingit, ut non tam facile in mentem venire soleat, quare verum sit aliquid, quam quare falsum; tum in hac re potissimum, in qua quid non sentiam facilius, quam quid sentiam dicere possum. Eius substiti pluries, & caput scalpfi, arrodique unguis, dum me ad ea de re differendum compararem: horrebat animus in avia ingredi. Sed durandum fuit, quia cœperamus; Et veri.

*Amor gemmatas aureus alas*

*Et mihi propositum perfice, dixit, opus.*

Quæ ad historiam hujus quæstionis pertinent in Arte Logico-critica paucis complexi sumus (b). Quædam quoque per summa capita indigitavimus, quæ demonstrant totius rei incertitudinem. Quod superest, systemata eadem pressius, accuratiusque ad examen revocabimus. Initium faciemus ab eorum philosophorum doctrina, quos *plebejos* Cicero vocat, apud nos *sensistæ* audiunt. Nam quamquam ea pervulgata nunc est, nectaque nobilissimos, & disertissimos patronos, tamen nisi superiora theorematum evertantur, vera esse, si quid cerno, non potest. Sed principio de natura idearum pauca.

*Prop.*

[a] Ita Bilfingerus.

[b] Lib. 2. cap. 1.

*Prop. XXVIII.* Mens nequit ipsa sibi esse causa creatrix simplicium idearum.

D. Ideæ sunt formæ rerum seu existentium, seu possibilium (def. 5.), quæ idcirco continent realitatem objectivam earum rerum, quarum sunt exemplaria, si eas sibi Mens creare potest, ante omnes ideas continere debet realitatem objectivam omnium earum rerum, quarum sibi ideas simplices producit, alioquin statueretur effectus sine ratione sufficiente, quod esse nequit (p. part. prop. 7.); at realitates rerum existentium aut possibilium sunt exemplaria, idest ideæ, ut patet: ergo ante omnes ideas debet ideas easdem continere, quæ sunt pugnantia. Neque vero dici potest, res illas, quarum ideas sibi producit *eminenter*, aut *virtualiter* in Mente contineri, nisi etiam dicatur, Mentem humanam esse aut Deum, aut Dei partem, quod falsum (prop. 19.)

*Schol. 1.* Neque alia est causa, cur, qui simplices ideas colorum habere nequeunt, nulla ope colores doceri possint. Sane enim, quod alias dixi (a), non magis potest Mens ideas sibi simplices creare, quam Pictor ignotæ rei expressam imaginem depingere. Sed demus interim posse, quemadmodum (ut idem persequar exemplum) si pictor ignotas in Saturno res depingeret, nullo modo asseverare posset, picturas hujusmodi ad vivum res illas exprimere, aut ullo modo esse illi similes, nisi haberi vellet deridiculus; ita si Mens ignotarum rerum ipsa sibi notiones crearet, incerta semper esset rerum extra se positarum, nec, nisi divinando, de illis differere posset. Ut idcirco pateat, eos, qui hanc opinionem tuentur, omnem e manibus hominum rerum certitudinem & scientiam præripere, illis commenticiam tantum & poeticam cognitionem concedere.

*Prop. XXIX.* Si ideæ & perceptiones sunt una eademque res, duorum alterum sit necesse est, aut Mentem esse subiectum mere passivum omnium suarum cogita-

[a] Vide *Art. logicocrit. lib. 2. cap. 1. & epistol. ad Cl. Continuum.*

gitationum, quemadmodum cera figurarum, aut eam omnes sibi rerum ideas creare.

D. Nam aut ideas excipit; aut non. Si primum, quum illæ (ex hypothesi) sint una eademque res cum perceptionibus, adeoque cogitationibus omnibus, omnes quoque cogitationes excipiet, ut sint illæ, *quod figura in cera*, quemadmodum loquitur Cartesius. Si alterum, quum eæ nequeant esse sine causa, eaque non alia nisi ipsa Mens, erit ea sibi idearum suarum causa creatrix.

*Prop. XXX.* Ideæ & perceptiones non videntur esse posse una eademque res.

D. Sint: duorum alterum sequetur, aut mentem esse subjectum mere passivum suarum cogitationum: aut eam omnes sibi ideas creare (*prop. super.*). At si primum dicatur. Mens nec vivens erit (*def. 10.*), nec magis Mens, quam later crudus: quum sit non principium activum, sed iners subjectum operationum alterius principii activi: quæ sunt absurda. Posterius minus etiam dici potest (*ex prop. 28.*); non ergo perceptiones & ideæ videntur esse posse una eademque res.

*Schol.* Acerrime super ea re disceptatum est inter viros doctos Malebranchium & Arnaldum. Malebranchius ideas omnes & a perceptionibus distinguit, & velut imagines, exemplaria, *entia representativa* habet, non quidem in Mente ingenita; sed illi a Deo in sui idea & lumine participata. Adversus eam doctrinam librum inscripsit Arnaldus *de veris & falsis ideis gallice*, Coloniae ann. 1683. 8. Geometrica methodo eam propositionem, *ideas a perceptionibus nullo alio modo distinguere*, nisi duobus respectibus, ut, quæ est perceptio relata ad Mentem, sit idea relata ad objecta, demonstraturum se confidenter pronunciat. Rem totam tredecim definitionibus, axiomatibus octo, postulatis septem, quinque demonstrationibus conficit. At ea argumenta mihi semper non digna tanto viro visa sunt. Primum & secundum in eo sunt posita, ut ostendat, Malebranchium petere, ut scholæ inquirunt, principium, atque

atque obscura præstitueret & incerta, dum ponit velut suæ doctrinæ fundamentum, *neminem posse percipere objecta externa in seipsis*. At nihil est clarius veriusque. Enim vero quum perceptiones sint & *immanentes* & *essentiales* Menti, quod ne ipse refragatur Arnaldus, necesse est in *seipso* percipere quæ percipit, nec potest in *seipsis* objecta alia cognoscere, nisi si aut illa in Mente contineantur *formaliter*, aut Mens ipsa rebus omnibus intime sit præsens. Quæ ambo quum ne Arnaldus quidem dixerit, conficitur in *seipso* Mentem intelligere cuncta. Qui autem id possit nisi expressas earum rerum aut sibi ipsa producit imagines, aut ab altero excipiat? Et sibi producere ignotarum rerum imagines nemo sobrius docuerit; quod si excipit, nequeunt illæ esse perceptiones, quin Mens omnis evertatur, ut demonstratum est. Nec obscura ergo hæc est Malebranchiana doctrina, neque logo-machia, neque *principii petitio*, quod Arnaldus contendit demonstratione illa prima & secunda.

Sed regerit Arnaldus (a): Mentem nostram. plura externa objecta, etiam distantissima, Lunam, Solem, Stellæ fixas, percipere, est in compertis; quoniam autem *argumentum ab actu ad potentiam concludit necessario*; consequitur Mentem esse præditam facultate intelligendi etiam externa & distantissima, quin exemplaribus Malebranchianis indigeat. Nihil pejus conclusum ex certis principiis unquam vidi. Rogo, perceptiones hujusmodi Arnaldinæ Lunæ, Solis, Fixarum complectuntur *realitatem* eorum corporum *objectivam*? Fatetur ultro. Sunt ergo idæ. At eæ perceptiones e natura ipsa Mentis, seu facultate intelligendi manant; Mens ergo suas sibi omnes ut perceptiones, ita idæ producit. Bene habet. Sed reddenda nunc est Arnaldo *ratio sufficiens realitatis objectivæ* perceptionum. Erit ea ne in agitationibus cerebri, quæ actione externorum corporum sunt? at quum Mens iis affici nequeat, ea ratio est nihili; idest nulla. Erit Deus? Non placet Arnaldo. Erit ipsa intelligendi facultas? At quum ea nulli objecto de-

[a] In libro cit. pag. 66. & seqq.

determinata sit, poterit etiam sibi producere ideas earum rerum, quæ sunt in globis circum Solem a nobis distantissimis, aut circum Fixas, si quidem sunt ulli, quod Astronomis recentioribus juxta ac veteribus Philosophis placuit. Infinitæ sunt hujusmodi conclusiones, quas adversus Arnaldum urgere possum.

Jam tertia ejus demonstratio prioribus nihil addit novi. Obscuritatis tantum & ambiguitatis Malebranchium reprehendit; recte nec ne nostra non interest, qui non Malebranchianum systema defendendum suscepimus, sed quod nobis videtur *verum*. Quarta autem est ejusmodi *lis*, inquit, qui ratione duce philosophantur, *entitates quædam philosophicæ, obscuræ eæ, & commentitiæ, eam in rem inductæ, ut systemati suscinendo infererentur, suspectæ esse debent, maxime quum nec necessariæ sint, & nullius usus: tales autem sunt ideæ a perceptionibus distinctæ*. Nam, pergit, quum Deus Mentem corpori junxerit tot circumdato diversis rebus vitæ ducendæ necessariis, non est simile vero, noluisse illi dare facultatem eas cognoscendi, & quidem via simpliciori & breviori; ea autem via est ut cognoscat sine ope idearum hujusmodi a perceptionibus distinctarum. Quali vero simplicior via sit Arnaldina hæc, non alia quæcunque, etiam nobis ignota! Interim vim argumenti frustra perquirō. Facultatem cognoscendi datam animæ nemo negaverit. Sed ea posita, oportuit ut id explicaret Arnaldus, qui sine ideis externa possit Mens percipere, nisi ipsa sibi vi prorsus creatrice rerum objectivas realitates effigiando. Quum itaque id non videatur alia via perfici posse, nisi ope idearum; apparet & necessarias eas esse, & rejici non posse, quin simul tota Menti negetur rerum cognitio. Cætera Arnaldi argumenta minus etiam facienda sunt, quam superiora: quocirca iis expendendis non puto operæ esse pretium imminuari.

*Prop. XXXI.* Nihil potest mens intelligere nisi in seipsa.

D. Perceptiones sunt actiones Mentis immanentes (prop. 16.); adeoque menti insitæ (ibid.); esse igitur nequeunt nisi in Mente. Præterea si mens extra percipit,

id vel effluxione fit, vel non. Primum naturæ animi adversatur: posterius verbum est *nibili*.

*Schol.* Miror Isaacum Newtonum præstantissimæ illum mentis philosophum, talia super ea re, per transfennam licet, scripsisse, ex quibus colligatur, in ea illum fuisse opinione, Mentem in cerebro præsidere, atque in eo, in suo scilicet sensorio, rerum imagines cernere. Quid enim hoc est, Mentem in cerebro ut in suo penu & sensorio rerum imagines cernere? Est ex cerebro in se attrahere, ut in se cernat? an perceptiones suas extra se, suamque essentiam exserere? Ex cerebro nihil nisi corporeum transire potest: & perceptiones nisi in animo esse nullibi possunt. Præterquam quod intolerabile est, asserere Mentem in cerebro quasi depictas rerum imagines intueri, cerebrum vero ipsum nullo modo: quasi quisquam possit pictas in tela figuras videre, nec videre telam ipsam figurarum subjectum. Ad hæc, qui in cerebro colores potest Mens cernere, quo solares radii, in quibus colores insunt, aut quibus depinguntur, non pertingunt? radii enim luminis in retina consistunt, nec ex iis nisi motus cerebro communicatur, qui solus colores pingere nêquit. An pertingit etiam ad oculos Mens? cur non etiam ad aures, gustum, odoratum? Quod si hoc, ad pedes quoque: ita forma erit corporis informans, quod recentes isti philosophi renuunt.

## PERIPATETICORUM OPINIO.

### Super origine idearum.

*Prop. XXXII.* **Q**uod spectat ad originem idearum. 1. nec sibi convenit Peripateticis. 2. & quæ fertur vulgaris in scholis opinio incerta est, atque non levibus objectionibus obnoxia.

D. Prima pars. Nam Arabes quidam & Mauri censent *habere mentem apud se rerum species*, quæ a rebus extrinsecis excitentur tantum (a), non etiam progignan-

(a) *Picus tom. 1. pag. 50.*

gnantur : & Albertus Magnus non negat species Met<sup>ti</sup> congenitas , licet iis aut nunquam , aut raro uti , dum in corpore est , doceat [ a ] : Avicenna vero posuit omnium rerum sensibiliam intelligibiles species . . . præ-existere immaterialiter in Intellectibus separatis ; a quorum primo derivantur hujusmodi species in sequentem & sic de aliis usque ad ultimum intellectum separatum , quem nominat intellectum agentem , a quo , ut ipse dicit , effluunt species intelligibiles in animas nostras , & formæ sensibiles in materiam corporalem ( b ). At B. Thomas superiora quidem refellit , sed docet tamen aperte , nos omnia cognoscere in rationibus æternis , quæ sunt in Deo [ c ]. Sed quum cognoscere quidquam in aliquo cum duabus notionibus accipi possit , una ut A cognoscatur in B tanquam in objecto cognito , qua ratione , inquit , videntur imagines in speculo ; altera ut A cognoscatur in B tanquam in principio , quemadmodum in lumine Solis colores ; priori modo Beatos omnia intelligere docet , quippe qui & Deum & in Deo cætera vident , posteriori nos , quod scilicet lumen intellectus humani sit participatio quædam æterni Dei luminis , in quo continentur rationes istæ æternæ . Eam vero doctrinam ex Augustino accepit . At quum Augustinus rationes hujusmodi æternas substituerit ideis Platonis ; quod eodem in loco agnoscit vir acutus , haberi eæ possunt pro ideis menti a Deo participatis ; ut non alia sit idearum origo & natura . Interim is systemati suo non fuit consentaneus , dum deinde docuit , & cogitationem intellectivam haberi a rebus sensibilibus ope intellectus agentis [ d ] , & impossibile esse , Intellectum nostrum secundum præsentis vitæ statum , quo passibili corpori conjungitur , aliquid intelligere in actu , nisi convertendo se ad phantasmata ( e ) , & quæ sunt his similia plurima . Jam reliquum scholasticorum vulgus sensum esse idearum omnium scaturiginem non dubitant . Nihil illo tritius in

K 2

fcho

[ a ] Idem ibid. pag. 42.

( b ) B. Thom. pr. part. qu. 84. art. 4. in corp.

( c ) Pr. part. q. 84. art. 5.

( d ) Ibid. art. 6. ( e ) Ibid. art. 7.

scholis, *nihil esse in intellectu, quod ullo modo non fuerit in sensibus*. Nec tamen hæc ita dicunt, quasi ideæ sint *defluxiones & idola rerum*, quæ per sensus, velut per canales Mentem subeunt; sed ita ut motionibus sensuum creentur in cerebro *phantasmata*, quas illi *species impressas* vocant: ex iis vero ope *intellectus agentis* species emergant *expressæ & intelligibiles*, quæ sint immediatum *intellectus passivi* objectum. Nam duos intellectus schola omnis peripatetica posuit *Agentem*, & *Passivum*, quem passim quoque *passibilem* vocant. Et ille quidem est, *quo facere omnia intelligibilia, hic quo fieri omnia intellecta*: sic enim illi loqui amant. Sed nec in natura, nec in muneribus intellectus agentis explicandis sibi convenit Peripateticis. Arabibus plerisque intellectus Agens est substantia intelligens ab Anima humana distincta; unus etiam est in omnibus hominibus; quibusdam Deus ipse, quod & Zabarellæ placuit (a) e Scholasticis, & Cajetano, non Alexandro tantum Aphrodiseo (b), & non paucis Arabibus.

Dissentiunt Arabes alii: hi animam ex duabus partibus constare arbitrantur a se invicem realiter distinctis, velut ex *materia*, & *forma*; & velut materiam esse *intellectum passivum*, formam *agentem* (c); qua de re superius dictum. Nostri scholæ Philosophis vis est & facultas, atque virtus Animæ unius & ejusdem, cujus sit & intellectus passivus, nec a passivo distinguitur tanquam substantia a substantia, sed tanquam ejusdem substantiæ facultas a facultate, virtus a virtute (d), *realiter* quidem, si Thomistas audias, *formaliter* si Scotistas, *ratione* si alios (e).

Præterea quæ intellectus agentis munera, controversum. Nam sunt qui opinatur intellectum agentem in sola phantasmata vim suam exserere, nec ullo modo in  
passi-

[a] De Mente humana cap. 9. & 10.

[b] Libro primo de Anima.

[c] Zimara theorem. 41., & in XII. Metaph. textu 17.

[d] B.Th. p. p. q. 79. art. 4. & Scotus in Quodlibetis q. 15.

[e] Piccolomineus lib. 1. de humana Mente cap. 12. alii-  
que qui ea super re se mutuo defendunt aut accusant.



*passivum* agere. Scilicet *phantasmata illuminat, facitque intelligibilia actu*. Ea Joannis Bacchoni sententia est (a); quinque eodem ferme modo loquatur sæpe S. Thomas, factum est, ut eandem illi opinionem tribuerit Zabarella. Sed adversantur Thomistæ ferme omnes, qui ex Thomæ sententia duplicem activitatem intellectui huic agenti tribuunt, scilicet & ut illuminet phantasmata, & ut inde expressas intelligibiles species imprimat *passivo* (b). At qui Aphrodisæum Alexandrum nobilem illum & veterem Aristotelicæ doctrinæ interpretem, sectantur, contendunt Intellectum agentem non illuminare tantum phantasmata, sed imprimere illis spirituales quamdam formas & species, qua intelligi possint, quod & probat Zabarella Alexandri alias admirator. Scotus vero loco superius citato acutissime super ea red disputat, & copiose, docetque, munus intellectus agentis esse duplex, *abstrahere e phantasmatibus species intelligibiles, & producere active actum intelligendi*. Hæc Schola super origine idearum, varia, & obscura, ut cetera: quæquæ idcirco narrasse refutasse est.

Secunda: Ea opinio supponit influxum physicum aut ex utraque parte, aut ex alterutra: at ea doctrina incerta est, & difficultatibus implicite gravissimis (prop. 21.); incerta ergo hæc & implicita.

Præterea intellectus agens Scholasticorum vulgo Mentis est aut pars, aut virtus: paucis Deus (ex priori parte). Quum Mens nihil possit intelligere nisi in se ipsa (prop. 31.) si intellectus agens ejus est aut pars, aut virtus, superest scholæ explicanda ratio & via, qua is, idest Mens ipsa, quatenus agit, & intelligit phantasmata, a sensibus & cerebro accipiat, & *intellectui passivo*, idest sibi ipsi Mens ipsa quali receptrix, offerat: quod quum nec fecerint scholæ philosophi, nec fieri posse videatur, nisi alter intellectus agens adhibeatur, obscura & incerta prædicant. Quod si Deus est

K 3

(quod

[a] In prol. primi sent. q. 2. art. 2. &amp; 3.

[b] Vide, si tantum abs rebus seriis tibi otii est, Javellum in 3. de Anima, tract. de intel. agente.

( quod meliore consilio alii opinantur ) res eo redibit, Deum phantasmata corporea illuminare, atque Menti humanæ offerre, ut non aliunde nascantur ideæ, nisi a Deo, qui illas in mente producat ad occasionem motionum corporearum; quæ sententia & a ceteris scholæ dogmatibus aliena est, &, ut inferius sumus demonstraturi, incerta ipsa.

Ad hæc, quum vulgata sit scholarum doctrina, *nihil reducitur in actum, nisi per ens actu*, & ne intellectus agens quidem sit semper in actu, ut iidem philosophi arbitrantur; a qua is causa *in actum* deducetur? a phantasmatibus? a Deo? a seipso? Primum fieri nequit nisi per *influxum physicum*, qui hucusque *qualitas est occulta*. Postremum cum priori illo axioma pugnât: medium systema invehit causarum occasionalium; tum *intellectus agentis* inutilitatem facit: quando enim ad Deum ventum est, is munera intellectus agentis præstare potest, quin hæc ignota hominibus qualitas obtrudatur.

## DEMOCRITICORUM SYSTEMA.

**J**Am super origine idearum Democritus, si quidem ejus viri mentes tenemus, hæc commentus est.

A rebus ipsis undequaque leves quasdam & corporeas facies, quas ille idola vocat, avolare, quasi summa abrasas industria, credidit. Hæc dum cerebrum subeunt, ideæ sunt, cogitationum nostrarum omnium materies (a). Eadem docuit Epicurus, fieri scilicet cogitationem, ut visionem, per *simulacra incurrentia*. Nempe quemadmodum Leonem videmus, dum illius imago allabitur Menti, ita reliqua. Quod si cogitemus Centauros, Scyllas, ac ejusmodi alia, quæ neque sunt, neque unquam fuerunt, contingere id posse docent, non tam ob formata sponte simulacra, quam ex eo, quod quum hominis & equi; v. g., simulacra sibi obvia fiunt, facile propter tenuitatem junguntur, in-

que  
(a) *Plutarch. de placit. lib. 4. cap. 8. & Cicero de Finib. lib. 1. cap. 6.*

que unum exinde conformantur, quale Centauro tribuitur. Sed audiamus hæc ex Lucretio, qui egregie ea enarrat & illustrat (b).

*Nunc age, quæ moveant animum res, accipe, & unde  
Quæ veniunt, veniant in Mentem, percipe paucis.  
Principio hoc dico, rerum simulacra vagari  
Multa modis multis in cunctas undique parteis  
Tenuia, quæ facile inter se jungantur in aureis,  
Obvia quum veniunt, ut aranea, bractæque auri,  
Quippe etenim multo magis hæc sunt tenuia textu,  
Quam quæ percutiunt oculos, visumque lacessunt,  
Corporis hæc quoniam penetrant per rara, cientesque,  
Tenuem animi naturam intus, sensumque lacessant;  
Centauros itaque & Scyllarum membra videmus  
Cerbereasque canum facies, simulacraque eorum,  
Quorum morte obita tellus amplectitur ossa:  
Omne genus quoniam passim simulacra feruntur,  
Partim sponte sua quæ fiunt aere in ipso  
Partim quæ variis ab rebus cumque recedunt,  
Et quæ consistunt ex horum facta figuris.*

Pergit deinde, atque horum simulacrorum ope præcipua cogitationum phænomena explicare conatur.

*Prop. XXXIII.* Democriticorum opinio, 1. pugnat cum rerum corporearum natura. 2. cum certis animi phænomenis; 3. nec ullo modo originem idearum intellectualium expedit.

D. Prima pars. Principio, simulacra illa facies sunt rerum corporeæ, an imagines in aere, vel lumine insculptæ, an nescio quid? Primum si est, jamdudum oportuit corpora solida fuisse in nihilum redacta, tot abrasis superficiebus. Alterum is dicere potest, cui natura corporum diffluentium, minime imaginum tenax, ignota fuerit. In postremum Lucretianum illud ipsum quadrat,

*Deinde adopinamur de signis maxima parvis,*

*Ac nos in fraudem induimus, frustramur & ipsi.*

Deinde an ulli verisimile erit,

*. . . . rerum simulacra vagari.*

*Multa modis multis in cunctas undique parteis.*

K 4

•quin

[a] Lib. 4. de nat. rerum v. 726.

quin alia aliis corrumpantur, aut deformantur? præsertim in tanta corporum plerumque distantia, in qua non possunt non cum infinitis aliis perpetuo colluctari.

Secunda pars. Egregium ipse suppeditat argumentum Lucretius, nec, nisi deridiculis rationibus, explicare atque refellere conatur.

*Quæritur in primis, quare, quod quoique libido  
Venerit; extemplo mens cogitet ejus idipsum.*

*Anne voluntatem nostram simulacra tuentur?*

*Et simul ac volumus nobis occurrit imago.*

*Si mare, si terram cordi est; si denique cælum,  
Conventus hominum, pompam, convivia, pugnas,  
Omnia sub verbo ne creat natura, paratque?*

*Quum præsertim aliis eadem in regione, locoque  
Longe dissimileis animus res cogitet omnis?*

*Quid porro in numerum procedere quam simulacro  
Cernimus in somnis, & mollia membra movere,  
Mollia mobiliter cum alternis brachia mittunt?*

*Scilicet arte madent simulacra, & docta vagantur  
Nocturno fasere ut possint in tempore ludos?*

Præterea quæ esse possunt simulacra rerum abstractarum? Ex. gr. demonstrationes Geometriæ puræ constant omnes ideis abstractis: eas tu ideas simulacra diceres circumvolitantia? Qui porro longas ratiocinationum series hujusmodi simulacris explicabit Lucretius? trecenta sunt alia animi nostri, seu cogitationum phenomena, quæ nullo modo Democritici idolis suis expediverint.

Tertia pars. Animus substantia est incorporea [prop. 12.], nec quidquam intelligit nisi in seipso [prop. 31.]: quum vero non intelligat nisi simulacra [ex hypoth.] necesse est hæc animum penetrare, adeoque corpus physice influere in animum, quod intelligi nullo modo potest [Prop. 21.]. A.

A. Sch. Scio Democriticos animum facere corporeum, atque ex ea doctrina de origine idearum consentanea principiis suis disputare; sed quando principia illa falsa esse ostendimus, perstat integra nostra adversus eam idearum naturam & originem ratiocinatio. Quamquam

ne

ne. si animus corporeus est, doctrina illa simulacrorum consistere potest. Enimvero aut animus est tenuis quædam substantia corporea toto corpore fusa; aut vis ista Dicæarchi. Si primum, ut simulacra intelligat, debet illa in se excipere; quumque illa sint corporea, penetrari cum illis oportet, quod esse nequit. Si alterum simulacra ipsa illabentia in sensus & cerebrum dum agitantur, & miscentur, aut intexuntur, erunt perceptiones, judicia, ratiocinia, quod idem cum vero pugnat. Nullo modo igitur hæc Democriticorum doctrina probabilis esse potest.

## SYSTEMA LOCKIANUM.

JOannes Lockius nobilis ille Anglus philosophus insignem sibi peperit existimationem ac dignitatem opere edito *de intellectu humano*. In duobus primis ejus operis libris id unum sibi proposuit demonstrandum, omnes ideas a sensibus atque meditatione & conjectura proficisci, nihil opus esse ideis ingenitis, esse quinimmo eas fanaticorum hominum commenta. Is primum ideam definit quidquid objectum est intellectus, dum cogitat, quodque phantasma, notionem, speciem vocant (a): & alibi, quidquid mens in seipsa percipit, omnis perceptio, quæ in mente est, dum cogitat (b). Atque passim ita scribit, ut non videatur ideas a perceptionibus distinguere, nisi relatione, in quo Arnaldo consentit. Quumque ei, quod alibi dictum est, anima sit corporis vis & entelechia, & ideæ sunt motiones sensuum & cerebri: eadem, si sibi esse velit consentaneus, erunt & perceptiones. Itaque Mens, quæcumque ea sit, partim actione sensuum, partim & ipsa sua agitatione, & meditatione omnes sibi comparat ideas, de natura animi, & idearum non hoc in loco cum Lockio concertabimus: id enim superius præstitimus: tantum opinionem hanc hodie in Scholis Europeis vulgarem super origine idearum accuratius perpendemus: idque tanto  
atten-

(a) *Avant. propos. §. 8.*

(b) *Lib. 2. cap. 8. §. 8.*

attentius faciemus, quanto est ea hodie provectior, & gravior.

*Prop. XXXIV.* Vulgaris opinio, primas ideas esse a sensu, quorum deinde ope Mens conjectura & ratiocinio alias sibi creat. 1. conscientiæ & phænomenis naturæ humanæ conformis esse videtur. 2. sed non videtur esse posse vera, nisi aut posito *influxu physico*, aut ea animi natura statuta, quam Dicæarchus, & Hobbes esse contendunt: 3. ex quo sequitur, ut sit incerta.

D. Prima pars. Principio tam vivide & clare percipimus res corporeas ope sensuum percipere, ut facilius cuiquam persuaseris, nihil esse omnino incorporeum, quam nihil oculis videre, tactu tangere, auribus audire. Dicere vero hanc sensuum evidentiam esse omnem fallacem, est, inquit homines ad Pyrrhonis furorem adigere. Quod si quid valet evidentia sensuum, in eo certe est maxima, nos primas nostras ideas eorum ope habere. Eadem quoque evidentia conscii sumus, nos ope primarum huiusmodi idearum alias conformare compositas, aut detegere connexas; vel ex iis conficere abstractas. 2. Nullas earum rerum ideas claras & distinctas conficere unquam possumus, quæ a sensibus nostris omnino sunt remotæ, quum quæ res sensibus subjectæ sunt, clare ut plurimum & distincte percipiantur. 3. Majorem semper idearum numerum habent, qui magis cum sensibus versantur, minorem qui minus. 4. Qui aliquo sensu carent objecta ejus sensus propria ignorant, nec ulla arte ea doceri possunt. 5. Instrumentis quibusdam, quibus sensus acuuntur, novæ acquirimus ideas, quibus perpetuo caruissemus, illis non adhibitis. 6. Pro perfectione majore, aut minore sensuum, res corporeas magis aut minus distincte cognoscimus, quod non esset, si nihil sensus ad animum deferrent. 7. Prout obtunduntur sensus, ita rerum ad eos sensus pertinentium imminuitur cognitio, quod in sensibus contingit, dum oculis, & auribus laborant, quod esse nequiret. si ab iis earum rerum cognitio nullo modo penderet. 8. Intelligi non posset, cui

cui usui sensus homini dati essent, si externarum rerum nihil illi ad animum deferunt. 9. Ut cætera omittam, sola Optica abunde demonstrat, nos non alia via colorum & figurarum ideas habere, præterquam oculorum: structura enim oculi in id tota conformata est, ut visio externorum perficiatur: idem demonstrat structura aurium quod ad sonos, aliorumque, quod ad alia sui objecta. Trecenta huiusmodi consarcinari possent phænomena, ex quibus totidem hauriantur argumenta, ad probandum, nos & primas ideas a sensibus habere, & externa non nisi sensuum ope percipere, & cæteras nostras ideas inde aut *consociatione*, aut *abstractione*, aut antecedentium, connexorum, & consequentium conjectura, & ratiocinio nobis comparare. Lockiana igitur hæc opinio, quæ & olim vulgaris fuit in Scholis Peripateticorum & Epicureorum, & nunc est tota in Europa, & intima conscientia nititur, & evidentia sensuum confirmatur, & est naturæ humanæ phænomenis conformis.

Secunda pars. Quum nihil mens nisi in se percipiat [prop. 31.] si ideæ proveniant a sensu, percipi nequeunt nisi in mentem ipsam pervadant: id vero fieri nequit, nisi aut posito *influxu physico*, aut ea animi natura statuta, quam Dicæarchus & Hobbes esse contendunt, ut patet.

Tertia pars. Si ideæ proveniunt a sensu percipi nequeunt, nisi aut *influxu physico*, aut ea animi natura statuta, qualem Dicæarchus & Hobbes ponunt [ex huius 2. part.]: posterius esse nequit [prop. 9.]: prius falsum, ne quid majus dicam [prop. 21.]; & hoc igitur ad minus incertum.

*Schol.* Ea quum sint, nemo non videt, non posse huiusmodi opinionem teneri, nisi simul mentis incorporalitas evertatur. Materialistarum igitur propria ea doctrina esse potest, quippe quæ est cum suis principiis consentanea. Nec mirum est eam tantopere Lockio placuisse, nisi ei, qui ignoret Lockium in natura animi Dicæarcho consentire. At scholasticos remis, ut inquirunt, velisque eam opinionem promovisse, incorpor-

poralitatē animorum alioquin tenaces, id certe mirum esse posset, nisi compertum esset, raro scholæ philosophos principiis suis accommodatē philosophatos esse. Quid? inquit, aliquis, & conscientiæ, & sensuum evidentiam vale dicemus? Omnino, nisi animi incorporalitati vale dicere velimus. Durum est, inquit, adversus evidentiam sensus philosophari. Durum proculdubio, ubi ulla argumenta eam evidentiam in dubium revocent. Nunc vero, quando hæc cum manifesta mentis nostræ natura non consentiunt, suspecta sint oportet. Nec in hac re primum discimus, quam parum tuta sit sensus & phantasie evidentia, ubi nullis rationis adminiculis fulciatur. Nam certe ea decipit turpissime majores nostros in Optica, in qualitatibus sensiferis, aliisque innumeris. Cui accedit, quod quum ideæ esse non possint nisi formæ rerum, quas referunt; qui dicit ideæ a sensibus provenire, is dicit etiam motiones in sensibus & cerebro factas (nihil enim aliud ab objectis externis excipiunt sensus), esse ejusmodi formas. At quis serio dixerit in his motionibus formas contineri rebus, unde proveniunt, similes? Quod si dicatur, non motiones istas formas esse & ideæ, sed causas idearum efficientes, id magis etiam improbabile est: causa enim efficiens continere debet rationem sufficientem essentia: sui effectus: quum autem essentia: idea sit posita in eo, ut sit forma continens realitatem objectivam rei, cujus est idea; motiones illæ continere debent rationem sufficientem ejus objectivæ realitatis; quis vero dixerit id in puris motionibus, idest mutatione figuræ, situs, loci, partium sensuum & cerebri, contineri? excitatur, inquit, ab iis motionibus Mens, eoque sibi ipsa ideæ conficit. Primum, videtis ne vocabulum hoc *excitari*, si nullus est inter mentem & corpus influxus physicus, vocabulum sit *nihili*. Deinde rogo, dum excitatur mens, pertransit ne aliquid ex corpore in illam, necne? si primum profecto corporeum: quid enim aliud? nisi iterum in scenam *intellectum agentem* producere velis. At qui id fieri potest, salva animi incorporalitate? si nihil, ne excitatur quidem: ipsa



ipſa ſibi rerum ideas, quas ignorat, divinando procreabit. Qua ex re & illud patet, quam obſcura & pugnancia ii loquuntur, qui dicunt, poſitis motionibus cerebri ab objectis externis, Mentem ipſam ſibi rerum ideas procreare, ſeu eas percipere, in qua opinione eſt Arnaldus. Id enim eſt *effectus* ponere ſine ulla *ratione ſufficiente*.

## SYSTEMA MALEBRANCHIANUM.

**F**ranciſcus Nicolaus Malebranchius in tertio libro eorum, quos de inquirenda veritate præſcripſit, ad ſex ſumma capita referri poſſe obſervavit quæcumque ſuper origine idearum ſcripta ſunt. 1. Ut Mens in ſeiſſa omnes perfectiones rerum, quæ cognosci poſſunt, vel formaliter, vel eminenter contineat. 2. Ut ſimulacra rebus externis ſimilia ab iis manent, atque per ſenſus mentem penetrent. 3. Ut Mens polleat virtute ſibi ideas producendæ, quæ respondeant motionibus corporeis. 4. Ut Deus ſub initium exiſtentiaæ cuiuſque animæ rerum omnium, aut ſaltem earum, quas perceptura ſit, ideas in eis inſculperit. 5. Ut ex occasione motionum corporearum perenniter illas in nobis Deus creet. 6. Ut tandem uniatur Deo ipſi, in quo omnia videre poſſit. Variis de cauſis priores quinque ſententias reſellit. Primam quidem ut manifeſto falſam: alteram, utpote quæ nec intelligi poſſit, & maximè difficultibus ſit implicita; qua de re ſuperius actum à nobis. Tertiam tanquam quæ Mentem Deo exæquet virtute illa idearum creatrice. Quartam cum finita animæ natura pugnare contendit, ut in eo infinita huiuſmodi *entia repræſentativa* contineantur. Quintam indignam Deo cenſet, qui non longiori & difficiliori, ſed breviori, & faciliiori ſemper operatur. Superreſt ſexta, ut ſcilicet omnia in Deo videamus.

Atque ut hæc confirmet animadvertit, eſſe in Deo mundum intelligibilem, in quo rationes omnium & notiones contineantur, &, ut Seneca loquitur, formæ quibus Deus eſt plenus, quaſque ideas appellat Plato.

Quo-

Quocirca, si mens *uoi* cum Deo uniatur, fieri nequit, quin in illo videat, quæcumque intelligit. Conjunctam autem esse Mentem cum Deo, & quidem arctius, quam cum corpore, non est, quod dubitare possimus: nam quum Deus sit infinita *extensio spiritualis*, non potest non esse spirituum locus, quemadmodum spatium locus est corporum: ita arctius Mentes Deo immenso, quum corpora spatio copulantur. Præterea unio Mentis & corporis neque Menti *essentialis* est, neque corpori: sed *essentialis* est unio Mentis cum Deo; cujus rei argumentum est, quod si priorem unionem recidas, nihil Menti detrahes: at non potest posterior abrumpi, quin Mens in nihilum redigatur. Tum vocat in subsidium divinos Scriptores. David, qui docet hominem scientiam (a). Paulus prædicat, Deus non longe est ab unoquoque nostrum: in ipso vivimus, movemur, & sumus (b): Jacobus: Deus est Pater luminum (c); qui manifestat Philosophis, quæ illi sciunt (d): qui est lux vera, quæ illuminat omnem hominem venientem in hunc mundum (e). Passim quoque Augustini auctoritate opinionem suam fulcit. Sane Augustinus in toto libro de Magistro conatur demonstrare, hominem nihil sensibus discere posse, nec ulla alia via, sed a Deo, qui intus in corde loquitur, erudiri: adeoque verum illud esse Scripturæ, unus est magister vester, qui in cælis est (f). Quem librum ille quum retractasset (g), tantum abest, ut de sententia animum dimoverit, ut confirmaverit potius. Sed & in aliis libris idem docet. In primo Soliloquiorum, Deus intelligibilis lux, QUO, & a quo, & per quem intelligibiliter lucent omnia. Repetit idem sæpe in libris de Trinitate, & in Confessionibus (h).

Si quis autem eam opinionem e Platonis schola originem

(a) Psalm. 3. v. 10. (b) Act. xvii. v. 28.

(c) Cap. 1. v. 17. (d) Ad Rom. 1. v. 19.

(e) Joan. 1. v. 9. (f) Matth. xxiii. v. 10.

(g) Lib. 1. Retract. cap. 12.

(h) De Trinitat. lib. xiv. cap. 3. & alibi Lib. x. Confession. cap. 26.

ginem cœpisse dicat, haud plane erraverit. Enimvero Jamblicus licet mundum noeticum & archetypum animis humanis participari a Deo asserat, in eoque intelligi a nobis cuncta; passim tamen edisserit lumen quoddam intelligibile, quod sit Deus, & in quo omnia cognoscamus. Etenim, inquit, si unquam aliqua re & modo potentes esse videamur ad agendum, hoc solo potentes efficiamur, quantum participando, & radios hauriendo divinitus, divina actione perfruimur (a): item, veritatem spectare mundum intelligibilem, eamque mentem tum clare pervidere, cum melioribus se copulaverit, naturæ scilicet divinae. (b) At in Segm. primo cap. 9. sic diserte scribit. Perstat in sese erectum & stabile lumen divinum, & tamen omnia penetrat, percurrit omnia, a seipso autem nunquam excurrit. Permeat universum, cernitur omnibus locis, omnibus partibus mundi. Eo lumine non creati ideas, sed tantum in mundo intelligibili existentes detegi, secundum Platonem docet (c): nempe rerum ideæ his æternæ sunt omnes, & subsistentes.

Jam Plotinus prolixè de unione Mentis cum Deo differit [d]. Inter cetera, quæ eo in loco dicit, est, *Mentem in contemplando ENTE* (ον, quo nomine Deum vocabant Platonici) totam esse occupatam. Etiam illud addit, *Ens eo ipso, quod intelligitur a Mente, dare illi & INTELLIGERE, & ESSE*. Quæ Chaldaicæ philosophiæ valde sunt similia. Noluerim tamen affirmare nihil esse in Malebranchii, quod veteres isti non opinati fuerint; similia tantum dico. Nam ceteroquin si indulgere phantasie velimus, Homerum ipsum systematis Malebranchiani primum conditorem dicere possumus, quippe cujus extat insignis locus in *Odyssæa* XVIII. in quo docet Deum quotidie ad cogitandum hominum mentes modificare.

Τοῖς γὰρ νόος ἐστὶν ἐπιχθονίων ἀνθρώπων,  
Ὅλον ἐπ' ἡμέρᾳ ἄγνοι πατὴρ ἀνθρώπων δαΐωντε.

Talis enim mens est terrestrium hominum

Qualem quotidie ducit pater hominumque Deorumque.

in

(a) Segm. 3. c. 19. (b) Ibid. cap. 3.

(c) Segm. 1. cap. 2. (d) Ennead. v. lib. 1. cap. 4.

in quo notanda est emphasis verbi ἀγναι: majus enim aliquid est, quam quod interpretes Latinus verbo *ducit* explicare credidit.

Adversus systema illud Malebranchii primum Arnaldus libro illo *de veris & falsis ideis* scripsit: cui Malebranchius respondit an. 1684. Roterodami. Accessit Petrus Poiretus, qui quamquam opinionem foveret non longe a Malebranchiana dissimilem (a); tamen Malebranchium accurate refellit (b). Lockius & ipse egregiam eandem in rem commentationem edidit (c); tum Georgius Pritius dissertationem emisit *de Enthusiasmo Malebranchii*. Neque quisquam, quod sciam, alicujus nominis Malebranchii defensionem in se suscepit.

Prop. XXXV. Malebranchianum systema. 1. puerilibus inædificatum est rationibus. 2. est incertum. 3. secundum pugnant. 4. absurdum.

D. Prima pars. Malebranchii argumenta duorum sunt generum, *rationis*, & *auctoritatis*. Prima duo. 1. quod Mens *σεί* cum Deo uniatur. 2. quod nullo alio systemate intelligi possit natura & origo idearum. Primum tam est nihil, ut ipse Malebranchius animadvertat, eam unionem non sufficere, ut Mens in Deo videat, quæ intelligit, sed necesse præterea esse, ut ei Deus ideas hujusmodi detegat. Enimvero unio hæc inter Mentem & Deum, nisi dicere velit esse *vocem sine sensu*, duo nobis significare potest, primum unionem substantiarum. 2. unionem operationum. Primum nec sufficit, ut Mens intelligat, nisi secundum accedat; & esse nequit, nisi simul mens Dei aut pars, aut modificatio esse dicatur; quod nec Malebranchius dixerit, nec dici potest [prop. 19.]. Alterum est idem atque dicere: Mens unita est Deo, quia communicatione idearum & luminis Dei intelligit omnia, quod est ignotum probare ex ignoto, aut *petere*, ut inquirunt, principium.

Magis etiam puerile est secundum argumentum. 1.

Quin-

(a) Vide lib. 3. de æconomia divina.

(b) In cogit. rationali lib. 3. cap. 10.

(c) Loke, *Oeuvres diverses* tom. 2. p. 146. edit. sec.

Quinque alia systemata probabilibus rationibus confutavit Malebranchius, non certis probationibus. 2. Est id *argumentum ad ignorantiam*, ut inquit, Non enim idcirco quod aliorum hypotheses sint falsæ, mea erit vera; & possunt ut quinque illi priores, ita sextus hic aut errare, aut ignorare. Qui ita argumentatur esse certus debet, primum, rem, de qua disserit sciri posse; deinde sciri a se posse. At duo hæc non sine intolerabili temeritate pronunciaverit Malebranchius ( a ), Itaque, nisi alia argumenta accedant, duo superiora nihil omnino conficiunt.

Jam in argumentis ab auctoritate desumptis systemati suo indulget vir doctus. Primum Scripturæ dum docent Deum homines illuminare, id duplici cum notione pronunciant, 1. Quod ratio, quæ velut lumen Mentis est, a Deo sit & conservetur. 2. Quod Deus rationem hominis naturalem *prophetia*, seu *revelatione* emendet & perficiat, qua ratione lex divina dicitur *lucerna ardens ante pedes*, prophetia *lumen in tenebroso loco lucens*, & Christus *lux, veritas, via*. Turpissime ergo loca illa Malebranchius contorquet, & de genuino sensu perturbat, ut genio suo licet. Deinde frustra nititur auctoritate Augustini: nam 1. in ea sententia Augustinus singularis est, cujus idcirco nomen nemini potest vim inferri, ut auctoritati cedat etiam sine ratione. 2. Augustini præceptum est, nullius hominis auctoritati concedendum, nisi quatenus aut divina auctoritate, aut naturæ probabili ratione utatur. Quod si quis est, qui ad Platonicos quoque appellet, non is melius causæ suæ consulit, nisi simul ostendat, quibus illi rationibus suffulti in eam opinionem venerint; alioquin si fanatico fanaticum alterum addas, non duo Doctores, sed duo erunt fanatici.

*Nil agit exemplum litem quod lite resolvit.*

Secunda pars: nam quum ea opinio nullis aliis argumentis nitatur præterquam quod hominum fanaticorum libidini (ex hujus p. p.) esse certa non potest.

Tom. II.

L

Præ-

[a] Vide Lokium examen du sentiment P. Mallebranche loco superius citato.

Præterea saniores philosophi adunco omnes naso eam excepere opinionem : certa ergo esse nequit, nisi apud eos, quibus persuasum est, esse aliquid, quod conturbata Mens melius videre possit, quam constans. Et mirum certè esse posset, virum non ignarum criterii veritatis, in mathematicis versatissimum, tam pertinacem in ea fuisse opinione, nisi exploratum esset, neminem esse, qui non aliqua insaniat. Sed ut peccent multa omnes,

*Nam vitis nemo sine nascitur : optimus ille est*

*Qui minimis urgetur ....*

in hoc tamen Gallus Metaphysicus *communi sensu plane caret*, si quid aut cerno, aut audio, quod mihi dulces

*Ignoscant, si quid peccavero stultus, amici.*

Tertia pars. Videri aliquid in aliquo cum duplici notione accipi potest, quemadmodum præclare est a S. Thoma observatum. 1. *velut in objecto cognito*. 2. *velut in lumine & in principio*. Priori modo imagines in speculis videmus, posteriori modo colores in lumine (utor veteri illo exemplo), aut in axiomatibus conclusiones. Rogo qua cum notione Malebranchius accipit? Si cum priori, objectum etiam ipsum cognitum exploratumque habemus oportet; quod nunc tantum abest ut sit verum, ut potius plerique reperiuntur, qui aut nullam, aut adeo confusam Dei notionem habent, ut ignorare Deum melius, quam scire dici possint. Deinde quum Deus non sit nisi simplex quædam natura, *totus animus, totus animi*, ut Plinii verbis dicam, idest simplex intelligentia, si mentes nostræ in Deo omnia vident, id fieri nulla alia ratione potest, quam intuendo divinam intelligentiam, quæ ideis omnium possibilium æquivaleret; atque ita nihil ignorare Mentem humanam oportet. Non omnia, inquit Malebranchius, detegit Deus. At pugnancia videri possunt ens simplicissimum videre, nec tamen integrum: sed id demus. Si quæ detegit; certe non inutilia, nec noxia, sed quæ maxime in rem nostram sunt, detegit: quod nunc contra est; quum maxima idearum humanarum

pars

pars inutiles sint , & pleræque etiam noxiæ . Præterea cur quum omnes Mentes eæque Deo conjunctæ sint , non omnes tamen æquæ vident ? Cur eadem Mens in pueritia ; adolescentia ; virilitate , senectute non eadem nec ex eodem adspæctû ? Cur quum promtuarium idearum nostrarum Deus sit semper idem , memoria nostra non eadem semper ? Quinimmo miror super eam doctrinam ullam in cerebro Malebranchius memoriam statuere potuisse . Ad hæc quid est cur quidam diu laborent in continuatione idearum percipienda , quum alii nullo eadem negotio intelligant ? Tum cur morbis nôtitia rerum amittatur ? nec enim quidquam causæ est ; cur Deus ita nobis a morbo aliquo irascatur ; ut priores ideas occultet . Cur jam amentes homines fiunt ? Cur divinarum legum ignari evadunt & contemptores ? nam ; si quid hominibus Deus patefacit in se ipso ; eæ profecto sunt divinæ leges ; quas tanta cura illis inculcat : nunc vero fit ut nihil minus homines apud se reputent . Accedit eodem quod mentes Deo semper *æquæ* unitatē nullo modo esse possent miseræ : an tu eum miserum dices ; qui summo ipsi bono perpetuo conjunctus est ? Infinitæ sunt hujusmodi conclusiones inter se ; cum evidentia , & cum systemate Malebranchiano pugnantes ; quas qui concoquēt , eum numquam sanum habuero . Videant igitur Malebranchiani , si qui ulli sunt , ne nos ; dum intelligentes facere conantur ; insanos faciant :

*Est modus in rebus , sunt certi denique fines ,*

*Quos ultra citraque nequit consistere rectum .*

Quod si cum secunda notione *videre omnia in Deo* accipiat , tum tantundem est ; atque ope divini luminis ; idest , rationis naturalis , intelligere , quæ intelligimus ; quod nemo inficiabitur : at id nec novum est , & tanto rerum apparatu non indigebat .

Quarta pars . Nam quæ opinio cum intima conscientia , experimentis hominum omnium perpetuis & clatis ; cum divina quoque revelatione pugnat , ea absurda est : est autem talis Malebranchiana hypothesis . Primum , quo quis conscientiam suam consulit atten-

tius, eo clarius intelligit, quavis potius alia ratione res extra positas cognoscere, quam in Deo, a cujus clara & distincta cognitione tam sunt mentes nostræ diffusæ, ut non inscite docuerint scholæ Philosophi, *Deum via remotionis cognosci*. Deinde phænomena humanæ scientiæ, ignoratio, errores, cognitiones rerum nihili; & ridiculæ concertationes super rebus iisdem, dependentia mentis a sensibus, phantasia, temperamentis corporis, phænomena memoriæ quæ colligi possunt plurima, omnia cum Malebranchiana illa sententia pugnant. Tandem, si omnia in Deo videmus. 1. omnes natura ipsa sumus prophetæ. 2. revelatio externa, & externa legislatio sunt inutiles. 3. Inscite monent scriptores divini, Deum a rebus *visibilibus nosci, & per ea quæ facta sunt*. 4. Frustra nobis beatitudinem promittunt aliam, quum non possint mentes arctius, quam quod uniuntur in Malebranchiano systemate, cum Deo uniri: mitto alia sexcenta. At illud certe omitti nequit, quod unio hæc substantialis Mentis cum Deo nequeat intelligi, nisi in Spinozistico systemate. Enim vero si Deus locus est Mentium, ut spatium corporum, ita Mentis cum Deo penetrabuntur, quemadmodum cum spatio corpora: at ita aut Dei partes erunt, aut modi, aut Deus ipse. Neque ego unquam alias censeui, aut censere possim, salva religioni viri pace, quam Malebranchianum & Spinozisticum systema verbo tantum tenuis distare, re vera unum esse idemque; quod fautores ignorent, si paulo confidentius dico: nam veritas potior est & antiquior philosophis. Quamquam quis tam Malebranchii fautor inepte est, ut non hoc fateatur? Ignoscendum interea sæculo, in quo opera Cartesii, aliorumque Platoniorum quædam placita æquo nimis provecta sunt, & in quo librorum B. Augustini lectio magna fuit Gallicis eruditionis pars. Nam certe Malebranchius.

*Si foret hoc nostrum fato dilatus in ævum,*

*Detereret sibi multa, recideret omne quod ultra.*  
recti fines trahi potest, iisque legendis, quæ in eum sunt congesta.

*Sæpe caput scalperet, vivos & roderet ungues.*

SY-



## SYSTEMA IDEARUM INNATARUM.

Quicumque Mentium humanarum præexistentiam philosophi sibi persuaferunt, iidem ideas omnes ingenitas cum mente esse credidere, in primis Platonici. Ideas ii omnium rerum æternas, & subsistentes posuere, quas primum Deus mente sua & intelligentia complecteretur, deinde Diis minoribus, & Mentibus participaret. Hinc illud Socratis *scientiam nostram esse reminiscentiam*, nec philosophia discere nos quidpiam, sed excitari, & in veteris scientiæ memoriam revocari [a]. Sed ea Platoniorum opinio, postquam una regnare cœpit Aristotelis secta, apud paucos custodita. Cum literæ Europææ instaurarentur Renatus Cartesius iterum ideas innatas prædicare occœpit, sed significatu longe a Platoniciis diverso: ideas enim innatas vocat non formas aut a Deo menti participatas, aut in animo insculptas; *quæ sint aliquid diversum ab ejus facultate cogitandi, sed earum cogitationum formas, quæ cogitationes, nec ab objectis externis, nec a voluntatis determinatione proveniunt, sed a sola facultate cogitandi*, quasi nempe necessitate naturæ a mente ipsa manentes, si recte accipio (b). Ejus philosophiæ fautores tenuerunt id constantissime, & longius etiam, quam Cartesius provexere, in primis Henricus Morus (c), qui semina scientiarum quum theoreticarum, tum maxima moralium Menti a Deo indita arbitratur. At Sylvanus Regis negat quidem ideas innatas esse menti concreatas, aut insculptas, sed notionem Dei, corporis, animi statim innasci putat in Mente atque cum corpore conjuncta est, easque tres notiones ideas innatas appellat (d). Leibnitius vero cum idea totius universi creatam mentem opinatur, qua de re superius. Graves philosophi, non omnes modo e Scho-

L 3

la,

[a] Vide Theethetum Platonis.

[b] Respons. ad art. 12. programmatiss Belgici ann. 1647.

[c] De immortal. animæ.

[d] Usage de la raison, &amp; de foy lib.1. part.1. cap. 7.

sa, sed politiores alii, Petrus Gassendus, Thomas Hobbesius, Malebranchius, Joannes Lockius, Andreas Rudigerus, ut minores alios omittam, ita omni ex parte adversus hæc inveci sunt, ut vix hodie in Europa reperias, qui sit nominis alicujus, ejus doctrinæ patronum. Nempe negatum humani stare diu!

*Prop. XXXVI.* Nequeunt ideæ omnes esse Menti creatæ.

D. Nam aut ideæ hujusmodi perceptiones sunt, aut formæ e perceptionibus distinctæ. Si primum, omnes, quas unquam habere mens potest, perceptiones simultaneæ essent, quod conscientiæ adversatur. Si alterum, necesse est tot distinctas ponere in animo insculptas formas, quot ea, quod est & intelligit, habere potest, idest non modo infinitas, sed infinities infinitas, quod pluribus ostendit Malebranchius: id vero cum finita mentis natura pugnat. Non omnes igitur ideæ ingenitæ esse possunt.

Præterea, si hæc sola est idearum origo, & corporum quoque omnium, earumque qualitatum, quæ nobis tactu, gustu, auribus, oculis, percipi videntur, & variarum corporearum rerum terrestrium, aut celestium ideæ ingenitæ erunt. At id principio nemo sobrius dixerit; deinde, si qui dicit, is etiam dicat necesse est, esse eas perpetuo menti præsentēs; neque enim quidquam in simplici animi natura inesse potest, quin sit illi semper præsens: quod si præsentēs, semper eas percipit: non autem semper percipit; ne ergo præsentēs quidem: neque idcirco innatæ.

Tum, si id se ita habet, memoria erit idearum cella penaria, & quidem in mente: nullo ergo corporis morbo imminui aut deperdi, nullo remedio juvari poterit; quod nunc contra est.

*Prop. XXXVII.* Nisi omnes ideæ sint innatæ, hypothesis idearum innatarum inutilis est ad originem idearum explicandam.

D. Nisi omnes sint innatæ, agnoscenda est altera via, qua reliquæ proveniant; ita ambages iterum & incertitudo super origine maximæ idearum partis.

Præ-

Præterea nisi omnes sint innatæ, erunt quædam adventitiæ: a Deo ne illæ, an a sensu & conjectura? Primum nec ullo modo probare possunt; & si verum est, intelligi nequit, cur non potius simul cum innatis aliis eas in Mente producat Deus, quam paulatim, & successione atque per intervalla. Nec id dico, quasi id esse nequeat, sed ut intelligatur, eos, qui ita arbitrantur nullas habere opinionis suæ probationes, sed quodcumque venit in Mentem effutire divinando. Si dicatur postremum, quum ex eo demonstratu facile sit, eadem via omnes reliquas, quæ non adventitiæ statuuntur, gigni posse; doctrina idearum innatarum inutilis erit & superflua: nec enim vero in rebus naturæ præter eas, quæ necessariae sunt & sufficientes, nisi inscitissime, causæ aliæ inducuntur.

*Prop. XXXVIII.* Systema idearum innatarum nullius usus esse potest ad idearum originem explicandam.

D. Non omnes idæ esse possunt innatæ (prop. 36.): & nisi omnes sint innatæ, inutilis ea opinio est ad idearum originem explicandam [prop. 37.]; id igitur systema omnino inutile est & supervacaneum.

*Prop. XXXIX.* Fautores doctrinæ idearum innatarum, nisi omnes ideas ponant ingenitas, rogati equanquam sint innatæ, nulla proferre possunt, quam non facile sit ostendere via eadem, qua reliquas oriri opinantur, sensu nempe & conjectura, provenire posse.

Enim vero præcipuæ, ad quas appellant, sunt idea Dei, idæ primorum principiorum cum scientiarum theoreticarum, tum maxime etiam moralium, idæ abstractæ numerorum, & proportionis, atque ejusmodi aliæ. At earum nulla est, quæ si quidpiam sensu & conjectura percipit Mens, non possit ostendi & eam inde originem trahere. Nam Deum velut primam mundi causam effectricem & conservatricem ex existentia, qualitatibus, structura, ordine, finibus rerum mundanarum ita posse intelligi, uti ex effectis causæ aliæ, tam perspicuè demonstratum est a viris doctis B. Thoma, Lockio, Derrham, Nieyventitio, Clarkio, aliisque,

que, ut qui id inficiatur, non modo impietatis, sed stupiditatis argui possit. Deinde prima scientiarum axiomata, & principia, ut in Geometria, ex simplici collatione idearum nasci, id adeo est exploratum, ut supervacuum existimo operam omnem, quam in ea re demonstranda impendit Lockius. Principia quædam moralia *Deum amandum super omnia: Proximum us æqualem spectandum: Nihil alteri faciendum, quod tibi fieri non vis*, ex ideis Dei hominum, naturæ societatis, utilitatis & nascuntur & corroborantur. Quamquam in hoc ego patronos Platoniorum miror, qui dum ideas innatas tueri student, judicia quoque & ratiocinia innata mentibus esse pronunciant. Quod utcumque excusari in Platoniciis possit, quippe quod est eorum doctrinæ de præexistentia animorum conforme, in his, qui ab illa doctrina descivere, membrum videri potest sine capite, conclusio ex negatis principiis. Jam vero eodem modo ideæ numerorum, proportionis, aliæque abstractæ explicari possunt: nascuntur enim illæ, aut divisione idearum sensibilibum, aut meditatione & conjectura; quam rem illi negare ut impossibilem nequeunt, quousque & conjectura plurima percipi fatentur (a).

## CAP.

(a) *Animadvertendum est hoc in loco, esse quasdam inter homines notiones, quædam rationis percepta, quæ homines ipsi per se a nullo edocti habent omnes, seu a sua ipsorum natura in ea advertenda impellantur, seu a natura rerum, quæ æque omnibus subest, excitentur, seu a ratione & intellectu admoneantur. Ita veritates quædam, quæ numerorum computationem, multiplicationem, divisionem spectant, suapte natura ab omnibus intelligi possunt: item principia quædam proportionum, quæ Arithmeticarum, tum Geometricarum, quæ operis ipsis omnes scire profitentur. Tum quædam aut nos ipsos, aut rerum naturas spectantes sunt inter omnes communes, quibus communis natura, eademque rerum universitas oculis objecta. Innata hæc vocari possunt, ac vocantur quandoque a viris doctis, suntque hoc sensu innata. Quibus nos minime refragatur,*  
qui

## CAP. IV.

*De humanæ mentis libertate, ejusque extensione.*

*Prop. XL.* **M**ens humana est libera, sed intra quosdam fines ea continetur libertas.

D. Libertas est ea mentis facultas, qua ex ratione boni vel mali propria, nec invita, & cum voluptate operatur (def. 12.): plurima autem ex propria boni vel mali ratione & conscientia, nec inviti & cum voluptate perpetuo omnes operantur (ex intima conscientia); est igitur Mens humana libera. Quod primum.

Jam quædam sunt, quæ inviti patimur & cum ægritudine; quædam alia quæ voluntati nostræ minime sunt subjecta, non in corpore tantum, verum etiam in ipsa mente; quædam, ad quæ potentia naturæ nostræ non pertingit; hæc omnia cum moderamini rationis nostræ non subsint, ne libertati quidem subesse possunt (def. 12.) (a).

*Prop.*

*qui qua notione hæc ingenita principia in dubium vocaverimus dilucide explicavimus. Quod si quis ingenitas & communes hominibus omnibus notiones, ea, qua hic accipimus, significatione, negare in animum induxerit, is dupliciter peccabit. Nam & imperite communi hominum sensui ac experientiæ adversabitur, & omnem hominum inter se societatem abrumpet, quæ nulla esse potest, ut alibi adnotatum est, ubi nulla inter se communi ratione copnulentur. Neque enim ego aliunde clarius deduxerim, ad communionem vitæ homines geri, quam hinc, quod in communi quadam ratione participant, sine qua ut sese mutuo intelligere nequirent, ita nulla communione sociari.*

(a) Tota hominis libertas binis verbis absolvi potest, ac digito ut ita dicam, demonstrari. Exploratum est, causas necessarias agere semper secundum totas suas vires: lapides totis viribus decidunt: elateres totis viribus objecta obstracula repellunt; ignis, aqua, ceteræ naturales ac necessariæ

Prop. XLI. Homines prædicti sunt libertate a *coactione*.

D. Quæ operandi potentia nullo Fato rapitur libertas est a *coactione* [Schol. def. 12.]: est autem fatum externum triplex, Democriticum, Stoicum, Spinozisticum (def. 53. primæ p.), a quibus omnibus immunes sumus [prop. 13. 74. 76. prim. part.]; liberi ergo sumus a *coactione*.

Præterea cujus libertatis motiva proxima suppeditat ratio intima Principio agentis ea libertas a *coactione* est (Schol. def. 12.): at libertatis nostræ proxima motiva, determinantia sunt motiva rationis (ex intima conscientia); est ergo ea libertas a *coactione*.

Prop. XLII. Motiva quæ libertatem humanam determinant sunt perceptiones boni vel mali, seu bona & mala *objectiva*. Nihil manifestius esse potest, si intimam conscientiam consuluerimus. In adjecta appendice copiosius id explico.

Prop. LXIII. Libertas humana est libertas a necessitate naturæ.

D. Quæ libertas pendet a motivis, quorum actio nec absolute infinita est, nec unum in modum determinata, est libertas a necessitate naturæ; talis est libertas humana; nam quum determinetur a bonis vel malis *repræsentatis* (prop. 42.), quorum activitas nec infinita est [si summi boni, & summi mali perceptiones exceperis], nec unum in modum determinata, quippe quod

saræ causæ totis semper suis viribus agunt. At vero, nisi vim manifestam conscientia facere velimus, ex intima experientia quilibet persentiscit, posse se parte virium agere. Ut ecce, quum abacum hunc primum parva vi digitis premo; mox majori; deinde paulo etiam majori; postremo quantum queo; nemo dixerit, me non potuisse premere totis viribus, quum parte premebam; nam alias ne postremo quidem id potuissem. Qui ergo parte virium agere possum, ac majori, vel minori, prout luitum fuerit, cogor fateri, me non necessario agere, idest esse liberum. Itaque nisi hoc sit perspicuum, non video, quid in ideis humanis clari ac perspicui esse possit.

quod perceptiones bonorum & malorum variæ sint, mutabiles, vagæ, ut patet; a motivis agitur nec absolute infinitis, nec unum in modum determinatis.

*Corol. 1.* Inest homini libertas indifferentiæ: nam quum libertas humana immunis sit a coactione (prop. 42.), & a naturæ necessitate (prop. 43.), regaturque a motivis rationis, nec activitate infinitis, nec unum in modum determinatis, nequit non esse libertas indifferentiæ.

*Corol. 2.* Est quandoque humana libertas *contradictionis*, & *contrarietatis*. Nam est indifferentiæ [corol. 1.], quæ indifferentia a motivis rationis tantum determinatur: sunt autem rationis motiva bona vel mala repræsentata [prop. 42.], & potest esse bonum repræsentatum *verum malum*, ut malum repræsentatum verum bonum, quod patet: ita non solum ex duobus bonis propositis unum præ alio eligere possumus, sed idem unum eligere possumus, aut respuere, & malum bono præferre possumus.

*Schol.* Ex quibus omnibus perspicuum est, unam humanæ libertatis radicem esse rationem, seu potius libertatem humanam, quemadmodum B. Thomas docet, *essentialiter esse in ratione per appetitum operante*: nam *voluntas est in ratione*, inquit alicubi ex Aristotele [a]. Perspicuum quoque & illud est, turpissime in statu quæstionis hallucinari, qui libertatem ita concipiunt, tamquam potentiam, quæ omne motivum determinans excludat: talis enim libertas nec ulla esse potest, & naturæ rationali repugnat (b). Sed nec minus erit clarum, si libertas e fonte rationis manat immediate, non idcirco minus esse libertatem, quod *concausis aliis*, ut vocant, temperamento corporis, actione externorum objectorum, actione Dei, adjuvetur: nam exploratum est causam non idcirco desinere esse causam, quod ab aliis adjuvetur (c). Quousque igitur Mens humana activitatem suam retinet, operaturque ex ratione boni per defi-

[a] P. 2. q. 9. art. 5. in corp.

[b] Vide eundem S. Th. 1. 2. tota q. 9. & 10.

[c] Vide ut idem ibidem egregie hæc explicat. A

desiderium, mali per averfationem, etiamfi ab aliis adjuvetur caufis, libera effe non definit. Quocirca inepta fophismata funt, quæ adverfus humanam libertatem ex temperamentis, actione rerum externarum, concurfu Dei generali, vel peculiari defumuntur argumenta: concau-  
fæ eæ tantum effe poffunt, quæ *caufalitatem* (liceat eo vocabulo uti) Mentis nullo modo evertunt. Sed ut plenius eam rem & accuratius pertraitemus, quam dudum ea fuper re commentati fumus, appendiculam adjiciemus. Quæ fi minus fit tironum captui adaptata, differri ejus tantifper lectio poteft.

## A P P E N D I X

Ad fuperius Caput.

*De libertatis natura & proprietatibus differitur  
accuratius.*

§. 1. **Q**Uum de rerum differitur natura aut proprietatibus, jamdudum monuere philofophi, eam rerum naturam, eas proprietates & qualitates, eas caufas quærendas effe, quæ vera funt, non quæ effe poffunt. Nam qui quæ effe poffunt fummo capitis labore perquifivit, atque beato ita ei effe licuit, ut repperit, non magis profecit, quam qui nihil unquam tentavit. Ea regula, quum de libertate differitur, potiffimum recolenda eft. Perquifenda enim eft ea humanæ naturæ libertas, quæ nobis a natura ineft, & quatenus ineft, non eam quam maxime vellemus. Nam qui eam fui libertatem exquirunt, quam maxime vellent: ne eam quidem, qua nos natura præditos fecit, reperiunt. Contenti ergo effe debemus iis dotibus, quibus fumus donati, nec aut alias aut majores exquirere, aut impudentius in Dei confilia inquirere, cur has potius, quam alias, aut cur non majores dederit. Quod tam eft ineptum & adrogans, quam fi quis exquirat curiofius, cur materiæ foliditas, cur igni calor fit, inditus, & cur materia metallica aquam,



aquam, aut aerem mole sua non exæquet. Factarum quidem rerum omnium fines, ac propterea rationes sine necesse esse, sed quas scire minime necessarium est, ac impudentissimum in arcanis sapientiæ Dei perquisitis, nec repertis, naturæ suæ poenitere, aut adversus Dei providentiam indignari.

§. 2. Quæ omnium hominum animis libertatis notio inest, clara ea est, & naturæ nostræ sufficiens, nisi abutamur. Nempe apud omnes homines is ex libertate agere dicitur, qui sua vi, & ex propria boni vel mali ratione cum voluptate agit: is vero ex necessitate, qui contra boni vel mali propriam rationem, & invitus operatur. Itaque lubenter agere, & invite velut contraria inter homines habentur. Ne aliam quidem homines, quum de læsa libertate queruntur, expostulant. Ea si detur vivendi & operandi optio, tum se plane liberos dicunt. Eam vero facultatem agendi ex propria boni vel mali ratione sibi inesse intimitus persentiscunt; nec ullus est aut tam doctus & perspicax, aut tam stupidus, & pectoris obtusi, qui ullis sophistarum conclusiunculis ab ea persuasione se dimoveri patiatur. Ea quoque naturæ sufficiens est, si recte uti didicerimus, quod sequentibus patebit.

§. 3. Ex quibus sequitur, ut eæ actiones quæ ex ratione boni vel mali propria cum voluptate in nobis nascuntur *liberæ* sint: quæ vero nec a ratione & voluntate nostra proveniunt, & vel nobis invitis, esse, aut fieri pergunt, *necessariæ*. Quumque nemo sit, qui posteriores has non habuerit *necessarias*; nemo esse potest, nisi qui insanire velit, cui primæ non sint *liberæ*.

§. 4. Voluntas est ultima mentis determinatio, quum aliquid eligimus, aut averſamur, ex ratione boni, vel mali propria proficiscens: non igitur consistere potest sine ratione. Ergo ratio sufficiens voluntatem nostrarum, seu *electionum*, & *cessionum* liberarum, ratio est boni vel mali propria. Nam tota ratio sufficiens cur aliquid eligamus ratio est boni, seu potius *bonum ipsum repræsentatum*, & *objectivum*: & tota ratio, cur

fit, ut apud philosophos actiones, quæ ex iis viribus inconsulta ratione, emergunt, in censum actionum moralium, &, ut vocant, *humanarum*, non veniant. Nam ea demum a Philosophis voluntas libera habetur, quæ procreta, seu consilio determinatur, quod ab Aristotele adnotatum omnes retinuerunt Scholæ Doctores (a).

§. 9. Earum inclinationum, aut declinationum, de quibus superiore §. dictum est, *ratio sufficiens* in Dei voluntate & hominis essentia unice est posita. At sunt inclinationes aliæ aut declinationes peculiares, quæ ex generalium illarum moderatione & determinatione in objecta particularia existunt. Earum *ratio sufficiens* sunt ideæ bonorum vel malorum peculiarium voluptate aut dolore naturam nostram inflectentes. In has libertas mixta cum necessitate quadam nobis inest. Et quidem liberi sumus in eo, ut possimus earum inclinationum causas, ideas nempe bonorum, vel malorum peculiarium, in consultationem rationis revocare, perpendere accuratius, quandoque etiam exhibere nobis alias, aut eas investigare, atque interim a prioribus animum tantisper abducere. At positis semel fixisque notionibus boni vel mali, indeque, ob arctam connexionem *rationis, & appetitus*, genitis commotionibus, necessario Mens rapitur in *electionem*, aut *fugam*. Quod scholæ aliis efferunt verbis, *Non potest mens bonum qua bonum aversari, malum qua malum sectari*.

§. 10. Inclinationes animi & declinationes particulares non omnes sunt æque vehementes: habent ergo suas *intensitates*, quæ commodè per gradus distingui possunt. Earum nunc intensitatum causæ physicae investigandæ sunt; ut quatenus in eas possit libertas, quo vero consistat, intelligatur clarius. Est autem id faciendum accurate, quandoquidem actionum plerarumque vitæ humanæ fontes in hujusmodi inclinationibus, aut declinationibus continentur.

§. 11. Exploratum est: ut illas generales (§. 8.), ita has peculiares inclinationes in bonum, vel malum ferri, velut in fines. Sed oportet Philosophum distinguere

(a) Vide S. Thom. 1. 2. q. 9. art. 4. in corp.

guere inter *bona* & *mala* objectiva, ac *bona* & *mala realia*. Bonum & malum objectivum voco quantitatem boni vel mali, quæ in idea boni vel mali apparet: *reale vero*, quæ in rebus ipsis, quæ velut bonæ, vel malæ percipiuntur, inest. Non semper æqualia sunt objectivum & reale bonum, objectivum & reale malum. Nam possunt reale bonum, ac malum minora, aut majora apparere: possunt diversa: potest malum apparere bonum, bonum vero malum. Nihil frequentius in vita humana accidit. Nec quidquam efficacius hominum miseriam progignit [a].

§. 12. Inclinationes, aut declinationes animi peculiares non pendent nisi a bonis, vel malis objectivis: nam pendent ab ideis bonorum vel malorum peculiarium generales inclinationes voluptate & dolore moderantium, & determinantium (§. 9.) Ex quo consequitur, ut earum inclinationum & declinationum gradus intensitatis sint in ratione bonorum, vel malorum objectivorum. Ut si ex. grat. quantitas boni objectivi sit  $\equiv 6$ , & inclinationis erga illud intensitas erit  $\equiv 6$ . Porro si mali objectivi quantitas sit  $\equiv 4$ , erit declinationis intensitas  $\equiv 4$ . Ea quum sint manifesta, non admodum perspicite, ut solebat, Renatus Cartesius (b) voluptatem ex magnitudine perfectionis realis illam producentis esse metiendam scripsit; nihil enim exploratius est, quam voluptatem & dolorem oriri ex bono aut malo objectivo, non reali.

§. 13. Nec minus & illud verum est, posse plerumque bonum reale producere in animo nostro declinationem, malum vero reale inclinationem; quum illud pro malo, hoc pro bono traduci possit [§. 11.] Cui simile & illud est, posse majus bonum reale inclinationem minorem facere, quam minus; ut minus malum declinationem progignere majorem, quam majus; quod postremum tum potissimum contingit, quum *majus malum* distantius est, *minus* vero propinquius. Scilicet

Tom. II.

M

quem-

(a) Intellectus non percipit res per modum rerum ipsarum, sed per modum sui, inquit cogitate S. Th.

(b) *Ad principem Elizabetham Palat. ep. 6. prim. part.*

quemadmodum corpora in ratione distantiae ab oculo majora aut minora videntur, ita appetitus nostri, aut adversationis objecta crescunt aut decrescunt in ratione plusquam fortassis duplicata distantiarum.

§. 14. Duo *bona objectiva aequalia*, sed opposita, inclinationem quidem *generalem* & vagam progignere possunt, *particularem* vero nullam. Nempe inclinatio generalis nascitur ex opinione boni ut boni: quum autem duo bona objectiva A, Butcumque diversa unum sint in ratione boni, perstat integra eorum activitas ut bonorum; progignunt ergo inclinationem generalem & vagam seu innatam excitant, agitant, fovent. Quod erat primum. Jam quum inclinationes animi peculiare sint animi erga peculiaria objecta determinationes; seu inflexiones; nec possit simul in oppositas partes animus flecti; ob æqualitatem vero bonorum ne in alterutram quidem possit; efficitur, ut quousque bona illa objectiva sunt æqualia nullam peculiarem inclinationem, aut actionem producat. Quare si in alterutrum mens se determinat, id quod oblibertatem potest, non inde determinatur, sed alias rationes sectatur. Quam rem Aristoteles exemplo capilli omni ex parte æqualis resistentiae explicuit: eum nempe capillum nulla in parte rumpi posse, quacumque adhibita vi, arbitratus est: quod utcumque falsum, clare tamen explicat, quod ille voluit, quodque scholastici magna consensione sectati sunt.

§. 15. Si idem objectum A duas in nobis producat ideas unam boni D, alteram mali C. intensitate æquales, sed contrarias, nulla inde sequi potest peculiaris Mentis inclinatio. Sit  $D = 4$ , Citidem  $= 4$ , erunt inclinatio & declinatio æquales: ergo erit inclinatio erga D  $= 4$ , declinatio a C  $= 4$ . Quocirca erit inclinatio  $= 4 - 4$ , idest nulla: & declinatio  $= 4 - 4$ , idest nulla.

§. 16. Intensitates bonorum vel malorum objectivorum sunt ipsæ idearum bonorum vel malorum intensitates. Intensitatem vero idearum bonorum vel malorum voco *claritatem*, *distinctionem plenitudinem*, aut obscuritatem, confusionem, imperfectionem.

§. 17. Si ideæ sunt innatæ, bonorum vel malorum intensitates sunt & ipsæ innatæ [ex §. 16.]. At quum experientia doceat in majori hominum parte realia mala esse *bona objectiva*, & contra realia bona esse *mala objectiva*; si ideæ sunt innatæ, idest Mentl a Deo communicatæ, sequetur Deum hominibus illudere, quod intolerabile est absurdum. Idem dici potest, si Deus singillatim in nobis ideas producat, prout nobis sunt illæ ad munera nostra perficienda necessariæ: aut si in sua essentia manifestet. Quod argumentum invictum est contra illa systemata.

§. 18. Postulo ut omnes ideæ nostræ statuantur *sensus esse*, & *meditationis* atque *conjecturæ*. Nam quamquam ea opinio valde sit controversa, est tamen & naturæ humanæ consentanea & phænomenis cogitationis humanæ explicandis accommodatior, & præsentibus philosophis probatissima.

§. 19. Pro varia intensitate externorum objectorum in nos agentium, variat intensitas impressionum in nobis factarum. Axioma est exploratum.

§. 20. Constitutio subjecti, in quo fit impressio aliqua, ad intensitatem ejus impressionis plurimum facit. Antiquum est & verum Scholarum proverbium; *quidquid recipitur per modum recipientis recipitur*. Ex. gr. Si vi = 2. urgeas objectum, cujus resistentia sit = 3: & alterum cujus sit resistentia = 1. actionis in iis intensitas non erit æqualis. Ex quo fit, ut intensitas impressionis ab objecto aliquo in nobis facta metienda sit non in ratione tantum magnitudinis objecti, sed etiam dispositionis naturæ humanæ in qua fit. Quumque constitutiones hominum seu temperamenta nec eadem sint in omnibus, nec in eodem homine quovis tempore eadem; inde intelligitur, qui fiat, ut impressiones ab iisdem objectis, aut in diversis hominibus, aut in eodem homine temporibus diversis varient.

§. 21. Voco *animi constitutionem*, quæ existit ex ejus *habitibus* aut *intellectualibus* aut *moralibus*; ex *affectibus*; & ex *præsentibus ideis*. Detur animus A imbutus habitibus scientiarum theorecticarum Geometriæ,

Logicæ, Metaphysicæ, Physicæ, Theologiæ &c. ; ejus constitutio diversa erit a constitutione animi B, qui aut iisdem habitibus non est informatus, aut non æque, aut est imbutur diversis. Detur animus C, qui ornatus sit habitibus moralibus caritatis, misericordiæ, justitiæ, fortitudinis, aliisque ad bonitatem moralem spectantibus, aut omnibus, aut plerisque, aut paucis, ea animi constitutio erit diversa a constitutione animi D, qui aut habitibus diversis sit formatus, aut non æque, aut deformatus habitibus contrariis feritatis, intemperantiæ, iræ, amoris venerei &c. Præterea si tempore X. animi C, D, iisdem habitibus imbuti non eadem versent animo cogitationes, constitutiones variabunt. Hujusmodi animorum constitutiones, quemadmodum est perspicuum, infinitæ esse possunt, non in diversis modo hominibus, sed in eodem diversis temporibus : nam pendent vel a minimis variationibus statuum animi. Earum autem omnium ratio habenda est, quum perquiruntur motiva determinationum voluntatum humanarum.

§. 22. Pro varia animi constitutione variant impressiones in nobis ab objectis externis factæ. Consectarium est eorum, quæ supra dicta sunt. Ex. g. si injuriam eandem feceris homini stupido, & homini perspicaci, ii non eodem modo afficientur : si feceris patienti, forti, temperanti, & intemperanti, impotenti, iracundo, diverso certe modo agitabuntur. Ex eodem insolente phænomeno non eodem modo commovebuntur vulgus, & philosophi. Eodem sermone pio non eodem modo agitabitur muliercula, idiota, politicus, impius. Audito viri cujusdam famosi nomine, commotiones & judicia varia excitantur in diversis, pro professionis, sectæ, affectionis, alterius ætatis, sexus diversitate.

§. 23. Ex quibus sequitur intensitatem impressionum in nobis factarum a tribus pendere causis. 1. intensitate actionis externæ. 2. a temperamento corporis. 3. ab animi constitutione. Ut si ea omnia, eorumque consensio, aut repugnantia possent exacte dimetiri, possent quoque intensitates impressionum exactis calculis subjici, indeque

deque deliberationes omnes, & determinationes animi magna probabilitate pervideri.

§. 24. Porro quum de his differitur, non solum ad examen conferenda sunt, quæ impressiones faciliores efficiunt, verum etiam quæ remorantur, quominus impressiones illæ nascantur, aut quæ de earum quidpiam quantitate detrahunt, conferendæque & agentes causæ, & resistentes. Ex. g. dum disceptatur, quanta cum vi Julius Cæsar se determinaverit ad sibi Romanam Remp. submittendam, in censum cum primis venire debent causæ impellentes. 1. externi boni consequutio. 2. corporis temperamentum. 3. animi affectus, præcipue ambitio regni, aut gloriæ, invidentia nominis Pompejani. 4. externa auxilia unde magnos animos homines facere solent &c.; tum vero etiam dissterrentes. 1. amor libertatis Patriæ, si qui ullus supersuit. 2. notiones honesti & iusti, 3. rei difficultas. 4. vires adversæ. 5. pericula quæ id facinus consequi poterant &c. Quibus omnibus inter se collatis, quum apparet majores fuisse impellentes causas, intelligitur, qui is homo adversus removens agere potuerit & voluerit. Infinita sunt similia facta, quorum similes sunt causæ.

§. 25. *Boni, vel mali objectivi*, intensitas est in ratione intensitatis impressionum: nam bonum vel malum objectivum sunt ipsæ ideæ boni, vel mali, (§. 16.): ponantur ideæ istæ adventitiæ [§. 18.] eæ erunt impressiones ab objectis externis in nobis factæ: ab illis igitur objectis pendent; in ratione igitur intensitatum earum impressionum erunt ideæ, atque idcirco bona, vel mala objectiva. Quod si jam ponantur esse ideæ factitiæ, eæ proculdubio erunt in ratione constitutionis animi, temperiei corporis, & actionum externarum: cum autem intensitas impressionum sit in ratione composita horum omnium [§. 23] idearum quoque factitiarum intensitas erit in ratione impressionum.

§. 26. Inclinationes, & declinationes peculiare pendent ab impressionibus, & sunt in ratione earum impressionum. Nempe pendent a bonis aut malis objectivis (§. 12.), bona autem & mala objectiva ab impressio-

nibus [§. 25.]; inde ergo inclinationes & declinationes: sunt igitur in ratione bonorum, vel malorum objectivorum [§. ex superior.]; bona vero & mala objectiva in ratione impressionum [25.]

§. 27. Voluntates pendent a libertate determinata a ratione ope impressionum, seu ope appetitus, ut loquuntur scholastici. Scilicet voluntates sunt ultimæ mentis determinationes erga bona objectiva, aut a malis objectivis: eæ vero determinationes pendent ab inclinationibus, aut declinationibus; istæ a ratione bonorum vel malorum objectivorum flectente libertatem (omnia ex demonstratis), ergo inde quoque voluntates.

§. 28. Quæ hucusque dixi, ea ex contemplatione peculiaris naturæ meæ mihi videor deduxisse: sed quum fieri possit ut fallar, nemini quidpiam pertinacius obtrudere velim. Si autem sunt vera constat jam de *motivis determinantibus* libertatem. Sunt interim qui ex iis, quæ observata sunt, hunc in modum fortassis adversus libertatem concludant (a). Voluntates nostræ pendent ab inclinationibus, aut declinationibus; hæ ab impressionibus adeoque sunt ut impressiones: impressiones vero ab actione objectorum externorum, temperie corporis, constitutione animi; necessariæ ergo sunt impressiones, adeoque inclinationes, & declinationes, atque hinc voluntates. Eo argumento triumphat Collinus. Plures scio fuisse philosophos, qui ad hunc scopulum illisere, nec ulterius progredi potuerunt, dumque libertatem studiose quærerent, amisisse repente, quasi ex oculis subductam. Me autem vide quam præfidentem faciat veritas, ut merum esse sophisma superius argumentum, plane confidam demonstraturum. Nempe voluntates ab inclinationibus, & impressionibus ita pendent, quod a ratione pendeant, quæ non alio modo libertatem inflectit, quam naturæ inclinationibus & declinationibus: ergo ita pendent, ut motiva inflectentia libertatem semper sint rationes boni vel mali, nec tamen vis infinitæ, atque idcirco constat integra homini libertas [def. 12. Schol.]. Sed ut plenius id argumentum refellatur, res altius suscipienda est,

§. 29.

[a] Collins recherches sur la liberté loc. sup. cit.



§. 29. Quum Mens humana sit ad beatitudinem facta , ab ejus amore necessario rapitur , adeoque necessario ab eo tantum bono objectivo determinari potest , quod summum est , quippe quod id tantum desiderium illud beatitudinis plene explere potest . At cetera omnia bona objectiva , quæ finitæ sint intensitatis , nec rapere in se unice eam possunt , nec necessario determinare , sed reliquunt ei facultatem super iis consultandi atque indifferentiam eligendi . In ea enim consultandi super natura finitorum bonorum facultate , quæ sacra testis homini inest , dum inter bona finita versatur , libertas indifferentiæ posita est , quemadmodum præclare BB. Augustinus , & Thomas docuere . Atque inde intelligitur cur in amando Deo homines liberi non sint libertate indifferentiæ ; quod nempe tale illud bonum est , super cujus electione nec consulere possunt , nisi vim naturæ inferendo , nec cunctari , nisi plane si stipites sint & trunci .

§. 30. Ex quibus intelligitur fontem libertatis a *coactione* esse , quod motiva immediata nos determinantia sint rationes boni vel mali per appetitum , vel aversionem : & fontem indifferentiæ libertatis esse imperfectionem bonorum , aut malorum objectivorum , super cujus electione aut fuga consulere integrum est , quorumque electio necessaria esse non potest .

§. 31. Qua ex re & illud sequitur , ut quæcumque media rationem nostram perficiunt , ea & magis nos liberos a coactione faciant , & minus cunctantes atque indifferentes . Nam quo rationis nostræ imperium dilatatur , eo plura ratione efficitur , quam aut naturæ impetu , aut affectibus . Et quo ratio auctior est & perspicacior , minus cunctabundi sumus , minusque indeterminati . Itaque ex philosophia , & Legislatio , & Gratia , quæ omnes rationem perficiunt , libertatem quoque perficiunt : ut idcirco tantum absit ut quidquam libertati humanæ derogat Legislatio & Gratia , ut potius nihil plenius eam augeat , atque provehat , in primis , quæ naturam quoque mansuefacit , quod accuratissime a B. Augustino pertractatum est in iis libris , quos de libertate arbitrii inscripsit .

§. 32. Observatum est in scholio prop. 43. argumenta omnia, quæ adversus libertatem produci solent, nihil aliud probare, nisi libertatem nostram sua habere *motiva determinantia*, aut *concausas* quasdam; quæ quum ei activitatem suam auferre nequeant, nec necessario quippe finitæ vis, nihil ei derogant, testamque atque sartam, ut dicunt, relinquunt esse. Sed quando gravi ea philosophorum magni nominis contentione agitata sunt, exigitur a me profecto hoc in loco, ut hujusmodi argumenta retractem atque refellam. Nec ab interna naturæ nostræ necessitate vindicanda nunc est libertas, quod superius præstitum est: externa tantum persequar. Ea ad tria potissimum referri solent. Quorum primum Dei providentia & prædeterminatio suppeditat; alterum Dei præscientia: tertium vero Astrorum influxus. Nam quod addunt quidam, peccato Adæ amisisse homines arbitrii libertatem, quod argumentum Theologia subministrat, id scripturæ ipsius auctoritate confutatur; quæ ut docet, nos omnes in peccato nasci; ita apud nos arbitrii nostri consilium esse. Eo igitur nihil moveri possumus, quamquam Calvinus eo potissimum nitatur.

§. 33. Est autem primum hujusmodi (a). Eæ causæ dici & esse possunt liberæ, quæ sese ipsæ determinant in operationibus suis, non verò, quæ determinantur ab aliis, quæque ipsæ se determinare nequeunt. Sunt autem omnes causæ creatæ hujusmodi, quæ nec seipsæ ullo modo determinare ad operandum possunt, & a solo Deo determinantur. 1. Quemadmodum intelligi nequit corpus, quod se ipsum a quiete ad motum impellat, ita nulla alia creatæ & finita res, quæ ab *inactione* ad *actionem* determinet: par enim utrobique ratio est. Scilicet & ex nihilo nihil est, & nemo, quod non continet, præstare potest. 2. Quum constet inter omnes qui sanam habent Dei notionem, a Deo omnia conservari, sitque vetus philosophorum & verum adagium, *conservationem esse perpetuam creationem*; non magis possunt creatæ res se ad agendum determinare, quam

(a) Nimis illud adornat Pomponatius in 11. de Fato &c. Hinc sæpe Spinoza.

quam se conservare. Quemadmodum horologii pendulum, idcirco quod externa causa moveatur, & ab eadem in motu conservetur, dici nequit ullo modo se in oscillationes agere, desperetque, & pugnancia aperte doceret, qui quum ab externis causis in motu conservari pendulum dixisset, adjiceret, esse tamen oscillationes quasdam, quas ipsum sibi faceret, aut gradum esse motionis, quem ipsum externæ actioni adderet. Nempe qui ita differit, ponat gradus ejus motionis esse = 4. quorum. 2. debeantur externæ causæ, 2. penduli ipsius activitati, tum dicat etiam necesse est, pendulum suapte natura, sine ulla externæ causæ ope, agitare se posse duabus viribus. Quæ doctrina superiorem omnem evertit, moveri pendulum ab externa causa, atque ab eadem in motu conservari.

§. 34. Diffiteri non possumus, graviter eo argumento premi, & *physicæ prædeterminationis* auctores, & Malebranchianos, qui omnia *æquius* a Deo repetunt, nulla in natura activitate posita, & Auctorem præcipue Gallici operis, *Actiones Dei in Creaturis*, alias a nobis laudatus. Nam respondere, iis principiis positis, liberos nos esse *in sensu diviso*, si non *in sensu composito*, id est fucum imperitis facere, quod est perspete a Becano observatum. Enim vero si quidem verba *in sensu diviso* intelliguntur, quum non operamur *potentia* retinere libertatem, ut in *sensu composito*, id est quum nos determinamus, non habeamus; nescio utrum id libertatem vindicet potius, an evellat. At id certum est, eam libertatem *potentia*, quæ sit necessitas *actûs*, nullius esse homini usus. Itaque ea responsio adhibenda est argumento, quam B. Thom. divinitus, ut solet, pluries adhibet. Nempe quum Deus sit infinite potens & sapiens, dubitari non potest, quin tales facere potuerit res, quæ causæ essent & ipsæ; id est activitatem sui generis haberent & exercerent. Ejus generis est humana Mens. Activitatem illa sui generis & habet & exercet. Sed quum quæ intensitate sunt finita, consumi usu possint, conservari ea a Deo debent. Est igitur Dei actio quædam universalis qua hujusmodi activitates *causarum*, ut vocant,

cant, secundarum, conservatur, eaque constans & perennis. Porro ea actione Deus rerum naturas non evertere, sed continere & conservare vult: esse autem id non potest, nisi naturis illis adaptetur actio Dei. Sunt porro causarum secundarum activitates non unius speciei; quædam brutæ sunt, ut vires materiæ *attractrix gravitans, plastica*, similes: quædam vero *rationales*. Illæ legibus mechanicis regi possunt, & reguntur: quocirca libertate destituuntur. Istæ ratione ducuntur, ut idcirco una iis sint agendi motiva, perceptiones. Hæ mechanicis subijci nequeunt legibus: rationis via conservari debent. Adaptatur prioribus Dei actio ut rapiat: his ut ducat. Ita Mentibus etiam cum actione Dei sua semper constat libertas. Quinimmo quum libertas *essentialiter* sit in *ratione*, & quæ rationem emendant & perficiunt, libertatem quoque perficiant [§. 31.]; & Dei actio naturæ Mentium adaptata non possit non illas emendare & perficere, conficitur actione providentiæ divinæ perfici potius humanam libertatem, quam suffocari. Quæ omnia & Augustinus summa perspicacitate prædixerat. Ita concidit tota illa Spinozistica moles.

§. 35. Alterum argumentum ita conformatur. Si omnia futura præscita sunt a Deo, hoc ordine evenient, quo ventura præscita sunt: si autem hoc ordine eveniunt, certus erit ordo rerum præscientiæ Dei, adeoque certus ordo causarum; si vero certus ordo causarum, quo fiat omne quod fit, Fato sunt omnia quæ fiunt: neque enim aliud est Fatum, quam certa & constans, atque immutabilis causarum & effectuum series: at si Fato omnia fiunt nulla est libertas; Jam sunt omnia a Deo præscita, ergo certus ordo causarum; Fato sunt quæcumque fiunt, nec ulla est libertas (a).

§. 36. Eo argumento ita perturbatus fuit Cicero, ut ne negaret libertatem, præscientiam Dei sustulit (b), atque ut nos faceret liberos, fecit sacrilegos, ut eleganter scribit Augustinus. Fabulantur Armachanum acutissimum

[a] Vide B. August. lib. v. de Civ. cap. 9. & Cic. de Fato.

[b] Lib. 2. de Divinat.

scholæ Theologum viginti annos laborasse, ut eum nodum solveret, nec poruisse. Cardinalis Cajetanus vir in Metaphysicis contemplationibus attritus, eam quæstionem in alterum sæculum distulit. Augustinus tamen paucis, quasi compendio, & confidenter, sed peracute respondit: *Non est, inquit, consequens, ut si Deo certus est omnium ordo causarum, ideo nihil sit in nostræ voluntatis arbitrio: & ipsæ quippe NOSTRÆ VOLUNTATES IN CAUSARUM ORDINE SUNT.* Quæ huc redeunt, præscientiam Dei non commutare rerum naturas, sed necessarias quidem sinere esse necessarias, liberas vero liberas: quod scilicet præscientia Dei, si a divina voluntate & providentia abstracta spectetur, in rerum naturas physice non influat. Non secus atque qui me quidquam operantem inspicit, non adigit ad operandum. Et quemadmodum *memoria tua*, inquit idem alibi, *non cogit facta esse quæ præterierunt; sic Deus præscientia sua non cogit facienda, quæ futura sunt* (a). Scilicet nihil vetat esse aliquid certum, quod sit liberum, si ex eo, cui id certum est, nulla inferatur operanti vis. Quæ adeo sunt perspicua, ut mirer esse potuisse viros doctos, quibus argumentum istud quidpiam imponere potuerit.

§. 37. Tertium verò argumentum est hujusmodi, Corporis nostri constitutionem, temperiem, mutationes, pendere ex aeris constitutione, gravitatione, mutatione notius est, quam ut demonstratione egeat. Hinc vero manare inclinationes quasdam & mores, atque ad effectus propensiones perspicuum est. Certe non alia potissimum est ratio cur climatum diversorum Nationes diversis sint temperamentis præditæ, diversis moribus, affectibus. Quum vero Astra aut lumine, aut motu, aut effusione alterius subtilissimi fluidi, aut mutua gravitatione, vel actione alia quacumque constitutionem aeris commutent, in eumque agant vi maxima, certe & in nos influunt, aguntque. Pendet vero a corpore mens ita, ut ne cogitetur quidem a nobis nisi ex commotionibus sensuum atque cerebri. Ergo, &

in

(a) *Lib. 3. de liber. arb. cap. 4.*

in Mentem Astra influunt: influunt autem vi maxima; obniti ergo contra non possumus. Quod si videamur plerumque obniti contra hujusmodi impressiones, id fit quia validioribus concedimus: quo modo si quis a duabus causis ex oppositis partibus prematur ab A viribus = 6, a C viribus = 3, dum repellit C facile putabit vi resistere, quum si animadvertat, id fit, quia ab A validius impellitur. Nec refert, eam vim nos non animadvertere: nam quum constet cordis, pulmonumque motus necessarios esse non liberos, ne eos quidem in nobis vi fieri persentiscimus, nec eos spectamus, nisi velut quos ipsi lubentissime efficiamus, quos lubenter tantum patimur. Addunt, nisi id esset, qui posset intelligi futura libera ab Astrologis, qui *judicarii* dicuntur prævideri posse & confidenter prædici? Nunc autem hujusmodi prædictionum plenæ omnes sunt historiæ, ut qui velit eas narrationes omnes velut fabulas traducere, ei necesse sit omnem pudorem exuere. Atque hunc ferme in modum *Tertiani*, quos ego fanaticos appello.

§. 38. Cui argumentationi nihil esset ut pluribus responderemus, quando superius explicita ea omnis est res, demonstratumque, corporis impressiones inter motiva rationis, adeoque libertatis referenda esse, aut, si mavis *concausas determinantes*, non vim inferentes necessariam; nisi quædam essent, quæ hoc in loco expediri paucis oporteret. Atque primum non negamus [neque enim hic ea de re sumus solliciti] temperiem nostram ab Astris quoque plurimum pendere, quum pendeat ab aere, in quem illa quocumque tandem modo agunt. Interea id non magis libertati officit, quam propensiones temperamentorum. Nempe quum ea omnia rationem consultatricem super bonis aut malis objectivis non auferant, efficere quidem possunt ut vim quamdam sentiamus, quæ nos illiciat, atque permoveat, cogere vero, & rapere nequeunt. Intima id confirmamus conscientia. Decipimur, inquiunt, quod proximas tantum causas electionum nostrarum, aut aversionum consideramus, remotiores minime prospicimus. At principio, si in iis, quæ omnes homines vivide & clare

clare sentiunt, hallucinantur; commutabuntur tantum humana vocabula, & quæ ignoratio dicitur appellabitur scientia, scientia vero ignoratio: res autem ipsæ permanebunt eædem. Deinde rogamus, remotiores illæ causæ libertatem flectunt operationis mediate, an immediate? nemo posterius dixerit, nam quæ a nobis actiones sine ratione fiunt, liberæ non dicuntur: super his non disceptamus. Si prius, erunt ergo *libertatis* fortasse motiva, non causæ vim inferentes. Scilicet, quotiescumque motiva proxima libertatem nostram determinantia in ratione sunt, homini semper sua constat libertas, ut demonstratum est.

§. 39. Jam vero proferuntur in medium Astrologi judicarii, *gens hominum*, ut perbelle Tacitus vocat, *potentibus insidum*, *sperantibus fallax*, *quod in Civitate nostra vetabitur semper, & retinebitur*. Eorum prædictionibus plenas esse historias Fati Astronomici assertores prædicant. At id argumentum vulgi potius fraudum ignari approbationem, quam philosophorum, mereri potest. Non quod propensiones quasdam hominum generatim non agnoscant plerumque, non isti de trivio Astrologi, sed prudentes & perspicaces omnes, atque inde probabilibus conjecturis proventuras actiones non pervideant; sed quod magna illa confidentia perridicula sit, & eventis ipsis refellatur. Profecto ubi cetera desint manifestæ fraudis argumenta, at illud non leve certe est, quod scite Ennius protulit.

*Qui aliis monstrant viam sibi semitas ignorant.*

Referendæ essent in tabellas circulatorum hujusmodi prædictiones, ut quæ mentiantur, quæ certa pronuncient, dimetiri posset. At nunc apud popellum, ut solet, plus potest vera una opere completa prædictio, quam miriades mendaciorum. Inde alienorum bonorum insidiatoribus & captatoribus prædientia & temeritas. Nec deterrentur, quum deteguntur: se quilibet animat Tiresiæ Horatiani verbis (a),

... neu, si vaser unus, & alter  
Insidiatorem præroso fugerit bamo,

Aut

(a). Horat. lib. 2. satyra 3.

*Aut spem deponas, aut artem illusum omittas.*

*Persta atque obdura, seu rubra canicula findet.*

*Infantes statuas, seu pingui tentus omaso*

*Furius hybernas cana nive conspuet alpes.*

In quo isti egregie divisiunt .... perraro hæc alea fallit.  
Sed tam docte & accurate est ea res a Cicerone (a) per-  
tractata, ut orationem nostram non exigit.

# C A P. V.

*De propensionibus & habitibus, tum  
de memoria.*

*Prop. XLIV.* **P**ropensiones ab *bonum*, & *verum* ge-  
neratim, naturales sunt homini; le-  
gesque naturæ humanæ mechanicæ, quibus illa ad con-  
sentaneos sibi fines fertur.

D. Quæ propensiones & in omnibus reperiantur ho-  
minibus, & in omni hominum ætate, quæque neque  
intenduntur unquam, neque remittuntur, eæ profecto  
haberi debent pro naturalibus totius generis humani  
propensionibus; quo modo quæ qualitates & in omni-  
bus corporibus, quæ observari potuere, insunt, & ne-  
que remittuntur, neque intenduntur, qualitates habentur  
naturales omnium corporum (b); ejus autem gene-  
ris sunt propensiones erga bonum & verum generatim.  
Nam primum adeo est omnium hominum, omniumque  
ætatum, ut communis sit etiam brutarum animantium;  
ut dubitari non possit; quin naturalis sit & insita *na-  
turæ animali*. Altera vero tam est hominum naturalis  
& communis, quam curiositas, quæ nihil aliud est;  
nisi propensio ad verum. Ex quo manifeste sequitur;  
esse illas naturæ humanæ leges mechanicas. Nimirum  
non alia est philosophis *lex naturæ mechanica*, nisi eā;  
cujus; ut inquit Vvolsius, in sola Dei voluntate sit ratio  
sufficiens; quales sunt vires *attrahrix*; gravitationis  
Planetarum, aliæque in inanimis rebus. Quum ergo

(a) *In libris de divinat. Adde Picum adversus Astrologos:*

(b) *Lex est Newton. probata ceteris.*



propensiones illæ sint naturales naturæ humanæ; *naturalium vero causa Deus*; leges naturæ mechanicæ sunt habendæ. Quod vero quidam ajunt ex *usu rerum* eas nasci propensiones, ii non advertunt usum esse non posse sine illis, adeoque usum omnem illas prævertere. Ceterum non sine magna supremi Numinis providentia id fieri intelligendum est, ut homo non sola ratione, & libertate ad suum finem, eique adaptata media ducatur, sed vi etiam ipsius naturæ impellatur, ut scilicet ubi ratione & libertate sit facile abuti, non possit non iis naturæ legibus obsequi. Qua ex re illud etiam intelligitur; qua ratione fiat, ut hominum mores, atque humanæ res, quæ in quibusdam hominum cœtibus videntur a veteri vita & institutis tam longe discessisse, recurrant, circumque quemdam perficiant. Quod nempe, quemadmodum elateres vi compressi a naturali sua figura inflectuntur, quam induunt statim atque vis concesserit; ita distrahi vi, aut ratione naturalia possunt, convelli funditus nequeunt: itaque cedunt tantisper, mox reditura. Intelligitur & illud, cur quum cæteræ peculiare propensiones, aut adversationes neque eadem in omnibus sint, & ætatibus, temporibusque aliæ atque aliæ: naturales vero illæ immutabiles: nam *naturalia*, ut inquit Philosophi, *immutabilia*. Atque hæc quum sint perspete Aristoteles, vir in primis acutus & accuratus, *scientiæ* quidem *moralis*, qua formatur homo ad beatitudinem, initium fecit ab hoc beatitudinis, idest summi boni, naturali desiderio: *metaphysicæ* vero, idest *universalis scientiæ*, ab ingenito desiderio veri. Quod nempe ut natura omnes cupiunt esse beati, ducendique sint ad veram beatitudinem *recta* directione & conformatione ingenitæ illius propensionis: ita natura ipsa omnes scire cupiunt, pertrahendique sunt ad veram sapientiam accurata & industria curiositatis propagatione ad utilia & egregia. Nec aliter ego censeo systemata moralia, & theoreticæ sapientiæ diducenda, & contexenda, quam moderatione quoad fieri potest naturaliori, & simpliciori duarum illarum natu-

ræ humanæ propensionum. Quomodo naturali fluminis impetu, paulo in rem suam flexo cursu, sata industrius agriculator irrigat. Quæ qui observant attente, ii profecto animadvertunt, in plurimis emendari posse præsentia disciplinarum systemata, ut sint magis naturæ humanæ consentanea.

*Prop. XLV.* Propensio se conservandi, tum veneris appetitus, propensiones sunt naturales, atque duæ alteræ naturæ humanæ mechanicæ leges.

D. Nam æque & in omnibus sunt; & immutabiles, & ante omnem usum, quum ex iis potius omnis usus proficiscatur. Ita quatuor habemus præcipuas naturæ humanæ leges mechanicas naturales, quibus homines vel imprudentes ad se suumque genus conservandum, atque perficiendum feruntur. Quanta autem earum sit in vita humana necessitas & utilitas, inde intelligere possumus, quod earum nulla sit, qua sublata, non tota hominum vita funditus perturbetur. Nam sublata propensione in ipsum bonum, efficitur ut ne quærat quidem quidpiam boni: quumque homines non sint entia sibi *sufficientissima*; consequitur ut sint semper misera. Tum propensio in bonum inutilis esset, aut nullo modo esse posset sine propensione in verum: hæc enim bona perquiruntur, quibus illa fruitur. Deinde amor nostri ipsorum nisi esset naturalis & necessarius, quum infinitæ sint vitæ perdendæ rationes, brevi hominibus deserta esset Tellus. Tandem Veneris appetitu extirpato a natura animali non ultra hominis ætatem habitaretur Tellus. Quæ si Athei cogitent, non possunt non clare intelligere, quanta divinæ alicujus Mentis cura natura humana sit conformata, ut nihil in illa sit naturale quod non hominis fini apte respondeat. Non igitur Theologia tantum physica, sed ipsa in primis metaphysica, supremæ divinitatis cura omnia in universo geri perspicue demonstrat. Jam [ut ad institutum redeamus] attente philosophus has leges recolere debet, qui operationum humanarum principia determinantia, fundamenta, primas quasdam in

in humana natura causas [ *resorts* Galli vocant ] sit accurate explicaturus (a) : quandoquidem nihil demonstra-

tu

(a) *Sed & iis in primis hujusmodi rerum cognitio necessaria est , qui ad res humanas gubernandas accedunt . Nam adversante natura imperium nec stabile esse potest , nec peccatum , hominesque , quorum est ingenium elasticum , perpetuo aut resilire , aut irrumpere conantes , maxima vi sunt cobibendi , quæ si tantisper remittat , itidem uti liberi elateres , perumpunt , atque evertunt omnia . In id potius danda est opera , ut primigenias illas propensiones , quibus homines duci & amant & volunt , sic in publicam rem flectant , ut omnes intelligant , se ire , non trahi , rem suam ac utilitatem agi , subdi omnes legi , ut liberi sint , vim nemini inferri . Pueros ergo , in quibus natura adhuc integra est , & sola , expertus sum pluries , invitos ac coactos , fere nihil , lubentes & blanditiis captos ea efficere , quæ supra vires eorum videri potuissent . Adeo ingenium nobis coactionis impatiens natura dedit !*

*Habent autem primæ illæ duæ propensiones , in bonum , & in verum magnum illud inter se discrimen , ut prior vi languescat , altera intendatur . Artes humanæ vitæ necessarias extirpaverit quisquis homines invitos ad eas adegerit ; si sua cuique libertas relinquatur , si earum magnæ utilitates ob oculos ponantur , tum alacres omnes incumbant , ac nihil est tam incredibile , quod non efficiant . Efficiunt idem si a naturæ suæ necessitatibus impellantur : voluptatem nempe suam & ingenium sequitur quisque alacer ; naturæ paret libenter , idem qui imperiis in rebus alieni fastidiosus est . Inde fit ut gloriæ amor , voluptas , luxus plures artes , aut artium ornamenta invexerint , quam leges omnes , aut minæ . Contra autem propensio in verum vi ac minis , tum quacunque re , quæ violentiæ sit persimilis , velut arcanis atque enigmatibus , mirum in modum intenditur : curiositas prima est , quæ hæc sequitur ; ea cerebri fibræ contrahuntur ; inde vis major , quæ quoniam nos angit , & infelicitat usque dum rem ipsi digito contigerimus , in vetita impellit . Opinor si quis severa sanctione prohibuerit inquiri ab hominibus*

tu facilius est, quam omnes humanas actiones provenire ex varia modificatione quatuor illarum Legum naturalium: scilicet modificatæ illæ ratione, & conversatione, in peculiare evadunt inclinationes, aut declinationes, quibus, ut in superiori appendice demonstratum est, homines regi solent. Neque tamen concludi quidquam ex ea re potest adversus utilitatem aut necessitatem legum naturæ moralium; constat enim sua illis necessitas, & utilitas in eo, quod peculiare inclinationes, atque hinc proficiscentes actiones emendant & formant, emendata, & formata ratione, cujus illæ velut supplementum sunt; tum sanctione pœnali plurimum & ipsæ voluntatem permoveant.

*Prop. XLVI.* Omnes habitus exercitatione acquiruntur & intenduntur, desuetudine remittuntur, aut delentur omnino: delentur etiam, aut obtunduntur contrariis habitibus. Et quidem de habitibus Mentis seu

theo-

*in magneticæ attractionis causam, brevi eam detectum iri. Sunt qui scripsere, philosophos præmio excitandos: nec nego posse plurimum in animis nostris præmii spem. Sed voluptatis ea est natura, ut facillime quis possit illam repudiare: dolori & inquietudini nemo unus concesserit. Ita fit ut acrius hinc exagitemur, quam a voluptate permoveamur. Ac vero vim hominis actuosam vehementius inquietudo vellicat & excitat, lenius voluptas. Est igitur ad hanc rem quod pertinet curiosum hominis ingenium flammæ persimile, quæ quo violentius comprimitur, eo vehementior ac voracior evadit. Atque hæc quum per se sunt perspicua, tum tota historia litteraria confirmantur: nulli enim errores quantumvis monstruosi tam publice grassati unquam sunt, quam qui severius vetiti; ut si blande ac palam expositi omnium fuissent oculis, brevi viluissent; ac fuissent irrisi. Itaque probo ego illos, qui istuc ducere, Ridiculum acri plerumque fortius ac melius secatur rem. Nam iidem homines qui tam curiose in occulta & vetita nituntur, nihil tamen magis verentur, quam ne publice rideantur, efficitque publica irrisio, quod nulla vis, ut vires naturæ humanæ omnes quasi dissipet, & alio convertat.*

theoreticarum disciplinarum, seu moralium virtutum, atque mechanicis corporis juxta id affirmo. Observationes enim perpetuæ super utrisque abunde id demonstrant. Nec ullus habitus in medium proferri potest, in quo id non obtineat. Quamquam quoniam morales virtutes, & a naturæ temperie plurimum quoque pendeant, minus theoretici disciplinarum habitus, aut habitus artium; facilins isti, quam illæ defuetudine amittuntur.

*Prop. XLVII.* Habitum nullus est menti congenitus. Nempe habitus omnes intenduntur & remittuntur, exercitatione acquiruntur, defuetudine delentur [prop. 46.]; quæ autem talia sunt naturalia, & ingenta Menti esse nequeunt. Vide ut eam rem præclare Aristoteles sub initium Ethicorum Nicomachiorum persequitur.

*Prop. XLVIII.* Omnes habitus animi simul & corporis sunt.

D. Habitus sunt facultates actuum exercitatione acquisitæ [prop. 46.]; in iis ergo subjectis, quorum actuum exercitatione acquiruntur; acquiruntur exercitatione actuum mentis simul & corporis: quandoquidem nullæ esse possunt actiones animi quibus totidem non respondeant in corpore; in utroque igitur sunt, seu potius in eo homine, qui ex unione Mentis & corporis existit.

*Schol.* Inde intelligitur, cur habitus, qui animi dicuntur, aut debilitentur; aut evanescant omnino, fracto morbis aut ætate corpore: & item cur qui habitus dici solent corporis, torpescant paulatim, animo ab iis abducto, aliisque rebus intento. Cæterum agnoscendum est esse habitus quosdam qui Mente magis exercentur, quam corpore; alii qui e contrario magis corpore quam mente; esseque alios vitæ sensitivæ; qui ab habitibus mentis theoreticis discernuntur manifesto. Ex. gr. Habitus scientiarum theoreticarum Mente plus, corpore minus constant: habitus artium mechanicarum corpore magis, quam mente: habitus virtutum moralium voluntate & temperamento magis, quam ratione. Quod dico, non quod totidem habituum

subiecta sit distinguenda, in quo laborarunt Scholaſtici, ſed ut quid poſſimum in ſingulis habitibus dominetur indicem.

*Prop. XLIX.* Quæ actiones aut majori animi attentione exercentur, aut intenſiori aliquo affectu, aut voluptate & dolore, eæ impreſſionem in nobis faciunt altiore, & diuturniore. Exploratum eſt ratione & experientia. Itaque qui habitus actionibus ejuſmodi acquiruntur, & facilius acquiruntur, & ſunt diuturniores. Non ſecus atque veſtigia, quæ majori vi in tenellis plantis imprimuntur, & altiora ſunt, & diuturniora.

*Prop. L.* Habitus humani quorū plures fuerint, eo debiliores evadunt. Appello ad experimenta. Sed ejus rei ratio in vi naturæ humanæ finita continetur. Scilicet habitus conſervari nequeunt ſine vi exercente: quo minor hæc vis evadit, eo minus facultatem exercitio conſervare potis eſt. At ea decreſcit diviſa: ergo in plures habitus diſtracta, minor ejus pars ſingulis inbæret; ex quo fit ut debiliores evadant. Quia ex re moniti eſſe debent, qui egregii & excellentes in facultate aliqua eſſe cupiunt, ut ne pluribus animum intendant: nullo enim modo finita naturæ noſtræ vis omnibus eſſe par poteſt. Et quemadmodum ſi eidem ſolo plura quam ferre poſſit ſemina commiſeris, detrahes omnibus alimentum; ita pluribus intentus animus mediocris quidem eſſe in illis poteſt, ſummus non poteſt.

*Coroll.* Eadem eſt ratio, cur habitus contrariis enerventur, & paulatim evaneſcant.

*Prop. LI.* Memoria eſt habitus.

D. Omne ſcilicet habituum habet proprietates. 1. ingenita non eſt; exercitatione acquiritur. 2. eaque tenacius memoria hærent, quæ pluries, & frequentius animo reſcitant. 3. & quidem iis actionibus, quæ aut majori attentione, aut cum voluptate & dolore, aut cum affectibus paullo vehementioribus, fiunt facilius, & eſt diuturnior. 4. deſuetudine debilitatur, & evaneſcit. 5. rerum numero & varietate laborat, & hebeſcit. 6. iis omnibus quibus vis humanæ naturæ corrobo-

roboretur, aut frangitur, & memoria corroboratur, aut debilitatur, velut aere, cibis, medicamentis; tum senecta, morbis &c. 7. minus fatigata & post otia major. Quæ omnia ita sunt habituum propria, ut perspicuum sit memoriam esse habitum (a).

*Schol.* Quod spectat ad memoriam, fuere, qui putarunt, eam considerari debere velut idearum penu: eas ideas dixere vestigia in cerebro ab objectis externis facta: itaque in cerebro hoc penu posuere. Protulere eam in rem Cartesii auctoritatem. Sed nec ea doctrina intelligi ullo modo potest, & a Cartesii doctrina longe aberrat. Nam nec ullo modo intelligi potest vestigia in cerebro ab objectis externis facta haberi posse pro eorum objectorum imaginibus: nec, si id tantisper detur, sibi quisquam persuadebit, tot rerum miriades posse distincta in cerebro, parva illa & molli materia, habere vestigia. Cartesius vero vestigiorum quidem vocabulo utitur, sed nihil aliud eo intelligit, nisi facilitatem cerebri, seu habitum actionibus repetitis acquisitum: nam illa vestigia, inquit, nihil aliud sunt, quam quod pori cerebri, per quos spiritus antea cœperunt suum cursum, acquisiverint eo pacto FACILITATEM majorem, quam alii, sese rursus aperiendi eodem modo spiritibus, qui ad se veniunt (b), quo pacto ille reminiscenciam explicat. Eodem modo Malebranchius memoriam explicuit, posuitque illam in habitu cerebri, seu in flexibilitate fibrillarum cerebri actibus repetitis acquisita (c). Nec alio modo se rem habere suadent phænomena. Scilicet quemadmodum in ceteris habitibus actus ita se excipiunt, ut primo posito quasi natura sua sequantur ceteri, quod in habitibus saltandi, cahendi, pulsandi instrumenta musica, observatur, ita in memoria excitata idea quavis, aliæ, quas cum illa didicimus consociare, subinde excitantur, ut altera alteram excipiat expeditius & distinctius, aut minus expedite, minus.

N 3

(a) Copiosius hæc persequitur Lockius de intellectu humano lib. 2. cap. x.

(b) De pass. Animæ part. 1. art. 42.

(c) Lib. 2. de inq. vers. cap. 5. §. 3.

nusque distincte, pro perfectione & intensitate habitus majori aut minori. Ceterum quacumque tandem via reminiscencia in nobis fieri contingat, id certum est, nullam esse in rerum natura rem admiratione nostra digniorem, & ex qua promptius in supremæ Dei sapientiæ & potentiæ contemplationem provehi debeamus, quam memoriam [a].

*Prop. LII.* Omnes habitus constant memoria & reminiscencia.

D. Omnes habitus sunt facilitates actus continuata & harmonica serie producendi, suntque animi simul & corporis (prop. 48.); ergo in omnibus habitibus conjunctæ sunt motionibus corporeis totidem animi actiones, perceptiones nempe & voluntates incredibili celeritate percurrentes; quum id sit memoria; omnes habitus memoria constant. Inde est, ut qui exercere habitum aliquem corporeum cœpit, si alibi mens abstrahatur, perturbatis illum actibus exercere pergit.

*Prop. LIII.* Facultas ratiocinandi habitus est, isque varius, prout in variis objectis exercitus, etsi vis ipsa ratiocinandi innata sit. Nam facultas exercitatione acquiritur, desuetudine amittitur, habetque ceteras omnes habituum qualitates.

*Prop. LIV.* Tota humana eruditio duobus generatim habitibus continetur, qui interea relatione ad objecta velut multiplices & varii spectari possunt.

D. Tota eruditio, scientia, sapientia humana continetur numero quodam idearum, idest memoria; & facultate super iis ratiocinandi, idest eas contexendi, antecedentia, consequentia, connexa pervidendi: at & memoria habitus est (prop. 51.) & habitus facultas ratiocinandi (prop. 53.); duobus ergo continetur habitibus,

CA-

[a] Vide quæ ea super re scribit vir doctus & mihi amicissimus Antonius Muratorius sub initium Philosophiæ moralis.



## C A P. VI.

*De causis physicis, voluptatis, & doloris,  
tum de affectibus.*

Sunt fortassis, qui mirabuntur, me geometrica methodo ea comprehensum ire, quæ nulla ratione constant, sed ex quadam potius naturæ perturbatione existunt. Esse cum ratione insanire, ut ille dicebat, affectus, qui omnes ex neglecto rationis imperio emergunt, ad rationem exigere. Addent affectus vitia esse & morbos naturæ humanæ, omnesque ex veteri illo Adami peccato defluxisse, curandumque magis esse ut in ordinem tumultuantes redigantur, quam ut illo systemate explicentur. At mea sententia semper fuit, nihil in rerum fieri natura, quod non certis statutisque causis, summaque ratione fiat; adeoque omnia esse in natura connexa & copulata; multaque idcirco haberi minime intelligibilia, aut quæ minus possint demonstrari, aut quod ea majores nostri velut desperatæ habuere indaginis, aut quod nos ea, qua par est, diligentia & labore, numquam pervestigaverimus. Qui vero putant morbos esse humanæ naturæ affectus etiam ubi minus tumultuant, eique propterea noxios, nã ii magnum operæ pretium facturi sunt, si in rem paulo attentius inquirent. Quod si qui molestius rogent, ecquid ad rem metaphysicam hæc spectent; respondemus eadem ratione hæc sibi Metaphysicam usurpare posse, qua ad se revocat tractationem de mente & natura hominis: ejus nempe naturæ hæc consectaria sunt, ut demonstrabimus. Naturam vero humanam quum dico, eam intelligo quæ est, non quæ aut unquam extitit, aut quæ olim erit. Hanc philosophum contemplari debere censeo, si humano generi esse velit utilis: nam qui hominem non in Adæ sæce spectant natum, sed velut in Republica Platonis positum, ii genium quidem in philosophando præferre possunt, utiles nullo modo esse possunt. Philosophum

ergo, qui æternitati scribere velit, *naturam exprimere* oportere censeo, non *eam abstrahere*. Quo propius naturæ accesserit, eo sua dogmata diuturniora habeat: quo ab ea abscesserit remotius, eo sciat sua esse brevi peritura, quia vera minus: veri enim mensura in natura est, non in opinione: itaque is se vero accessisse proximus æstimare debet, qui naturam rerum verius expresserit. Cetera ingeniorum sunt lusus, indigni in quibus viri graves tempus terant. Nec sane video, quum Philosophia experimentalis tantopere probetur, ac jure quidem & merito probetur, cur ea a nobis exordiri non debeat.

*Prop. LV.* Voluptatum & dolorum omnium causæ physicæ sunt commotiones in corpore excitatæ, quibus corporis harmonia aut conservatur, aut turbatur, aut turbata restituitur (a).

D. Causas hoc in loco physicas dicimus eas, quibus positis semper existit effectus, ablatis, evanescit, parum nunc curiosi, utrum influxione id fiat, nec ne: at hujusmodi sunt commotiones harmoniæ corporis, seu in anima & vita atque energia hominis *sensitiva* excitatæ: nempe iis positis, sensus doloris aut voluptatis repente existit, sublatis, cedit; & ita quidem ut nullus sit dolor cujuscunque generis, nulla voluptas, quæ non eas motiones consequatur. Causæ ergo physicæ hujus sensus non aliæ sunt, quam commotiones illæ.

1. Ejus argumentationis assumptionem paucis demonstrabo. Ac primum, quod ad hanc rem spectat, quatuor omnino statuo hominis status. 1. voluptatis æquabilis, seu lætitiæ minime gestientis, sed pacatæ tranquillitatis. 2. Voluptatis gestientis quum animi, tum corporis, ut vocari solent. 3. æquabilis doloris, seu tristitiæ per modum habitus perdurantis, minime tamen dilacerantis. 4. doloris impetuosius, & dilacerantis. Scio disputatum acerrime esse ea super re a veteribus Græciæ philosophis (b); sed eorum argumentationes nihil moror.

2. Jam

[a] *Ea Platonis est doctrina in Philebo communi philosophorum reliquorum consensione probata.*

[b] *Plato, Aristoteles, Plutarchus sæpe eam quaestionem memorant. Vide & Ciceronem lib. 1. de Finibus.*

2. Jam experimur continenter eorum statum nullum esse, cujus physica & immediata causa non sit energia vitæ sensitivæ seu perturbata, seu restituta, seu leniter & instar amnis placide fluens. Atque ut a priori statu exordiar, observatum est Santorio (a), tunc nos hilariiores esse, & magis ex animo, quum corporis perspiratio nec nimia est, nec deficit; tristiores vero, ubi minor, quam par sit, aut etiam nimia. Cujus status animi manifesta causa est, prioris quidem justæ energię vitalis harmonia, posterioris excessu, vel defectu perturbata. Idem ceteris evacuationibus confirmatur: enim vero perpetuo experior, perspiratione, aliisque evacuationibus paulo retardatis, obtundi mentem, corpus fieri gravius, atque molestam studiis melancholiam dominari: magna perspiratione, aut purgatione quacumque reparari statim hæc omnia. Sunt quidem status lætitiæ, aut tristitiæ ex perceptionibus rerum pulchrarum, aut tristium provenientes, sed non immediate. Cogitatio rerum bonarum & pulchrarum agitationem majorem excitat in humani corporis fluidis; inde perspiratio justa, aliique motus expediti: hinc vero lætitia, quæ semper est in ratione harum motionum, & vasorum dilatationis, ac fluidorum expediti cursus. Inde reddenda ratio, cur lacrymis hilarescant melancholici: cur lætior mens post lacrimas. Rerum contrariorum & tristium cogitatio coarctat fluidorum vasa, motum retardat; hinc turbatio & tristitia. Hinc quoque tristes illi perpetuo, qui durioribus & adustioribus sunt compacti fibris, lentiorique fluidorum motu, rara perspiratione, impedita evacuatione.

3. Exploratum est affectus omnes esse conjunctos cum motione quadam præternaturali fluidorum, aliarumque corporis partium. Esse autem potest ea motio 1. aut æqualis & lenis. 2. aut æqualis in toto corpore, sed paulo intensior. 3. aut minime æqualis in toto corpore, sed quæ naturales corporis actiones præpediat. 4. aut quæ magnopere perturbat. Prima æquabilem voluptatem gignit, & lætitiā, qualis amor sub sui

ini-

[a] Santorius in *Statica humani corporis medica*.

initium, & quum, ut inquit, platonius est. Altera paulo intensiorem voluptatem. At quum quo intensior motus evadit, eo est vicinior turbationi, inde intensissimam lætitiā mæror comitatur, seu statim infra naturalem eo motu compresso, seu paulatim. Tertia levem tristitiā progignit, & inquietudinem, veluti paulo ferventior amor. Quarta intensum animi dolorem. Atque ea generalis est ratio expediendi, cur omnes affectus, qui ex boni opinione nascuntur lætitiā, qui ex mali perceptione tristitiā, secum adnexā habeant: & cur quidam sint, qui aut mixtā cum lætitiā tristitiā, aut *falsa gaudia* creent.

4. Eodem modo excitantur voluptates & dolores corporis gestientes. Ex. g. defectu cibi vel potionis, sublato objecto, in quo ventriculi actio exseratur, necesse est ut harmonia vitæ perturbetur; inde dolor famis, aut sitis. Cibo aut potione quum restituitur, voluptas oritur, quæ semper est in ratione cedentium graduum doloris sitis aut famis. Idem contingit in usu aliorum sensuum, ut facile quivis per se intelligere potest.

5. Quum ergo hæc clare & continue experiantur homines, ratione abutuntur, qui alias dolorum & voluptatum causas physicas in medium proferunt. Causas autem dico physicas, quod quid Menti ipsi, dum dolore aut voluptate afficitur, contingat, id me ignorare ingenue fateor. Nec raro subit animum esse dolores omnes, & voluptates animæ cujusdam mediæ & corporeæ: nam phenomena dolorum & voluptatum vix locum habere posse videntur in substantia corporea. 1. Transitus a statu doloris ad statum voluptatis intelligi nequit sine mutatione quadam intrinseca subjecti: in animo vero incorporeo nec naturæ ulla mutatio intelligi potest, & sola operationum intellectus, aut voluntatis vicissitudo hunc sensum efficere nequit, quemadmodum perpetua experientia comprobatur. 2. Sunt in voluptate & dolore quidam gradus: intelligi autem nequit, qui substantia incorporea intendi & remitti possit. Sed quum sciam, non  
id-

idcirco aliquod esse non posse, quod non intelligam, agnoscamque eam opinionem non satis cum religione consentire, præstat rationi diffidere, quam de obsequio in illam vel hilum demere. Scilicet constat Religio divina ratione, cui, nisi velimus furere, postponenda est humana ratio.

*Coroll. 1.* Voluptates & dolores necessario consequuntur naturam humanam, ut illa scilicet nequeat nunc esse, quæ non sit iis subiecta. Nimirum nascuntur ex iis physicis causis, quæ, ea existente natura humana, quæ est, nequeunt non in illa locum habere. Præterea sunt hæ affectiones naturæ animalis, idcirco animantibus omnibus communes: quum autem tota insit in homine natura animalis, & necessario eam naturam affectiones doloris & voluptatis consequantur; necessario quoque sequuntur naturam humanam, seu, si scholæ formulis loqui licet, sunt ita naturæ humanæ propria, ut *risibilitas*. Ex quo sequitur, ut quum Adam integram habuerit naturam humanam, fuerit natura sua voluptatis & doloris capax, etiamsi in statu innocentiae, ut in beatitudine quadam naturali, sine ullo dolore victurus fuisset; quod nempe partim ratione divinitus hausta; partim imperio animi majore in res corporeas [a], partim quoque peculiari Dei ipsius cura & subsidio, causas omnes physicas doloris & miseriæ cavisset. Et quo modo Adam *gratia*, non natura fuisset immortalis, quod Theologi magna consensione docent; ita *gratia*, non *natura*, dolores omnes evasisset.

Sci-

[a] Quid si ante peccatum Tellus ipsa sæcundior & hominum integrorum felicitati faciendæ accommodatior fuisse dicetur? Nam divinæ scripturæ aperte dicunt, Tellurem a Deo post primorum mortalium peccatum maledictam, spinas & tribulos germinasse. Quod si Vodvvardi opinio vera est, diluvii tempore totam dissolutam, ac renatam inde corruptis hominibus puniendis, accommodatam, intelligitur facilius, qui tot inde in nos mala imperium habere potuerint, quibus homines integri caruissent. Vide ut ea de re is disserat in *Geographia physica*.

Scilicet ut in Adamo connexa erant immortalitas & beatitudo illa naturalis: ita mortalitas & miseria. Jam id Moses aperte indicat, qui & cibo usos primos homines etiam innocentes docet; cujus usus intelligi nequit; sine titillatione famis; & Evam salivam fecisse ad spectu pomi *pulchri visu, & suavis ad vescendum*. Natura ergo fuere primi homines voluptatis & doloris capaces; a dolore immunes rationis, majoris libertatis, & gratiæ dono: nec doloris nisi imperium ex peccato profluxit, inducta mortalitate, quæ B. Augustini doctrina est.

Qua ex re etiam intelligitur, quid respondendum sit iis, qui rogant, cum ex peccato Adæ dolores in vitam humanam inundaverint, ecquid peccavere bruta, quæ doloribus & ipsa affligantur? quam quæstionem pluribus in locis agitavit Augustinus. Nempe ejus naturæ Creatori suo facere placuit, quæ ut voluptatis, ita doloris essent capacia, atque alteri altera compensaretur. Non ergo probari possunt, qui idcirco, aut negant bruta dolorem & voluptatem sentire; aut opinantur de voluntas in brutorum corpora fontes mentes, quorum illud cum ratione, hoc cum Religione pugnat. Sed *sub Deo justo*, inquiunt, *nemo miser, nisi mereatur*. Nempe id obtinet in iis creaturis, quæ & Dei, & rationis atque legum divinarum intelligentes factæ sunt: nec ulla suadet in naturis brutis locum habere, quæ ut pro voluptatibus nullas agunt gratias, ita pro doloribus conqueri nequeunt. Sed ea de re alibi; est enim paulo implicatior, quam ut paucis explicetur.

*Coroll. 2.* Voluptatis & doloris intensitas est in ratione intensitatis perturbatæ aut restitutæ harmoniæ. Nam intensitas effectus est in ratione intensitatis actionis causæ physicæ: Est autem perturbata, aut restituta harmonia doloris & voluptatis causa physica (prop. 55.); ergo &c.

*Prop. LVI.* Affectus omnes nascuntur ex perceptione boni, quæ operatur *voluptate*; & mali, quæ impellit *dolore* (ex intima conscientia) suntque naturæ imperus intensiores, quibus persequatur bona externa, aut mala externa aversetur.

*Prop.*

*Prop. LVII.* Omnes affectus sunt argumentum manifestum. 1. naturæ mutabilis. 2. nec infinite perfectæ. Nam sunt commotiones naturæ, quæ iis afficitur (def. 15.) & quidem impetus, qui habent intensitates, quippe qui cum voluptate, aut dolore sunt conjuncti (56.); quæ omnia, nisi in natura mutabili, intelligi nequeunt.

Deinde affectus sunt naturæ impetus intensiores, quibus persequatur bonum externum velut naturæ nostræ complementum, aut externum malum velut a quo destrui possimus aversetur (prop. 50.) quod pugnat cum natura perfectissima, quæ nec bonorum externorum indiget, ut plena sit, absoluta, sibi sufficiens, nec malis ullo modo affici potest.

*Prop. LVIII.* Affectus necessario consequuntur naturas rationales atque animales non infinite perfectas.

D. Naturæ rationales atque animales non infinite perfectæ necessario ferri debent in summum bonum, bonum ipsum generatim, quod in se non habent; adeoque & necessario averfari malum quodcumque quod timere possunt; nequeunt ergo non affici ex cujusque externi boni vel mali perceptione; qui sunt affectus, idest naturæ impetus intensiores, quibus bona externa prosequatur, aversetur mala.

*Prop. LIX.* Affectus naturam humanam necessario consequuntur.

D. Primum, affectus necessario comitantur naturas rationales atque animales finitas (prop. 58.) quum sit talis natura humana; necessario eam consequuntur. Præterea affectus omnes sunt impetus intensiores, quibus rationalis & animalis natura persequitur bonum, averfatur malum (56); qui impetus necessario sequuntur intensitatem voluptatis, aut doloris, quibus natura humana determinatur: quum autem voluptas & dolor necessario sequantur naturam humanam (coroll. 1. prop. 55.); sequuntur & affectus.

*Schol.* Est hoc in loco nobis non cum philosophis modo quibusdam, sed & cum Theologis etiam plerisque acerrima concertatio. Nam Stoici *morbos* vocabant affectus,

Atus, eosque *præternaturales motiones* definiebant [a], aut *aversas a recta ratione contra naturam animi commotiones* [b]. Jam affectus in sapientem numquam cadere pertinaciter docuere Stoici: alias negarunt esse sapientem: agunt nempe sapientes voluntate, idest constante ratione; non affectu, perturbato scilicet & incitatore appetitu [c]. Porro sunt Theologi inter Christianos quidam, qui non dubitant affectus omnes inter peccata censere, quod scilicet originem cœperint ab Adæ peccato. Ita Lutherani ferme omnes & Calviniani [d]. Non desunt qui eandem B. Augustino sententiam tribuunt: in quo profecto aberrant; quippe qui passim scribit, imperium tantum affectuum inde cœpisse [e]. At B. Thomas [f], cuius ego hominis subtiliorem hanc philosophiam in plurimis admirari soléo, rem ita composuit, ut tribueret naturæ integræ affectus ex opinione boni manantes, quos perpetuo voluptas comitatur; negaret vero eos, qui ex mali opinione progigni solent, quod ea natura ut a dolore fuit immunis, ita ab affectibus tristitiam & dolorem comitantibus. Mea non refert exquirere, qui affectus fuissent in hominibus integris: nam disserere non admodum soleo de rebus, quæ minimum nos tangunt, aut *possibilia* persequi. Id affirmo; affectus consequi necessario naturam rationalem & animalem: atqui non dubito, Adamum; ut erat immortalis, ita affectuum libidini minime ante peccatum fuisse obnoxium: sed id pronuncio audacter, tali fuisse creatum natura, quo ut dolore & voluptate, ita affectibus affici posset: alias nullam in eo naturam humanam intelligere possum.

Et

[a] Zeno apud Laer. lib. vii. sect. 100.

[b] Cic. Lib. iv. Tusc. cap. 6. & lib. 3. de finibus.

[c] Cic. ibid. Laert. lib. vii.

[d] Vide Campegium Vitringa observat. sacror. lib. 3. cap. 11. Buddeum Theol. Mor. part. i. cap. 1. sect. 6. §. 2. Et revera Lutherus & Calvinus non aliter loquuti passim esse videntur.

[e] Vid. lib. 14. de Civit. cap. 10.

[f] Prim. Part. q. 95. art. 2.



Et quemadmodum in JESU CHRISTO servatore nostro integerrima fuit natura, sed voluptatis & doloris; eorumque, qui voluptatem & dolorem comitari solent, affectuum capax, quod aperte in Evangeliiis positum est; ita esse potuit in Adamo licet innocente. Nam ego imperium in affectus illi relinquo: naturam affectuum impatientem nego. Stoicorum vero hoc dogma non possum non deridere: tantundenim est homini affectus demere, atque circulo rotunditatem; aut si mavis, triangulo æqualitatem cum tribus angulis, cujus est illa *necessaria proprietas*. Sunt præterea affectus instar *vestium* quarundam, quibus mirifica in homine excitatur, aliturque magnarum rerum affectrix vis; nec sine magnis affectibus quidam egregium & præclarum legas unquam ab hominibus factum. Ratio recta nullo impetuosiori affectu concitante constantius operatur, & æquabilius, sed eximium quidquam & distinctum efficiet unquam. Eadem, ubi natura vehementissime affecta est, velut erigitur, ac, licet paullo turbulentius, efficit tamen quæ mira videri possent naturæ humanæ vires omnes ignorantibus. Itaque Plato sæpe scribit, magnorum virorum fuisse neminem sine entusiasmo quodam, idest vehementiori affectu.

*Prop. LX.* Affectus, nisi quum ad extrema vergant, sunt homini necessarii; seu solitarium illum spectes, seu in societate constitutum.

D. Nempe conservari homo nequit nisi bonorum frui-tione, declinatione malorum: at bonis nemo perfruitur, iisque frui studet, nisi incitatus affectu voluptatis: nec quispiam aversatur mala, nisi affectu doloris disterreatur: necessarii ergo homini conservando sunt affectus.

*Schol.* Ut hujus propositionis veritas intelligatur plenius, operæ pretium erit præcipuorum humanæ naturæ affectuum paucis historiolum contexere, eorumque physicas expedire causas, tum fines & effecta demonstrare. Quumque nemo sit, qui ea de re accuratius Renato Cartesio disputaverit, in tractatione *de passionibus animæ*, pauca inde depromam in rem nostram.

1. Sex Cartesius statuit primarios affectus, admirationem, amorem, odium, cupiditatem, lætitiā, & mœrorem: ceteros esse putavit horum modificationes. Sed & motu spirituum & glandulæ pinealis eos produci omnes, augeri, conservari existimavit. Nostri hoc in loco non refert systema illud accurate expendere, qui non id nunc ex instituto agimus (a): Præcipuorum affectuum causas physicas ex illo mutuabimur, quas ille accurate investigavit, eorumque necessitatem atque utilitatem perpendemus, ut sint exemplorum loco.

2. Affectuum ordine primus, nec intensitate, & vix infimus, est admiratio. *Est ea, inquit, substantia animæ occupatio, qua fertur in considerationem attentam objectorum, quæ ipsi videntur rara & extraordinaria.* Neque in ea animi affectione, mutationem ullam sensibilem in corde aut sanguine, quod in ceteris contingit affectibus, provenire putat: ex nova tantum & insolente cerebri concussione nascitur. Sunt qui alia ex causa

(a) *Mentem is in glandula pineali sitam censuit: inde ope spirituum animalium solo voluntatis nutu corpus moderari arbitratus est. Hanc glandulam in medio cerebri ita suspensam esse statuit, ut minimo spirituum animalium motu huc illuc impellatur. Addidit hanc glandulam tot variis modis in medio cerebro suspendi, quot variis modis spiritus animales in eandem impingunt: præterea tot varia vestigia in eadem imprimi, quot variis objectis externis spiritus animales in eandem impelluntur. Hæc, quæ late ille in prima parte ejus tractationis exsequitur, principia sunt quibus ortum, & compositionem affectuum explicat. Nimium in his genio suo indulgit Cartesius. Profecto mirari satis non possumus, summum philosophum, qui firmissime statuerat, nihil affirmare, nisi quod clare & distincte perciperet, nihilque nisi ex evidentibus & claris concludere, & qui idcirco toties in Scholasticos invehens erat, occultarum qualitatum prædicatores egregios, hypothesim proferre omni occulta qualitate occultiore; quod est viri acris, ac Cartesianorum partium judicium.*

sa nasci admirationem putant. Admiratio, inquit, est quum mens uni imagini contemplandæ defixa hæret. Id evenit, quum ea imago connexa cum aliis non est, idest quum insolita & rara est. Is affectus, dum excedit, *stupor est*, qui, ut in ceteris, vitium est [a]. Dubitari tamen non potest, quin admiratio ex fibrarum cerebri contractione quadam nascatur. Ea contractione fit, ut curiosius in rem, quam admiramur, intendamus animum, ac inquiramus diligentius, nec inquirendi faciamus finem, nisi re cognita. Quod scilicet ea est, non admirationis tantum, sed omnium affectuum natura, ut nos de naturali statu paulatim dimoveant, ac propterea naturæ hominis eam faciant commotionem, qua nisi pacata, inquieti simus necesse est. Eam ob rem cavendum est iis, qui res humanas gerunt, publicis aut factis aut legibus hominum curiositatem erga ea excitare, quæ præstat esse occulta. Omnia potius adhibenda esse remedia censeo, quam ea, quæ vim quamcumque ingeniis inferendo, cerebri humani fibras contrahunt, & curiositatem vehementissimam concitant; quum ut in rebus pulchris ac utilibus, ita in pravis nunquam, ut dixi conquiescat, nisi re, qua impellitur, penitus explorata.

3. Utilitatem ejus affectus persentiscimus magnam, ut *discamus & retineamus, in memoria nostra, ea quæ antea ignoravimus* (b). Nam ex gravi illa cerebri agitatione altiora memoriæ vestigia proveniunt. Quæ utilitas est in affectibus omnibus: nam quum affectus omnes sint vehementiores commotiones, gravius, quam ex ullis aliis causis, inde afficimur, memoriæque expeditius acquiritur, & est diuturnior (prop. 49. & 51.). Sed est altera hujus affectus utilitas: nempe inde pulcherrimarum & utilium rerum inquisitio exorditur: ut accurate prorsus Plato & Aristoteles scripserint, *totius philosophiæ principium fuisse admirationem*. Itaque esset hic affectus in pueris & adolescentibus, non, ut quidam faciunt, suffocandus, sed blandè & prudenter alendus, ac ad præclara sensim inve-

Tom. II.

O

stigan-

[a] *De pass. animæ par. 2. art. 70. 71. 72. 73.* [b] *Ibid. p. 79.*

figanda flexendus. Dici vix potest quantam hæc naturæ humanæ vestis vim habeat, ac quantopere hominibus esse possit utilis, si iis applicetur, unde quidpiam præclari & utilis in genus humanum derivari potest. Accedit, quæ in alios ex admirantis situ & adspectu redundat, ut scilicet ii una excitentur ad eandem rem attentius contemplandam. Nam longe præstantissima est hæc affectuum omnium utilitas; ut scilicet externis eorum signis & characteribus una agitemur, nobisque, aut aliis caveamus, ut nihil sit tam facile homini, qui adspectu aliquo vehementissimo agitur, quam eos omnes, qui adstant, nec satis firmam rationem habent ad cavendum, veluti magica quadam virtute corripere, & excantare. Qua ex re intelligi potest, qui fiat ut Enthusiasmus, quod Aristoteles adnotavit, velut flamma quædam plurimos corripere possit. Est enim Enthusiasmus plurium affectuum vehementissimorum velut complicatio. Jam admiratio necessarium consecrarium est *mentis* finitæ: nihil enim admirari aut Deus potest, aut truncus.

4. Admirationem sequuntur *æstimatio*, aut *contemptus*: ex quibus porro magnanimitas, aut humilitas, & *abjectio*: *veneratio*, aut *despectus*; qui affectus omnino sunt necessarii, ut nempe nos ex ratione circumpositorum objectorum componamus in statibus naturæ nostræ necessariis, & externis rebus adaptatis. Scilicet non eodem modo agere nos debemus erga exilia, & nullius pretii objecta, quo erga præstantia & nobilia. Ad eos situs, atque agendi habitus illi nos facilius expeditiusque componunt affectus. Id vero quantopere vitæ humanæ præclare & sapienter gerendæ conducatur, hinc intelligere possumus, quod, ut Stoici perspektissime docuere, tota nostri tranquillitas, &, quæ hic haberi potest, beatitudo, hinc tantum fieri possit, ut *congruenter naturæ vivamus*. Vivere autem congruenter naturæ non possumus, nisi eas, quas cum rebus, a quibus aut agimur, aut circumdamur, relationes & animadvertamus, & sectemur. Ad eas vero relationes sentiendas satis a natura facultatibus instructi nascimur: sed affectibus, idest ipso naturæ nostræ sensu, iis aptamur;

mur ; ut proinde nihil in iis debeat philosophus cavere , nisi perturbationes , idest , ut dictum est , excessus , quibus fit , ut a naturæ ordine desciscamus . Atque hac in re valde ego mirari soleo Stoicos , & , qui eos perpetuo se affectari assimulat ; M. Tullium Ciceronem , qui quum illud intellexerint , oportere secundum naturam vivere , nihilque eo esse in vita præclarioris & jucundius , in affectibus non compescendis modo , sed extirpandis giganteum conatum converterint , atque naturam humanam eum in locum adigere , in quo nullo modo nec præclare , nec jucunde vivere possit , sed nec illud quidem possit , quod est secundum naturam . Contingit id enim quum ita vivitur , quum rebus natura ceteris armonice & simus & vivamus : nec vero hoc fieri ullo pacto potest , nisi eam habeamus naturam , qua iis adaptemur ; quod fieri porro nequit , nisi varie pro rerum varietate ac adspectibus componi & modificari possimus ; neque tandem hoc , nisi simus affectuum patientes . Ita ea Stoica doctrina non cum natura modo tota , sed secum quoque mirifice pugnat .

5. Amor Cartesio definitur , commotio animæ , qua illa impellitur ad se voluntate jungendum objectis , quæ ipsi convenientia videntur : odium commotio , quæ animam ad id incitat , ut velit separari se ab objectis , quæ illi videntur noxia [a] . Amore rarefit paulatim sanguis , atque fluidorum vasa dilatantur , hinc perspiratio major , & hilaritas , nisi quum modum excedit . Odio arstantur fluidorum vasa , motus fit tardior , impeditur perspiratio : inde tristitia . In amore floridus vultus & subridens , macies & squalor in odio . Amoris necessitas atque utilitas est manifesta , seu privatam hominis vitam , seu publicam spectes . Noxius esse potest quum modum excefferit , quod illi cum ceteris affectibus commune est . Et quidem non morali tantum vitæ , sed

O 2

ani-

[a] Ibid. art. 79. Eam definitionem secundum effectus esse , non secundum essentiam putavit B. S. Is definit , amor est lætitia concomitante ideæ causæ externæ , idest boni : odium tristitia concomitante ideæ causæ externæ , idest mal.

animali etiam est utilis, quum eo affectu harmonia vitæ humanæ & contineatur, & exerceatur expeditius. Sed & necessarium est odium, ut a noxiis caveamus; nec est noxium, nisi cum perturbata ratione ea odio prosequimur, quæ bona sunt & utilia (a).

## 6. Me-

[a] Inter omnes animi affectus nullus est aptior ad præclara facinora gerenda, ac virtutes heroicas gignendas & edendas, præterquam unus amor. Is & verecundos nos efficit, & honestatis studiosos, nobisque perniciosissimas alas addit ad virtutes ferme omnes, id quod quum est ex natura ipsa amoris perspicuum, tum perpetua docet historia. Quare Plato scribit in Convivio, si civitas coire, aut exercitus legi posset omnis ex amatis & amantibus, supra quam dici potest fore illam quidem beatam, omniaque generose & sancte administraturam, hunc vero fortissime & magnanime gesturum omnia. Nam & se mutuo verentes singuli ab omni injustitia & turpitudine exhorrent omnes, & se mutuo amore complectentes, communi omnium æmulatione ad nobilissimas incitarentur virtutes. Dicit hæc posset civitas heroica, atque heroicus exercitus. Ac sunt hæc quidem longe difficillima inter Adæ filios, & ut nunc sunt mores a naturæ simplicitate immane quantum diffiti, admodum rara: sed nec vacant exemplo, & in ipsa amoris natura rationem habent. Nam egregia sunt & illustria amantium facta in historiis relata, ut de hac doctrina ab eo tantum dubitari possit, qui res humanas nunquam attigit, & prima Christianorum Civitas ita mente & moribus composita fuit, ut viderentur unum habere cor, ex quo factum est, ut nulla a Patrum memoria fuerit ætas tam ferax earum virtutum, quæ hominum magis intersunt, seu ad adversa fortiter toleranda, seu ad vitiorum consequitas illecebras constantissime repellendas, seu ad ea inter se exercenda officia, ex quibus utilitas, commoditas, porremo felicitas humani generis proficisci potest. Sed & est ejus rei causa physica, in ipsa, ut dixi, amoris & hominis natura. Amor enim paulatim & leniter sanguinem rarefacit, ac fluidorum vasa dilatat: novam quoque vim fibris, id est humani corporis vectibus, tribuit, aut expeditiores

## 6. Metum Stoici definiebant, opinionem impendentis mali,

iores illas efficit. Ita fit ut mens humana augustius se domicilium & nobilius incolere tum sentiat, quam amet. Sibi suarum virium magis conscia evadit; itaque in magna & nobilissima nititur; turpia velut humilia & se suaque natura indigna despectat. Ac animadverti saepe ego, nationes, quae sub ipsis ferme mundi polis vitam degunt, geluque perpetuo obdurantur, amicitia, & misericordia, iisque affectibus, in quibus nonnihil inest amoris; gloria, ambitione, & huiusmodi aliis, aut nihil omnino, aut vix tangi, esseque feroces, truculentas; denique inhumanas, eumque ipsum, quo agitantur, in alterum sexum amorem, & caritatem quam erga partus suos praesferunt, nescio quid belluini habere, & naturalis potius esse impetus, quam delectus & amicitiae: contra qui circa tropicos habitant naturam habere molliorem; aequabilius ingenium, amore & misericordiae capi; ac nisi aut vetera vitia obstant, aut metus vel suspicio animent, illustrium virtutum esse capaces. Adeo naturam emollit, & ad honesta & pulchra hic unus agit affectus! Quamobrem sic habeo, nulla ex re ticere clarius conicere interiorum animi humani habitum & constitutionem, quam ex amore; quo qui facile capiuntur, amabiles ii sunt, ingenio aequabiles, sociales, honestatis studiosi, & ad virtutem facti: qui minus, truces, subdoli, fallaces, ciwes aut inepti, aut perditissimi; ad scelera quævis suscipienda prompti. Interea animadvertendum est, amorem quem dicimus, eum nos intelligere, qui amicitiae similior sit, aut habeat ejus plurimum, non eum animale tantum impetum, quo velut mechanica lege sexus in se mutuo feruntur. Illum; non hunc, nos amorem architectum habemus Civitatum; artium, literarum: eum & tutum omnium quem socialium; tum divinarum stimulum: Atque utinam ii, qui infantes & pueros educant in hoc operam praesertim locent suam; ut in iis nobitem hunc amicitiae flammam, cujus scintillas a natura ipsa haurimus omnes, alant, & ad egregia quaque impellant! Est enim hoc dolendum, ut puero- rum institutores mentem excolant attentissime; vitiosam

**mali**, quod intolerabile esse videatur (a). Et is naturam rationalem animalem consequitur necessario, non secus atque *lætitia*, & *tristitia*: nempe natura ita sumus comparati, ut ex perceptione boni, quod quocumque modo nos spectet, lætemur; ex perceptione mali, quod quacumque ratione ad nos pertinere possit, tristemur. Est *lætitia* persensio boni præsentis: *spes* futuri, ut *spes* sit *minor lætitia*. At persensio mali præsentis *tristitia* est; futuri *metus*, seu minus vehemens *tristitia*: qui cum sine ulla spe est impendentis mali evadendi, est desperatio. Ut *lætitia*, ejusque species omnes, in primis amor, vasa fluidorum dilatant, sanguinem leniter rarefaciunt, atque agitant; ita *tristitia*, & qui ei sunt subiecti affectus coarctant, atque præpediunt. Inde ex timore pallor, tremor, pavor. Hujus affectus utilitas insignis est; ut nos adversus mala tuemur fuga, quum ad defensionem vires deficiunt. Est is affectus in imbecillis vice armorum. Et, quod magna providentiæ divinæ cura contingere judicio, brutarum animalium quæ satis in se virium ad defensionem habent, in prospectu periculorum ita inceduntur, quæ naturalia arma validius adhibere possint, venenum, cornua, ungues, ungulas, rostrum, dentes: quæ vero inermes sunt, ut pisces, lepores, avium quædam, damæ, capræ &c. subitaneo terrore in fugam aguntur. Ex quo intelligi potest quanta supremæ mentis cura natura animalis affectibus obnoxia sit creata (b)

7. Ira  
*philautiam foveant, falsi honoris, ambitionis, superbiam semina, virtutis prætextu in teneris animis indant, amicitia vero illius germanæ vim aut ignorent ipsi, aut excitare & fovere negligant.*

(a) Cic. 4. Tusc. cap. 7.

(b) Non singulorum tantum vitæ tutandæ necessarius est hic affectus, sed societati in primis conservandæ. Nec enim sine harmonia quædam partium Civitates coire & stare possunt; nec ea harmonia sine amore aut metu nasci. Quum autem nec sociali amicitia tangantur omnes, & de immodico sui ipsorum amore quidquam concedere assuescant



7. Ira est libido puniendi ejus, qui læsisse videatur injuria . Cujus species , ex iræ excessu natæ sunt odium , ira inveterata : amaritudo ita confectim prorumpens : bilis ira contumescens : inimicitia ira ulciscendi tempus observans : discordia ira acerbior intimo odio

& corde

scant pauci ; nihil aliud superest , quo dissilire promptæ partes contineantur præterquam metus . Ita fit ut Civitas sine pœnarum sanctione esse inter Adæ nepotes nequeat , faciliusque quis conceperit Civitatem sine mutuo civium amore conservari , quam sine pœnis & metu . Quocirca Civitates omnes dissipare repente posset , quisquis naturam humanam metus impatientem redderet . Atque hoc in loco illud mihi cogitanti occurrit , esse Civitates elaterum in eodem plano infistorum fornicibus persimiles : quemadmodum enim flecti illi & curvari nequeunt sine suprema quadam vi ; ita , nisi majoris potentiae metu , in idem consentient homines fere numquam , nec cœtum illum efficient . Eodemque prorsus modo , ut elaterum fornices statim dissiliunt , ac comprimens vis cesserit ; ita homines natura sua elastici , idest libertatis naturalis amantes , desinunt ejusdem esse Urbis Cives , atque in mutuam armantur perniciem , ubi vis legum & imperii concedat paullulum . Inde fit , ut in publicis quibusdam calamitatibus , ubi nullus esse potest legibus , & supremo imperio locus , veluti peste publice grassante , aut ingente belli metu Rempubli- cam perturbante , incredibilia scelera regnare solcant , audentibus singulis in legum cessatione , ad quod vix plures in imperio essent aggressi . Molucas Insulas quum dereliquissent Sinenses , nostri ubi primum invasere in statu naturali , sine Legibus , sine Imperio , sine Republica reperierunt : sed adeo alios in alios audentes & invadentes , ut nihil clarius ostendere possit , quam difficile sit homines in naturæ statu societatem ullam servare posse , nisi aliter educentur .

Quod si quis quærat , quid causæ fuerit , quamobrem homines metus capaces creati fuerint , quum potuerint ita esse natura comparati , ut solo amore & voluptate efficerent , quæ societati sunt consensanea : respondeo , eadem

O 4

ratione

& corde concepta (a). Ita non sensim, ut amor, sed statim & vehementer sanguinem rarefacit: unde excandescentia, & robur: nam iræ momentanea est necessitas: amor in longum tempus spatium potest. Sunt tamen qui in ira pallescant, alii qui illacrymantur, quæ Cartesius [b] aliter explicat, ego ex conjunctione cum aliis affectibus oriri censeo. Pallere in ira solent, qui temperamento sunt flegmatico, quod scilicet, antequam sanguis ebulliat tutas vindictæ vias excogitant; hinc odium, timor, & defixa cogitatio; ex quibus pallor; qui idcirco magis sunt timendi, quam subito excandescentes, non secus, atque qui excandescent, & dissimulant; cujus erat Tiberius naturæ (c). At plorant animæ imbecilles tum quum iræ admixtus est amor, ut pueri, fœminæ, iisque alii similes.

8. Nullus affectus est, qui dum excedit, ira sit perniciosa: itaque sapienter veteribus dicta est, *brevis furor*. Sed & naturam humanam necessario consequitur, &, ni evagetur, utilissima. Nempe nos atque nostra necessario amamus, nec sine eo amore conservari possumus: porro ira nihil est aliud nisi nostri, nostrorumque amor sanguinis agitatione in nostri defensionem excitatus & injuriæ tristitia mixtus. Ut idcirco stipites sint oportet, qui ira tangi nequeunt. Tum vero ira & memoriæ fovendæ, & intellectui acuendo est utilissima: ita veteres *ingenii cotem* dixere. Adversus pericula vires augeat: bellorum nervus est. Argumentum certe generosorum hominum. Sed nisi ratione & usu cohibe-

ri

*ratione quæri posse cur doloris capaces sint creati; est enim metus doloris velut consequens. Quod si quis est, qui & dolori subiectus homines indignetur, renuciare is voluptatibus debet; quandoquidem fieri non potest, ut natura animalis voluptate tangi possit, quin & doloris sit patiens. Scio ego hæc ex ideis rerum nostrarum disputari: Sed his philosophandum nobis est, quando aliæ non suppetunt.*

[a] Perelegantes Stoicorum definitiones apud Laert. lib. III. Ciceron. IV. Tusc. Stobæum Eclóg. Eth. cap. 4.

[b] De pass. part. 3. art. 200. &c. [c] Vide Taciti præclara super eo observata in primis annal. libris.

ri affuescat, *ruinis simillima est, quæ super id, quod oppressere, franguntur* [a].

9. Commiseratio Stoicis definitur ægritudo super eo, qui indigne est miser. Affectus est ex temperatione quadam *amoris & tristitiæ*. Atque hinc ex eo præsertim affectu facile illacrymamur. Nam quemadmodum elati calore terrestres vapores superioris aeris frigore coeunt in guttas, unde pluvia; ita agitatus amore sanguis, dum tristitiæ occursum frigescit, lacrymas generat [b]. Est autem hic affectus, si quis alius, homini in societate degenti necessarius: nam ita in opem mutuam impelluntur homines. Hinc nullus est hominibus, qui ira, aut aliis affectibus non agitentur, æque familiaris, eoque frequentior & faciliior, quo natura simplicior, ut in pueris, & sæminis. Familiarissimus est iis gentibus, qui pastoralem, & agrestem vitam, sine luxu, sine bello, ac sine iis vitiis quæ luxum & bellum comitari solent, agere sunt repertæ. Ut intelligere possimus hominem aptissimum societati ineundæ creari, posseque esse societates beatissimas, nisi prava educatione in mutuam instrueremur miseriam.

10. Pauca hæc exempla, satis, opinor, demonstrant, affectus omnes & naturam sequi humanam, quum, si recte observetur, sin varie modificationes *inclinationis naturalis in ipsum bonum, & adversationis ab ipso malo*, sine quibus natura humana nullo modo concipi potest (c): & esse utilissimos non homini tantum solitario, idque seu memoriam, seu intellectum, seu ipsum corpus spectes; verum etiam in societate agentis, seu ut sese mutuo defendant, seu ut ab aliis caveant homines. Quanto ergo in errore versantur qui morbos semper eos habent, quique extirpatos illos a natura humana optant? Sed est, ut dixi, in quo & Menti simul, & corpori, & societati noceant, quum nempe omne rationis jugum excutiunt, atque ad extremum vergunt, quod nunc explicare locus non est.

11. Illud observatu dignum est, affectuum nullum esse,

(a) Vide Senec. ad Novat.

(b) Vide Cart. ib. art. 128. & seqq. (c) Consule app. supp.

esse, qui non vultu manifestetur. Quod quamquam videri potest necessitate quadam naturæ fieri; non fit tamen sine sapientissimo Dei consilio: nam & ita facile homines aliis sui animi sensa, & agitationes etiam sine voce, idque vehementius & sincerius, patefaciunt, atque una aut incenduntur in idem, aut ab eodem cavent, quod societati conservandæ adprime est necessarium: & certis [neque enim mentiri vultus potest] indiciis intelligunt quo sint loco apud alios, id quod scire omnium, quorum vita socialis est, interest maxime.

*Prop. LXI.* Aversatio ipsius mali, quæ naturalis est humanæ naturæ, consequitur amorem. 1. ipsius boni. 2. nostri; totaque ejus *ratio sufficiens* posita est in amore illo. 1. ipsius boni. 2. nostri ipsorum: Atque idcirco non lex naturæ mechanica, sed legum naturæ mechanicarum phænomenon est. Est ea propositio evidens, nisi vehementer fallor: enim vero nemo quidquam averfatur, nisi quia naturæ suæ, aut iis, ex quibus naturæ suæ præfectio & conservatio pendet, contrarium est, neque quæ contraria sunt naturæ humanæ, iisque, quibus ea perficitur & conservatur, idest bonis, averfari quibuscumque potest, nisi, quia se, & bona amat. Quumque necessario se amat, & ipsum bonum; necessario his contraria averfatur. Ex quibus patet, averfationem malorum conservatorium esse necessarium amoris nostri & boni (a).

*Prop. LXII.* Omnes affectus sunt reactiones amoris. 1. ipsius boni. 2. nostri ex peculiaribus objectis naturæ.

D. Affectus sunt commotiones naturæ humanæ ex opinione boni vel mali naturæ [def. 15.], idest modificationes variæ naturalis erga bonum amoris, & naturalis a malo declinationis. Quum vero averfationes & declinationes conservatoria sint naturalis amoris (ex sup.) affectus omnes sunt modificationes variæ & inflexiones amoris illius a variis naturæ objectis bonis vel malis. Jam ex modifica-

(a) *Vide ut eam rem pluribus exsequitur Malebranch. lib. 5. de inq. verit.*

fications & agitationes tum demum nascuntur ex actione bonorum, aut malorum objectivorum, seu bonorum aut malorum realium perceptionibus, si eas natura nostra aut sequatur, aut aversetur, quod reactione fit naturæ in objectorum actionem; atque inde affectus sunt proportionati actioni bonorum aut malorum objectivorum (vide super app.): reactione ergo amoris illius naturalis varia & diversa, progignuntur affectus omnes. Memini alicubi Augustinum eam propositionem pluribus, & acutissime explicuisse, locus memoria excidit. Ex ea vero & illud etiam confirmatur, affectus & naturam humanam sequi necessario, velut ejus proprietates, & esse non posse morbos, nisi quum ita excelsierint, ut sint amoris illius naturalis perturbatæ modificationes, quod ego potissimum ex Adamitico peccato natum arbitror.

*Prop. LXIII.* Affectus aucta atque emandata ratione intra terminos suos plurimum contineri possunt.

D. Affectus in vitium abeunt, aut quia excitantur, quum iis natura non indiget; aut quia justam intensitatem excedunt: utrumque defectu rationis fit. Primum deceptione circa ea, quæ nobis offeruntur objecta, velut quum bona phantastica amamus, mala timemus, quumque aut nullis, nisi apparentibus, aut levissimis de causis agitamus. Alterum deceptione circa intensitatem bonorum aut malorum: nam quum affectus sint proportionati actioni bonorum aut malorum objectivorum, si hæc sint falsa, justo nimius intenduntur affectus. Ergo emendata, atque aucta ratione intra suos terminos magna vi contineri possunt.

*Coroll.* Affectus quum in vitia abeunt argumentum sunt manifestum aut brevis, aut corruptæ rationis. Atque hoc fortassis est quod Stoici in sapientem non cadere dixerent.

*Prop. LXIV.* Quodcumque naturæ nostræ conservandæ aut perficiendæ aptum est, bonum & dicitur, & est: malum quodcumque destruere potest, aut deteriorem reddere.

*Prop. LXV.* Bona & mala voluptate & dolore cognoscuntur.

gnoscamus, idest adfectu. Scilicet ea dicimus bona, quæ naturam nostram conservant & perficiunt; mala quæ destruunt, & deteriore efficiunt (ex sup.); at quæ conservant & perficiunt voluptate animadvertuntur; quæ destruunt dolore [prop. 35.]; voluptate ergo & dolore bona & mala cognoscuntur. Quum vero voluptas & dolor aut ipsi sint affectus, aut cum affectibus conjunctissima; de bonis & malis nonnisi affectu judicamus. Et extendimus quidem eam cognitionem *analogia* ad similia, in quo sæpe decipimur: sed primæ boni aut mali notiones voluptate & dolore ingenerantur. Scilicet ante usum omnem cum naturæ rebus: neque bonas eas, neque malas habemus, quod infantium, & idiotarum exempla docent aperte: experimentis inde, quas illæ cum natura nostra relationes habeant, animadvertimus. Ex quo illud licet intelligere, quod veteres perspecte docuere, externa in bonis non esse numeranda; quum eorum bonitas, aut malitia ex usu tantum nascatur.

*Prop. LXVI.* Bonitas externorum, aut malitia, & hinc amor, aut odium, sympathia, vel antipathia, plurimum a constitutione naturæ nostræ pendet.

D. Bona & mala voluptate & dolore, adeoque affectu judicamus [ex sup.]; ab externis autem afficimur in ratione constitutionis nostræ [ex sup. append.], adeoque dolore, aut voluptate agitamur in eadem ratione, ergo a constitutione nostra externorum bonitas, aut malitia plurimum pendent. Jam bonum & voluptatem amor sequitur & sympathia: malum & dolorem odium & antipathia: ex constitutione ergo nostra amor plerumque & odium, sympathia & antipathia emergit.

*Sch.* Hinc intelligimus, qui fieri potest ut quædam amemus, aut odio habeamus sine ulla causa nobis cognita. Scilicet ex eo solo, quod rem aliquam, dum læticia aut tristitia aliunde afficimur, contemplemur, bonam illam, aut noxiam habemur; toriusque amoris, aut odii causa in natura & constitutione nostra posita est. Inde etiam petenda ratio cur amemus quæcum-

que

que sunt similia rei amatæ , odio habeamus , quæ similitudinem quandam habent ei objecto , quod nos tristitia afficit .

*Prop. LXVII.* In constitutione naturæ nostræ ratio inest , cur amemus eos , qui iisdem , atque nos , affectibus agitantur , aversemur , qui diversis .

D. Nempe quæcumque naturæ nostræ judicamus consentanea , idest bona , amamus , contraria averſamur ; idest mala [ *prop. 55. 64. 65.* ] : sunt autem naturæ nostræ consentanei & conformes , qui iisdem afficiuntur affectibus ; contrarii qui contrariis ; ergo &c.

*Schol.* Egregie id didicere parasiti ; qui ad eorum se formam , & ingenium componunt , quos aucupantur . Gnato Terentianus , qui si potis esset , tanquam philosophorum habent disciplinæ ex ipsis vocabula , parasiti itidem ut Gnatonici vocarentur , efficere gestiebat , artes sic explicat suas .

*. . . . hisce ego non paro me ut rideant ,  
Sed eis ultro arrideo , & eorum ingenia admiror  
simul .*

*Quicquid dicunt , laudo ; id rursus si negant , lau-  
do id quoque .*

*Negat quis , nego : ait ; ajo ; Postremo imperavi ego-  
met mibi .*

*Omnia assentari : is quæstus est nunc multo uber-  
rimus .*

*Prop. LXVIII.* Miseriæ , ejus qua in hac vita agitamur , necessariæ insunt in natura nostra causæ , æque tres . 1. Intellectus brevitæ & imbecillitas . 2. appetitus naturali potentia major . 3. natura sibi ab beatitudine non sufficientissima .

D. Natura humana ita comparata est , ut intellectus brevitæ & imbecillitate affectibus agitetur a falsis bonis , & a falsis malis , ex quibus perturbationes , dolores , & postremo miseria existunt [ *ex super.* ] ; est igitur prima & maxima humanæ miseriæ causa brevitæ & imbecillitas intellectus , & quidem in ipsa natura nostra necessaria , talis nempe , quæ nulla nostra industria , nulla ope convelli penitus queat .

Dein-

Deinde quæcumque percipimus, nobis vel consentanea, vel contraria repræsentamus, adeoque bona, vel mala (prop. 64.), necessariisque inde agitatur inclinationibus, aut declinationibus (ex super. addend.), idest *appetitu*; qui nos torquet quousque quod concupiscimus bonum non sumus adepti, quod timemus malum non evasimus. At quoniam potentia naturæ nostræ intellectu & appetitu longe minor est, ut nec concupita omnia adipisci, nec quæ timemus & averſamur omnia cavere possimus, uti est perspicuum; efficitur ut appetitus intellectui quidem par, major tamen potentia, perpetuo nos torqueat, & misere miseros faciat. Quum vero id natura ipsa nostra & necessario ita sit comparatum; est & hæc alia in natura nostra necessaria miseriæ nostræ causa.

Tandem natura nostra & mutabilis est, & externorum plurimorum indiga ut conservetur, idest sibi sufficientissima ad beatitudinem non est. Ergo necessario fertur in usum externorum: in eo autem & errare potest, indeque esse misera in eo, in quo sui beatitudinem maxime consistere judicavit; & non semper ita sibi felix esse potest, ut concupita consequatur, caveat, quæ timet; ex quo iterum misera; ergo quod sibi sufficientissima ad beatitudinem non sit, natura sua est misera. Tres ergo necessariae humanæ miseriæ causæ in natura insunt nostra, atque individuae perpetuo nos comitantur.

*Sch.* Si accurata inductione res pendatur, totius humanæ miseriæ, quacumque ea patet, non aliæ profecto proximæ causæ detegi possunt. Nam primo quod mutabilis sit natura nostra, nec sibi sufficientissima, quodque ab externis plurimis pendeat, morbi omnes, quibus continenter agitatur, proveniunt. His non minimam partem addit intellectus atque appetitus libido & petulantia. Tum brevitate & imbecillitate intellectus quotidie fit, ut aut nullibi existentia velut bona vel mala imaginemur, unde aut *falsa gaudia*, aut panici timores; aut quæ sunt, ex aliis aspectibus nobis repræsentemus, vel majora, aut minora percipiamus;

ex



ex quo violentissimi progignuntur affectus, quibuscum continenter sit decertandum. Tandem vagus, inconstans, & propemodus infinitus appetitus eorum bonorum desiderio nos torquet, quæ atmosphæram omnem potentia nostræ excedunt quam longissime; aut eorum malorum adpectu turbat, quæ nulla ope cavere possumus. Quocumque libuerit oculos torquere per latissima humanæ vitæ spatia, nullas tot miseriarum alias causas proximas reperire est. [a]

Coroll.

[a] 1. Nolo ego hic quisquam suspicetur, me præsentis vitæ mala ita exaggerare, ut multo illa bonis pluræ & majora habeam, hominumque aut perditorum, aut tristium & querulorum in naturam humanam indignationem aquam. Nam contra nihil ego exploratius habeo, quam bona & voluptates, quibus dum vivimus fruimur, generatim & plura esse, & majora, etiam dum minus ex recta ratione vivimus, quod plerique omnes faciunt; ut si viveremus omnes secundum naturam & rationi rectæ congruenter, sola naturæ mala, quæ dicuntur, in tanto ac tali bonorum cumulo aut evanescerent, aut essent quod in opiparis mensis herbosa moreta, aut certe minus illa persentirentur, tantumque, quantum nos ad virtutem revocandos satis essent. Itaque illud mihi in ea propositione propositum est demonstrare, perfectam beatitudinem nemini in hac vita contingere posse, id quod ego relative miseriam voco; non hoc etiam, nos ad miseram vitam a natura generari, quamquam ad laboriosam generemur. Nam idem non est laborare ut sis tranquillus, atque esse miserum. Sed retrahemus hæc paullo pluribus, quo morosorum hominum & turbulentorum stultas voces comprimamus.

2. Primum ego argumentum, vitæ humanæ bona longe esse plura & majora, quam mala, hinc duco, quod nemo est quantumvis senex, aut malis obrutus, qui non vivere etiam aliquantulum velit, quique vitam inopem, miseramque non morti præferat. Hic in omnibus naturæ sensus constantissimus, magnum est, ut dixi argumentum, nos vehementer falli in bonis & malis dijudicandis, eaque

Coroll. 1. Natura ipsa monemur, exquirere, sit ne ratio ulla & via, qua possimus miseriæ hujus causis mederi. Nam natura ipsa impellimur ad beatitudinem,

& su-

æque judicia non ex natura nasci, sed ex libidine, esseque hominis aut ægritudine vel dolore agitati, aut ex abstracta ratione declamantis, quam naturalis & se suaque natura contenti. Ac vero hujusmodi seditiosas & injurias in Dei bonitatem voces ab iis audias, qui aut dolore premuntur aut animi intemperie agitantur, aut cum adversa fortuna colluctantur, & tum quum mala sentiunt. Qui si ad naturæ æquabilitatem redeant, scribique & accurate integram humanam vitam reputent, haud dubito quin illi æquius de se existiment.

3. Alterum argumentum desumo ex eo, quod bona vitæ sint perennia, mala per vices recurrant. Conscientia existentiae, libertatis naturalis, mentis, sensuum perennis est quoad vivimus, eaque cum æquabili voluptate conjuncta. Est hoc bonorum omnium vitæ humanæ maximum, quod quoniam perenne & perpetuum minus animadvertimus, nec in censum bonorum referimus, qua in re stulti & in nos ipsos ingrati sumus. Equidem quum solutus omni cura cogito me esse, me mentis, & Libertatis esse compotem; me oculis, auribus, manibus esse instructum, esseque in immenso hoc naturæ templo, velut in pulcherrimo theatro, positum, nullam ego voluptatem huic anteponi posse sentio. Itaque ut hoc bonorum omnium maximum censeo, ita mirari eos non desino, qui extra se perpetuo vagantur, ac veluti si sibi infesti nati sint, in se animumque suum redire exhorrescunt. Qui si ita pergunt, vere quidem ii malorum cumulum prædicant; non recte tamen, neque jure de natura conqueruntur.

4. Sed est, inquit aliquis, perennis hæc voluptas minus intensa quam vel mediocris dolor, vel animi ægritudo, ut nullo modo compensare posse videatur luctus, ærumnas, calamitates, orbitates, corporis contusiones, fracturas, lanienas, pressuras, dolores articulares, morbos capitis, pectoris, laterum, febrium inflammationes, famem, sitim, æstus, rigores, & trecenta alia, quibus, licet per vices,

& sumus miseri ; monemur ergo , ut viam & rationem perquiramus , qua a miseria liberemur , simus vero beati .

Coroll.

*ces , frequentissime tamen omnes affliguntur . Ego contra longe superare censeo . Primum capiamus vitam humanam annorum 60. sunt in ea dies 21900. si serio homines unius Civitatis , qui ad annum 60. devenerunt , ad quæstionem adigas omnes , vix reperiās in miserrimis , idest paucissimis , dimidiam cujusque anni partem ægritudine & dolore confectatos , in aliis quartam , sextam in aliis ; est ubi reperiēs octavam , decimam ; duodecimam , in paucissimis nullam . Eximamus extrema , ac accipiamus partem sextam . Erit bonum illud æquabile cujusque anni ad mala omnia ut 6. ad 1. in tota vita ut 21900. ad 3650. Accedant nunc ad bonum illud æquabile voluptates gesticantes , gustus , tactus , aurium , oculorum , narium : tum somni , inambulationes , gesticulationes ; jam , plurimæ animi , præsertim in iis , qui philosophantur , veritatum pulcherrimarum contemplationes , confabulationes & conversationes amicorum , amicitia & caritatis ipsius vis , & sexcentæ aliæ . Hæc ego omnia , quæ quotidie incidunt , quartam saltem cujusque diei partem efficere opinor , idest fere quartam cujusque anni partem , ut quasi adæquent & numero , & intensitate mala illa , de quibus conquerimur . Itaque etiam ubi hæc omnia mala sint a sola natura , ea non compensantur modo bonis , sed longissime superantur .*

5. Jam demamus de illo malorum calculo sic negligenter facto omnia , quæ ipsi nobis consciscimus ; neque enim æquum est , ut illa in naturam referamus . Me nunc tota hæc ratio mirifice exhilarat & beat : nam certum est naturæ mala , quæ invitus patior , pene ab oculis evanescere , ubi ego illa demere velim , quæ sunt homini ab homine : itaque pene beatus esse possum , si ad rationem rectam vivere volo . Principio plurima esse reperio , quæ aut meæ ignorantia , aut defectui attentionis , aut vitiis & pravis habitibus originem suam debent , quæ vitare possum si , qua par est , diligentia mentem excolam . Quot sunt quæ negligentia , aut pigritia , aut ignavia , aut cupiditas , aut avaritia , aut su-

Coroll. 2. Natura ipsa monemur, ut perquiramus existat ne talis extra nos causa, qua possimus esse beati. Neque monemur perquirere viam & rationem evadendæ

perbia, aut levitas, aut ingluvies, aut veneris abusus; aut cæterorum sensuum incontinentia & gignit & alit? Quot affectuum excessus, quos libenter fovere solemus, amoris, odii, inimicitiae, metus? Nullum est vitium, quod non malum aliquod secum deferat. Animi ægritudines, quæ malorum omnia sunt maxima, maxima ex parte a vitiis progignuntur. Plerumque ex ignorantia proficiuntur, ut panici timores, gaudia falsa, inanes amores, leves iræ, odia, spes. Non raro stolidæ reflexione intenduntur eæ ægritudines, quæ si naturam sequeremur, longe essent minores. Naturale est homini interitu filii acerbo dolere, quia naturalis in liberos amor; nec id malum, quia humanæ vitæ fini consentaneum; ad societatem ineundam & continendam necessarium. Sed necesse non est naturæ malum reflexione augere velle. Perpetuo in memoriam revocare, viride depingere, omniaque agere, quæ dolorem vehementissimum excitare possint, id nec natura exigit, & prave rationis malum est. Ac peccamus sæpe similiter in ceteris animi morbis: videntes & prudentes illos intendimus, dum fovemus. Ita ex levissimis causis excandescit ira, fervet cupido, alitur, vegetaturque ambitio, nutritur, aut excitatur timor, quibus misere torquemur. Hæc qui in naturam refert nã is impudentissime calumniatur: quippe quæ evadere potest, si ex recta ratione vivere instituat.

6. Deinde infinita alia sunt in humana vita mala eaque gravissima, quæ non natura, sed sunt homini ab homine, quæ & ipso ex malorum illo cumulo demere oportet. In primis sunt quædam corporis mala, quæ cum semine majores nostri in nos transmittunt, qui quum prima futurorum hominum ovula, ac machinas sædassent, monstrosos generant, imbecilles, mancos, præsertim postquam lues venerea totum ferme hominum genus infecit. Sunt alia mala, quorum & iidem majores nostri causas posuere, veluti inimicitiae, bella, lites, mali mores, depravata consuetudines, pernicioles artes. Tum alia quæ alter alteri

ma-

dæ miseriæ (coroll. i.), adipiscendæ vero beatitudinis beatitudinem autem a natura nostra frustra expectamus (prop. 68.); perquirendum ergo est, existat, nec ne extra nos causa, quæ eam nobis beatitatem facere possit.

Coroll.

*machinatur, quorumque est numerus pene infinitus, quæ alii aliis vitam, bona, famam, animum inficiamus, quorumque superius ex Arnobio historiam discere potuimus.*

7. Hæc quum sint, ubi mala, quæ nos nobis consciscimus a malis naturæ discernere velimus, intelligitur aperte, esse hæc bonis, quæ a natura ipsa parata habemus, & prompta, quibusque quotidie fruimur, longe minora. Ut propterea si velimus ad naturæ simplicitatem unde discessimus, redire, beati vivere possimus. Naturæ enim pauca sufficiunt, libidini nulla. Itaque si congruenter naturæ vitam agere velimus, eaque omnia, veluti onera quædam, rejicere, quæ sunt superflua, quæque affectuum & phantasiæ libido adduxit, nihil humana vita jucundius experiri possimus. Sed venimus in immensum superfluarum rerum apparatus tam alte, ut enatare sine humanæ vitæ & societatis eversione posse non putamus, in eoque ex iis causis erramus turpissime, quas ipsi nobis fecimus.

8. Tertium tandem argumentum, quo ego conficio, nos non ad miseriam, sed ad beatitudinem generari, miseriamque ipsos nobis consciscere, est illud, quod longe absunt Naturæ mala, malis voluntatis. Nam illa ad nostram beatitudinem, & tranquillitatem pertinent; his nihil aliud efficitur, nisi aut privata, aut communis miseria: ut nulla ex re clarius intelligere possimus, esse illa effectus amoris erga nos Dei; hæc iræ nostri ipsorum adversus nos ipsos. Nam illa virtutem fere semper aut in animis nostris ingenerant, aut alunt, aut custodiunt, nosque ad vitæ commoda & procuranda fortiores, & ad utendum sapientiores efficiunt: hæc vero virtutem omnem aut enervant, aut extirpant, quumque a vitiis progignuntur, tum vitia alia ingentia progenerant. Quum autem quicquid ad virtutem refertur bonum est; quæ vitia attinent mala; sequitur esse illa semper bona, hæc perpetuo mala. Sed ea de re differemus copiosius in tertia parte.

*Coroll. 3.* Ea causa, aut nulla est, aut Ens intelligentissimum, potentissimum, optimum immutabile. Nam ea causa perficere debet intellectum, potentiam, naturam, quæ sunt miseriæ nostræ causæ: id vero fieri nequit, nisi intellectus extra aleam erroris constitutur, potentia intellectui & appetitui æquetur, natura perficiatur, ita ut a nullis aliis pendeat; quod exigit Ens intelligentissimum, potentissimum, optimum, immutabile. Nisi igitur id sit, nulla esse potest extra nos causa, qua esse possumus beati.

*Coroll. 5.* Nisi id ens existat ( *coroll. 3.* ) est homo animantium omnium, quæ in Tellure sunt, miserissimum. Quippe qui iis miseriæ causis agitur, a quibus illa sunt immunia.

*Schol.* Sunt hæc, quæ posuimus, fundamenta prima Religionis, & Gratiae, quemadmodum in Theologia naturali sumus demonstraturi. Quod heic adnoto, ut lector spectet hinc quo tendam.

## C A P. VII.

### *De hominis beatitudine, tum de virtute.*

**P**Lacet hoc caput exordiri nobilissimi hujus ævi philosophi verbis (a). Nihil, inquit ille gravissimo pernicialius hominibus accidere potest quam rationis abusus: nihil interea est, quod utrique nunc sexui, omnibus hominum ordinibus pulchrius sit. Mentis acumine, dextertate, solertia nemo, quidquam alteri concefferit: quilibet id præ se fert velut maximum humanæ vitæ ornamentum. At corrumpi & corrumpere seculum vocatur: virtus loco vitii est. Hæc mentis major, quam animi cura unica corruptorum morum, eaque ubertissima scaturigo est: adde & miseriæ: nemo enim unquam vitio, sed virtute fuit beatus; mentiri vitia quidem felicitatem possunt, præstare nequeunt. Si mihi ea philosophandi ratio placuisset, quæ in hoc argumento aliis videri posset

(a) *Speçtateur Anglois, ou le Socrate moderne tom. 1. discours. 6.*

posset abs re longissime esse, Metaphysicum de virtutē differere: Nunc quum nihil vehementius reprehendere in Philosophorum recentium scriptis soleam, quam ita philosophari, velut qui nihil sua intersit, quæ sit hominum vita, eos non moror, qui scientiarum a me fines determinari clamant. Sterilis illa contemplatio hominum est, qui otio & literis abutuntur, quique quo in rerum natural loco sint ignorant. Philosophiam hi in hominum bonorum reprehensionem inducunt; de maiestate sua deturbant. Quod est cur reprehendamus scholæ doctores; quod tetricas & ab hominum usu ac commercio abhorrentes quæstiones induxerint, quique ita philosophati sint, quasi extra hominum mores cultumque positi, quum paria illi nobis objicere possint, & eo gravius, quo præsens philosophia verioris sapientiæ speciem ementitur? Amanda pulchra, sectanda utilia.

*Prop. LXIX.* Natura ipsa admonemur, beatitudinem spectare, nec præsentis vitæ tantum, sed sempiternæ.

D. Prima pars. Lege ipsa naturæ mechanica in ipsum bonum rapimur (prop. 44.) idest in id, quo natura nostra perficitur & conservatur, atque cum perfecta sit voluptate (prop. 64.), nimirum in beatitudinem; & ita quidem ut & affectibus eam in rem prævalidis armet (ex cap. sup.) & nos in bona voluptate determinet, a malis absterreat dolore. Naturæ ergo reluctatur, qui data opera sibi miseriam consciscit, aut qui in id non omnia sua studia intendit.

Secunda. Mentis vita ultra præsentem hominum ætatem pertingit, & æterna est (prop. 14. & 15.); potest igitur in altera vita esse misera vel beata. Quum vero miseriam horreamus natura, appetamus voluptatem; & æternæ alterius vitæ beatitudinem spectare debere ipsa admonemur natura.

*Prop. LXX.* Sempiternum bonum etiam minimum præstantius est bono finitæ durationis etiam maximo tantum non infinito.

D. Nam rectangulum quod sit ex minima magnitudine

line in infinita infinitum est, finitum vero quod fit ex quacumque finita etiam maxima magnitudine in altera finita. Sit magnitudo A omnium minima, Z infinita, erit A  $\times$  Z rectangulum infinitum: dentur vero duæ aliæ magnitudines maximæ, sed finitæ, B, Q, erit B  $\times$  Q rectangulum finitum. Sempiternum ergo bonum etiam minimum præstantius est bono finitæ durationis etiam maximo.

*Prop. LXXI.* Sempiternum bonum intensitate maximum sed probabile, præstantius est bono finitæ durationis maximo & certo. Est enim illius rectangulum infinitum, hoc finitum: in bonis autem finitum certum infinito probabili proculdubio minus præstans est.

*Prop. LXXII.* Stipites sint oportet homines, nisi quæliacumque præsentis vitæ bona in comparatione eorum, quæ æterna sperantur non contemnunt.

D. Quæ enim sperantur bona non omnino sunt phantastica; nec enim quisquam unquam confecit, nullam aliam post hanc homini vitam superesse; nec, si ingenui Athei esse velint, probationes omnes aut *rationis*, aut *revelationis* tanto doctorum consensu confirmatâs futilia esse sophismata dicent: Vita ergo altera sin minus certa (ex abundantia agam) at probabilis saltem est: præponendum autem est sempiternum bonum etiam probabile certo cuicumque finitæ durationis (propof. 71.); Ergo stipites sint oportet homines &c.

*Schol.* Quin si demus omnia esse dubia (neque enim aliud Athei expostulare possunt, nisi magis etiam, quam sunt, deridiculi esse volunt), nemo esse potest, nisi imprudentissimus, & stultissimus, qui malum sempiternum quantumvis dubium bono intensitate & duratione finito postponendum censeat. Quod si in vita hac præsens malum prudentes homines fortiter tolerant metu majoris alterius probabiliter futuri, jureque atque merito eos stultos habent, qui secus operantur; intolerabilis profecto est stultitia mali infiniti duratione & intensitate etiam probabilis, etiam dubii fugam præsentis cuicumque bono non præferre.

*Prop. LXXIII.* Non potest præsentis vitæ felicitas in



in alia esse sita, nisi in eo ut corpus sine dolore sit, animus sine perturbatione. Enimvero nemo aliud quidquam desiderat, neque in aliud omnes intendit curas. Philosophi illi veteres dum in tot diversas opiniones, ivere, non de re ipsa disputarunt, sed de causa. Nempe consentiebant in hoc, beatum eum tandem esse, cujus animus pacatus, corpus sine dolore esset, qui status beatitudinis est: super eo disceptabant, quum nonnisi ex præsentia alicujus boni is status nasci possit, ecquodnam illud summum esset bonum, ex quo ea beatitudo oriretur. Quumque nunquam observassent, possibilem præsenti hominum naturæ, quoad heic vivimus, eum statum non esse, in absurdas & deridiculas ivere sententias, ut non defuerint coqui, qui, ne ab arte sua discederent, rem coquinariam in medium proferrent.

*Prop. LXXIV.* Hic status (prop. 73.) consistere nequit cum præsente hominum natura.

D. Est hæc natura talis, ut quod spectat ad animum, brevitate rationis, & imbecillitate potentiæ sibi relicta necessario sit misera [prop. 68.]; cum ea ergo is status consistere nequit. Deinde homines corpore sunt mortales, adeoque ut dissolutioni, ita morbis & doloribus, qui perturbata corporis harmonia velut ex necessaria causa physica oriuntur, subjecti; corporis ergo indolentia cum præsente hominis natura pugnat.

*Coroll.* Maxima quæ obtineri in hac vita beatitudo potest, est minima miseria, idest, ut quoad fieri potest minimum ex miseria habeamus. Nam perfecta beatitudo, idest animus sine perturbatione & ægritudine, corpus sine dolore (prop. 73.) haberi nullo modo potest [prop. 74.] maxima ergo in hac vita beatitudo erit, minimis intensitate & duratione malis urgeri, idest minima miseria.

*Prop. LXXV.* Emendatio intellectus, capacitatis, & rationis augmentum, necessaria sunt ad qualemcumque præsentis vitæ beatitudinem.

D. Hæc beatitudo posita est in minima miseria [coroll. prop. 74.]; ex turbata autem & brevi ratione

maxima activæ vitæ perturbatio & miseria nascitur (ex sup.) non ergo cum ea & beatitudo obtineri potest. Veteres docuere necessariam esse sapientiam non tantum ut emendaretur vita, quo scilicet pacatior esset & æquabilior, qui unus est genuinus usus purgatæ & auctæ rationis, *sed propter se*, ut loquuntur, quasi in voluptate ipsa qua in contemplatione veri mentes perfruuntur, sita omnis sit beatitudo. Ego non inficior gratissimam eam esse voluptatem & æquabilissimam, quæ ex ea contemplatione oritur; sed quum homo, ut conservetur, debeat esse necessario activus, nisi scientiæ theoricæ, quo nomine purgatam auctamque rationem intelligo, vitæ huic activæ conferant, prudentiamque vivendi & agendi progignant, eæ omnino sunt inutiles. Omnium ego ineptissimos eos habeo, qui distitant, scientias propter se expetendas, quum id præterquam quod instituto ipso vitæ evertunt, ut idcirco reperiantur mendacissimi, est etiam naturæ ipsi contrarium; quæ ut nos oculis non voluptate videndi, sed in usum vitæ instruxit, ita intellectu ornavit, velut supremo totius vitæ humanæ duce & lumine.

*Prop. LXXVI.* Philosophia, idest studium sapientiæ, tum ad beatitudinem præsentis vitæ conducit, si regatur *epoche* in iis, ubi evidentia deficit, jungatur vero cognitio omnis, cum *ataraxia*, idest quiete & indolentia, seu pervestigatæ res reperiantur, seu non.

D. Nam quum mens humana sit brevis, adeoque terminos suos habeat, extra quos ubi gestit evagari, erroribus implicatur; iis tantum assentiri potest ut veris, quæ & ipsa evidenter percipit, & evidenter ab aliis percipi intelligit (post. 2.); ceteris si consentiat ut veris errare potest; atque ita vitam omnem perturbare necessaria; est ergo in obscuris controversisque *epoche*, idest iudicii suspensio. Quod si in eorum articulo quis constitutus sit, ut in obscuris *agere* debeat tum præclare cum natura sua gerit, si nihil contra, meliorem animi sententiam aggrediatur. Nam si & in hoc erret aliis potius causis, quam voluntati suæ tribuere errorem potest: qui vero errores voluntarii non sunt,

sunt, torquere neminem debent, nisi fortassis eum, qui sibi persuasit extra omnem erroris aleam positum esse.

Deinde, qui necessarias vitæ veritates recte perquisivit, si quidem eas invenit, non potest inde nisi lætari, velut de magno acquisito bono, emendata nempe atque aucta mente in iis, quibus vita ducitur; si non reperit, nihil voluntate peccavit, ob quod doleat. Quod si iterum perquirendas putet, nullas habet causas cur anxie nimis & sollicitè ita afficiatur, ut eam ob rem miseria angatur; quippe quod stultissimum sit ut supra naturales vires agere velle, ita dolere, quod non id feliciter cedat; non magis quam si canis doleat, quod Geometriam addiscere nequeat. Quocirca adhibendæ sunt quidem vires naturæ qua majori possumus industria, sine afflictione tamen & anxietate. Graviore quoque rationes *ataraxiam* suadent circa eas veritates quæ vitæ non sunt necessariae; quippe quas summo animi capitisque labore perquirere non minus stultum est, quam ea in usum cibi undecumque contrahere, quæ objecta aurium potius sint, aut oculorum, quam ventris.

*Schol.* Hæc, quæ dicta sunt, non melius confirmari possunt, quam eorum exemplo, qui, quod hæc duo in philosophando non adhibent, nullum alium ex studiis suis fructum consequuntur, quam perpetuos animi tumultus, totiusque vitæ perturbationem. Enimvero, qui *epochen* in obscuris & dubiis non servat, is ne tolerantiam quidem in iisdem observare potest. Quumque nihil naturæ nostræ congruentius, quam plurimos opinionum nostrarum approbatores habere, cupiatque natura quisque ut sibi potius ceteri omnes aptentur, quam is ulli; dissidentes velut sibi inimicos imaginatur, omnibusque modis insectatur, ex quo turbationes maximæ, quibus humana societas funditus evertitur. Plenæ sunt historiarum tragædiarum, quæ eam ob rem provenire. In iis vero est ne quisquam, qui beatus esse possit? Præstat profecto rudem literarum esse, quam hæc, quæ literæ progignunt, bella atrocissima, velut oblectamenta inspicere. Quod si literati homines serio id cum animo suo cogitarent, haud certe amarulentæ,

nec

nec sine veri specie, hominum bonorum querelæ audirentur, beatiora ea fuisse secula, quæ rudiora, contulisseque plus hominibus ad felicitatem vitiorum ignorantem, quam cognitionem virtutum. Jam vero qui ad *ataraxiam* non omnia sua studia referunt, ii similiter faciunt, atque avari, qui studiose quidem divitias comparant, conduntque, sed nec uti sciunt, ignorantes cui usui Telluris bona destinata sint; & continuo earum amore macerantur. Næ igitur satius facerent, si a philosophando abstinerent, gravissima CHRISTI Servatoris nostri moniti sententia, *si oculus tuus te scandalizat, erue eum.*

*Prop. LXXVII.* Ad præsentis vitæ beatitudinem comparandam & conservandam necessaria est prudentia cum suis affeclis.

D. Prudentia est scientia bonorum, malorumque, & mediorum (a), vel faciendorum, non faciendorum, & neutrorum. Ei subjunctæ aliæ virtutes sunt.

*Eubulia*, seu *consultandi dexteritas*, quæ est scientia res gerendi, quousque utiliter expediri queant:

*Eulogistia*, seu *recta computatio* scientia complectens res efficienda:

*Anchinia*, *solertia animi*, seu scientia officia inveniendi:

*Nunecthia*, *mentis advertentia*, scientia attingens scopum in re qualibet:

*Eumechenia*, *callida providentia*, scientia exitus rerum inveniendi:

*Eutaxia*, *ordinandi facultas*, scientia temporis rerum gerendarum, eorumque ordinis:

*Cosmiote*, *decori observantia*, scientia motuum honestorum, turpiumque:

*Aidemofine*, *verecundia*, scientia vitandi probri (b) hæc autem omnia nisi feceris animo pacato, corpore sine dolore vivere nequis, idest nequis esse beatus [prop. 73.]; prudentia ergo cum affeclis &c.

*Prop. LXXVIII.* Ad præsentis vitæ beatitudinem necessaria est fortitudo cum suis affeclis (c).

D. Status omnes, qui humanæ naturæ accidere possunt,

(a) *Zeno apud Laertium lib. VII. sect. 92.*

(b) *Vide Stanleyum in Zenone.* (c) *Eundem ibid.*

sunt aduersi ad duo genera referri possunt ; nam alii ex rationis nascuntur abusu , alii ex concatenatione ipsa immutabili rerum mundanarum . Qui velit beatitudinem , idest minimam miseriam , utrosque si non omnino evitare , at emollire saltem & tolerabiliores efficere debet . Primos moderatur prudentia ; quam idcirco præsentis vitæ tranquillitati necessariam demonstravimus : alteros *fortitudo* cum suis asseclis , continentia rationis , confidentia , magnanimitate , constantia ; est igitur hæc cum suis asseclis necessaria . Nihil autem magis conducit ad fortitudinem gignendam , quam 1. assuefieri malis ab naturæ ineunte ætate . 2. reputare cum animo , status huiusmodi a libertate nostra non provenire , nec ullo modo nos aduersus conari quidquam posse . 3. dejectione animi fieri majora . 4. aut nos alias , aut alios gravioribus afflictatos fuisse malis . 5. compensari profecto ea mala futuris bonis , quum nequeat summus hominum fator , atque parens Deus nos velle omnino miseros . Quod si Fati opinio apud plerasque nationes ad fortitudinem faciendam aduersus mala quævis vim habet incredibilem , ut profanus homo Spinoza putaverit , nihil tam alacres in vita homines efficere , quam firma Fati persuasio ; maiorem certe habere apud nos vim debet providentiæ divinæ doctrina quippe quæ non Tyrannorum modo rapit , sed Patrum amore ducit . Legendæ omnino sunt , quæ Cicero in Tusculanis lib. 2. Seneca de Constantia , & alibi passim scripserunt .

*Prop. LXXIX.* Ad præsentis vitæ beatitudinem necessaria est Temperantia .

D. Ad præsentis vitæ beatitudinem necessaria est mentis serenitas , corporis indolentia [ *prop. 73.* ] & temperantia , quum appetitus moderetur , ne ultra quod satis est erumpant , affectuum , atque gestientium voluptatum excessus cohibet ; quum autem sine moderatione affectuum & gestientium voluptatum nec sinceritas animi & tranquillitas , nec indolentia in corpora servari possit , ut patet ; profecto ad beatitudinem temperantia , quoad ea patet , est necessaria . Patet autem multum : nam non modo omnium sensuum usum spectat , potissimum

*gustus ,*

*gustus*, & *tactus*, verum quoque affectus omnes, quos nisi intra fines suos coerceat, ut animus pareat rationi, imperant, totamque vitam perturbant: non secus, quo exemplo utitur passim Plato, atque equus, nisi freno compescatur, peſulanter equitem dorſo deturbat.

*Prop. LXXX.* Ad præſentis vitæ beatitudinem neceſſaria eſt juſtitia cum ſuis affectis.

D. Vita hominis ita natura eſt ſocialis, ut eſſe illa nequeat niſi in ſocietate. Natura ipſa ejus rei nos admonet.  
1. dum ineptos ad nos conſervandum ſine ſocietate creat.  
2. dum facultate loquendi inſtruit, 3. dum horrorem ſolitudinis animis noſtris ingenerat (a): extra eam igitur beatus eſſe homo nequit: nec in ea, niſi ſciat & paratus ſit cuiſvis quod ſuum eſt tribuere, alioquin in mutuam bellum armarentur omnes, atque idcirco in mutuam perniciem; quæ autem virtus ſuum cuique tribuere docet & impellit, juſtitia eſt; ergo juſtitia ad præſentis vitæ beatitudinem neceſſaria. Conferunt idem juſtitiaæ affectæ ex Stoicorum doctrina, *Eusebia*, pietas, ſcientia Deum colendi, *Chreſtote*, *benignitas* ſcientia bene faciendi, *Euchinoneſia*, ſocialitas, ſcientia tuendi in ſocietate æqualitatem, *Eufinallaxia*, ſcientia honeſte cum aliis contrahendi, & ſimiles (b); quæ ea de cauſa neceſſariæ.

*Coroll.* Quæ his omnibus ſunt contraria nos ad beatitudinem impeditiores efficiunt, miſeriamque noſtram augent. Demonſtratione non indiget, ſi ſuperiores propoſitiones ſunt veræ.

*Prop. LXXXI.* Perſectio rationis, epoche, prudentia, temperantia, fortitudo, juſtitia cum ſuis affectis ſunt virtutes morales: his contraria ſunt vitia.

D. Virtus moralis eſt, quæ perficit facultates rationales ad beatitudinem: vitium quod impeditiores ad illam efficit [def. 17.] hujusmodi ſunt recensita in propoſitione [ex ſup. prop.]; priora ergo virtutes, poſteriora vitia.

*Coroll. 1.* Nonniſi ergo virtute eſſe homines beati poſſunt, vitio non poſſunt eſſe niſi miſeri. Quam ergo incauti decipiuntur ſpecie recti homines? Opponunt ple-

(a) Vide *Ariſt. ſub init. ad Nicomach.*

(b) Vide *Stanl. loc. ſup. cit.*

pleraque esse vitia cum voluptate conjuncta, cum dolore atque labore multo virtutes. Nempe principio, quæ comitatur vitia voluptas fugax est, & turbida; quam pollicetur præstatque virtus æquabilis & constans: nemo est qui non continue experiatur. Tum consequuntur illam fere semper aut ingentes dolores, aut gravissimæ tristitiæ; hæc impeti adversa fortuna potest, frangi nequit, mensque conscia recti, & tranquilla est, & sibi judex, & theatrum. Deinde nego viam ad vitia breviorē esse aut faciliorem.

*Ut jugulent homines surgunt de nocte latrones:*  
 intemperantiam, injustitiam, aliaque vitia acerbis sentantur dolores, difficillimæ fraudes, excogitationes, animi consternationes præeunt, eadem & sequuntur. *Ut nox longa quibus mentitur amica?* Nemo uni vitio servire potest, nisi & sociis plurimis se mancipet. Quantum autem jugum plura sunt vitia, ubi unum de natura & majestate sua hominem dejecit? Sed quædam virtutes paullo sunt austeriores. At hæc intollerabilis est stultitia magna bona velle in promptu parata: quum minora, quandoque etiam mala magno labore persequaris, *pulchra*, inquit ille, *difficilia*.

*... vides, quæ maxima credis  
 Esse mala, exiguum censum, turpemque repulsam  
 Quanto devites animi capitisque labore.*

*Impiger extremos currit mercator ad Indos,  
 Per mare pauperiem fugiens, per saxa, per ignes:  
 Nec cures ea, quæ stulte miraris & optas,  
 Discere, & audire, & meliori credere non vis?  
 Quis circum pagos, & circum compita pugnat  
 Magna coronari contemnat olympia, cui spes,*

(a) *Cui sit conditio dulcis sine pulvere palmæ?*

nempe

*Nos numerus sumus, & fruges consumere nati  
 Sponsi Penelopes, nebulones, Alcinoique  
 In cute curanda plus æque operata juventus,  
 Cui pulchrum fuit in medios dormire dies, &  
 Ad strepitum citharæ cessatum ducere curam.*

*Quæ*

(a) Horat. lib. 1. epist. 2.

*Quæ lædunt oculos festinas demere: si quid  
Est animum differs curandi tempus in annum?*

..... atqui

*Si noles sanus, curres hydropicus* . . . . . [a]

Coroll. 2. Virtus homini necessaria esset etiam si nulla altera esset vita, imo magis etiam necessaria. Nam si nulla sit altera vita, ut contendunt Athei, ultimus humanæ naturæ finis est præsentis beatitudo; quæ quum sine virtute obtineri nequeat [prop. super.] est ea homini, etiam si nulla sit altera vita, necessaria, & tanto magis necessaria, quanto nihil sit alterius sperandum. Quod corollarium omnium mortalium stultissimos eos esse demonstrat, de quibus David cecinit, *dixit insipiens in corde suo non est Deus: corrupti sunt & abominabiles facti dies ejus.*

Prop. LXXXII. Virtus, quæ beatitudini necessaria est, non est *actus*, sed *habitus*.

D. Nam debet perficere facultates rationales ad beatitudinem; id quod fit & obstacula removendo; quæ homini seu a natura, seu a consuetudine mala insunt; & expeditiores facultates ejusmodi efficiendo: ea vero singulares actus præstare nequeunt; sunt ergo habitus virtuosii necessarii. Silicere occallere *generose pectus bono* debet ei, qui serio ad beatitudinem hanc contendit, ut a proposito tenaci nec terribilia dimoveant, nec revocent blanditiæ.

Schol. Contractis semel habituum virtutibus tum prudentia perpetuo in earum custodiam vigilare oportet: nam impetimur undequaque ad vitia: hinc ab aspero quorundam virtutum adpectu & naturæ injucundo; inde ab hominum corruptorum exemplo, aut lasciviente rerum quarundam facie, postremumque hoc duellum difficilior. Egregie prorsus Galba Pisoni [b]. *Fortunam adhuc tantum adversam tulisti: secundæ res acrioribus simulis animos explorant; quia MISERIE TOLERANTUR, FELICITATE CORRUMPIMUR.* Fidem, libertatem, amicitiam, præcipua humani animi bona, tu quidem eadem constantia retinebis; sed alii per obse-

(a) Horat. lib. 1. ep. 2.

(b) Tacit. lib. 1. histor. cap. 15.



*obsequium imminuent: irrumpet adulatio: blanditiæ pessimum veri affectus venenum: sua cuique utilitas. Etiam ego & tu simplicissime inter nos hodie loquimur; ceteri libentius cum fortuna nostra, quam nobiscum. O præclara, & apposita, quæ sequitur, sententia [suadere Principi quod oporteat multi laboris: assentatio erga principem quemcumque sine affectu peragitur] digna quæ hominum pastores legant, & cum animo suo continenter cogitent.*

*Prop. LXXXIII. Ad beatitudinem alterius vitæ necessaria est fides in Deum, & gratia.*

D. Prima pars. 1. Eam beatitudinem revelatione sua Deus nobis promisit, apposita lege, *nihil coinquinatum in Regnum Dei intrare.*

2. Ut ne simus coinquinati conformare mores debemus ex legibus ipsius Dei.

3. Ex quo fit ut necessaria sit ad beatitudinem illam divinarum legum scientia.

4. Jam pleræque divinæ lege legibus sensus adversantur: formant enim homines ex ratione æterna ad æterna bona, adversus quæ hominis appetitus præsentibus sensuum oblectamentis irretitus & abruptus recalcitrant (a).

5. Ergo ut divinis potius pareamus legibus, quam cupiditatibus nostris, præferre debemus Dei rationem rationi & appetitui nostro, reputareque sedulo Deum ita nos amare, ut nequeat velle miseros, tantaque sapientia esse præditum & potentia, ut sapientius & validus nos ad veram beatitudinem ducere possit, quam ulla nostra sapientia, aut potentia.

6. At id (5) numquam obtinebimus, nisi mentem nostram obsequentissimam Dei voluntati præbeamus, ita ut ejus sapientia, bonitas, & fidelitas nos concutiat, Deique timor in nobis dominetur.

7. Id autem (6) est fides divina, quæ in hoc est posita, ut maxima sit apud nos Dei sapientiæ, bonitatis, amoris erga nos, providentiæ, & fidelitatis existimatio, maxima dictorum, factorumque ejus veneratio.

8. Fides ergo divina necessaria est ad alterius vitæ bea-

[a] *Paul. ad Romanos.*

beatitudinem obtinendam , velut primum vitæ Christianæ fundamentum .

Secunda pars . Experimento discimus præsentis vitæ bona fortius nos rapere , quam æterna , plurimaque præsentis vitæ bona adversari contendentibus ad æterna . Ad eam vitæ perturbationem & depravationem curandam subsidium a natura nostra petere non possumus ; petendum ergo est a Deo . Necessaria est igitur Dei gratia &c. ( A ) .

*Schol. ( A ) .* Tam hæc sunt perspicua , ut nihil frequentius in ipso Homero legas , quam oportere hominem in omni vita prudenter pacateque degenda ad Deos auxiliares confugere . Sed & extat apud Platonem in *Legibus* aureus plane locus , quo in loco , quum monuisset Socrates adolescentem , ut in depravatis vitæ cupiditatibus seniorum rogaret consilia , qualemcumque inde opem laturus , addit , *si ne id quidem morbo medetur , confuge ad Deos auxiliares , quorum certum est præsidium* . Passim similia in aliis legere est , ut intelligere possimus , quo naturæ sensu ducimur in notitiam supremi rerum opificis & gubernatoris , eodem rapi in ejus invocationem , faterique sine ejus ope imbecillia heic esse omnia & perturbata atque præpostera .

Capita attigi virtutum humanarum . Ea qui probe servabit grandem proculdubio gradum in vita recte gubernanda fecit . Rem autem ulterius non proveho , copiosius id in *Ethica* , si vita suppetat , facturum . De iis vero quas ad beatitudinem æternam spectant , differere philosophi non est : Theologorum ea est provincia , eam nos quoque partem in *Theologia Christiana* pro virili pertractamus . Nunc Menti mundi architectrici , & gubernatrici principio lætus qualemcumque hanc oppellam in gratiarum actionem devoveo : tum *in spiritu & veritate* supplico ut opem continuet ;

*Quæ quoniam rerum naturam sola gubernas ,  
Nec sine te quidquam dias in luminis oras  
Exoritur , nec fit lætum , neque amabile quidquam  
Te sociam te invoco scribendis omnibus esse .*

# A P P E N D I X

## A D C A P U T S U P E R I U S

*De virtute generatim, ejusque causis & signis.*

§. I. **Q**Uum sint quidam, qui licet agnoscant virtutem necessariam esse *ad bene beateque* vivendum, videntur tamen in eo hærerere, acquiri possit, nec ne, virtus, suspicanturque, a natura esse, non ab arte & exercitio, ut proinde inutilem possint existimare omnem, quam philosophi eam in rem operam impendunt; ego quæ ad virtutem generatim pertinent, ejusque effectrices causas retractare hoc in loco tanto lubentius suscepi, quanto res est quæ naturæ nostræ magis interest. Scio esse, qui mihi illud objiciant, *difficile esse ab artificio suo discedere*, quique censeant idcirco me res diversi generis uno in loco coarctasse; ac *Delphinum silvis appingere, fluctibus aprum*. Sed certum mihi est, nihil esse ab ulla disciplina alienum, quod quocumque modo subjectam ei rem explicare & illustrare possit. Quamquam quo quis jure censere possit, esse a Psychologia alienum quodcumque ad naturam animi & hominis pertinet, nondum satis intelligo. Ego potius sæpe Metaphysicorum libros legens (quid enim id dissimulem?) dolui, viros summos in *homine metaphysico & abstracto* contemplando totos fuisse tamdiu occupatos, *naturæ vero hominem*, quod nostra ac generis humani magis interest, quasi ab officio suo alienum, nec inspectare quidem voluisse, in quo mihi illi ignoscant, si ingenio & tempore abusus judicem. Sed illi in hoc errabant, quod eundem *Metaphysicum hominem*, & *hominem naturæ* opinabantur, quum longe a se dissiti & diversi sint. Platonicum ego hominem, aut Stoicum nullibi nisi in libris philosopho-

Tom. II.

Q rum

rum comperio: alius est & diversus naturæ homo: ac de homine naturæ me plus docent ii, qui eos depinxerunt, qui in Tellure gignuntur ut historici, quam omnes Platoniorum & Stoicorum libri. Itaque me quoque pœnitet non exiguum tempus in huiusmodi acroasibus contrivisse. Accedit quod hæc metaphysici hominis contemplatio aut exiguum, aut nullum sit in vita humana præclare agenda operæ pretium. Nam cum nos hominem addiscere oportet, quocum vivimus; nec vero vivimus, nisi cum naturæ homine. In homine autem hoc contemplando, ejus constitutio, propensiones, dispositiones, qualitates, ac ea demum quæ sunt in eo omnia, seu a natura, seu a vitæ commercio perpendenda sunt. Secundum hæc in vitæ rectæ & beatæ regulas inquirere oportet; ad eas tandem hunc homines formare, & ubi enormis abit, revocare. Id ego esse ajo in philosophia præclarum. Sed eo redeamus, unde discessimus.

§. 2. Aristoteles in libris ad Nicomachum virtutem in hoc esse positam arbitratur, ut animi affectus temperet, ac modificet, ut esse possint apta instrumenta ad beatitudinem consequendam. Itaque affectus velut materiem virtutum habet. Nos iterum hoc in loco virtutem ex fine definimus. Virtus igitur est quidquid naturam perficit, atque ad finem consequendum habiliorem reddit: ut contra vitium est, quod impeditiorem efficit ad finem suum, aut ab eo distrahit: Quoniam autem affectus naturæ humanæ sunt quidam vehementiores impetus, & quasi elastici vectes quibus in finem impellimur; tota natura virtutis ejusque officium in hoc præsertim positum est, ut eos temperet, modificet, regat.

§. 3. Fines porro naturæ nostræ, quod sæpe alias dictum, aut præsentem tantum vitam spectant, aut futuram quoque. Quæ hominem perficiunt ad vitæ futuræ beatitudinem, atque ad eam regunt, virtutes. Theologicæ dicuntur. Præsentis vero vitæ duo status spectandi sunt, Monasticus, & Civilis, seu vita solitaria, & vita socialis. In primo statu tranquillitas, &  
pax

pax vitæ privatæ, in secundo vero tranquillitas totius societatis maximus finis est. Quocirca quæcumque hominē perficiunt ad tranquillitatem vitæ Monasticæ virtutes monasticæ & ethicæ appellantur: quæ vero eundem hominem ad Societatem sancte colendam instituunt; & societatis tranquillitatem pariunt, dicuntur virtutes civiles.

§. 4. Quum homo Anima, & corpore constet, intelligitur esse virtutes, quæ animum, esse quæ corpus, & esse quæ utrumque perficiunt. Quæ corpus perficiunt, nec animam spectant, hujus non sunt loci. Quæ vero animum, aut totum hominem spectant, duplici item sunt in genere positæ: nam aut rationem; aut voluntatem, seu potentiam agendi, perficiunt. Illæ virtutes intellectuales nominantur; hæ morales.

§. 5. Jam quod animum ad finem suum perficit; aut *actus* est, aut *habitus*: habitus omnes continuatione actuum acquiruntur, ut nullus sit in natura nostra ingenus, licet sit habitudo quædam, & aptitudo ad habitus excipiendos. Scilicet humana natura spectanda est velut mollis quædam cera; quæ nullis figuris prædicta, est tamen apta omnibus excipiendis. Nullis nos virtutibus moralibus ornati nascimur Adæ filii: quin potius ita corrupti nascimur, ut faciliorem naturam habere videamur excipiendis vitiis, quam virtutibus, quemadmodum humana docet historia. Præterquam quod, quæ sunt innata non sunt mutabilia; ut Aristotèles ipse ratiocinatur: Virtutum vero habitus omnes mutabiles sunt; virtutes ergo innatæ non sunt. Divina igitur ope, assuesactione, ac continuata naturæ nostræ inflexione ad honestatem, & justitiam, virtutum habitus acquiruntur. Quamquam singuli actus, quibus habitus virtuosos acquirere nitimur; virtutes quoque sunt, & appellantur; vulgatius tamen est habitus ipsos virtutes appellare.

§. 6. Sed gravis hoc in loco nobis exoritur quæstio, acquiri ne possit virtus? Quum virtus in eo sit omnis posita, ut affectus in ordinem referat, componatque, atque quum naturæ nostræ indigentia, cujus illi

argumentum sunt, cuique permovendæ velut vestes inferviunt; tum externarum rerum cum natura nostra relationibus temperet; id minime fieri posse videtur. Nam natura nostra temperamentis necessario agi videtur, ut ea nec extirpare possimus, nec immutare. Sunt quidam, qui sanguineo temperamento præditi, in jocos, scurrilitatem, amores, aliasque corporis voluptates quasi inviti rapiuntur, quos qui frænare velit, is totam eorum naturam immutet necesse est. Alii temperamento sunt præditi melancholico, ut idcirco perpetuo inquieti sint, minime sibi satisfaciētes, turbidi, truces, immanes. Eos qui cicures efficere velit, fibras, vasa, fluida, structuram omnem humani corporis, & naturæ constitutionem immutare debet. Sunt quidam natura timidi & pusillanimi; iracundi alii & ruinis simillimi: quidam molles & inertes; alii avari, alii natura ambitiosi; quidam subdoli & fraudulentī. Hos ubi ad virtutem componere velimus, a primis naturæ elementis suscipiendum est. Accedit, quod naturæ humanæ constitutiones diversæ a climatibus plurimum pendeant, id quod Geographia hamani generis satis docet. Ita isti concludere sibi videntur, virtutem, nisi a natura sit, acquiri nullo pacto posse.

§. 7. Falluntur tamen, eaque naturæ humanæ faciunt *propria*, & *prima*, quæ sunt illi accidentia, & accessoria. Ac principio, temperamenta non vim habent ad agendum, sed ad suscipiendum: facilitates aut difficultates faciunt recipiendi, non agendi. Ratione illa & phantasia commoventur, facilius quidem & promptius, aut tardius & difficilīus, quam si abessent. Et quemadmodum ariditas in lignis facilitas est ignem excipiendi, quæ in humidis deest, non autem vis ad inflammandum; eodem modo temperamenta efficiunt, ut promptius & facilius aut difficilīus & tardius quibusdam rerum imaginibus agitemur, non autem ut inviti impellamur. Quamobrem si rationem emendares, si phantasiam purgare studeamus, si rerum bonitatem aut malitiam exacte dimetiamur, si veras rerum cum  
natu-

natura & finibus nostris relationes despiciamus, poterimus quidem ab illis aut paullo vehementius commoveri aut retardari aliquantum, nullo autem modo inviti adigi. Itaque experimento didicimus plurimum in iis emendandis posse & purgatam sanamque rationem, & continuatum studium, diligentiamque ea ad regulam subigendi. Nec ullum majus argumentum esse potest, evadere illa posse instrumenta virtutis, quam quod experientia docet, plures sibi illa & rationi submisisse, ut sentirent quidem se aut vehementius agitari, aut impediri vi magna, interea vel frænarent, vel stimulis agerent. Neminem esse ego ajo quantumvis depravatum, qui, si ingenuus esse velit, se invitum ad vitia rapi fateatur: neminem scelestissimum, qui ad honestatem & virtutem flecti nequeat. Non equidem negaverim plurimum climata in temperamenta & mores influere; sed necessario agere id ego esse falsum ex experientia comperio. Nam plures sunt sub eodem ferme climate nationes, quæ diversis vivunt moribus. Nam sub eodem prope climate sunt Japonenses, Sinenses septentrionales, Tartari plures, Armeni, Græci, Itali, Mexicani Boreales, non iisdem tamen vivunt moribus. Insulani quidam sibi alioquin vicinissimi moribus, & institutis, immane quantum distant. Itaque una præcipua illis diversorum morum causa est educatio. Quid quod non eosdem mores in eadem gente diversis temporibus reperiamus, nisi quis dicere velit, Romanorum, qui fuerunt olim mores & studia, eadem nunc esse. Quando ergo constat educatione ad diversos mores flecti naturam humanam posse, fateamur, omnium esse naturaliter capacem; ac proinde ut educatione & exercitio ac commercio vitæ vitia contrahere posse, ita posse & virtutes.

§. 8. Quoniam virtutes non innascuntur nobiscum, ut demonstratum est, jure hoc in loco nunc a nobis quæretur, quæ sint causæ effectrices virtutum moralium. Videntur esse omnino quinque; Deus, ingenium, seu temperamentum, educatio, exercitatio, præcepta. Ac principio veræ, & perfectæ virtutis dator solus

est Deus : a quo enim sunt essentia , & natura nostra , ab eodem & converfantur , & perficiuntur , & ad fines suos potentissime , & sapientissime ducuntur . Præterea nemo accuratissime noscere potest Præter Deum , naturarum rationalium fines , mediæ ad fines , mediorum cum fine proportionem , & vires ad id necessarias : Deus ergo tantum veræ , & perfectæ virtutis Dator esse potest .

§. 9. Hoc , quod Scripturæ Sanctæ est perpetuum Dogma , Ethnici ipsi philosophi intellexisse videntur . In celebri enim illa inter Græcos controversia , virtus nascatur ne nobiscum , an acquiratur doctrina & exercitatione , Plato sic differuit in Menone , ut virtutem nec a natura esse , nec a nobis , sed a Deo scriberet . Sed sunt plurima Homeri ipsius loca , in quibus ille virtutem a Diis expectandam tradit , quæ studiose collegit Fridericus Rappoldus Commentariis in Horatium , pag. 809. Notandum & hoc Epicteti , qui dum de compescendis affectibus , quod virtute fit , disserit , ait , *Certamen quidem magnum est , opusque plane Divinum . Dei igitur memineris , Eum invoca opitulatorem , & auxiliatorem , quemadmodum Nautæ Dioscuros , quum in tempestate navigant . Quæ enim major tempestas , quam quæ oritur ex imaginationibus violentis ipsamque rationem elidentibus ?* Vide Arianum lib. 2. cap. 1. in Epictetum .

§. 10. Id confirmatur etiam perpetua experientia vitæ humanæ , ex qua discimus , rationem quantumvis purgatam , dum natura affectibus agitur , vim non habere ad compescendum . Itaque veritates morales in magna hominum parte intellectum cogunt ad assensum , naturam minime movent . Viri ipsi in ratione consummati , nec exercitati in virtute , ubi natura paullo vehementius agitata fuerit , impotentes animo evadunt , nec minus perturbantur , atque transversum aguntur , quam cetera omnia animantia , Quo argumento evidentissime demonstratur , naturam humanam sine interiori quodam , & potente Dei auxilio , etiam ubi vera quæ-



quædam intelligit, minime tamen esse aptam ad agendum, ac ita agendum, ut cum sine suo contentiant perfecte. Eodem argumento imbecillitatem nostram cognoscere docemur atque nobis minime fidentes, in Deo spem nostram collocare.

§. 11. Ingenium, seu natura, ad virtutem moralem duo potissimum confert. Primum facultatem, seu aptitudinem ad virtutem excipiendam; alias enim virtutem numquam assequeremur. Secundum, impetum, & inclinationem erga virtutem, quæ aptitudinis illius naturalis quædam perfectio est. Hæc autem inclinatio duplex est: Una omnibus communis, minus tamen vehemens, quam amorem honestatis dicere possis. Est hæc in omnibus hominibus, qui prava educatione non sint efferati. Nemo enim est, qui non aliquando amore hoc honestatis tangatur. Altera est peculiaris, & perfectior, quæ in iis tantum est, qui singulari naturæ bonitate sunt præditi, qua qui ornati nascuntur, eos ad virtutem natos, factosque dicimus. Pendet ea plurimum ab educatione, nec raro etiam a corporis temperamento. Nam educatio sine apto temperamento non magis utilis est ad virtutem, quam Terræ arenosæ cultura ad fruges. Tertia & quarta virtutis causæ sunt educatio, & exercitatio, educatione enim, & exercitatione, ut tenellæ plantæ continuata cultura ad fruges, ita natura nostra ad habitus virtuosos tandem inflectitur. Qui dixit, hominem civilem nihil esse aliud, nisi habituum congeriem ex educatione, & exercitatione contractorum, dignum Philosopho pronunciavit. Scilicet homo naturalis tam differt a civili, quam marmor a statua. Sed ad educationem, & exercitationem conferunt plurimum præcepta doctrinæ, quæ quinta sunt virtutis causa. Ea enim præcepta, si attente excipiantur & recolantur sæpissime, ita ut in succum, & sanguinem convertantur, non parvam vim obtinent ad naturam perficiendam, & promovendam, præsertim si vitiosi habitus non impediant. Sed de his nunc accuratius disseramus.

§. 12. Præcepta ei observanda, qui se ad virtutem excitare, & exercere vult, duorum sunt generum, alia generalia, alia specialia. Specialia virtutum præcepta in iis locis Ethicæ si vita suppetat, trademus, in quibus de Officiis hominum disputabimus, Generalia tantum hoc in loco proponemus.

§. 13. Primum Præceptum est, ut Divinum auxilium, quo ad virtutem colendam vires recipiamus, assiduis precibus imploremus. Nam & prima causa virtutis effectrix est Deus, ut supra demonstratum est, & *timor Dei initium sapientiæ* in divinis Scripturis appellatur. Quo in loco adnotandum est, vocabulum *sapientiæ* non accipi theoretice pro scientia, & doctrina tantum, sed practice, idest pro cognitione, & arte vitæ directrice. Quumque fieri possit, ut quis multiplici eruditione, & doctrina refertus, nesciat interim recte vivere, fieri & illud potest, ut quis sit *doctus*, sed non *sapiens*.

§. 14. Secundum præceptum est, ut virtutis insignis pulchritudo, & uberrimi fructus continenter ob oculos habeantur. Socrates dicere solebat, quod si honestas, & virtus vultum suum sine velo ostenderet, incredibiles in nobis amoris flammæ accenderet. Inter fructus vero virtutis præcipui sunt, animi tranquillitas, quæ a sola virtute proficiscitur, ut in superiori capite demonstratum est: deinde vera laus, & gloria, quæ non a vitiis, sed a sola virtute expectari potest: præterea vera utilitas: quandoquidem vitia utilitatem mentiri possunt, veram præstare nequeant, ut si aliquando contingat, esse fortunata, nunquam tamen sunt tuta: tum vera nobilitas; nobilitas enim ex virtute primum nata est, & in virtute posita est *essentialiter*, ut qui avita nobilitate gloriantur, ipsi omni virtute vacui, nobilium magis filii, quam nobiles dicendi sunt. Tandem virtus magnum hoc beneficium secum affert, ut amorem etiam a Barbaris extundet: hinc præclarum illud Tullii, *Virtus etiam in hoste diligitur*.

§. 15. Tertium præceptum est, non mediocria tantum, aut factu facilia, in virtute tibi proponas sequen-

quenda, sed ad summum ejus fastigium, ac virtutem, quæ dicitur heroica, semper adspires; quod nisi feceris, vix in extrema ejus parte hærebis. Imitandi sunt armorum duces, qui etiam dum orbem Terræ populantur, falsæ gloriæ adspectu moti, semper eos sibi imitandos proponunt, qui summi fuere, velut olim Alexander Herculem, & Achillem, Cæsar Alexandrum, Eodem quoque modo tu in vita honesta, & virtuosa perfectissimos velut exemplaria vitæ tibi proponas ad imitandum. Revocat nos ad id præceptum Christus Servator noster: *Estote, inquit, perfecti, sicut Pater vester, qui in Cælis est.*

§. 16. Quartum Præceptum est, ut vitia omnis vis coloribus perpetuo Menti depingamus, atque assuescamus exhorrere. Dici enim vix potest, quantam vim conferat ad virtutem constabiliendam horror vitiorum. Noscere in primis id debent Educatores Infantium; ac horriticiis exemplis vitia illis describere, & læpissime vitiorum infelices exitus demonstrare. Sic enim habendum est, neminem esse posse virtuosum, qui horrore vitii animum spoliabit. Pudor *sepimentum virtutis* dicitur eleganter a Platone. Præclare Horatius, *Virtus est vitium fugere, & sapientia prima stultitia caruisse.*

§. 17. Quintum Præceptum est, ut ab eo vitio, quod magis virtuti adversatur, longius discedamus, & in contrariam partem quodammodo nos inflectamus. Esse vero eidem virtuti vitia multa contraria, atque alia magis, quam alia adversari, omni dubio caret. Præcepti ratio est, quod si nos vitiis aliquibus obnoxios esse contingat, quam minimis, & minus perniciosi obnoxii simus, atque de malis minima habeamus, quod inter corruptos homines, bonitatis species quædam est: nam minima mala comparata cum majoribus boni quodammodo rationem habent, præsertim quum a majoribus præservant.

§. 18. Sextum Præceptum est, ut non solum consideremus quòdnam vitium magis cum virtute pugnet, quod superius præceptum sciscit, verum etiam ut per-

pen-

pendamus, in quod simus, aut ob temperamentum, aut ob educationem propensiores, ut ab eo nos longius abducamus. Atque in hoc præsertim homini virtutis amanti danda est opera. Eleganter item Horatius.

*Denique teipsum*  
*Conscute, nam qua tibi vitiorum iniecit olim*  
*Natura, aut consuetudo mala: namque*  
*Neglectis urenda siliæ innascitur arvis.*

§. 19. Septimum Præceptum est ex superiori proficiscens. Nempe quoniam sunt quædam vitia, quæ ætatum sunt propria, ut in adolescentibus, ac juvenibus intemperantia, & præcipitantia; in viris ætate maturis ambitio: in senibus avaritia; hæc in primis coercenda sunt, & vitanda: his impendendus magna cura animus, ne si nos semel invadant, correptos tota illa ætate teneant, ac totam vitam moralem perturbent.

§. 20. Octavum Præceptum est: otium cane pejus & angue fugias: est enim ut vitiorum omnium sentina, ita præcipue virtuti inimicum. Quocirca labori incumbendum est viro virtutis amanti. Quumque duplices sint labores, animi, & corporis; corporis quidem labores pro cujusque conditione suscipiendi: sed animus nunquam, aut raro a seriis occupationibus removendus. Homines ipsi literarum studiis dediti operæ pretium facient, si artem aliquam Mechanicam, honestam illam, & ingenio dignam discant, atque in ea subcivis horis se exercent. Picus Mirandulanus Comes juvenis, & nobilitate generis, & literis celebratissimus id præcipuum sui ornamentum censebat, quod artes ferme omnes Mechanicas sciret exercere. Egregios superioris ætatis Philosophos cum voluptate exercuisse, aut Sculpturam, aut Picturam, aut artem perspicillorum, vel horologiorum, ex eorum vitis scimus. Eam ob rem plura inventa Mechanica iis debemus. Inter animi autem labores studia sunt literarum, quibus qui serio vacant, tempus, quod impendant in vitia, non habent. Fama est rogatum Newtonum, an amori un-

unquam operam dedisset, respondisse, nullum sibi reliquum fuisse tempus a meditationibus Philosophicis, quæ de re cogitaret.

§. 21. Quoniam tamen longum est iter per præcepta, breve & efficax per exempla, ac inter exempla illa magis nos commovent, quæ in oculis perpetuo versantur, quam quæ tantum audiuntur, aut leguntur; & rursus, quia ab iis, quos amamus, & quibuscum vivimus, discimus facilius, eosque studiosius imitamur; inde nascitur nonum Præceptum, ut non solum historias virorum in virtute illustrium attentissime legamus, verum etiam eligamus amicos honestos, virtuosos, & sinceròs, atque cum iis familiarissime conversemur. Enimvero cum ex lectione vitarum illustrium virorum, tum ex conversatione virorum virtuosorum transeat aliquid continenter in animum, quo paulatim ad virtutem componimur. Præterea coram amicis virtuosis non possumus non esse virtuosì, ac perpetuo ad virtutem inflecti: omnes enim homines quantumvis impudentes verentur hominum gravium, & honestorum reprehensionem, ac judicia. Præclare prorsus Seneca Epistola 11. ad Lucilium, *Magna pars peccatorum tollitur, si testis peccaturis adsistat.*

§. 22. Decimum Præceptum idem Seneca in laudata Epistola suppeditat, ut si testis morum sanctitate gravis, & qui pudorem ac reverentiam incutiat non semper habeatur præsens, saltem perfecta quædam ejus imago Menti perpetuo obversetur: plurimum enim animum a vitio retrahit, impellitque ad virtutem. Ut ecce finge te coram Catone esse, vereberis profecto coram viro tam severo & justo esse scurrilis, aut incontinens, aut injustus. Et quomodo dum quis scribit, aut loquitur privatim, si fingat se versari in confesso doctissimorum, ac severi Judicii virorum, castigatius ille scribit, aut loquitur; eodem modo honestius vivit, qui coram honestissimis viris vivere sibi persuadet. Sed in re morali id in primis maximi momenti est, sedulo secum reputare coram Deo nos esse, & operari, Dei vero

vero oculum vindicem esse, ut Homerus loquitur. Reperire est hoc præceptum in ipsis Ethnicis scriptoribus, præsertim in Platone, Seneca, Epicteto, Marco Antonio, aliisque sæpe traditum.

§. 23. Undecimum Præceptum est, ut admonitiones, & objurgationes amicorum, aut seniorum non solum æquo animo auscultemus, verum etiam efflagitemus, si viri boni esse volumus. Nam quoniam vitia sua nemo omnia inspicit, refert plurimum sincerum admonitorem habere. Quin etiam inimicorum reprehensiones, quas livor dictat, veluti virtutis scholam excipiemus, atque iis, quæ ad nocendum intenduntur, proficiemus ad virtutem: honesta enim hæc est vindictæ ratio, ex inimicis proficere. Insignis est super ea re Cardani liber *de utilitate ex adversis capienda*. Contra vero neminem magis cave, quam, adulatorem, qui inimico ipso hoc est peior & nocentior, quod sub specie amicitiae tutius lædat. Legatur liber Plutarchi: *Qua ratione discerni possit amicus ab adulatore*.

§. 24. Duodecimum Præceptum est, ut vitiorum occasionem omnes fugiamus, atque eorum initiis vehementissime resistamus: quod scilicet semper facilius est, integrum hominem jam vitio irrepenti resistere, quam hominem jam vitio correptum, ac debilitatum: vires enim paullatim decrescunt, atque in eadem ratione augetur vitium. Id vero cum in omnibus vitiis adhibendum est, tum præcipue in iis, ad quæ sumus natura procliviores. Alexander Macedo utcumque non multæ continentiae; tamen quum semel invisisset Darii Persarum Regis filias ætate florentes, ac forma pulcherrimas, noluit secundo invisere, quia sibi ab illis metuebat: *Dolores*, inquit, *oculorum sunt*. Vide Plutarchum in Alexan.

§. 25. Decimum tertium vero Virtutis Præceptum est, ut quod de salute corporis pronunciavit persæcte Hippocrates, *nihil parvum, nihil contemnendum existima*. Id potiori jure ad animum referamus; nam ut præclare observat Aristoteles, plerumque, quæ mole sunt

exi-

exigua, virtute sunt maxima: ac *parva sæpe scintilla*, ut ille inquit, *neglecta magnum exitavit incendium*. Igitur ne levibus quidem vitiis aditus patefaciendus est: sic enim ad maxima fit gradus. Vulgata sunt illa, & continuata experientia confirmata. *Qui spernit modica, paulatim decedit*, & *nemo repente fit pessimus*. Nationes, quæ ad publicam morum corruptionem devenere, non illæ repente, sed paulatim devenerunt: sensim scilicet a veteribus institutis, & moribus descivere, & vitiis aditum aperuerunt, donec eo veniretur, ut corrumpere, & corrumpi sæculum vocaretur, quod de Romanis scribit Tacitus.

§. 26. Decimumquartum Præceptum est, ut quotidie, & accurate factorum, dictorum, apt cogitatorum nostrorum examen instituamus, quo accusatoris partes adversus nos ipsos suscipiamus, defensoris nunquam. In hoc autem examine vel minima quæque recensenda, atque minima quæque emendanda sunt. Testatur Seneca, se hoc præcepto totam vitam regere solitum, nec unquam somnum capere, quin severus sui censor cuncta perpendisset dicta, facta, cogitata. Extat in Carmine auro, quod Pythagoræ tribuitur, locus super ea re insignis, quem operæ pretium est immortalis memoria tenere.

*E somno primum vigilans, quum strata relinquis,  
Disponas animo luce expedienda futura.*

*Quando adimit rebus veniens nox atra colorem,  
Ne prius admittas per dulcia lumina somnum,  
Singula quam elapsi ter volveris acta diei.*

*Numquid deliqui? quid gessi in tempore? quid non?  
Cur isti facto decus absuit, aut ratio illi?*

§. 27. Postremum tandem Præceptum est, ut de nobis quam modestissime sentiamus, nec tam quo progressi sumus, quam quousque nobis adhuc sit progrediendum, cogitemus. Nihil enim tam progressibus in virtute obstat, quam adrogantia, & multa opinio sui, quandoquidem nemo eo pervenire contendet, quo se jam pervenisse putat. Itaque quod Plato de virtutibus

in-

intellectualibus dixit, *multi ad scientiam pervenissent, nisi se jam pervenisse putarent*, id tu de virtute morali majori jure dicere potes. Eam ob rem cavendum est, ne laudibus capiamur, atque a recto virtutis tramite superbientes deflectamus.

§. 28. Plura alia præcepta ad virtutem aut compo-  
nentia, aut cohortantia ex virorum illustrium exem-  
plis, aut ex continua vitæ humanæ consuetudine qui-  
vis colligere potest. Quæ in superioribus protulimus;  
si exercitatione ipsa in naturam convertantur, primæ  
adolescentiæ regendæ sufficiunt. Illud autem nunc  
explicandum est, quibus argumentis cognoscere possi-  
mus, profecerimus, nec ne, in virtute? Egit ea de  
re accurate, & doctè Plutarchus in Opusculo de *Pro-  
fectu virtutum*: inde pauca delibare placet.

§. 29. Primum ille argumentum profectus in virtute  
ponit virtutis ipsius amorem. Is scilicet se profecisse  
in virtute sciat, qui virtutem, ac virtutis speciem  
quamlibet impenſe se amare perſentiscit. Agnoſcet au-  
tem se virtutem amare, si occasionem exercendæ im-  
patienter quærat; si magno ejus desiderio teneatur; si  
hominum virtuosorum conversatione delectetur: si ad  
præſentiam vitiorum exhorrescat, nec in se sollici-  
tationem ad vitia sentiat interiorum: uno verbo, qui-  
bus indicis cognoscitur; nos rem aliam quamlibet ama-  
re, iisdem dignoscitur, nos amare virtutem.

§. 30. Alterum indicium constituit Plutarchus, si ad  
aliorum irrisum constanter perseveret in virtute,  
nec magnopere animo turbetur: Id autem, ut obti-  
neat necessarium est non solum ut in virtute occal-  
leat, verum etiam sedulo perpendere, majorem homi-  
num partem vitiis esse corruptam; ac propterea ne-  
cesse esse, ut virtuosus pluribus displiceat, ut eorum  
invidentiæ obnoxius sit, ut calumniis laceretur. In  
anteceſſum hæc futura ſecum reputet, quominus, quum  
accidunt, perturbetur. Quinimmo hinc tertium argu-  
mentum profectus in virtute deducere potest: displice-  
te enim malis, magnum est bonitatis argumentum.

Ita



Itaque Philosophus ille, de quo Laetius, quum relatum ei esset; se publice laudari, *me miserum*, inquit; *quid tantum mali commerui?* Hinc illud Senecæ, *argumentum pessimum est Populi consensus.*

§. 31. Quartum indicium est, si læto animo, & lubentissima objurgationes, & reprehensiones auscultemus. Quemadmodum enim si corpus ægroti utilia medicamenta respuat, argumentum est morbi lethalis; eodem modo animus, qui objurgationes ægre fert, atque iis cruciatur, sanus esse non potest. Cujus ratio est, quia virtus animum non insolentem, trucem, ferocem, aliorum contemptorem efficit, sed mitem, ac facillimum. Itaque ubi mansuetudo deest, manifestum est argumentum, aut nihil, aut admodum parum in virtute profecisse. Eleganter Plutarchus, *Spicæ plenæ curvantur, vacuæ eriguntur.*

§. 32. Jam quintum signum, nos in virtute profecisse, est, si ad difficultates, quas virtus in prospectu offert, non cedamus timidi, sed contra audentes eamus. Ad hunc ardorem accendendum considerandi perpetuo sunt fructus virtutis. Hinc illud Poetæ,

*Durate, & vosmet rebus servate secundis.*

Diogenes Synopeus; quemadmodum idem retulit Plutarchus, profectus Athenas ad Philosophiam discendam, publicos Civitatis ludos offendit, in quibus Athenienses per omnia Urbis loca effusi splendide convivia exercebant. Hic Urbis ejus status cum laboribus, quos ille suscepturus erat, pugnabat, atque illos magis etiam horridos ostendebat. Ille interea minime commotus: tantum abest, ut attentionem remiserit, ut potius ea omnia ad excitandam attentionem converteret sapienter, secum reputans, tantas commoditates unam compensare posse virtutem. Quicumque igitur ita formatus est, ut in eo ratio adversus difficultates, quas virtus præferat, fortior pugnet, is sciat, se non mediocriter in virtute profecisse.

§. 32. Sextum indicium est, si adversa sereno animo tolerantur. Enimvero, qui vel minimis malis  
ita

# DISSERTATIO

## *De anima Brutorum.*

§. I.



Rutorum animam, quidquid illa sit, inter *principia universi activa* referendam esse, non est quod dubitemus: esse enim oportet activum aliquod & perficiens, natura irrequietum, quodcumque actiones brutorum edit. Jam *Universi principia activa*, aut, ut alii loquuntur, *substantiæ*, sensibus minime sunt illa subiecta: ne mentis quidem primis intuitionibus intelligi possunt. Latent ergo. Eam ob rem, si quid de illis aut certum, aut vero saltem simile statuere velimus, non vagis hypothesibus nati, sed analytica via & ratione progredi debemus. Perquirendum enim est, non quid animæ brutorum esse possint; sed quid revera sint. Id vero ex operationibus brutorum accurate examinatis exordiendum.

§. II. Omnium primum, ut in homine, ita in bruto quolibet, saltem perfectiore, quæ nunc potissimum spectamus, trium generum operationes observamus, *necessarias, spontaneas, medias*. Necessariæ motiones sunt sanguinis circulatio, cordis palpitaciones, pulmonum ventilationes, arteriarum ictus, jam perspirationes, accretiones, aut diminutiones partium, similesque. Has necessarias voco, quod unice legibus naturæ mechanicis fiunt, quodque in eas nullum est animæ imperium. Id de nobis audacter dicimus idcirco, quod interno experimento vincamur. De brutis ex analogia machinæ conjicimus, sed confidenter tamen & certe: experimentis quoque probamus. Secetur enim bruto vena, nisi aliis remediis sanguinis cohibeatur fluxus, animantis voluntate (liceat hoc uti vocabulo, quando propria non suppetunt) ut cesset sperandum non est. Præterea & febres, & alios morbos vel invita ferunt

Tom. II.

R

bru-

bruta : at fiunt morbi perturbatis necessariis corporis motionibus , & machinæ harmonia . Sed argumenta congero in re non dubia .

§. III. Motiones spontaneas appello quæ ex animæ nutu pendent , seu quas anima ipsa vi & imperio suo excitat , quæque tamdiu sunt perennes , quamdiu perennis est animæ nutus ille , cessant vero statim ac is nutus cessat . Hujusmodi sunt in homine artuum varix agitationes oculorum , capitisque gesticulationes , linguæ agitationes . Actiones istas ( nisi cum ex habitu fiant , inclinatis in eam partem ex earum replicatione corporis machinulis ) semper perceptiones præcedunt . Ejus rei in homine argumentum habeo intimam conscientiam , earum rerum , quæ in ipso fiunt homine , gravissimum testem . Inde fit , ut plerumque manum , aut linguam , aut totum corporis motum quasi inscii fisti animadvertamus , si paullo a priore proposito , nobis quasi inconsultis , animus abcefferit : at eum postquam citavimus , ut adest , priores interruptosque motus resumamus . Qua ex re apparet manifesto , motus hujusmodi spontaneos a momentaneis perceptionibus pendere : continuatos a continuatis perceptionibus . Nempe momentanea perceptio momentaneam cit voluntatem ; hæc momentaneum motum : continuata perceptio objecti ejusdem , saltem confusa & generalis , continuatam voluntatem , hæc continuatam in idem objectum motum . Qua perceptione interrupta & voluntas interruptitur , & motus .

§. IV. Ceterum an hujusmodi insint in brutis motiones spontaneæ valde video inter philosophos controversi . Id saltem pernegarunt Cartesiani , qui bruta ab horologiis hoc solo distare opinati sunt , quod hæc metallo concinnatæ , illa ossibus , visceribus , sanguine conflatæ machinæ sint . At tam est evidens bruta spontaneis motionibus sese agitare , ut quotiescumque ad id argumentis probandum animum intendo , mihi ipse desipere videar . Sed faciamus id paucis adversus refractarios , si qui hodie ulli sint , Cartesianos . Qui motus naturales sunt , nec spontanei , certis naturæ , & immu-

immutabilibus regulis fiunt : id enim demonstratur ex continuis experimentis . Harum regularum præcipua est, *Corpus in motu positum perseverare eadem velocitate, atque in eadem directione, nisi ab externa aliqua causa aut cohibeatur, aut alias in partes determinetur*. De qua motus regula, quæ omnium philosophorum consensione probata est, vide quæ recentes philosophi scripsere (a) . Jam si bruta spontaneas motiones non habent, hæc regula, quod ad utramque attinet partem omnino est falsa.

1. Bruta quotidie e somno surgunt, postquam nempe veluti mortua humi strata jacuerint . Nisi autem admittas vim iis insitam, quæ surgant, cogeris fateri ingentem Elephantum machinam a quiete ad motum suapte natura excitari . Dicere autem id provenire ex motione ab objectis externis in bruti machinam factis, id est ineptire . Nam experimento discimus easdem fieri plerumque motiones, immobilibus interim brutis . Ostende jacenti cani corpus pani simile, surget, accedet oculisque, naribus, aut etiam gustu impossuram detegget : itaque recumbet iterum . Tu ei recumbenti iterum ostende, fortassis & secunda hac vice surget . At detecta fraude, si centies ostendes, ne aures quidem quatiet, oculos etiam avertet, dormitabit . Quid? eadem externæ motiones : eadem canis machinæ, cur non idem in cane motus ? Ex iisdem enim causis naturalibus & necessariis iidem profluere debent effectus . Pluries cum Fele, quam domi habeo, ludere soleo . Sunt Feles oris tactu delicatissimæ : itaque cibos vel mediocriter calidos declinant . Huic igitur Feli frustulum assipiscis, sed pene urens, ostendo : ea accedit, ori admo- vet : murmurans saltitasque domum circumcursat . Vo- co parum post, efficio idem ; illa eadem . Ergo recta in Coquinam . Ego vehementius illam ; blandiusque revoco : ea graviter seroque ad cubilis ostium se confert : ostendo piscem : lente intuetur : moratur parumper : hinc oculos avertit, caputque in Coquinam re-

R. 2

dit.


(a) *Newot. Grævets. Musch. &c.*

dit. Quid? effluvia prædicabis? Canes expertus sum plures, qui si quando heros suos manus cum aliquo, seu hostiliter, seu per lusum conferere conspicerentur, statim inimico, ut putabatur, adsilirent, heros defensuri. Effluvia ne excitabant?

2. Ad hæc; Pleraque brutorum in impetu ipso motus velocissimi repente consistunt, si aut viderint aliquid, aut audiverint, aut olfecerint. Aves, quales Grues, Anxeres, Palumbes, aliæque quæ turmatim volitant, aut sibilo audito, aut hominis voce, aut venatore conspecto, velocissimum volatum alio divertunt, etiam per oppositam motus directionem. Canes, Equi, Damae, Lepores, aliæque animalia perniciosissima, vel objectu aquæ, vel rupis, vel profundioris scrobis, vel hominis alicujus, aut alterius animalis infesti, vel statim consistunt, vel motus directionem repente commutent. Si nunc spontaneos brutis denegas motus, fatearis necesse est, exitisse tanta extra bruta illa vim, quæ eorum velocissimos, concitatosque motus vinceret: non enim motus extinguitur, aut motus directio mutatur, nisi objecta potentiore aliqua causa, ut statutum est. Quis autem dixerit sibilum, vocem, effluvia scrobis, rupis, fluminis tam valere, ut brutorum illa phænomena producere possint?

3. Præterea omnes analogiæ leges demonstrant bruta spontaneis his motibus prædita. Nullus est enim in homine motus spontaneus, qui in animantibus locum non habeat. Eadem capitis commotiones: eadem oculorum conversiones: pedum elevationes, tensiones, contractiones: & hæc quidem ob easdem causas eadem in homine & bruto. Quod ostendit motiones istas in homine æque & brutis esse spontaneas: similitum enim effectum similes esse causas necesse est. Qui causas motrices horologii A detexerit, is omnium similitum horologiorum detexerit. Nec alia ratione nos de mutuum hominum motibus judicamus. Non dubitamus eos asserere spontaneos, quod & similes sint nostris, & similibus membris in simili machina, atque ex similibus causis facti. Quid vetat idem ratiocinium in brutis locum habere-

habere? Ratum igitur indubiumque sit, bruta motibus spontaneis sese agere. Quod adeo verum putavit acutissimus quidam philosophus, ut non dubitaverit libertatem quoque quandam in brutis agnoscere, eamque rem, in specie saltem similibus, verum argumentis probare. Sit A bivii caput, duo Lepores ex A communi nido ad canis latratum exsurgant: pergat alter



per AB, alter per AC, Canis feratur ab X versus A: is quum est in A subsistit parumper, deinde duarum alteram eligit directionem. Quo experimento confirmantur saltem motus brutorum spontanei: libertatem enim iis nego: ea enim sine rationis consultatione esse nequit: neque vero hæc in brutis est ulla.

5. Scio his argumentis ita respondere Cartesianos, ut eos motus Deus producat in machinis animantium, prout objectorum occasio rulerit. At nihil fingi potest ineptius. 1. unde id consistit Cartesianis? ratione ne id assequuti sunt, an revelatione; si prima certa ejus rei proferant argumenta. Nam non altera: quippe omnis revelatio, uti commodius ostendam, brutorum spontaneitati & cognitioni favet. 2. si Deus hos motus efficit ad objectorum occasiones, hanc sibi legem, secundum Cartesianos statuit, ut iisdem semper existentibus occasionibus eosdem motus producat. At ea lex falsa est in exemplis productis num. 1. Cur enim non semper movet Canem, si semper lignum, quod panem immittetur, ostendo? Occasio eadem: motus non iidem. Non censet, inquit aliquis, id conservatione bruti conducere: scit

animum panem non esse. At si verum est, ne primum quidem quum ostenderem movere debebat: sciebat enim lignum esse non panem, 3. ferantur velocissimo motu ingente turba palumbes: paganus homo baculo armatus colli adsidens adspiciat directe adversus se venientes: clament incondito clamore: palumbes statim motus commutant directionem, seu potius Deus, ut Cartesius placet, novam motus directionem in palumbum machinis producit. Quid ita quæro? Deus enim si *αἰετῶς* omnes mundanos motus producit, eos non alia ratione producere decet, quam ut universi ordo & pulchritudo servetur, atque ne ejus partes intereant, dissolvaturque ordo. Nunc nova hæc in palumbis motio palumborum conservationi necessaria non est: neque enim paganus altissime volantibus palumbis nocere potest: id Deus probe intelligit: nulla ergo ratio illum movere potest, qua id velle efficere percipiamus. Deficiet me dies, si Malebranchiani systematis absurda omnia colligere velim. Ad fontem digitum indigitasse sit satis. Sed illud præterire non debeo, hoc systema totam Scripturarum sacrarum œconomiam evertere. Cur enim vult Deus homines ab Ursis, Leonibus, Pantheris, piscibus, devorari? expediant hoc Malebranchiani.

§. V. Bruta actionibus spontaneis donata esse superiori articulo confestim. Nunc affectibus quoque ea subagitari, quæ *mediæ actiones* sunt a nobis vocatæ, demonstrandum est. Rem ad pauca referemus capita: ostendemus enim bruta iræ, & metui esse obnoxia, quod ad rem nostram satis superque erit. Porro id ex iisdem inferemus principiis, ex quibus superiora. N. mpe 1. *ex iisdem causis eosdem effectus nasci, ex similibus similes: & 2. ex iisdem effectis easdem causas, ex similibus similes argui.* Quæ principia qui adspernatur, is omnem rerum ordinem, omnesque scientias physicas evertit. Quæ iram, metumve in homine antecedunt, aut consequuntur, eadem cernuntur in brutis. Exordiamur a posterioribus. Iræ hæc in homine signa. Excandescunt vultus, oculique; contrahuntur pili, gestiunt artus. Secundum hæc, violenti motus, adversus pericula impetus;

petus; in id quod capere, pertinaces: necessitudinum immemores. Eadem in brutis. Videre est in Cane irato rubescere oculos, corripì undique pilos: tardi initio gravesque motus; oculorum capitique agitationes: mox ferus impetus; nullus periculi metus: ne familiarium quidem dispectus. Idem in Tauris, in Leonibus, aliisque brutis armis a natura ornatis. In metu stupor, tremor artuum; cordis palpitationes vehementiores, trepida fuga, atque velocissima. Idem in Gallinis, Leporibus, Damis observatur. Ex his conficitur motione corporis in ira, aut metu, easdem, aut similes in brutis, quæ in hominibus: adeoque affectibus hisce æque illa, atque istos agitari. Respondebis machinæ id fieri articulatione, impresso ab externis objectis motu. Quot, quantaque ut hoc tueris, absurda pronuncianda? Videre est Vulpes, Leporesque a Canibus excitos, consistere quandoque, arrestisque auribus Canum clamores, hinc cursum explorare: mox iterum perniciosissime hac illac fugere: adversus periculum stratagemmata etiam adhibere: circumspicere quaquaversum: tum se opportune abscondere, atque hinc, quasi non satis testos, proripere: quæ omnia eidem clamori Canum, aerisque motioni tribuere, solemnia est insanire.

§. VI. Sed & iisdem ex causis quum illa, tum homines in affectus huiusmodi concitantur. Opinio injuriæ hominem adigit in iram: idem in brutis. Simiæ non ex malo tantum illato corpori, sed ex gesticulationibus quibusdam, sonisque inconditis, & injuriosis irascuntur. Manent quinimmo in Simiis & Canibus injuriæ alta mente repostæ. Perpetuis discimus experimentis Canes etiam in ira atque odio adversus eos, a quibus sunt semel læsi, pertinaces, nisi beneficiis injuriam compensaverint. Nulli certe bruto memoria tenacior, quod Homerus ipse Ulyssis Cane demonstrat. Præterea ipsa stupidiora animantia, quales aves, ex filiorum raptu immaniter irascuntur: si pullum rapueris Gallinæ Matri iracunda infilit. Ut ne quid dicam de Corvis, Gracculis, Vulturibus quorum iram, quod corripuerim nidulos, ab experto, nec sine periculo, didici: ne quid



dicam de Tigribus, de quibus scriptores historiæ animalium majora narrant. Metus homini ex periculi opinione: idem in brutis, ut agnoscere possimus affectus istos in brutis & in homine eosdem. At illud observatu dignum etiam est, ea præcipue bruta ad iram concitari, quæ aut armis, aut veneno sunt armata: veluti Serpentes, Calabrones, Scorpiones qui veneno: Canes qui dentibus, Tauros qui cornibus, Equos qui ungulis, Leones, Tigresque qui dentibus, unguibusque, Vultures qui rostro, & unguibus. At quæ inermia natura genuit, adversus pericula non ad iram, ut superiora sed in timorem agi, ut Vulpes, Lepores, Ranæ, Pisces. Quod sapientissima Dei providentia factum est: nam illa ira se conservant: hæc metu: hinc hæc idcirco perniciosissima: illa robustiora: nisi enim ita comparata essent vix possent se adversus pericula conservare.

§. VII. Dubitandum, ergo non est quin bruta affectibus sint obnoxia. At probandum deinceps est voluptate quoque & dolore perfundi: quamquam tam id apertum est, ut mirum sit tam fuisse Cartesianos confidentes, ut hanc brutorum stupiditatem voluerint universo orbi persuadere. Id autem primum ex superiori doctrina demonstratur: etenim si bruta affectibus agitantur (§. VI.); affectus autem esse nequeant sine voluptate & dolore, quemadmodum est per se notum sequitur bruta voluptate & dolore perfundi. At alterum, idque evidentissimum argumentum suppeditant brutorum phænomena cum iis maxime, quæ in homine voluptate aut dolore occupato contingunt, comparata. Quum vero duorum potissimum sensuum voluptates & dolores magis sint gestientes, *gustus*, & *tactus*: hæc paullo distinctius perpendemus. Alio in loco demonstravi voluptatem in homine positam esse aut in æquabili motione fluidorum, nervulorumque, qua corporis harmonia continetur, quæ voluptas æquabilis est: aut in restitutione hujus harmoniæ ruptæ jam, atque turbatæ augmento, aut defectu, & gestientem appello: dolorem veto in perturbatione hujusmodi harmoniæ, seu

seu id excessu motionis, seu defectu fiat. Prout autem major aut minor fuerit hujusmodi dolor, vehementius, aut lentius ad earum rerum usum ferimur, quibus is demitur. Dolor famis, aut sitis ex vacuitate nascitur; hæc prout major fuerit aut minor, ita nos magis aut minus ad cibum, potionemve impellit. Ex ipso gestu comestitionis, aut potationis dignoscere facile possis, qua fame, qua siti quis agitur: & præterea parva ne, an magna voluptate edens, bibensve perfruatur, quod hæc respondeat, seu, ut cum Geometris loquor, sit *proportionalis quantitati doloris ex fame vel siti nati*. Eodem modo dolor libidinis ex repletionem nimia vasorum seminalium, eorumque quæ illis adjacent, tum vero & totius corporis originem ducit; hæc repletio prout major fuerit aut minor, majori aut minori impetu hominem ad Venerem adigit. Veneris porro hujusmodi voluptas proportionalis & ipsa est doloris quantitati, eximiturque dolor evacuatione, eademque generatur voluptas. Ad hæc, dolores ex tumoribus nati proportionales sunt gradibus perturbationis harmoniæ: unde fit ut voluptas nata ex tumorum hujusmodi evacuatione respondeat gradibus evacuationis. Signa autem in homine quum alia, tum potissimum, anceps, quæ in dolore, exserta, & libera, quæ in voluptate, respiratio. Nunc autem bruta omnibus, quæ in homine dolore, aut voluptate affecto cernuntur, signis dolorem voluptatemve suam ostendunt. 1. Spontaneis motibus ad cibum, potionemve feruntur, & majore, aut minore impetu, prout fames, aut sitis diuturnior fuerit & vehementior; exsaturata autem, expletaque lenta eadem & inepta, & somnolenta, ut homines. Eadem in Venere aut adeunda, aut inchoata, aut expleta, in homine atque bruto signa. Eadem corporis contorsiones, gesticulationes, clamores in vehementissimis corporis doloribus quum in homine tum in bruto. Quod si ex iisdem affectibus easdem causas Physicus recte dignoscere sibi videatur, omniaque in bruto atque in homine; quod ad tactus, & gustus voluptates, doloresque, eadem; jam aut negamus hominis dolores atque

volu-

voluptates, aut etiam brutis concedamus. Est autem talis hujusmodi argumentatio, ut, si Cartesianos paucos excipias, vel ab hominum memoria inventus sit nemo, qui brutis voluptates gestientes negaverit. Quid quod voluptates ipsæ paullo æquabiliores videntur in brutis esse? nam & gestiunt canes ad amicorum adventum, & blande adulantur: & in suaviationes ruunt vetuli notique columbi: & ludunt catuli, Feles, & alia. Quid? erat mihi canis tam musicæ amans, ut testudinem, qua per adolescentiam plurimum utebar, quum pulsarem, dormitabundus magna velut perfusus voluptate genibus mihi adgestiret, nec poterat minis removeri, sed confugiendum erat ad baculum. Ceterum sunt voluptas & dolor adeo ad vitam animale necessariam, ut illa servari non possit, nisi his agatur stimulis. Voluptate & dolore 1. rapiuntur animantia ad Venerem, qua genera conservantur: eam si demas unum intra sæculum vacua viventibus futura sit Tellus. 2. Ad victum, quem certe nec homo, nec brutum sequetur, nisi dolore famis, aut sitis adactus. 3. Ad ea paranda, quæ vitæ sunt necessaria. 4. Ad ea cavendum, quæ sunt vitæ infesta. Ut agnoscere possis sapientissime cum animantium natura Deum se gessisse. At mihi opponent Theologi, *sub Deo iusto nihil miserum quin mereatur*. Quid igitur tantum merita sunt bruta, ut doloribus obnoxia fierent? nam de homine, inquirunt, scimus eum peccato suo se miseræ mancipasse. Quibus duobus potissimum modis respondeo. 1. Brutorum dolores voluptatibus pensari. 2. Philosophi non interesse investigare occultos sapientiæ & providentiæ divinæ fines: id enim is pensi habet, ut phænomena ex proximis suis causis explicet, non ut primas etiam investiget. Bruta affici voluptate vel dolore experimenta apertum faciunt. Quid ita autem sint facta, Deo constet auctori suo. Eo enim philosophia non pertingit. Quid? Explicant ne Theologi facilius, cur Deus hominem, quem sciebat inconstantem, peccato & miseræ facile obnoxium fecerit? Nam Augustinus, quo nemo acutius his in rebus vidit, ad Dei imper-

imperfcrutabilia retulit arcana . Præstat igitur hæc ignorare , quam contentioſe edifferere . Sed reponunt , ſi ita id eſt , non licere bruta lædere , & dolore afficere , eſſeque adeo juris inter homines & bruta communionem . Fateor me non leviter hac difficultate permoveri . Sed quum reputo fontem juris eſſe divinam voluntatem , eamque veniam fieri hominibus , ut bruta in uſus traducant ſuos , inde repeto , quæ huic argumento reponam . Nam ſane , ſi cui Deus veniam faciat , ut id cum hominibus efficiat , quod cum brutis efficere ſolemus , omnis ceſſatura erit injuriæ datæ actio . Nec deſunt exempla in veteri Hebræorum hiſtoria .

§. VIII. Longe admodum , quod felix , fauſtum , fortunatumque ſit , e diſſertatio noſtra eſt progreſſa : eſt enim demonſtratum . 1. bruta ſpontaneis motibus ſe movere : 2. adfectibus agitari . 3. Voluptate & dolore perfundi . Sed objecta vitæ ſuæ aut utilia , aut noxia percipere , atque diſcernere nunc demonſtrandum eſt . Id autem primo ex eo conficitur , quod bruta ſpontaneis motibus ſeſe agitant ; nec eſſe poſſint motus ſpontanei ſine ulla cognitione . Quocirca aut negandum eſt primum illud , evidentiffimisque argumentis , experimentiſque adverſandum ; aut hoc concedendum . Idipſum vero ex brutorum ſenſibus comprobatur . Corporearum rerum perceptiones ſolis ſunt ſenſibus : iis enim corporum extensionem , colores , figuras , ſonos , aliasque , quæ ſenſiferæ dicuntur , qualitates cognoviſcimus . Idcirco organa ſenſuum ita ſunt in nobis accomodata , ut facile , nullaque perturbatione harum rerum imagines in cerebro noſtro depingi poſſint . Oculi ex . g. ita conſtructi ſunt ut varie refractis luminis radiis in retina colorata objecta exhibere poſſint : aures ita temperatæ , ut ſonos referant : ſic porro . Dicere autem cum Lucretio , ſenſus non ad hos uſus factos fuiſſe , ſed iis caſu factis , uſum & caſu ipſum eſſe natum , ſolemnia eſt inſanire : talis eſt enim ſenſuum fabrica , ut nullam ob aliam cauſſam eſſe factos pateat , quam ut duces ſint , quibus vitam tranſigere poſſimus . Porro quæ in ho-

homine eadem est in brutis, saltem perfectioribus, sensuum structura & machinatio, nisi quod illud etiam accedat, esse brutorum sensus totius machinæ structuræ, & situi diligentissime accomodatos, eaque adjecta, quæ illis necessaria, homini superflua: dempta vero quæ superflua illis, homini necessaria. Dicere ergo brutorum sensus non esse tactos ob eodem fines, ut scilicet externa vitæ utilia, aut noxia, perciperent, maximum mihi videtur absurdum.

§. IX. Sed ista sunt accuratius examinanda. Oculorum structura pene eadem in brutis atque in homine. Sclerotides, humores, retina, muscoli, optici nervuli: tum externa munimenta palpebræ. Scimus harum partium hos esse in homine fines: palpebræ munimen sunt, ne ullius externæ rei vi lædantur oculi, non necessarium corpori membrum: muscoli dati ad oculum aut convertendum, aut constringendum, vel dilatandum, ne major, aut minor, quam oporteat, lumen subintraret oculum. Sclerotides instar lentis est, qua radii refrangantur, atque convergant, ne si dissipati progrediantur nullius rei imaginem depingant. Eundem in finem humores, qui antierius quidem convexi, interius paulo complanati sunt. Uno verbo nihil in hominis oculo est, quod fini suo non sit aptatum; nec alius est is oculorum finis præter quam *visio*. Quum autem eadem sint in bruti oculo partes, dicere non eundem esse finem, est abuti patientia eorum, qui serio philosophantur. Vident ergo bruta: quod si vident, & audiunt, & olfaciunt, & gustant. Id autem, nisi cognoscant, qui habere possunt? Cognoscunt ergo bruta.

§. X. Sed idipsum confirmant experimenta. Bruta objecta distinguunt: internoscunt inter utilia & noxia, amica, & infesta. Ex voce, sibilo, strepitu, odore objecta discernunt: ab incessu quandoque judicant, in eoque homine ipso sunt sagaciora. Canes; equi, Elephantis voces internotescent; iis auditis, de objectis, quæ nondum videre, præjudicant: ea esse amica, aut inimica præsciunt. Nam si amica fuerint toti se comparant, ut blande, amiceque excipiant: contra vero si ini-

Inimica præſagiant, exaſperantur, ſequæ ad prælium veluti accingunt, in aciem, ſi res ſerat, prodituri. Præterea Canes, quod negatum homini, odore ipſo, de objectis judicant. Iidem ad incertos rumores, aſſurgunt, adſtant incerti, quouſque amici ne adveniant, an inimici intelligant: tum poſt certiores conjeſturas, aut inſiliunt furentes; aut blandientes occurrunt. Deſiceret me dies, ſi Canum tantum experimenta enarrare aggrederer. Unum vel alterum addam. Quum eſſem quatriennis, atque S. Magni (a) parvo in oppidulo apud Avlam leſtiſſimam ſæminam Annam de Medicis degerem, Verno tempore, ridente mane ludibundus ab Aviæ oculis Patriam verſus, mille circiter paſſibus, ſed arduis & alpeſtribus locis, diſtanti me deporto: adſit & Canis, quo cum plurimum jocari conſueveram. Advenio ad rivulum, qui utriuſque pagi fines diſterminat: is Vernis aquis paululum excreverat. Ergo verti me in opaciſſimam, quæ adſtabat, Silvam, proceris Caſtaneis, Quercubus, aliisſque arboribus conſiſtam. Ita autem in ea me implico, ut cum volo, exeundi nullas, quantum circumſpicere poſſum, vias invenio. Adſideo mærens primum, mox lacrymans, hinc ejulans: adblanditur Canis, &, quaſi me provocans, sæpe ingreditur viam, iterum redit, nec, niſi ut manu me comprehenderet, deerat. Flebili me excitat voce lacrymantique illacrymatur. Eum, qui quid vellem videbat, non intelligo. Ad vesp̄erum uſque in eo me ſitu macero. Tum cadere umbras cum adſpicio, Silvamque obtenebreſcere pavidus rigidis capillis adſurgō: Canis totum me ruſpatur, prehensat. Eum tandem ſector ducem, qui domum refert incolumen. Gratus me ei vitam debere agnoſco. Quum Neapoli familiariter verſarer in domo nobiliſſimi, atque humaniſſimi Joſep̄hi Leuſterii catellum Iſabellæ Leuſterix adoleſcentulæ fruſtis delinivi. Is tanta mecum familiaritate eſt conjunctus, ut advenientem vel inceſſu cognosceret: circumſiliebat, veſtiumque peras lepidiſſime lepi-

[a] Diſtat a Salerno S. mill. paſſus ad æſtium Orientem.

lepidus catellus rimabatur. Sed idem Josephus Leuclerius narrabat, quum mortuus esset Frater vir sanctitate conspicuus, Sacerdos optimus Franciscus Leuclerius, ejus canem funus consecutum plorabundum monumento adstasse, idque vel per mensem frequentasse, ut vix vi verberum ejiceretur. Memoranda certe est, & veteribus adnotata Canum fidelitas. Celebratus Homero (a) Argus Ulyssius Canis, qui.

*Δὴ πότῳ γ' ὡς ἐνέησεν Ὀδυσσεύα ἰγγυῖς ἰόντα,*  
*continuo advenientem Ulysssem agnovit.* Tum & Tacito Canis Sabini: alii aliis. Jam quid memorem brutorum aliorum artificia? Feles dum Soricibus insidiantur, Araneæ dum muscis, quam πολύτροποι? Formicæ vero quam οἰκονόμοι? Nam Salamon ipse hominem eis credidit, ut cum prudentiam docerent. Simia præterea, quam *similis turpissima bestia nobis?* Pudoris quoque animal istud intelligens videtur (si id ita dicere licet.) Simiam enim scio sœminam Salerni, quam delictiarum causâ Paulus Capograisus vir literis & nobilitate æque illustris, domi habebat, quam pudebat, si occulta naturæ quispiam inspexisset. Quam rem cum narraffem Matthæo de Sarno Neapolitanorum literatorum Mæcenati, ipsique in litteris versatissimo, id præcipuum nobilitatis suæ insigne reputanti), adensus est, remque similem de masculo Simia, quem olim penes se habebat, retulit. Elephantorum historia hac in re prorsus miraculosa est, itaut, ne paradoxa narrare videar, ab his referendis abstinere. Ergo bruta cognitione prædita esse, si his non demonstratur, nescio an evidentioribus experimentis res alia ulla in Physicis demonstrari potest.

§. XI. Constat jam bruta animata esse: ea enim & cognoscunt (§. X.) & dolore atque voluptatæ perfunduntur (§. VII.) & affectibus agitantur (§. VI.) & motibus spontaneis sese percipiunt (§. II., & III., & seq.) Sed illud non æque constat, qualis sit hæc brutorum anima, seu hoc activum eorum operationum, ut vidimus, principium. Id esse aliquod superiora demon-

(a) Odyss. P.

stant: quale nunc sit ex iisdem operationibus perquirendum: non enim vagas consectamur hypotheses. Nihil igitur brutis tribuendum, nisi quod ex eorum operationibus necessario deducitur.

§. XII. Animam brutorum non esse corpus ejus generis, qualia sensuum tactu cognoscimus, iis argumentis probari posse nobis videtur, quæ si non Mathematicam evidentiam, at summam, & qua in aliis rebus physicis sumus contenti, præferunt probabilitatem. Omnium primum Newtoni egregiam illam in rebus. Physicis philosophandi regulam, quam auctoritate sua ceteri philosophi comprobarunt, præstatuimus, *qualitates corporum quæ intendi & remitti nequeunt, quæque corporibus omnibus, in quibus experimenta instituere licuit, inesse deprehenduntur, pro qualitatibus corporum universorum habendas esse*. Ergo quæ ex una harum qualitaturn necessarie in uno corpore deduco, id ex quolibet corpore deduci compertum habeo. Ex. g. Gravitationem veluti qualitatem omnium corporum habemus, ex lapidis gravitate deduco, eum in Telluris atmosphæra libere relictum cadere; idipsum de quocumque corpore conficio, id nempe libere relictum, idest nulla resistentia alterius corporis opposita, æque cadere. Ex soliditate, quæ & ipsa inesse reperiuntur in cunctis corporibus, in quibus experimenta licuit instituere, deduco, duas metalli partes sese compenetrare non posse: ergo (per præfatam legem) deducam idem de ligno, aqua, aere, aliisque corporibus. Ex vi inertię deduco: metallum suapte natura non posse statum suum, seu quiescendi, seu movendi, mutare ergo inferam idem de terra, de aqua, de aere, de quocumque alio corpore. At enim, inquit aliquis, quum istæ corporum qualitates genericæ a voluntate Dei pendeant, an non potuit corpora efficere, quæ his destituta aliis diversis sint proprietatibus composita? Respondeo. 1. nos non id quærere, quid potuerit Deus, sed quid fecerit. Quousque non constat aliud fecisse, nos ex analogia rerum id non fecisse judicabimus. 2. tum nos dicere, ea non esse corpora, sed res alterius generis. Corpora enim vocamus eas res, qui-



quibus qualitates has inesse scimus; quibus insunt contrariæ, ea sicut alterius naturæ, alio appellabimus vocabulo. At si eodem aliis uti placet, sciant se magnifice vocabulis abuti.

§. XIII. Quibus explicatis sic propositionem nostram demonstramus. Inertia & soliditas qualitates corporum sunt genericæ: ea in re consentientes habemus Philosophos omnes: ergo si brutorum animæ sint corpora ejus generis, qualia sensuum tactu cognoscimus, inertes erunt & solidæ; sunt autem nec inertes nec solidæ: id enim patet ex eo. 1. quod sint activæ, spontaneisque motibus gaudent. 2. quod percipiant. 3. quod relationes objectorum cognoscant. 4. quod vis eorum vitalis tota corpora permeet; corpora ergo hujusmodi, qualia contendimus, non sunt.

Explicemus assumptionis partes paullo accuratius. Activas esse brutorum animas ex spontaneis motibus conficitur: quod enim activum non est, sese spontaneis motibus ciere nequit. Porro quod activum est, id iners non est, ut patet: inertes ergo non sunt animæ brutorum. Præterea cognoscere bruta probatum est: ergo & rerum ideas percipiunt, & eas conferunt. At quamquam in solida materia imagines aliarum rerum depingi possint, idque intelligatur clarissime, harum imaginum perceptiones fieri nequeunt, nisi soliditate destruita. Nam extensæ imagines in indivisibili percipiuntur & conferuntur: nulla enim fieri potest extensarum imaginum comparatio, nisi in indivisibili, ut iis patet qui paullo attentius hac de re meditantur (a). Quod si id fieret vi motus, motæ materiæ partes in indivisibili compenetrarentur. Ponamus percipi duas imagines, unam circuli A, alteram quadrati B. Si id motione fieri asseris, certe partium A motus diversus erit a motu partium B: diversitate enim motuum ponis exhiberi diversas imagines. Pone nunc simul conferri; id faciendum tertia quadam motione, hæc motio nec debet esse A tantum, nec B tantum, alioquin unam referret imaginem. Nec esse potest ex utriusque simul  
una,

(a) Vide dicta prop. x.

una, mixta, nisi partes  $\tau\alpha$  A cum partibus  $\tau\beta$  B moti penetrentur. Quodcumque asseris, si hæc perceptio motione fit, soliditas materiæ evertitur. Brutorum ergo animæ, quæ cognoscunt, solidæ non sunt. Ad hæc, anima brutorum vi sua vivifica eorum corpora tota permeat, estque, ut actio motrix, penitus cum toto corpore compenetrata: quod confirmat Principium hoc activum minime esse solidum; adeoque incorporeum esse.

§. XIV. Atque hoc adeo mihi est persuasum, ut putem ullam esse vim corpoream activam, quæ corpus dici possit, viresque has omnes aut incorporeas esse substantias, aut incorporearum substantiarum attributa. Nempe vires istæ activæ totam materiæ massam permeant, nihilque habent cum ceteris corporum qualitatibus communis. Præterea sine his viribus existere corpora posse clare intelligo. Quid enim vetat existere rem extensam, solidam, tangibilem hujusmodi activis viribus destitutam? ergo vires istæ activæ mundanæ aut substantiæ sunt incorporeæ, aut incorporearum substantiarum attributa. Sed, inquiunt, extensæ sunt vires istæ, & materiæ *proportionatæ*? Respondeo spatium ipsum vacuum, si quidem est ullum extensum esse, esseque extensioni corporum proportionatum. Quid igitur vetat ejusdem, aut similis esse generis substantias hujusmodi animales, & vivificas? Quidvis potius dicere paratus sum, quam aut vires istas esse corporeas, aut proprietates corporum essentielles.

§. XV. Præterea, si brutorum animæ sunt corporeæ, earum perceptiones nihil aliud erunt quam internæ partium motiones: quum autem quodcumque est corporeum divisibile sit in indefinitas partes; sequitur in qualibet perceptione fieri in anima bruti motiones innumerabilium partium: pone fieri motionem 1000. partium: cur, inquam, non erunt mille perceptiones? Non aliud dicere potes, nisi omnes illas 1000. partes conspirare motu suo in unam imaginem objectæ rei: Id vero intelligi non potest, nisi eandem habeant motus directionem. Ponatur percipi alius rei aliam imaginem; tum aut eandem animæ bruti partes secundum aliam

directionem movebuntur, immutata priore; & id omnibus mechanicæ legibus repugnat; aut mutata priore, & tum prior imago dissipabitur: aut non eadem sed aliæ partes ejusdem animæ hanc secundam imaginem repræsentabunt; tumque bruti anima erit multiplex, idest distinctæ erunt in bruto, atque diversæ facultates percipiendi. Quod si asseras actione alterius generis a motione corporea fieri brutorum cognitiones, tum cogaris fateri actionem hanc esse & ipsam qualitatem alterius subjecti, per ea quæ superius sunt dicta.

§. XVI. Minime igitur dubitandum videtur brutorum animas esse incorporeas. Sed illud video mihi opponi, nihil repugnare, ut Deus materiæ cognitionem & sensum largiatur. Eadem enim ratione, qua quælibet materiæ portio motu est capax, esse potest & sensus atque perceptionis. In hac sententia fuit vir doctus Johannes Lockius, qui eam ob rem cum Eduardo Stillingfleetto acerrimam habuit controversiam (a). Sed mihi quæstionem provexisse philosophi isti Angli videntur: idcirco quod non satis vocabula definiyerunt, in quo mirandum est Lockium præscriptis a se regulis migrasse. Quæstio enim est, an Deus possit materiæ sensum & cognitionem dare ita tamen in illa adhuc retineat priores materiæ qualitates, inertiam potissimum, soliditatem, gravitatem: non autem hæc, an efficere possit, ut id subjectum, quod prius erat solidum, iners, grave, evadat cogitans, amissa interim inertia, & soliditate. Quod ad secundam hanc quæstionem spectat neque affirmare neque negare est animus: religio enim nobis est de obscuris judicare. Ad primam vero quod attinet, negamus id fieri a Deo posse. Neque enim Deus efficere potest, ut idem constet ex iis quæ se mutuo destruunt: ex. gr. nequit efficere circulum quadratum: quippe altera alteram figuram destruit, estque voluntas Dei qua vult æqualis voluntati qua non vult,

ex

(a) Vide notas Acosta ad cap. 3. lib. 4. Speciminum Philosophicorum de intellectu humano, & quæ nos ad prop. 1.

ex qua idcirco sic contraria voluntate æquilibrata nulla sequitur operatio. Sit voluntas, qua vult circulum  $A = 4$ , voluntas vero, qua idem vult ut sit quadratum  $B = 4$ ; quum altera tantumdem demet quantum ponit altera, erit actio ::  $B 4 : A 4 = B 4 \dagger A 4$ , idest nulla. Quoniam ergo perceptio & inertiam, & soliditatem destruit, ea non potest ita convenire materiæ, ut eidem inertia & soliditas conveniunt; quod est, corpora huiusmodi, qualia sensuum tactu cognoscimus, cogitationis non esse capacia.

§. XVII. At molestior est quorundam Theologorum objectio. Quid, inquit, fiet huic animæ, si incorporea est? Ergo creata ea est: ergo perire nequit nisi per adnihilationem: ergo legum quoque, & boni moralis erit capax; & sexcenta huiusmodi, quæ non sine fastidio audiri possunt. Nam primum nostra non interest scire, quid contingat his substantiis, postquam ab unione aliarum discessere. Constet id auctori suo, ut perspecte pronunciat Augustinus Calmetus. Ad rerum, ut alias dixi, extremos fines humana mens non pertingit. Ergo, inquit, creatæ sunt? Quid vetat? Nihil enim substantiæ in natura est, quin per creationem prodiderit. At persuasum erat aliis, idque videbatur probabilius, prodire eas e sinu *materiæ*. O lepide! quasi hoc minus sit, materiæ facultatem dare novas creandi substantias. Nihil, addunt, Deus de novo creat: omnia semel sub rerum initium creavit. At secundum hos creat humanas mentes. Sed esto, quod ajunt: quid prohibet omnes eas animas, cum aliis universis activis substantiis & seminibus vitalibus sub rerum initium creasse? Ergo pereunt per annihilationem? Quid ni? nam ne minima quidem materiæ pars alia via perire potest: nihil enim eorum quæ sunt a Deo creata naturæ vi funditus perire potest. Addere, vero, quod Scholastici faciunt, *nihilum sui*, & *nihilum subjecti*, id est inutile: nam id quamquam recte fortasse dictum sit *de modis*, & *accidentibus*; at de substantiis haud certe dici nisi imperitissime potest: hæ enim quum pereunt, totæ pereant necesse est. Sed vero mihi, ut ingenue quod sentio dicam,

eam, hæc Peripateticorum opinio quum rectæ rationi repugnare, tum ad gravissima absurda deducere videtur. Primum sententia hæc Aristotelis, materiam primam unicam esse, immensam, immobilem, ex ejus vero *sinu* & potentia mundanas educi formas. Spinozismo mihi videtur similis: in hoc enim eodem modo omnia omnibus modis ex æternæ substantiæ sinu emanant. Quod vellem observatum Vvalchio, dum rationes conquirir, ut Aristotelem inter Atheos colloquet. Deinde quis intelligat ex inertis materiæ sinu principia educi activa? ita posset materia suapte natura a quiete ad motum transire. Quis præterea intelligat ex bruta materia cogitationem prodire? Quod si id fieri potest, triumphabit Anaximander: is enim Mentis atque Deos ex atomorum conglobatione, atque motu effici sibi persuasit. Quod sane non repugnat, si ex bruta materia cognitio proficisci potest & *spontaneitas*, quæ esse in brutis probatum est, iique, quibuscum nunc rem agimus, non diffitentur.

Quod pertinet ad ultimum, respondemus brutorum animas nec abstractarum rerum notiones ullas habere, nec leges sentire, tantum abest ut possint actiones ad legem conformare, quæ moralis est bonitas. Sunt enim eæ inferioris ordinis substantiæ, & a natura animarum rationalium longe distantes. Quod si quis putat, id fieri non posse, næ is divinæ sapientiæ & potentiae nimis arctos statuit cancellos. Mihi contra persuasum est, summum illum rerum opificem substantias infinitorum generum, atque infinitarum specierum creare posse, quas nullo modo nos intelligere valeamus; nihil unquam magis temerarium censui, quam ex viribus ingenii aut naturæ nostræ de divinis operibus judicare. Quid quod animas etiam humanas esse posse in hoc statu, infantium & stupidorum exemplo docemur? qui etsi quæ vitæ utilia sunt aut noxia discernant, at legis, & ratiocinii ad legem formati nondum sunt capaces. In Castileone Patria mea hominem scio, qui quum supra 60. vixerit annos, nec ratiocinii unquam nec reflexionis, adeoque nec legis fuit capax:  
nullus

nullus est infans eo stupidior. Nihil unquam relationum moralium, sed, ne vitæ quidem corporæ regendæ quidpiam discere potuit. Ludificabamus eum pueri, eique in os lignea ingerebamus frustra, quæ illæ deglutiebat. Vestandis rebus destinabatur. In beatæ innocentiae statu & vixit, & mortuus est. Erat ei nomen Iosephus Pelusius. Rem narro quam cœvi testes plurimī & sciunt, & narrant.

*Dii immortales! homo homini quid præstat.*

*Stulto intelligens . . . . (a).*

Qui homunciones ea de re pedestantes in uno sententiam pronunciabunt, & non potius divinam venerabundi adorabunt providentiam? Quam rem idcirco retuli ut confirmarem, nihil esse mirum non intelligere nos pleraque, quæ ad brutorum statum, animasque pertinent; nam infinita sunt de hominibus ipsis, quorum fines & rationes ignoramus.

§. XVIII. Scripturæ sacræ, reponunt, negant brutis intellectum: nolite, inquit Psalter, *feri sicut equus & mulus, in quibus non est intellectus*. Respondeo multo plures esse Scripturarum Sacrarum locos, in quibus bruta cognoscere affirmatur, quam in quibus negetur, esseque illos magis naturales, hos emphaticos. Nam & Gallo intelligentiam, & Milvo cognitionem temporis, in quo nidificet, & Bovi domini sui notitiam, & aliis brutis generatim cognitionem tribuunt Scriptores Sacri. Ne memoratur quidem hæc Cartesianorum veteribus sententia. Sacris una profanisque Scriptoribus, quantum memoria vetera repetens recorder, quidvis potius, quam hoc Cartesianorum paradoxum venit in mentem. Sed negant Scripturæ brutis intellectum? Commode sunt illæ explicandæ, ne Scripturas scripturis committamus. Negant nempe ratiocinium, eamque, quæ propria hominis est, rationem, reflexionem perceptiones relationum rerum abstractas. Bruta moventur sensationibus ab objecto aliquo præsentē factis: homines a perceptionibus etiam abstractis, & remotarum rerum. Quod inde intelligere licet, quod bruta præ-

S 3

fen-

(a) *Terent. in Eunuch. act. 2. scen. 2.*

sentia tantum cavent pericula: homines remota quoque & futura. Canis si jacet non surgit ad remotius periculum quod prospectare nequit, sed ad præsens: rumorem audit, videt minas; cavet. At homo futura quoque prospicit. Simples præterea perceptiones corporearum rerum habent bruta; harumque simplicium idearum simplices relationes, quæ in natura ipsa constant, percipiunt. At ideas simplices varie componere, hinc systemata conflare, per longas series disponere, longissimasque ratiocinationes proficere, negatum brutis. Quod inde patet, quod brutorum opera eodem semper se habent modo: nulla apud eos nova inventio: non artes; non nidulorum, casarumque novæ structuræ; nihil novi. Non igitur systemata ulla in simplicibus suis inædificant sensationibus. Ex quo conficitur cognitionem brutorum intra solarum sensationum ambitum contineri, nec pertingere ad reflexiones, meditationes, perceptiones universales, actiones abstractas, ratiocinationes, quæ sunt hominis. Præterea Dei & juris cognitionem non habent bruta: ad hæc enim paulo a sensationibus abstracta non perveniunt: at proveniunt homines. *Unum hoc animal sensit quid sit ordo, quid sit quod doceat; in factis diffisive qui modus (a).* Adeoque homo ut intelligentia cæteris animantibus antecellit, ita de JURE & DIIS solum aliquam cogitationem animo concipere potest (b).

§. XIX. Sed qui bruta meras esse machinas universo orbi adroganter persuadere conantur, quærant, corporeæ cum non sint brutorum animæ, spiritus sint illæ, nec ne? Respondemus brutorum animas substantia esse diversi prorsus generis atque corpora sunt, quæ sensum tactu cognoscimus. Nam ex brutorum actionibus superius demonstratum est, brutorum esse aliquod activum principium, idque aut substantiæ cujusdam incorporeæ esse attributum, aut ipsum esse incorpoream substantiam. Hæc clare esse demonstrata ex iis principiis, quæ communia sunt Philosophis, nisi toto cælo aberro,

(a) Cic. lib. 1. de off. cap. 4.

(b) Plato in Menex. t. 2. pag. 233. edit. Henr. Steph.

ro, video. Nunc autem spiritus nec ne sint brutorum animæ istæ, non valde explicatu difficile existimo: tantum si quid *spiritus* vocabulo significetur clarius exponant Cartesiani: Nam si hoc vocabulo intelligunt, quodcumque activum est; & sese perciens; quæ propria spiritus notio est, haud dubium spiritus sunt brutorum animæ. Si eodem vocabulo, ut videtur, significant quidquid corporeum non est; idest quidquid talem non habet naturam, qualem vulgaria corpora, nihil quoque vetat spiritus brutorum animas vocare. Sin intelligunt substantiam ratiocinio donatam; negabimus animas brutorum esse spiritus: Quid clarius dici potest? ergo Cartesiani vocabula definiant; si rite disputare volunt. Nihil, inquiunt; medium est: aut corpora sunt bruta, aut mentes nostris similes. Quid? unde id resciverunt Cartesiani; duorum tantum generum substantias esse posse; corpora; & mentes? at videant quantum distemus: mihi potius; ut dixi, persuasum est; esse posse substantias numero infinitas; quæ generibus quoque discrepantibus infinitis sint: esse præterea in hoc universo revera substantias alias in pluribus generibus positas, quæ non minus inter se; quam a mentibus nostris, & vulgaribus corporibus differant. Nam quin tales substantias intelligere Deus possit; nemo dubitat: nemo præterea dubitat quin efficere eas; ut intelligit; queat; probabilissimum vero est; pluribusque naturæ phenomenis confirmatum; reapse eas creasse. Quum igitur Cartesiani nullum esse posse medium inter corpora & mentes nondum demonstraverint; audiri sine fastidio nequeunt.

§. XX. Interim quamquam non dubitamus naturas huiusmodi animarum; ut plerumque aliarum rerum; a nobis non intelligi; quæ tamen ea de re philosophi cogitaverunt in medium proferre; idque historicum in morem, haud abs re nostra alienum putamus. Sententiæ omnes circa brutorum animantium animas ad has referre possis. Vel enim brutorum animæ substantiæ peculiare sunt & sui generis; vel sunt mentes in corpora revolutæ; vel ipsa sunt mundi anima: nam tria



hæc vulgavere Philosophi. Vulgatiores ea opinio est, singulis brutis singulas esse animas. At hujus patroni de hujusmodi animarum natura omnino non conveniunt. Corpus esse illas tenuissimum, mediumque inter crassa corpora, atque spiritus credidere Scholastici, Claudius Berigardus (a), Cardosus (b), Baco de Verulamio (c), Petrus Gassendus (d), Magnanus (e), aliique docti Philosophi. Sed si corpus res est solida, gravis, iners, tenuissimumque corpus suam habet & soliditatem, & inertiam, & gravitatem, nullum corpus ita tenue esse potest, ut medium sit inter corpus & spiritus, quum spiritus heic accipiantur res omnino incorporeæ. Esse quidem potest res alia, & revera esse plurimas non inficior, quæ media sit inter corpus, & spiritum, sed id certe corpus non est, quod generis est diversi, non a spiritu modo, sed a corpore ipso. Quæcumque autem sit hujusmodi opinio ea superioribus argumentis refellitur: demonstratum est enim superius, brutorum animas iis qualitatibus destitui, quas corporum proprias Philosophi omnes censent. Videtur tamen hanc sententiam paullo verisimiliorem reddidisse Andreas Rudigerus (f), qui sub initium sæculi hujus res philosophicas novo ausu, exitu non satis felici tractavit. Is in ea fuit opinione, distinguendam esse *materia*, a *corpore*: corpus enim esse hoc contractibile, solidum, iners; illam puram esse extensionem, primumque esse substramen quum corporis, tum & spirituum, & animorum. Animas igitur brutorum, ut & humanas mentes suam habere extensionem, quacum vires vitales sint conjunctæ, opinatur. Valde est hæc opinio similis vero. Nam quis eos feret, qui substantias incorporeas veluti geometrica quædam puncta intelligunt. Præterea patet spiritus

(a) *In circulo Pisano pag. 602.*

(b) *Philosophiæ liberæ lib. 3. quæst. 3.*

(c) *De argumentis Scientiarum lib. 4. cap. 3.*

(d) *Phys. sect. 3. lib. 3. cap. 3.*

(e) *Philosoph. naturæ cap. xx.*

(f) *Vide Buddæum in historia philosophiæ pag. 501. edit. Vvalchii an. 1631.*

tus humanos, & brutorum animas suarum habere operationum veluti theatrum quoddam, corpus nempe hominis & bruti: in eo vero sese coextendere admodum est probabile. Ita facilius hac in re Scholasticos sector, quam Cartesianos: nam illi non brutorum tantum animis, sed & mentibus ipsis extensionem quandam, & diffusionem per corpus dederunt. Sed clamant Cartesiani; omnem extensionem esse corpoream: inscite admodum (a), ut nemo hodie probatus sit philosophus, qui eos defendendos hac in re putet. Mihi potius persuasum est, esse infinita alia entia extensa, quæ non sint corpus.

§. XXI. Singularis præ cæteris hac de re fuit Leibnitii doctrina. Is Mundi elementa, ut in dissertatione de rerum genesi dictum est, esse voluit substantias quasdam simplicissimas, easque inextensas, quas Monadas appellavit. Earum Monadum quatuor esse docet genera, activa omnia & sese perscientia, 1. earum est, ex quibus corpora constantur: æ vi tantum activa motrice: quam *formam substantialem* vocat, sunt præditæ. Alterum genus est eorum, quæ mundum sibi repræsentant *clare*, sed *confuse*: ex his esse docet animas brutorum. 3. genus est earum monadum, quæ mundum *clare* & *distincte* repræsentant, quales animæ sunt humanæ. Quartum tandem est divina Monas, quæ sibi *simultane*, *clare*; & *distincte* omnia *possibilia* repræsentat (b). Plura haud dubium sunt, quæ in hac Leibnitii doctrina reprehendi possunt; quæ, quæ plura vult, legat apud Ruardum Andalam (c). Ad me quod attinet, nihil aliud fecisse Leibnitium puto, quam vulgatam  
vete-

(a) *Lege quæ habet Musschembroek element. phys. §. 18.*

(b) *Extant plurimæ Leibnitii commentationes in actis Eru-  
ditorum Lipsiæ, an. 1694. mense Martii p. 110. an. 1695.  
mense Aprilis p. 145.; an. 1698. mense Septembris p. 427.*

(c) *In disputatione philosophica de quatuor fictis simpli-  
cium speciebus, ex quibus illustris Leibnitius cum Cl. I'vol-  
fo derivare voluit omnia mundi corpora, animas bruto-  
rum & hominum, ut & ipsum intellectum divinum. Fre-  
naquæ ann. 1727. 4. eodemque anno Halæ recusa.*

veterum, recentiorumque Philosophorum doctrinam novis vocabulis obtegere. 1. prima corporum elementa vi quadam activa esse prædita; seu una omnes, itaut ea sit mundi anima; seu singulis singula; vetustissima est, sed & recentioribus probatissima Philosophorum sententia, ut alibi ostendi. 2. Brutorum animas esse monadas, idest substantias simplices incorporeas, infiniti ante Leibnitium dixere. Eas cognoscere iidem dixere hoc mutato vocabulo; per mundi *repræsentationem claram*; sed *confusam*; pronunciat Leibnitius. Deinde id ipsum facit cum hominum animis; Deique intellectu: Unum igitur in hac doctrina Leibnitii est proprium; animas istas brutorum & hominum nihil ope sensuum percipere; sed eas tali esse vi prædita; ut continuata serie sibi mundum repræsentent. Quod quale sit superius; penitus de natura animarum istarum; quæ in brutis sunt; disseruit Volfius (a) perpetuus Leibnitii admirator; fidusque Achates. Ejus doctrina huc redit. 1. esse animas hujusmodi incorporeas; inextensas; simplices. 2. Prodire non potuisse nisi per *creationem ex nihilo*. 3. esse immortales; nec perire posse; nisi *adnibilatione*: 4. Non esse tamen spirituales: quippe quæ sint ratiocinii expertes: Quæ quibus ille argumentis probat; non vacat dicere. Eandem vero; paucis tantum commutatis; doctrinam docuit Augustinus Calmetus Benedictinus ille celebratissimus in Dictionario Biblico art. *Bestia*; Edit. Gall. qui consuli potest.

§. XXII. Veteribus autem plurimis placuit; brutorum animas esse Mentis in corpore revolutas. Quicumque metempsychosin; *μετεμψυχωσιν* animarum posuerunt; ii omnes in ea versati sunt opinione; similes esse brutorum; hominumque animas: has scilicet ab homine in bruta; a brutis in homine transire; donec labes omnes; quibus se in superiore vita fœdarint; eluant. Sunt autem isti in primis veteres illi Ægyptii; qui Metempsychosis inventores & architesti dicuntur Herodoto (b) & Diodoro Siculo (c); tum Græci pluri-

mi

[a] In *Psychologia rationali*.[b] *Herodot. lib. 2.* [c] *Diod. Sicul. lib. 2.*

mi Philosophi , qui eo dogmate , inquit Herodotus ,  
 usi sunt pro sua inventione , in primis Pythagorici &  
 Platonici . Sed quum quidam Pythagoreorum hanc &  
 Platoniorum metempsychosim in allegoriam detorque-  
 re videantur , in primis Chronius ille in libro de Pa-  
 lingenesia , quemadmodum retulit Gregorius Nyssenus  
 in libro de anima (a) , non huic traditioni multum in-  
 nitentur . Illud certum est , *πρὸ τὰ πρῶτα* animarum to-  
 tam Platonis scholam statuisse . Platonemque ipsum di-  
 fertis eam verbis passim docuisse . Certum item cum  
 hoc dogmate hæc alia admixta : 1. Creatam a Deo  
 omnium parente immensam Animarum , & Dæmonum  
 copiam , ejusdem ferme naturæ , sapientiæ , pulchritu-  
 dinis : 2. in Sphæris supramundanis : locatas locis nem-  
 pe amœnitate & deliciis diffluentibus : 3. his volupta-  
 tibus mentes corruptas , plurimis se criminibus immi-  
 scuisse . 4. Eam ob rem demisse in corpora , tanquam  
 in carceres , ut ita pœnas scelerum darent . 5. selecta  
 autem corpora minus aut magis deformia , pro cuiusque  
 criminis qualitate . 6. Itaque alias devolutas in homi-  
 nes , quippe quæ minus , alias in bruta , quod magis  
 peccassent . Ordinem vero harum animarum in corpo-  
 ra delabentium pro criminum varietate magis aut mi-  
 nus sæda . Plato explicat in Phædro (b) : quæ Ægyptiacæ  
 doctrinæ sunt consentanea . Vide Porphyrium de absti-  
 nentia &c. Nec defuere qui & Scripturis Christianorum  
 divinis in hanc sententiam abuterentur : isti arbitrati  
 sunt dæmones quum excidissent a Deo consortio , im-  
 missos in varia corpora , idque explicare Mosem ex per-  
 sona Dei dæmoni tentatori ita minitantis ; *super pe-  
 ctus tuum gradieris , & vesceris terra* , ut hæc verba si-  
 gnificent spiritus in corpora animalia detrusos , præ ci-  
 bo illo Angelorum , terrestribus vesci cibis (c) : Quæ tam  
 sunt putida , ut pudeat ea refellere . Quum enim sic  
 certum

(a) *Nyssenus de anima.*

(b) *Quem in locum vide & Marsilium Ficinum.*

(c) *Ornavit nuper eam sententiam auctor libelli amuse-  
 ment philosophique sur le langage des Bestes.*

certum immensum esse discrimen inter brutorum, & hominum animas [ ex §. XIX. ], id certe satis superque demonstrat, substantias illas diversorum generum esse. Sed, ut cetera omnia omittam, si id ita esset, communio esset juris bruta inter & homines; essetque tam contra naturam, brutum, quam hominem lædere; quod nunc tantum abest ut Christianorum id Scripturæ, ad quas isti appellant, doceant, ut potius aperte dicant, in hominis commodum & servitium facta esse, licereque ea occidere, & in cibum convertere. Scio nonnullos fuisse, quibus persuasum fuerit, non licere brutis vesci, in primis Porphyrium *περὶ ἀποκτῆς ἐμψύχων*. Sed id quale sit non est hic dicendi locus.

§. XXIII. Restat ut de eorum dicamus sententia, qui animam hanc mundanam invexerunt, in qua & docti plurimi sunt & eruditi. Mundum universorum, aut singulos saltem globos, quos pro totidem mundis habuere veteres, anima quadam *fontana*, unde ceterarum rerum animæ perpetuo manarent, animatum esse, velut Ægyptiorum, Chaldæorumque vetus doctrina habetur (a). Virgilius elegantissime hanc in quarto Georgicorum explicuit (b): ex veterum enim sententia (quorum Philosophiæ erat ille callentissimus) ait,

. . . . . Deum ire per omnes  
Terrasque tractusque maris, Cælumque profundum.  
Hinc pecudes, armenta, viros, genus omne ferarum,  
Quemque sibi tenuis nascentem arcessere vitam:

Manichæi ipsi, ut agnoscere in eis possis Persicam Chaldæorum, & Zoroastris doctrinam, idem docuisse videntur, auctore Augustino, qui ejus sectæ arcana omnia rimaverat (c). Probatam eam recentibus pluribus Orientali-

[a] Legatur Stanleyus de Philosophia Chaldaica, & Cudworthus in systemate intellectuali.

[b] Virg. IV. Georg. 222.

[c] Lib. 2. de Gen. ad lit. cap. 8. & ep. 74.

talibus Perfidis, Mogolis, Siam, Indorum ex Viatorum itinerariis discimus (a). Nec defunt in Europa quibus idem placuit. Certe Spinozæ & Tolandi doctrina in hoc est posita, ut doceant Deum esse rerum omnium mentem, animam, vitam. Noster ille Calaber Thomas Campanella Dominicanus Monachus in *Commentario de sensu rerum*, quem anno 1590. in lucem edidit, dum conatur probare omnibus rebus, omnique, qua, circumdamur extensioni sensum inesse, ab anima ista mundana non admodum abhorrere videtur. Sed animam mundi, qua omnium vita constet, quæque a Deo sit creata, ex Platonis Platoniorumque sententia, promovit Henricus Morus (b); Cudworthus (c), præterque alios Anglos, Newtonus ipse, in principiis enim *Phyfico Mathematicis ad finem* hunc in modum scribit: *adjicere jam liceret nonnulla de spiritu quodam subtilissimo corpora crassa pervadente, & in iisdem latente, cujus vi & actionibus particule corporum ad minimas distantias se mutuo attrahunt & corpora electrica agunt ad distantias majores . . . . & lux emittitur, reflectitur, refringitur, inflectitur, & corpora calefacit, & SENSATIO omnis excitatur.* Vide quæ eadem de rescripsimus in disputatione de origine rerum corporearum. Nec vero ab omni veri similitudine abhorret creatam esse a Deo animam, idest substantiam quandam activam, quæ dum organica quædam corpora, qualia brutorum sunt, permeat, sensum in iis & perceptionem pariat, quæque statis quibusdam legibus, quas ignoramus, in natura agat, ejus vires omnes, motiones, vitam producat, magna æquabilique perennitate. Esse enim in natura aliquid unde motiones rerum corporearum, eorumque vires activæ, plantarum vegetationes, seminum, ovorumque fecundationes, animantium generationes prodeant, indubium est. Sunt qui hæc *αἰσῶς* a Deo

(a) Vide la *Philosoph. des Pagens* tom. 1. pag. 78. & seqq.

(b) In *Enchiridio & de Immort. an.*

(c) In *system. intellectuali dissertatione de nat. Genitrice.* Sed ejus argumenta oppido sublesta censuit Mopsbottomius ad §. 2. ejus diff. not. 1.

a Deo provenire opinantur, naturamque istam activam nihil esse aliud, quam Dei ipsius voluntatem rentur. Sed cur non id ope hujus animæ mundanæ efficere Deus possit? Nihil video, quod aut rationi, aut Religioni, ea si doctrina statuatur, officiat. Sed præstat de re tam incerta nihil, quam inconditum aliquid, minusque probatum dicere: nam ego philosophari in rebus occultis concedam omnibus, temere affirmare semper negabo. Ab instituto nunquam discedam, & quod præcipio, *epochen* esse philosopho necessariam, ipsum primum omnium perficere oportet: *opinari enim duas ob res turpissimum est* (inquit perspecte Augustinus de utilit. credendi cap. 11.): *quod discere non potest qui sibi jam se scire persuasit, si modo illud disci potest; & per se ipsa temeritas non bene affecti animi signum est.* Quod si qui sint, qui etiam rem nimium me promovisse asserunt, ii sciant, non me ignorare majora quoque scripsisse & Augustinum Calmetum in Dictionario, & veteres omnes Scholæ philosophos, atque Theologos; & nimium non esse brutis cognitionem eorum, quæ circa sensum sunt, quibusve eorum vita indiget, concedere, quam & sensus hominum communis, & experimenta omnia iis vindicant. Quid quod non defuerunt veteres aliquot Patres, qui syllogismos quoque brutis tribuerunt? veluti BB. Basilius (a) & Ambrosius (b): Lactantius vero scripsit, & sola religione nos a brutis distare (c), & rationem brutis & hominibus datam (d). Qui fortassis oratoria libertate ita pronunciarunt: alioquin eos probare non possumus, quando Scriptura *nulum esse in brutis intellectum docet*, & experimenta ipsa demonstrant. Interim efficitur saltem, ne nos homines vetustatis incuriosi temeritatis tam facile damnent, ubi ea resciverint. Ceterum qui argumento a religione desumpto veterum adgrediuntur opinionem Cartesiani, ii profecto ignorant, nullam esse doctrinam, quæ magis

ma-

[a] *Basil. Magn. homil. 8. & 9. in Hexaem.*[b] *Ambros. lib. 4. cap. 4. Hexaem.*[c] *De ira cap. 17.* [d] *Lib. 3. Inst. cap. 10.*

*materialismum* foveat, quam quæ ab iis nudius tertius in philosophiam inducta est: quod diserte agnovit Cudworthus in Syst. Intel. cap. I. §. 35. nam si tot mirandas brutorum operationes solus efficit mechanismus, atque a brutis ad homines brevis est, ut libertinis videtur, gradus; in eam etiam atque etiam indurabunt animi pravitatem, & hominem meram esse machinam. Videant igitur quam rem agant. Nos, quicquid alii clamitant, Philosophiæ & Religioni litasse nobis persuasimus. Interim si quid est, quod viros doctos offendant, omnia emendare parati sumus, modo humanitus admoneant,



*Finis Tomi secundi.*



